

PANARANGAN DIT
ONGOPONGORETAN KANANGAN
I TEOLOGIA OM KOSIPAN

PANARANGAN DIT
ONGOPONGORETAN KANANGAN
I TEOLOGIA OM KOSIPAN

ginama di T.A. Forscher

Diterbitkan oleh
Gereja Protestan Di Sabah
1996

UMPATOD

Iti buuk diti, banalko kiontok sid sokoviai it ulun dit engin humarati di boros do Kinoringan, lobipo ong sid ongopendita, Tumpuk, Penginjil antawa Ponulung om it onogoguru Sekolah Minggu.

Onsi di buuk diti kemot tokou do boros dot aralom o harati sid teologi (ino-no i tudukan antad sid ongoginama, boros om kobuatano do Kinoringan) i sid Kitab Laid om sid Kitab Vagu. Labaan hatas ot ongoboros om tema o tinalahas sid book diti. Sokoviai ino tema dino tinalahas do sinumuhut dit opurimanan om pongohorotizan dit ongominonurat di Kitab kodori, iadko it ongonabi om it ongorasul. Om iri-ogi tinalahas do kuran sid pongohorotizan di tokou siti, tinumimpun sid pongohorotizan di tokou di kodori sampai biano. Nisurat-po it ongoayat do Kitab sid siombo-nopo ino boros om tema dino di noguna om napakai. Ginama iti, supaya osinang mogihim it ongoayat sid Ongokitab.

I guna di buuk diti sid Ongopendita, Tumpuk, Ponulung om sid ongoanggota do PCS, ino-no:

1. Monunda di tokou do sumodia om polombus tokou di boros do Kinoringan sid piumpugan dot lobi atarang om ohorotizan banal di kondiri di monuduk om i piumpugan ko it ongoulun di mongining di tudukan.
2. It ongoboros di natarang siti monulung monginruhai di tokou humarati banal di boros Momogun om mogihim do siombo o varo i boros dino sid Kitab.
3. Monulung di tokou do humarati banal kananganko i pongohorotizan di boros dino sid koundango ko nolimbaganan tokou kodori antawa i hiza di sid labus-po i bansa tokou sampai kuran-no o pongohorotizan

tokou ong iti Kristian-no.

4. Monulung di tokou, supaya kaharati banal di tudukan om i kosipan tokou sid Kinoringan maza sid Boros do Kinoringan di nongotalahas sid buuk diti.

Humarap-oku dot i Sundu dot Osusi o monunda di tokou sid saralom di Boros do Kinoringan, do potorong om pembulai di kabanaran sampai monuduk humarati di kenginan om tudukan do Kinoringan sid riniba.

Agazo o gama do PCS monorima kaseh sid di Amai Forschner, tu vinalun dau minonurat om minonusun om mominonibuuk diti sampai kabasa tokou biano. Sid saralom dino lobi-po kiharati i gama tokou monorima kaseh, ong mongoguna sampai posurut tokou banal di buuk diti sid adau-adau rumikot, supaya i gama tokou humarati om mangasip sid Kinoringan empapagan om ophot banal.

Kota Kinabalu, Januari 1996 Daniel Oduhau Pelajar STS

IT A-KOPIRO ONGOPONGORETAN DI KIHARATI SID KITAB OM
KOSIPAN DOT ULUN KRISTIAN

ada, kaadaan >sala	hukum
anak do Kinoringan	imam
anak do Riniba	imbulai >kembulazan
akun	ingut >kodim
andus	intoron
asip	izo
banal	izon >intoron
bantug	janji
barakat	kaadaan do sala >sala
batos	kabanaran >banal
bobolizan >boli	kapamanaran >banal
boli	katamanan >tomon
bolou	katapatan >topot
boros (do Kinoringan)	katatapan >tatap
buatan	kavazao >vaza
gama	kembulazan
garal	kemerdekaan >merdeka
gorija	kinogulianan >gulian
ginavo	Kinoringan
gulian	kobinsianan >sian
habal do kovosihan	kobuatano >buatan
hakim >hukum	kodim
harap, harapan	kohormatan >hormat
hatod	koginavaan >ginavo
hormat	kogulianan >gulian

kokuasaan >kuasa	navau,kanavahan
kolobusan >labus	ngaran
kolonutan >lanut	obpinai
kompusan >ompus	ompus
kopiadaan >ada	ondu >kusai
kopiondusan >andus	onsi
kopolidan >palid	ontok
koponobusan >tobus	ozom
kopupusan >pupus	palid
korosizan >rosi	pandita
koruhang	Paska >sambayang
kosianan >sian	penlaid >laid
kosipan >asip	pili
kosopulan >sapul	piniizaan >izo
kososizan >sasi	pinta dua
kourugan, kinourugan >urug	pongintaran >sambayang
kovosihan >vasih	poginakanan di Tuhan Yesus
Kristus	poniagan >tiag
kuasa	ponuhuan, >suhu
kusai, ondu	ponulung >tulung
labus	puasa
lanut	pupus
lupu, lulupuhon	raha
malaikat	rasul
M(in)ananggung,	rosi
merdeka	rudson >intoron
mosikim	rusod, rumusod >intoron
nabi	samba

sambayang

sapul

sasi

savo

sian

sogit

suhu

sunat

Sundu

suromo

tanggung >mananggung

tatap

Taurat >suhu

Teologia

tobus

tomon

topot

torima kaseh

Trinitas

tulung

tumbozo

tungkus

tutun

uli

urug

uva

vasih

ada, pada, kaadaan do sala, karaatan, karanggalan: It ulun Kristian di nakapangakun di sala, ombo-nopo it a-nokonong, pokiadaan dau sampai atanus-no i karaatan dino. I riniba a-milo-milo kosuvang sid karaatan ko monimbaru do sala, minsan okonko tomodon. Iti-no o sabap do suvai mopud it ulun, ong soumul-umul varo kaadaan di karaatan dino. Sid suriban di Tuhan Yesus: Lukas 15 it ama di banalko kikobinsianan tumorima dit anak dau om potorontog dit anak dau sid kavazao dau dino. Pengkaa dino it ongoulun Kristian nga mangada dit ongohal do koruhang dit amu atag, isuhut di Pomintaan di Tuhan Yesus: om padao-no i kasalaan-za, iadko iokoi diti nakapangada-no di sala dit ongoulun di kisala sid dahai, ka.

Ino pongoretan pada apakai-po sid gama pedu ko potongkizad do savo, ong a-kopionong i minisavo. Na kenginan do Kinaringan dot i minisavo miobpuput sampai pempatai. Topot antad sid ongovaza manansavo om mokisavo ko popisavo dit amu atag varo mimbulai do karaatan om kopisanaan ko kobuatano dit amu kopionong sampai suhulon miada i minisavo mantadko miraraat sampai pempatai.

kada, i pongoretan di moniag di gama dot ulun dit amu atag om amu apakai.

mangada do savo (ong ondu), mokiada (ong ondu engin), miada kopiadaan

Ong sid di Yesus: a-kavasa mitongkizad it minisavo, **pada** >sala

Ong i Musa, kakun mangada do savo (gama ong kusai, ong ondu amu-no).

Matius 19,8 Boros di Yesus, Baiko it okodou i ginavo dikou o kinopoturutan di Musa do mangada-kou dit ongosavo dikou. Topot antad di kinotimpuunan diri amu kavasa do iadino. Boroson-ku-no sid dikou dot, Isai-nopo i mangada do savo do tanidko i sala do kumiagai

sampai manansavo do vokon, ino-no i iadko kumiagai-no iosido om isai-nopo i manansavo dit ondu di nakada-no, nga iadiko kumiagai-no iosido, ka di Yesus.

1. Kor. 7,15 Topot ong titongkizad it ulun dit amu-po nakasip, tantu kotongkizad iosido sampai amu noboludan it obpinai ong iadino.

akun, mangakun, kopongokunan, >sasi, >ofo. Ong otoguvangan do hakim ko ruput ko varo karaatan, it ulun di kisala mangakun ko mongoho dot iosido o ginama. Suvai nakakun do gama do iadino ko kasalaan om otimbangan i kobungahan ko kohombilan ko iada i sala dot ulun dino om varo vaza mangatag ko kemot do kaadaan. Ong mangakun om mamalang it ulun di karaatan om >kasalaan dau, iri-ogi varo-no kaadaan di karaatan om kasalaan dino, gima iadino i nisuhu di Kristus: Yahya 20,22 Ong mangada-kou di sala dot ulun, tantu nakada-no i sala dino, ka di Yesus.

a) Suvai nohorotizan dit ulun do kisala iosido om kadapat-ogi iosido mangakun om mokiada:

Zabur 51, 4 Vougai-oku-no, supaya edu i karaatan-ku om susio-oku-no antad sid dusa-ku. Sabap ioku diti mangakun di sokovia i kasalaan-ku om i dusa-ku soumul-umul sid tinoguvangon-ku.

Amsal 28,13 Isai-nopo i mangamu do varo karaatan dau, ino-no a-kemot do kosungguvo. Topot isai-nopo i mangakun di nokotimbaru di kasalaan, ino-no kemot do kosianan.

1. Yahya 1,9 Ong mangakun tokou di kasalaan tokou, otuju om abanal i Kinoringan sampai mangada di kasalaan tokou sampai momoug di sokovia i karaatan tokou.

b)It ulun do kisala om kikaraatan mangakun sid tinoguvangon do Kinoringan do mamalang sid ulun dit harapan dau (pandita ko ulun

vokon, osukod ko isai-nopo):

Zabur 51,6 rontob sid dikau (Kinoringan) o kisala-oku, ka.

Yakub 5,16 Sabap ino, ong sumakit it ulun, okunon-no dau i kasalaan sid ongobpinai dau om mongontok-ogi ioti minta dua, supaya engkod i sakit dit ulun dino.

c) Ong inakun i karaatan dino, abarakatan-no it ulun:

Zabur 32,1 Osinang-no it ulun di niada di Tuhan i karanggalan dau om tinakapan di Tuhan i karaatan dau. Osinang-no it ulun di tinanus di Tuhan i kasalaan dau.

andus, miandus, kopiondusan, kopioondusan

I riniba di nokedu-no sid Kinoringan atandas dot miodu-oduw ko misasana-sana om mihuhungot-hungot-nopo. Antad di kasalaan di mokirad do Kinoringan (Kinotimpuunan 3) nokembali-no i kasalaan do koduvo, ino-no mokirad dot ulun vokon. Ino gama milalavan-lavan om mokiirad om miaanggan-anggan o minongimbulai di kohungatan om kopioduhan om kasanaan sampai it ulun om i koruhang dau mibobog om mibambang sampai mitibas om mipapatai. (Kain om Abel, Lamek, Babil)

Na i kovosihan di Tuhan Yesus o pinengkod dino kopisaapan dino om minongimbulai-no di piniizaan dot ulun sid Kinoringan sid songkoruhang. Manjadi suvai mangasip it ulun sid kovosiihan dino om kandus-ogi iosido sid Kinoringan om mokiandus om mangandus-no dit ulun vokon. Na hiza di korikatan vagu di Yesus om i kotulukan di karajaan om hoturan do Kinoringan om kembali-no i kopioondusan sid sokoviai i riniba.

Manjadi sid Kitab Laid niintahan-no ino kopioondusan sid saralom di gama di Kristus (imatai Yesaya 2,4 om Zakaria 9,9)

Sid Kitab Vagu noboros-no do nokotimpuun-no ino kopioondusan dino, tu i gima kinorikatan di Yesus. Ino kopioondusan dino mangajagi do piniizaan sid pialatan dot ulun, gima natagan-no i kopioondusan sid Kinoringan om it ongoulun vokon. Tuluk ino kopioondusan i hiza do penlaid. Antad sid kopioondusan dino kogoos-no it ulun Kristian manamod om kumiandus dit ulun vokon.

1. Bai vudut do retan kopioondusan, ong okonko antad sid Kinoringan i kopioondusan dino.

Yeremia 6,14 Ensan-an-no ioti momudut di monginsasamod di bansa-ku di sid saralom do kosusaan, retan dioti ko, Kopioondusan diti, kopioondusan diti, ka, dot okonko varo kopioondusan, ka di nabi.

1. Tes. 5,3 Ong varo momoros dot, Osinang-no ong didino, ka, om Aso kosusaan ong didino, ka, nga tigogi sumondot-no sid dioti i kosusaan, iadko it ondu di hingoton dot aso kopogiduan.

Yesaya 48,22 It ulun dit amu kasip, tantu aso kopioondusan bahagi dioti dino.

Rom 3,17 om i ralan do kopioondusan amu elaan dioti, ka di Paulus.

2. I kopioondusan antad sid Kinoringan sid saralom di gama di Kristus Yesus do popiandus.

Yesaya 53,5 I hukum di sala tokou, iosido (i Kristus) ot nanangan, tu mananggung (om popiandus) di tokou. Nadamat om nasaadan iosido. Topot i tokou nolingasan.

Yahya 16,33 Inot iadino boroson-ku sid dikou, supaya varo kopioondusan om kosinangan di ginavo dikou antad sid dohon, ka di Yesus.

Efesus 2,14 Iosido kondiri o pinengkakat di kopioondusan, ka di Paulus.

Efesus 6,23 I kopioondusan om i samod sid kosipan mozo-vozo di

sokoviai it ongoobpinai.

3. It ulun di mangasip om humarap sid Kinoringan, nakanu-no do kopioondusan. Rom 5,1 Manjadi nabanal tokou-no gima i kosipan. Sabap ino miandus tokou-no do Kinoringan sid dau sid saralom di Tuhan tokou Yesus Kristus.

Yesaya 32,17 Ino-no ot uva di kabanaran, i kopioondusan.

Rom 14,17 Sabap i karajaan do Kinoringan, okonko hal do kakanan om kenuman, inoi nga kabanaran om kopioondusan om katamanan sid saralom di Sundu dot Osusi.

4. Popiandus-po i Kristus dit ongoulun di nokosuhut sid dau.

Efesus 2,14 losido kondiri o pinengkakat di kopioondusan sampai pinopizo dit Ongoyhudi om it okonko Yahudi. Hinuzas-no dau i rindin g sid pialatan dioti di hiza di kakali ioti misasangod-sangod.

1. Korintus 7,15 Tu i Kinoringan minongingut dikou sid kopioondusan.

5. Antad sid kopioondusan ponong sid Kinoringan kikakansangan-no it ulun Kristus do posurut di kopioondusan sid tanga do riniba.

Filipi 4,7 I kopioondusan antad sid Kinoringan manaud dit ongoginavo dikou om it ongopongitungan dikou sid saralom di Yesus Kristus. ka di Paulus.

1. Tes. 5,23 I Kinoringan kondiri o puun do kopioondusan dino o monusi dikou dot osukup banal, om ensanan i ginavo dikou om i pongitungan om guvas dikou nga ataud dot asot ohino om aso sala ontok di korikatan vagu di Tuhan tokou Yesus Kristus.

Ibrani 13,20-21 I Kinoringan, it ovud do kopioondusan o pakansang dikou sid sokoviai i kavantango, supaya koponuluk-kou di kenginan do Kinoringan.

6. It ulun Kristian di nakanu-no do kopioondusan do Kinoringan kotiim-po do kosusaan sid vokon..

Yahya 16,33 ..supaya varo kopioondusan antad sid dohon. Sid saralom di vinangun varo korosizan dikou. Topot tama-kou-no banal, sabap ioku-no o minonori di vinangun diti, ka di Yesus.

Lukas 12,51 Mongitung-kou naku do nokorikot-oku do popiandus diti pomogunan. Banalko amu, gamko popioduw, ka di Yesus

7. Suvai ontok do penlaid om kembulai-ogi i kopioondusan dit aso-not engkod om tumongkop-no sid vinangun om surga.

Yesaya 2,4 Manjadi iosido-no o mongohukum do popiandus dot ongobansa. Manjadi ioti nga modsupu do sapadang. Manjadi supuon-no do radu om it bilok nga supuon-no do linggaman.

Yesaya 11,8 Iri-ogi it anak di murapugi kakali sumusu nga mimomoi sid luvang do vulanut om it agazo-gazo-no, nga itamol i longon dau sid luvang do topirik, ka di nabi.

Kentalaganaan 21,4 Kinoringan-no o momihid dit ongoromou dioti om aso-no kapatazan om aso-not oruol o ginavo, om aso-no mogihad antawa mongoruol, tu natanus-no it ongohal gulu.

asip, mangasip, nasip, Kosipan,

1. I pongoretan kosipan om mangasip, ong bai oribau o vaza mamakai, bai harati dot, humarap sid ulun ko hal ko tumorima dot otopot i boros dot ulun, amu ovudut ko mangakal it ulun om i hal, nga kakali amu elaan dot banal i iadino ko kuran. Varo pitonidan ong elaan ko bai akasipi. Kokiraai, elaan-ku dot induvo o duvo, nga apat, ko ong amu-oku mangasok, tantu aso't omoton-ku. Topot, minsanko agazo o tagad-ku ko ranahon-ku, amu-ku-po elaan dot varo't oula. Tu kaluto, ong olizudan i ranau ko oruzou i tagad sampai aso't ula. Na sid gama-ku mangasok ko mananom mangasip-oku om humarap-oku do varo't omoton. Ong muvalai-oku, kasip-oku dot i gama-ku poturug do valai,

tantu atahan i gamaon-ku sampai minsanko borizu, nga amu kahaba di valai. Kakali suvai otoliban i borizu om elaan-ku-ogi do banalko atahan om apapag i valai-ku. It aso-po borizu, bai kasip-oku dot atahan i valai-ku. Pengkaa, ong mangakan-oku dot ubat, kasip-oku do kiguna it ubat dino, nga suvai engkod-no i sakit-ku om elaan-ku-ogi do kiguna it ubat dino. Ong bai kalu-kalu ko moniim di hal, ino dino okonko antad sid kosipan, inoi nga baiko moniim om momorisa o tomodon, tu aso-po nenahan sid hal ko ulun dino sampai amu elaan dot aharap i hal ko it ulun dino. Ong agazo o ginavo-ku sid ulun ko i hal, mangasip-oku dot kiguna i hal ko it ulun dino, dot otopot, minsanko amu-po notiiman ino. Ong apakai i pongoretan do iadino, tantu aso-po harati dot bai ino ko iri ot otopot ko kiguna.

Ong Kristian mamakai di pongoretan dino ponong sid Kinoringan, iadko *kasip sid Kinoringan, ka. ko, iti-no o kosipan-ku, ino-no i Yesus Kristus o Minananggung dohon, ka*, banalko agazo o pitonidan om banalko aralom o harati di pongoretan dino. Sabap kodung iadino o boros, tantu aso kuasa vokon ot akasip ko aharap, gam ensanan o guvas om ginavo sumokot sid samod om kotulungan do Kinoringan sampai iseso i Kinoringan o harapan om kosungguvon om pananangan di kopoulosan-ku. Sabap ino,

a) i pongoretan kosipan manarang do kuran it ulun Kristian mopud sid tinoguvangon do Kinoringan, dot antad kavi sid Kinoringan o kopoulosan om kosurutan dau. Pengkaa dino i pongoretan mangasip-oku sid Kinoringan, ino-no o harati, mamanal-oku om tumorima-oku di boros do Kinoringan dot otopot ino boros dino (Yahya 2,22 om Usuran R. 24,14 I Taurat om it ongonabi) ko i boros di Musa (Yahya 5,46) ko i boros do malaikat (Lukas 1,20,45 om Usuran R. 27,25). It Injil di Yahya manarang dot atag ong it ulun mangasip sid di Yesus (5,38), tu

antad sid Kinoringan i Yesus, gam i boros di Yesus, nga boros do Kinoringan, ka (Yahya 3,34).

b) varo-po kosurutan di harati, ino-no, kodung mangasip it ulun, sumuhut iosido ko tumumbozo iosido (Ibrani 11,4-6,8,27,30,33) Ong i Paulus o manarang, varo gama sumuhut, gima mangasip it ulun iadnoko i suhut do Kinoringan (Rom 16,26 om Rom 6,17: nokosuhut-kou-no di tudukan di pinatahakan dikou, ko Rom 1,8 i gama dikou mangasip nokoronu-no sid pentongkop do pomogunan, ka di Paulus). Sabap ino, kosipan, ino-no, sumuhut di Habal do Kovosihan Rom 10,16).

c) Varo-po harati do humarap, sumokot, sumondu sid Kinoringan. Usuran R. 14,9 Notolunungan-po di Paulus dot inot ulun dino banalko kasip do varo kengkadan dit oruol dau, minomoros-no i Paulus dot ologod o boros dot, Ingkakat-no, ka.

1. Kor. 13,2 om 12,9 manarang i Paulus do varo kosipan di mongimbulai do kosunduvo. Ino dino, nga harapan do varo kuasa do iadino. Topot ong varo kopiduvaan sid kuasa dino, retan di Yesus dot okurang ko oluvau o kosipan dioti (Markus 6,6 om 9,24; Matius 17,20)

d) Na kakali i kosipan okonko hal do kumavid sid palad ko mimot i mato, inoi nga hal dit amu-po notuluk ko a-po norikot. Rom 4,19: I Ibrahim, amu linumuvau i kosipan di Ibrahim, minsanko mad minataino i guvas dau, tu osomok-no dot hatas toun it umul dau om i Sara, nga nopoporizan-no. Kopikoruhang i harati harapan om kosipan, iadko sid 1. Kor. 13,13 om 1. Tes. 1,3 om 1. Petrus 1,21.

e) Gam kopiamung i kosipan om harapan om katatapan. Ibrani 6,12 i gama mangasip sid saralom di gama tumahan. 2. Tes. 1,4 I kosibako do ginavo dikou om i kosipan dit atahan-no sid tanga do kapagasan om kosompitan, ka di Paulus. Ko Ibrani 11,17 Sid pensubaan

tinumbozo i Ibrahim, ino-no i kosipan dau. Yakub 1,2 Ong anangan-kou do boginisan o pensubaan, tomon-kou-no, tu elaan-no dikou dot oporisa-po i kosipan dikou, kosurut-kou-no sid katatapan. Sakap-kou-no sid katatapan dot aso't okurang, supaya rumangkap-kou-no, ka.

1.Kor.16,13 Boros di Paulus, Pihoto-no dikou i kosipan dikou. Siou-kou-no sampai kansang-kou-no, ka.

2. a) Ong varo-po iamung i panangan: *kosipan sid, ko mangasip-oku sid* iri-ogi o harati, i kosipan dino varo kosungguvon om panangan, iadko kosipan do kosopulan, kosipan do kotonggungan, kosipan do kasalamatan. Ino dino asarok apakai ponong sid Yesus Kristus. I gama dot ulun tumorima om kumavid di gama di Yesus om i samod do Kinoringan, ino-no o mangasip sid di Yesus ko Kinoringan. Ino gama dino okonko otopotko gama ko pongitungan antawa kiroon dot ulun, inoi nga gama di Sundu dot Osusi i mongogiang di ginavo dot ulun, supaya karamit it ulun dot antad kavi sid Kinoringan ko i Yesus o kopudan dau. Ino gama rumamit di kosipan okonko hal dot utok om hal do mongitung ko momorisa om moniim, inoi nga atahakan it ulun dino di kosipan om i gama sumondu sid samod om kotulungan dino. Sabap ino, ong *mangasip sid Habal do Kovosihan*, ino-no o harati, tumorima om kumavid om mopud sid Habal do Kovosihan om ponong sid karajaan om hoturan om kenginan do Kinoringan. 1. Tes. 1,9 Boros di Paulus, I kosipan dikou sid Kinoringan, antad di tinumolikud-kou sid rogon, ka. Ibrani 6,1 I gama tumolikud sid onogogamaon dit amu kapasi om i kosipan sid Kinoringan ino-no i kobuatano dit ulun Kristian, ka.

b) It onsi di kosipan dot ulun Kristian, ino-no, *I Yesus o Tuhan, ka*, om *i Kinoringan o minongogulian di Yesus antad sid ulun minatai,ka* di

Paulus. I kosipan monumbozo di tudukan om khotbah. 1. Kor. 15,11 boros di Paulus, inoi ot ihabal-za om ikou, nga nakasip-no di iadino. I. Tim. 3,16 Nakahabal-no sid ongobansa, nakasip-no i riniba, ka di longoi di Paulus.

c) I kosipan mongovit sid kosungguvon di kosipan. 1. Tim. 1,16 i sokoviai it ongoulun di mangasip sid di Kristus sumuvang sid koposizan penlaid, ka di Paulus. I kosipan sid di Yesus kumavid di keloo dot i Yesus, ino-no i ponuhu do Kinoringan om Tuhan, i monuhu dit ongoulun do umadi do sasi di kotuhanan om koponopulan om koponongungan dau. 2. Kor. 5,18-21 i boros di kopioondusan dino nipakavid-no dahai. Manjadi iokoi diti ponuhu di Kristus, ka di Paulus. Gal. 2,20 I mangasip-oku sid di Kristus, okon-noko mizau-oku-po vagu, inoi nga i Kristus ot apasi sid saralom-ku, ka di Paulus. Rom 6,8 mangasip tokou-no do kokoruhang tokou-no di Yesus sid koposizan.

d) Ong varo Kosipan, ino-no o harati, it ulun di kikosipan najadi-no do Kristian.

e) Iri-ogi i pongoretan Kosipan apakai bahagi di tudukan do Kristian dit otopot. 1. Tim 4,6 It ongoboros di kosipan om i gama-nu sumuhut di tudukan dit avantang, ka di Paulus. Pengkaa dino varo kasaapan di kosipan: 1. Tim. 4,1 it ongoulun di tumongkizad sid kosipan om sumuhut dit ongosundu di mamalid om i tudukan do rogon do magut-hagut sid gama momudut, ka di Paulus. Topot ong i Paulus, 1. Tim. 2,7 Guru-oku di kosipan om katapatan bahagi dit ongoulun dit okonko ulun do Yahudi, ka.

3. I kosipan om i samod mivozo-vozo om mioopud-opud om mikoruhang. I kosipan sumaap om monori di kavazao do riniba di tomod monongkudau om pakaso do Kinoringan. 1. Yahya 5,4 Sokoviai

it anganak do Kinoringan koponori di vinangun, om iti-no o vazaan monori di vinangun, mangasip tokou, ka di Yahya. Om 1. Yahya 3,23 Iti-no i pinonuhuan do Kinoringan, Amu milo-milo mangasip tokou sid ngaran dit Anak dau, i Yesus Kristus sampai misasamod tokou, iadko i nisuhu dau diri. Yahya 3,16 It ulun di mangasip om tumorima di Yesus, ino tanda om suntuan di samod do Kinoringan, ngamongimbulai di samod do Kinoringan sid saralom di koposizan om gama dau. Yahya 13,15 Ino-no i pogintutunan dikou do koruhang-ku ikou, ong varo kopisasamadan dikou, ka di Yesus. I gama mangasip, ino-no tumorima di kembulazan do kovosihan do Kinoringan om kumavid sampai mizo sid kopiizaan do Kinoringan om humarap sid kosopulan it antad sid Kinoringan, i nokembulai sid Yesus Kristus om i vaza dau manapul di songriniba.

Sid Kitab Laid, ino-no sid nabi Yesaya om sid Zabur, iadino i kosipan dot ulun, i gama dot ulun manangamin di kovosihan do Kinoringan om tumatap sid katatapan do Kinoringan di nokembulai sid gama do Kinoringan mangagazad di bansa dot Israel antad sid kinuripanan do Masir om mangapad om mamasi di bansa dino sid tanga do ralan rumantang sid belantara sampai humarap dot i Kinoringan mongompus di gama dau mongumbasih di bansa dau. I pongoretan di kiharati do mangasip, nga monsi sid: Amin, tu i harati dino, Banal ino. Kondiri dit ulun humogizo om mamanal di noboros om nagama dino.

Sid Kitab Vagu, i kosipan sumunsui di kosipan do Kitab Laid. I nokentahan-no laid diri, nga notuluk-no sid gama di Tuhan Yesus Kristus. I kavazao di Yesus sid sangkap om sid lobong, ino-no i kovosihan dit Ama ponong sid bansa dau om sid songriniba. Sabap sino nokembulai om nolumbatos-no i samod do Kinoringan di kogoos sumaap di sokovia i karaatan om kobungahan om kopintaran do

riniba di misingkinoringan. Ino-no i timpa do Kinoringan, misingriniba do sampai mokipatai iadko ulun do kisala. Manjadi it ulun di mangasip kumavid di gama di Yesus iadko bahagi di kondiri dau. Om tumoguvang sid Kinoringan om tumolikud sid kavazao dau laid sampai mongimbulai di gama do kosipan, ino-no i samod.

Na i gama mangasip okonko iadko garan di kodung nanu, notontuan-no do sampai penlaid, inoi nga osusa it ulun di mangasip do soumulumul posurut om palanut di gama mangasip om manamod, supaya mintoron it ulun sid kovosihan do Kinoringan, i minanahak di kosipan.

Sid Surat Ibrani, nitarang-no i kosipan iadko harapan om kolonutan di sumokot sid katatapan do Kinoringan. Ibrani 11,1: I kosipan dino, ino-no i kolumbatasan di ginavo kananganko i hal do harapan, om i kopihoto do ginavo kananganko i hal dit a-emot. I kosipan di iadino o nakasabap do nokoronou-no it angaki.

It ulun di mangasip kumavid sid di Kristus sampai i Kristus mizon sid ginavo dot ulun. Galatia 2,20: Sabap ino, okon-noko mizau-okupo vagu, inoi nga i Kristus ot apasi sid saralom-ku. Tu nunu-nopo i kopolosizan-ku dino, nga apasi-oku sid saralom di gama-ku mangasip sid Anak do Kinoringan, i minanamod dohon om i minongontok dohon, ka di Paulus.

Ong onsizon, iadino o kosondoto:

1. *Sid tanga do kosusaan humarati it ulun di kogofoo do kovosihan do Kinoringan, di sid saralom di Tuhan Yesus.*

Matius 8,10 I kopitan minangasip sid di Yesus. Boros di Yesus, Sid sokovia i bansa dit ulun dot Israil amu-okuno nokemot di iadino o gama mangasip om humarap, ka di Yesus.

Matius 9,29 Sid ongoulun do bolou: iadko i gama dikou mangasip ot ajadi sid dikou, ka di Yesus.

Matius 9,22 I gama-nu mangasip o minonulung dikau, ka di Yesus.

Matius 15,28 Ot ondu, agazo-no i gama-nu mangasip, ka di Yesus sid ondu di bansa do Kana.

Matius 8,8 I kopitan hinumarati di kogofoo do kovosihan di Yesus: O Tuhan, amu-oku apatut do rikoton-nu i valai-ku, ka dau.

Yahya 4,41 It ulun do Samaria nga minangasipi di Yesus.

Lukas 23,42 It ulun di nokohiza di Yesus pasangkap, nga minangasip sid di Yesus. I boros dau, O Tuhan, hondo-oku-no sid karajaan-nu, ka dau.

2. It ulun di mongining di boros di Tuhan Yesus om i habal do Kovosihan, nga mangasip, ino-no tumorima om kumavid di habal dino.

Markus 1,15 Boros di Yesus, Pangasip-kou-no di Habal do Kovosihan, ka dau.

Yahya 3,16 Banalko sinamadan do Kinoringan i riniba sampai nitahak-no dau it Anak dau dit iso-no, supaya isai-nopo it ulun di mangasip sid dau, amu tumagak, inoi nga kasanganu di koposizan penlaid, ka di Yesus.

Usuran do Rasul 15,11 Boros di Petrus, I tokou diti mangasip sampai humarap dot osopulan tokou, iadko ioti, gima i kovosihan di Tuhan Yesus.

16,31 Boros di Paulus om Silas sid jaga do torungku, Pangasip-no sid Tuhan Yesus om kemot-kou-ogi songongkob do kosopulan, ka.

3. It ulun di mangasip, otontuan-no i kosipan dau dot amu-no opiduwaan do dang Kinoringan iosido.

Rom 8,38 Boros di Paulus, Sabap olumbatos-no dot elaan-ku, okonko i kapatazan ko i koposizan, i malaikat ko i nunu-nopo i monguasa, i biano ko i rumikot-ogi,ko it ongokuasa dot akansang, i sid savat ko i sid sibak, antawa nunu-nopo songvinangun, iso nga aso

kopotongkizad di tokou antad sid samod do Kinoringan, i nokembulai sid di Kristus Yesus, i Tuhan tokou, ka.

1. Timotius 1,15 Ino boros dino otopot dot a-no milod osimbanan, ino-no, I Kristus Yesu rinumikot sid riniba, tu manapul dit ongoulun do kisala, ka di Paulus.

Usuran do Rasul 4,20 Lokoi diti aso tinganan dot amu momoros di sokoviai i nemot om noron gou-za, ka di Petrus om i Yahya.

4. I kosipan, ginama do Kinoringan, inimbulai antad sid Habal do Kovosihan om nituduk di Sundu dot Osusi. Manjadi it ulun a-milo-milo, nga tumoguvang sampai mongoho di kovosihan dino.

Yahya 6,29 Ino-no i gamaon dot dang Kinoringan, i gama dikou mangasip sid ponuhu do Kinoringan, ka di Yesus.

Filipi 2,12 Boros di Paulus, Pembulai-kou-no banal di kosopulan dikou kondiri dot obingronok-kou om mogkikip-kou.

Ibrani 12,2 Tumingaha tokou-no sid di Yesus, i minangagazad di tokou sid kosipan sampai momonu-po di kosipan tokou dino.

Usuran do Rasul 16,14 Manjadi minonogiang-no i Kinoringan di ginavo di Lidia dino sampai minongining-no iosido di tuturan di Paulus...

U.R. 14,27 minanarang i Paulus do kuran i gama do Kinoringan manahak sid ongobansa di vazaan mangasip.

5. I kosipan suvaiko idomoon om atahakan-ogi do Kinoringan.

Lukas 11,13 Lobi-po it Ama-ku sid surga manahak di Sundu dot osusi sid ongoulun di mindamo sid dau, ka di Yesus.

Lukas 22,32 Boros di Yesus, Mininta dua-oku bahagi dikau, supaya amu engkod i kosipan-nu, ka dau.

Efesus 3,17 Boros di Paulus, Indomoon-ku, dot i Kristus o mintoron sid ginavo dikou, gima i kosipan dikou. Om ikou nga mugamut om

mutimpusod sid samod.

6. It ulun kadapat momili do kumavid di kosipan ko sumaap

Matius 23,37 Boros di Yesus, O Yerusalim, Amu-kou ozi om tumorima-kou di kodim di Tuhan di iadko i punan moninong dit ongopizak psusut sid alad dau.

Yahya 16,9 Boros di Yesus, Amu nakasip ioti sid dohon, ka.

Yakub 1,21 Gamit-kou-no di boros do Kinoringan, i natanom sid ginavo dikou dit osibak, tu kapanapul dikou i boros dino.

7. I kosipan sumurut om humino.

Lukas 17,5 Boros dit ongorasul sid di Yesus, Omungai-no i kosipan dahai, ka.

Lukas 17,6 Boros di Yesus, Ong kikosipan-kou-ogi do minsanko iadno do linsou do sasavi o kagazo...

Filipi 3,12 Okonko momoros-oku do nakagamit-oku-no di sokovia i antawa nopongo-oku-no. Magavi-oku gumusa, kalu-kalu ong kagamit-oku, sabap nogomitan-oku-no di Yesus Kristus.

8. Sid saralom do kosipan nokezo-no it ulun sid Kristus om i kavazao dau.

Usuran do Rasul 13,39 Boros di Paulus, Isai-nopo i mangasip sid di Yesus, ino-no i natanus-no i karaatan dit amu milod tonuson, ong baiko sumuhut di Taurat di Musa.

Rom 3,28 Sabap ino, ohorotizan tokou-no dot i riniba embanaran antad sid gama mangasip, okonko antad sid gama sumuhut di pinonuhuan, ka di Paulus.

Rom 10,4 I Kristus, ino-no i pasandatan di pinonuhuan, supaya ipat-apat it ulun di mangasip, kasanganu di kabanaran.

Kinotimpunaan 15,6 Minangasip-no i Abram dino sid Tuhan. Sabap ino, kiniro di Tuhan i gama di Abram dino do iadko kabanaran dau.

Rom 6,8 Ong nokokoruhang tokou-no di Kristus matai, mangasip tokou-no do kokoruhang tokou-no di Kristus sid kopoulosan.

Yahya 3,16 ..supaya ipat-ipat it ulun di mangasip sid di Kinoreingan, amu atagak, inoi nga kasanganu di kopoulosan penlaid.

Yahya 5,24 Isai-nopo i mongining di boros-ku sampai mangasip sid minonuhu dohon, tantu varo-no kopoulosan dau penlaid om amu-no onong iosido do hukum.

banal, (Mal. benar), kabanaran, kapamanaran, abanal, mamanal

It ulun ot abanal dit ohukuman do hakim, nga amu-no asalaan iosido, tu aso gima sala dau. Ong sukuil abanal i hakim. Sabap varo't ongohakim dit amu onong i hukum dau. Sabap ino, suvai abanal it ulun, ong amu asalaon di hakim do penlaid, ino-no Kinoringani. Rontob-nopo, isot ulun nga asot abanal, tu kisala kavi om okurangan di hormat dau. Tu Kinoringan elaan-no, minsanko it onogama dot olingob sid riniba, alanta-no kavi ong sid tinoguvangon do Kinoringan. Sabap ino, i kabanaran dot ulun suvai atahakan do Kinoringan om varo-ogi. Kinoringan o minongimbulai sid di Kristus di hukum dau bahagi di riniba om i kapamanaran dot ulun, supaya it ulun Kristian kikabanaran, gima i Kristus Yesus. Manjadi ino kabanaran dit ulun Kristian dino iadko vangun vagu, kovongunan vagu dot ulun.

Sid Kitab Laid Kinoringan o paratu dot ombo it abanal om ombo it araat (Kinotimpuunan 2-3) Kagi Kinoringan o mongohukum om manala, supaya amu osimbanan i kabaanaran dau dino. Ulangan 32,4 Boros di Musa, i Kinoringan iadko pampang. I gama dau dino, nga a-no kiroon i sala. Tu i sokoviai i ginama dau, nga abanal-no kavi. Atatap i Kinoringan sampai aso karaatan sid dau. Abanal iosido om elin, ka di Musa. Sabap ino, it ulun sid Kitab Laid minangasip dot

abanal-no i Kinoringan sampai hinumarap it ulun dot Israel do kengkakat it avasih om rumatu-no it araat, tu i gima hukum do Kinoringan. Isai-nopo it ulun dit amu anangan do hukum do Kinoringan, ino-no it abanal, ka di Kitab Laid. Sabap ino, minagavi-no it ulun do Yahudi do monuluk om sumuhut di nunu-nopo songpinonuhuan di Kitab Laid.

Na sid Kitab Vagu, nakatalib-no i harati sid Kitab Laid. Ino-no it vagui, Kinoringan-no it abanal, tu iosido-no o popiandus sid saralom di kinapatazan di Yesus Kristus di iadko mangatag di sala, ko iadko mangapus dit utang, ko popiandus di kopioduhan, ko notobus antad sid kinuripanan. I kinapatazan di Yesus iadko posukup di kaganti do sala do riniba.

Rom 3,23-26 Sokovia i nga kisala om asot kendazahan sid tinoguvangon do Kinoringan, nga nembanaran-no ioti do baiko nisian di kovosihan dau, gima notobus-no sid saralom di gama di Yesus Kristus. Tu iosido dino noumpai-no do Kinoringan dot ipangandus bahagi dit ulun di mangasip sid raha dau, o ino-no i kembulazan di **kapamanaran** do Kinoringan. Sabap i kasalaan di gulu baiko pinosimozo, gima i kolonuto do Kinoringan, supaya kembulai i kapamanaran dau biano dot iosido ot **abanal** om iosido o **mamanal** dit isai-nopo i mangasip sid di Yesus.

Manjadi i Kristus (I Almaseh) ot abanal (Usuran Rasul 3,13 om 7,52).

I Paulus o monuduk di gama do Kinoringan mamanal dit ulun do kisala, tu suvai abanal it ulun ong kogoos iosido do mingkakakat sid tinoguvangon do Kinoringan om sumamung do Kinoringan. I kabanaran dot ulun okonko antad sid gama dau kondiri, om i gama sumamung do Kinoringan, okonko riniba ot elo posunu. I kabanaran do Kinoringan atandas-no do Kinoringan o sanganu sampai it ulun bai

nisian ino kabanaran dino om nosingkapu.

Rom 1,17 I Habal do Kovosihan dino o kointalangan di kapamanaran do Kinoringan, antad sid kosipan sampai monong sid kosipan. Ino-no, sid sangkap di Tuhan Yesus o kembulazan di kabanaran do Kinoringan. Ino kabanaran dino mamanal dit ulun di kisala. Rom 4,5 It ulun di mangasip sid Kinoringan, i kapamanal dit ulun di pakaso dau, pokiroon-no i gama dau mangasip dino do kabanaran.

Ino iadino okonko sumuhut do koubasan do riniba, iadko riniba o mongohukum om manala ko mamanal. I gama do Kinoringan mamanal pengkaa, Porosuma i Kinoringan mangada di sala iadko tahak, okonko iadko suul dot ulun. Kagi okonko baiko mangada i Kinoringan di kasalaan, dot it ulun kakali sid kosusaan, gam kondiri di Kinoringan manapul dit ulun di mangasip. It ulun ajadi dot obpinai di Kristus om koburuo sid piniizaan dit Kristus, ino-no i gorija. Ino kapamanaran dino nokembulai-no biano om otulukan-no di hiza do penlaid. Sabap ino, it ulun di mangasip, elaan i kosungguvon om kalanta-no iosido ponong sid kosungguvon dino, ino-no i karajaan do Kinoringan, isuhut di boros di Paulus sid Filipi 3,14 I torontog-ku iti vuos-ku ponong sid tinoguvangon sampai mokiririkot-oku-no sid rikoton om sid pokioonuvan, ino-no i kodim sid savat it antad sid Kinoringan, sid saralom di Yesus Kristus, ka. Manjadi antad sid kapamanaran dino kembulai i kavazao dit ulun Kristian Rom 6,19 I gulu diri, uripon-kou di kensasakahan om karaatan. Topot ong biano, patahako-no dikou it onkokoburuo dikou dot uripon do kabanaran do pongimbulai di kosusian. Rom 5,17 It ongoulun di nakanu di kovosihan dit amu milod ovion om i kabanaran di nitahak, ajadi do raja sid kopolosizan penlaid, gima it iso ot ulun, ino-no i Yesus Kristus.

1. I kabanaran dot ulun

Matius 5,20 Bang aso kabanaran dikou di lobi-po abanal mantadko kabanaran dit ulun do Farisi om it ongoulun dit elo do Kitab, tantu- tantuko amu-kou kosuvang sid karajaan do surga. ka di Yesus.

Rom 1,18 Kointalangan di kotigiran do Kinoringan bahagi di sokovia i koguvail do riniba om i kavazao dot araat di monobon di katapatan, tu posurilog di karaatan. 1,29 manarang di karaatan dino.

Rom 3,10 Isot ulun nga asot abanal, iso, nga aso.

Rom 3,20 Isot ulun nga asot embanaran, sabap i pinonuhuan baiko pentalang di kasalaan.

Lukas 10,29 Boros dit ulun sid di Yesus, tu minokibanal-no iosido, Isai-no-ka it ulun vokon dino? ka.

2. I kabanaran dit antad sid Kinoringan

Kinotimpunan 15,6 Manjadi minangasip-no i Abram dino sid Tuhan. Sabap ino kiniro-no di Tuhan i gama di Abram dino do iadko kabanaran du Ibrahim.

Yehezkiel 36,26 Tahakan-ku-no ikou do ginavo vagu om pongitungan vagu. om jodizon-ku ikou do riniba vagu di sumuhut di kenginan-ku.

Yesaya 42,1 Boros di Tuhan, Iti-no it uripon-ku, i tinoruntud-ku it ulun di pinili-ku. Mongohukum iosido dit ongobansa (kumavid di kabanaran-ku).

Matius 5,6 Osinang-no it ulun di monombitil om tuliohon di kabanaran, sabap it ulun dino envizahan.

Lukas 18,14 Boros di Yesus, iosido dino minuli-no sid valai dau do nembanaran-no mantadko it ulun do Farisi dino.

1. Korintus 1,30 Boros di Paulus, i Yesus Kristus o kabanaran tokou

Rom 3,21 Boros di Paulus, Topot biano nokembulai-no i kapamanaran

do Kinoringan, dot i Kinoringan o mamanal dit ipat-ipat it ulun di mangasip sid di yesus Kristus.

2. Korintus 5,21 It aso sala jinadi do Kinoringan do kisala, tu mongontok di tokou, supaya embanaran tokou sid tinoguvangon do Kinoringan.

3. It ulun di nakanu do kabanaran do Kinoringan jumadi dot ulun vagu.
Rom 6,18 Boros di Paulus, Nakalabus-kou-no sid kuasa do kasalaan om najadi-kou-no dot uripon do kabanaran.

Rom 6,13 Kadan-no posongonuvai do sala it ongokoburuo di guvas dikou sampai ajadi do pakakas do karaatan, gamko posongonuvai-no do Kinoringan i guvas dikou, iadko it ulun di minatai-no nga nogulian-no, om i koburuo di guvas dikou jodizo-no do pakakas do kabanaran.

2. Korintus 5,17 Isai-nopo i nasanganu di Kristus, vangun vagu-no iosido.

1. Timotius 6,11 Boros di Paulus, Ikau, ulun-ko do Kinoringan, Mogidu-ko-no dino iadino o buatan, gusao-no i kabanaran om kiskusian om kosipan om samod om kosibakan do ginavo om kamamasan do ginavo.

Matius 6,33 Boros di Yesus, Ihimo-no banal dikou i karajaan di Kinoringan om i kabanaran dau, tu ong iadino, itahak sid dikou it onghal vokon.

4. I Kinoringan mangapad di kabanaran dau om it ulun dot abanal

1. Korintus 6,9 A-ka elaan dikou dot it ulun dit amu abanal amu kotungkus di karajaan do Kinoringan?

Galatia 5,5 I tokou diti sid saralom di Sundu o humarap di kabanaran dit antad sid kosipan.

1. Petrus 3,14 Kagi-po, ong kasadu-kou di gima posurut di kabanaran, nga abarakatan-kou-no.

bantug, > hormat, mad pangkat, pongoretan di manarang di kogo zoo do ngaran dot ulun, gima ulun dot avantang om avasi iosido. Asarok sid Kitab napakai-no i pongoretan hormat do mongontok di pongoretan bantug

a) i bantug di dang Kinoringan:

Yesaia 42,8 loku-no diti o Tuhan, ino-no o ngaran-ku. Amu-oku koho do varo-po pinokokinoringan do manansanganu di kohormatan-ku antawa varo rogon do mongunsopot di kobontugan-ku.

b) i bantug di Kristus

Fil. 2,11 ipat-ipat i dila nga mangakun dot, I Yesus o Tuhan, tu mamantug di Kinoringan it Ama.

Ibrani 5,5 Okonko i Kristus o minamangkat di kondiri dau, inoi nga i Kinoringan...

c) i bantug dot ulun, vokon-no iadko pangkat

Zabur 8,6 lkau-no o minamangkat di riniba do iadko it ongomalaikat sampai minanahak do kovosihan om kohormatan sid riniba.

Yahya 12,26 Isai-nopo it uripon-ku, iosido o bontugon-ku (hormaton) dit Ama.

2. Kor. 1,12 boros di Paulus, i bantug dahai atalahas-no sid ginavo-za dot okonko antad sid pongitungan om kopintaro do riniba, inoi nga tinunda-okoi di kosusian om kamamasan antad sid kovosihan do Kinoringan.

barakat, mamarakat, ong Kinoringan o mamarakat, ino-no o harati, mongimvantang om posinang i Kinoringan dit ulun. Ong riniba o

mamarakat, ino-no mindamo sid Kinoringan, supaya abarakatan it ulun ko i barang.

a) i barakat do Kinoringan nokonong sid di Adam ko Hava, i Noa, Ibrahim om iri-ogi isai-nopo it ulun di sumuhut di kenginan do Kinoringan.

Ulangan 7,12 Ong osuhut om agama dikou i sokovia i hoturan diti, kosunu-no dot i Tuhan momihot sid dikou di janji om i kobinsianan dau i nisumpa dau pajanji sid angaki dikou. Manjadi samadan-kou dau om barakatan-kou i ginamaan dikou om i gandum om it anggur...

Matius 25,34 Siti-kou-no ot ongoulun di nabarakatan dit Ama-ku...

b) i barakat mongimbulai dot kouvaan

Zabur 91,16 Ponoruvon-ku i sukud dot arangkap banal i koposizan dau, ka do Kinoringan.

Rom 15,29 Topot elaan-ku, tantu osukup i barakat di Kristus mozo-vozo dohon, ka di Paulus.

Efesus 1,3 I Kinoringan minamarakat di tokou sid Minananggung di minanahak di Sundu antad sid surga.

Rut 2,4 Minambat it ongoulun dot, I Kinoringan o mamarakat dikau, ka dioti sid di Boas.

c) i vaza mamarakat: i palad manampal dit ulu dot ulun

Kinotimpuunan 48,14 I Israil dino pinopikorivalod i longon dau sampai natampal di gibang dau om binarakatan-no dau it anganak di Yusup.

Kinotimpuunan 47,7 Na i Yakub sinumamung-no di Faraun sampai binarakatan-no di Yakub i Faraun..

d) i ponuhuan do mamarakat

Bilangan 6,24 Suhuo-no i Harun do mamarakat di piumpugan dot ino-no o boroson, I Tuhan mamarakat dikou om manaud dikou...

batos, olumbatos, kolumbatasan (iadko janji)

Atarang noboros-no dot amu-no osimban vagu i hal. otopot om opihot o boros, ong sid upakat: i piupakatan dit amu osimban vagu.

Nokopomoros-no i Kinoringan sid riniba dot olumbatos o boros. Ino-no i lumbatos di gulu banal sid riniba ontok di kinotimpuunan. Topot i riniba minogidu-no antad sid tinoguvaong do Kinoringan dot amu otopot o boros, gam minomodut i Adam. Iri-ogi i Kinoringan minanarang-no vagu di tomodon do kovosihan om pentahan (sid di Ibrahim) dot olumbatos o boros dot i Ibrahim o puun do kovosihan om barakat do Kinoringan bahagi dit ensanan i riniba. Iri-ogi sid Torsina, minanahak-no i Kinoringan di pinonuhuan dot olumbatos nisuhu, supaya i bansa dot Israil mionong sid lumbatos do Kinoringan. Suvai sid di Kristus notuluk-ogi i lumbatos di Ibrahim, tu antad sid di Kristus dino o kembulazan do kovosihan om barakat bahagi dit ensanan i riniba. Manjadi isai-nopo i sumuhut sampai mangasip sid Yesus Kristus, nokosuvang-no om nakanu-no di harati dinot kolumbatasan vagu: Kinoringan-no manarang dot it ulun dino tantu koruhang-no do Kinoringan sampai Kinoringan-no o mioontupat om mamasi dit ulun om mamarakat-po om manapul-po om posuvang sid kovosihan om koposizan penlaid .

1. I batos di gulu banal.

Kinotimpuunan 2,15 I Tuhan Kinoringan pinosuvang di riniba sid kabun dot Eden, supaya it ulun mutanom om mangajaga di kabun dino, ino-no i boros dau: Akano-no dikou i sokoviai it ongouva dot ongokazu di kabun dino, ombo o kenginan dikou. Topot ong it uva di kazu di pongilaan di kabanaran om karaatan, kadan-kou-no mangakan. Ino-no o harati, nakatahak-no do Kinoringan i rontob dit

ulun di mad mandul do Kinoringan sid kabun.

Hosea 6,7 Boros di Tuhan, Topot ioti dino mangaranggal di nolumbatos-ku iadko i Adam, i riniba di gulu banal.

2. I lumbatos di nokentahan-no.

Kinotimpuunan 3,15 Boros sid vulanut, Pisanaon-ku-no ikou dinot ondu dino sampai it anganak-nu om it anganauk dinot ondu dino. Hotokon dioti it ulu-nu om tindukon-nu i totod dioti, ka.

Kinotimpuunan 8,22 Salaid do kakal-po iti pomogunan diti asot kengkadan dit ontok do mangasok om mongomot, it azami om alasu, i manangadau om manampangi, it adau om sodop.

9,1 Manjadi binarakatan-no do Kinoringan i Noa om it anganak dau dot olumbatos o boros, Paganak-kou-no om gumumu-kou-ogi sampai pusoko-no dikou i pomogunan. Itahu-ku-no i buluntung-ku sid pialatan do mituvong iadko pogintutunan di janji-ku sid vinangun. Iti-no i pogintutunan dot olumbatos o boros-ku sid dikou.

9,8 Minomoros-no i Kinoringan sid di Noa om it anganak dau dot, Lumbotoson-ku-no sid dikou om sid mongkupu-nu...

Kinotimpuunan 12,2 Usangon-ku ikau do bansa dot agazo. Barakatan-ku ikau om punganaran-ku ikau do ngaran do kipangkat sampai ikau-no o puun do barakat sid sokovia i it ongobansa.

15,18 Hiza-no diri o minangajanji-no i Tuhan sid di Abram dot, Itahak-ku sid mongkupu-nu iti pomogunan diti antad sid volit do Masir sampai sid bavang dot Efrat, ka.

17,11 I sunat nga pogintutunan di nokopijanji kito, ka.

3. I kolumbatasan di pinonuhuan sid Torsina minongouasa di bansa dot Israel. Isai-nopo i kosuhut, ino-no kanu di barakat do Kinoringan.

Manjadi ino lumbatos dino iadko poponguru dit ongoulun.

Kolobusan 19,5 Ong mangasip-kou-ogi om kovidan banal dikou i janji-ku, ioku-no o sanganu dikou.

Kolobusan 24,7 Boros dioti, I sokoviai i suhu di Tuhan dino, suhutonza-no kavi, ka.

Imamat 26,42 Boros di Kinoringan, Hondomon-ku i lumbatos-ku sid di Yakub om Isaak om i janji-ku sid di Ibrahim, ka.

Ulangan 26,42 Sabap ino, horotizo-no dikou dot i Kinoringan dino Kinoringan dot abanal om atatap, i kumavid om kohondom di janji om obinsianan dau om manaud di hukum dau sampai sid okonko impiropiro ribu puokizai.

Yeremia 11,3 Olupu-no it ulun dit amu sumuhut di boros dino nolumbatos-no dino, ka.

Zabur 50,16 Nunu-ka o guna-nu do piboboros-nu i pinonuhuan-ku om mingrait ino munung-nu di janji-ku? do baiko kasanaan-nu ong ikau it ongoros-ku om ibibi-bibi-nu it ongoimuhun-ku.

4. I lumbatos vagu (nipintahan dit ongonabi)

Yesaya 42,6 Boros di Tuhan, Onuvon-ku ikau dot ipangjanji di sokoviai i riniba

Yesaya 54,9-10 I hiza di Noa nokopongolumbatos-okunon diri do boros dot amunon lusuvon vagu i tana do iadko i linusuvon. Pengkaa dino olumbatos o boros-ku diti dot amu-okunon pohungot vagu dikau.

Minsanko it ongoburul nga gumuzu antawa it ongoompulongon nga zumuzu. Topot ong i gama-ku manamod dikau amunon engkod om i gama-ku popiandus dikau, amunon sumimban, ka di Kinoringan.

Yesaya 55,3 Boros di Tuhan, Mangajanji-okunon sid dikau do janji dit amunon orungoi. Nunu-nopo i najanji-ku sid di Daud, amunon atanus,

gam tulukon-ku ino sid tinoguvangon dikou.

Yeremia 31,31 Amu songkuro om mangajani-oku-no vagu sid bansa-ku dot Israel om Yahuda. Ino janji dino okonko iadko i janji-ku sid angaki dioti di hiza di pinalabus-oku dioti antad sid pomogunan do Masir diri. Sabap i janji-ku diri rinungoi dioti. I janji vagu di jonjizon-ku sid bansa dot Israel, ino-no, Isurat-ku i pinonuhuan-ku sid ginavo om sid pongitungan dioti.

Zakaria 9,11 Kagi, polobuson-ku it ongonokotorungku-nu antad sid ongoluvang, gima i raha di lumbatos diri.

5. I kotulukan om kosunuan di nolumbatos vagu sid Kitab Vagu (Ong sid KV asarakan-no i pongoretan lumbatos ko janji di nasalin do Testament. Ino-no i harati do Testament: i kovosihan dit ulun minatai di huntad matai di mongimuhun sid anganak dau ko i sumusuhut dau di dau do kenginan dit iopung dau. Ong sid Momogun iadino: Imuhun dot ulun, Ong matai-oku-no, povitai-no dikou dohon i kampil-ku om i sigal-ku, ka. Aso kobulun monimban ong kodung imuhun di minatai).

Lukas 1,72 Longoi di Zakarias, Mongohondom i Kinoringan di nakajani dau dit osusi, o ino-no i janji di nosumpaau dau sid aki tokou, i Ibrahim.

Matius 26,28 Boros di Yesus, Iti-no raha-ku o janji vagu, kouza bahagi di sokovia.

Galatia 4,24-26 Ino duvo i janji, it iso antad sid burul dot Torsina bahagi di kouripanan. I vokon i janji, ino-no i Yerusalim i sid savat.

boli, bobolizan, sid adat do Momogun diri, ong kodung alasu o pomogunan, a-milo-milo nga monogit i bobolizan di pomogunan sid gama mangagaras do boli, ino-no i vogok di nontoluhan dot monginan

o vangal. I harati, sid gama di bobolizan, it ulun dit elo kumitoguvang dit ongorogon (borontuvilon) ogontian i karaatan om kasalaan do pomogunan di nakalasu di pomogunan, supaya opud vagu i pomogunan om edu-no ombo i hal dit amu atag. Na i **bobolizan** suvai ondu di kisavo. Alambat varo kusai di kihak do bobolizan iosido. Om varo-po't ongosumuni di kumuruhang di bobolizan i retan mogkuvozo-mozo (i harati murid).

Na sabap ino, it ongoulun dot Israel om Yahudi minongitung do iadino o gama antad sid hoturan di Musa, ong varo karaatan om kasalaan, a-milo, nga osusa mangaganti di karaatan dino sid gama mangaraha om pasamba do dupot, ino-no kambing ko domba om sapi. Manjadi antad sid pongitungan do iadino, varo vaza di Yesaia 53, i surat Ibrani om a-ko piro boros di Paulus dot i kavazao di Yesus di minatai iosido sid kazu do sangkap mad vaza mangaganti ko boli dit ipomoli di kasalaan do riniba, miabal boli iosido om i gama di bobolizan. Topot minsanko varo kiroon dot ino gama di Yesus miabal di gama di bobolizan do Momogun, isuhut di boros sid Yahya 3,16 *nitahak do Kinoringan it Anak dau, ka*, kakali ino boros di Yesus ko i Paulus om Ibrani bai vazaan manarang sid a-ko piro o gama do nunu banal i kovosihan om samod do Kinoringan, tu tumorima vagu di riniba di nokedu-no sid tinoguvangon dau. Sabap atarang-no i boros di Yesus dot amu ozi i Kinoringan ong sambaan iosido dot ulun do dupot ko barang, inoi nga i kenginan do Kinoringan, i ginavo dot osibak om obinsuhut (Mat. 9,13 Ozi-oku di kosianan ko i parsambaan, ka di Yesus).

bolou, bolou, norungoi i mato, nga sid Kitab asarok apakai kananganko i ginavo dot ulun dit amu kotutuan dit abanal. Amu kaharati it ulun di kovosihan om katapatan do Kinoringan sampai amu

kaharati di sala dau om karaatan dau. Ong Kinoringan posirot dot ulun, kosirot i mato om emot i sala om kaharati di kovosihan do Kinoringan.

1. It obolou dot ulun antad sid hukuman do Kinoringan, tu i gima kisala it ulun dino.

Ulangan 28,28 Bang amu-ko sumuhut di boros di Tuhan, tantu i Tuhan o pobolou om poulau di ginavo-nu, ka.

Yesaya 6,10 Boros di Tuhan sid nabi Yesaya; Pokodoho-no i ginavo di bansa dino, pobongungo-no i tolingo dau om poboloho-no i mato dau, supaya amu kemot i mato dau om amu korongou i tolingo dau om i ginavo dau nga amu humarati om amu-ogi miguli iosido om aso-ogi kosinangan dau, ka.

Yesaya 9,1 I bansa di pentoron sid otuvong nokemot-no do binahang di banalko anavau om i sokovia i it ulun di nodundungan do kapatazan, nga nembulazan-no dot anavau.

Yahya 3,19 Ino-no i hukum, nokorikot it anavau sid riniba om it otuvong lobipo i kenginan dot ongoulun mantadko it anavau.

Matius 13,13 Mirot-siroti dara i mato dioti, nga amu kemot om kitolingoi dara ioti, nga amu kening antawa humarati.

Rom 11,25 Sambahagi dot Israel nikodou-no i ginavo (ong Yunani: nobolou i ginavo)

Matius 23,24 Boros di Yesus, Ot ongomangagazad do bolou, manahas-kou di togonok do tolonon dikou it unta. 26 Ot ongoulun do Farisi, i bolou, lihungai-po laid i rinuvang do subung om pinggan, supaya opulang i soribau.

Matius 15,14 loti dino iadko i bolou di mangagazad do bolou, ka di Yesus.

2. Kor. 4,3 Manjadi i habal do Kovosihan it ihabal-za, olingob ong sid ulun dit obintagak. Amu mangasip ioti, tu binolou di vozoon do rogon, i monguasa diti riniba, i ginavo dioti, supaya amu kosirot ioti sid kanavaho di habal do kovosihan.

Efesus 4,18 Otuvong i ginavo dioti. I kobungoho om koguvelo dioti o mamalid di koposizan dioti antad sid Kinoringan.

2. Suvai antad sid Kinoringan o katarangan dot ulun di nobolou-no i ginavo dau.

a) Kinoringan iadko ovud do kanavaho.

Zabur 36,10 Sid anavau-no o kematan tokou di kanavaho.

Yakub 1,17 I Kinoringan, it ama do kanavau.

2. Kor 4,6 Kondiri di Kinoringan minomoroso dot, Antad sid kotuvangan mimbulai-no it anavau, ka. I kanavaho do Kinoringan minimbulai sid ginavo-ku, supaya kemot it ongoulun di kohormatan do Kinoringan, i nokembulai sid di Kristus.

b) I Kristus o panganavau

Yesaya 42,6 loku-no diti o Tuhan Kinoringan. i minongodim dikau sidkabanaran, supaya kosirot vagu it ulun dot bolou om kalabus it ulun di nokotorungku sid otuvong.

Lukas 2,32 Boros di Shamun, Manganavau iosido dit ongoulun dit amu-po nakasip om posurut di kohormatan sid Israel.

Yahya 1,9 I panganavau dit abanal, i manganavau dit ipat-ipat it ulun, rinumikot sitid vinangun.

Efesus 1,18 Boros di Paulus, i Yesus Kristus o posirot di mato di ginavo dikou, supaya elaan dikou i harapan di kodim do Kinoringan

Efesus 5,8 Boros di Paulus, I gulu diri, ikou nga sid kotuvangani. Topot ong bianco sid anavau-kou-no, tu nokokoruhang-kou-no di

Tuhan.

c) It anavau ino-no i boros do Kinoringan

Zabur 19,9 I pinonuhuan di Tuhan alus om posinang di mato.

2. Kor. 4,4 I kanavaho di Habal do Kovosihan mongimbulai di kohormatan di Kristus.

Usuran Rasul 26,18 Boros di Tuhan sid di Paulus, Ikau-no o posirod dit ongomato dioti, supaya tumolikud ioti sid otuvong om tumoguvang sid anavau.

Zabur 119,105 I boros-nu ino-no o monitiu di ralan-ku.

Matius 13,16 Boros di Yesus, Osinang-no i mato dikou, tu kemot.

Boros, i boros dot ulun mongimbulai di pongitungan dot ulun. Sabap ino, i Yesus Kristus, i minongimbulai di pongitungan do Kinoringan, retan tokou dot **Boros do Kinoringan**,

a) i Boros mad ngaran di Kristus

Yahya 1,1 I hiza di kinotimpunaan, varo-no laid ong i Boros om i Boros dino minintoron sid Kinoringan sampai i Boros dino, nga Kinoringani, ka. 1,14 I Boros dino jinumadi do riniba sampai nokentoron-no sid di tokou.

Kentalangan 19,13 Ino-no i garal dau, Boros do Kinoringan, ka.

Ibrani 1,1 Nokopomoros-no laid i Kinoringan di kodori-po sid angaki tokou sid kabang dit ongonabi dot okonko impiro-piro om misalagingis-no o vaza. Topot minomoros-no vagu iosido di kopupusan-no sid saralom dit Anak dau..

b) I boros do Kinoringan kikuasa mongurug di vinangun
>Kinotimpunaan 1

Yahya 1,3 Sid Boros dino i kopolosizan om i kopolosizan dino o panganavau di riniba.

Ibrani 1,3 I boros dit Anak di kikuasa o mongopud di sokoviai i nunu-nopo.

c) I boros do Kinoringan nokorikot-no sid riniba

Yoel 1,1 Iti-no it imuhun di Tuhan sid nabi Yoel

Yesaya 1,10 Iningo-no dikou i boros di Tuhan, ot ongotuan do Sodom.

Matius 4,23 minonuduk-no i Yesus sid ongopanambayangan dioti om minangahabal-no di habal di karajaan do Kinoringan.

Matius 13,3.. i lininsahan miabal di boros do Kinoringan.

1. Korintus 2,13 Iti habal diti o boroson-za do iadko i tudukan do Sundu

1. Tes. 2,13 notorima-no dikou dot okonko kiroon do bai boros do riniba, inoi nga kiroon dikou do boros do Kinoringan, ka di Paulus.

d) i boros do Kinoringan dino, ino-no pinonuhuan: Kolobusan 20

Mikha 6,8 Nokentahan-no di Tuhan sid dikou i nunu-nopo it avantang, ino-no, Posurut-kou do kabanaran om i gama misasamod om soumul-umul-kou sid tinoguvangon di Kinoringan dikou dot osibak o ginavo, ka.

e) om Habal do Kovosihan Yahya 1,17 I pinonuhuan nakatahak antadpo di Musa. Topot ong i kovosihan om i kabanaran jinumadi-no sid di Yesus Kristus.

1. Tim 1,15 Ino boros dino otopot sampai a-no milod osimbanaan o ino-no i Kristus Yesus rinumikot sid riniba, tu manapul dit ongoulun do kisala.

f) I boros do Kinoringan kikuasa

Ibrani 4,12 Sabap i boros do Kinoringan dino nga mizau om kikuasa sampai atarom mantadko karis di kitarom miampaping om kotogu banal dot aralom sampai kogutas di kinopigaganggazan di guvas om ginavo, i piuhalan om tulang, tu kelo sampai kopongohukum di nunu-

nopo sid saralom di ginavo.

g) i boros do riniba

Matius 15,19 I kalabus sid kabang, ino-no kembulai antad sid ginavo sampai monginsasakau dit ulun. Tu antad sid ginavo o kembulai i pongitungan dot araat, kapamatazan, kaagazan, kezutan, katakahan, kososizan do vudut, kopongusakan, ka di Yesus.

Matius 12,37 Banaron-ko, sabap i boros-nu dot abanal om hukumon-ko, sabap i boros-nu dot araat, ka di Yesus.

Efes. 4,29 Kadan-no palabpu do songlinsou o boros dot araat antad sid munung dikou, inoi nga pakazo dikou i boros di kiontok, supaya oubosihan it ulun di mongining.

Matius 12,36 I hiza dit adau do hukum osusa it ongoulun manarang dit ipat-ipat i boros dot araat di nakalabpu sid munung dau.

Matius 5,37 Ong mongoho-kou-no, nga O, ka om i gama dikou mangamu, nga, Amu, ka. Sabap nunu-nopo i boros di kalandak antad sid O, ka om Amu,ka, tantu ino-no it araat, ka di Yesus.

buatan, kobuatano, ino-no i kavazao dot ulun ko barang, i vaza poperad do gama om barang. Na i riniba nourug do koluu di kobuatano do Kinoringan.

a) i riniba inurug isuhut di kobuatano do Kinoringan. I buatan dau kondiri ot inanu do Kinoringan do suntuan di riniba, ka sid Kinotimpuunan 1,27.

Kinotimpuunan 1,26 Mongurug tokou-po do riniba kerad di buatan tokou, ka di Kinoringan.

b) minsanko kisala i riniba sampai nokedu sid tinoguvangon do Kinoringan, kakali nabantug-no i riniba do koluu di kobuatano do Kinoringan.

Kinotimpunaan 9,6 tu i riniba dit inurugi do Kinoringan nisuntu sid dau do kobatano.

c) Sid di Kristus nembulitan-no i kobatano dino, tu iosido-no o suntuan vagu.

Ibrani 1,3 I Kristus it ompiling di kohormatan do Kinoringan om koluu iosido di kobatano dau.

Rom 8,29 Sabap isai-nopo i nopili-no laid, nahatul-no dau do koluu di suntuan, o ino-no it Anak dau.

1. Kor 15,49 Sabap ino, iadnoko i tokou diti, tu koluu di kobatano dit antad sid tana, tantu lumuu tokou-po di kobatano dit antad sid surga.

gaji, suul, i vaza mongoguna di gama dot ulun di mongontok mangagama om tumabang ko monulung. Na i Kitab Laid manarang do kuran it atag o gama dit ulun di pagaji dit ulun vokon (i mosikim), retanko kihorogo i gama dot ulun. Suvai otimbang i gama dot ulun om i gaji dau.

Lukas 10,7 Ipat-ipat it ulun do gumama apatut do kisuul, ka di Yesus.

1. Tim 5,18 Ipat-ipat it ulun di gumama, nga varo suul dau, ka.

Na varo-po harati vokon, ino-no iadko hukum om vaza manala

Rum 1,27 sampai anangan ioti dit apatut o suul di kinopolidan dino.

Varo-po harati dot osulan it ulun Kristian, gima it atag o gama dau sumuhut di kenginan do Kinoringan

Luk 6,35 Lobipo avantang ong manamod-kou dit ongosangod. Bang iadino, agazo o suul dikou sampai ajadi-kou dot anganak di banalko asavat, ka di Yesus.

Matius 10,8 Kadan-kou-no mokihorogo ong mongolombus-kou-no di kovosihan do Kinoringan.

1.Kor. 3,8 I mananom om i monuntug dino, nga miradi, om ipat-ipat i

mangagama, nga kotorima di suul antad sid Kinoringan, isuhut di gama dau.

gama, gumama, mangagama, gagamaon

Engin i Kinoringan do gumama it ulun. I Kinoringan mamarakat di gama dot ulun om monuhu dot atag o suul bahagi di nunu-nopo i nagama.

Kolobusan 20,9 Onom-ko-no't adau gumama sampai minggama di nunu-nopo i gamaon-nu. Topot ong it adau do pongintaranan nakatanid-no bahagi di Tuhan. Kadan-no gumama dit adau dino, ikau kondiri ko it anak-nu ko it uripon-nu ko it ongopangazam-nu antawa it ulun di nokotombuvoi sid dikau.

Zabur 128,2 Mokipasi-ko di nagama di palad-nu.

Efesus 4,28 I manakau nga engkadan-no i manakau iosido, gamko atag ong magavi-no iosido mansahari di kosukupu dau do longon dau o pakazan gumama, supaya varo-po kalaba bahagi dit ulun mosikim.

1. Tes. 4,11 Boros di Paulus, Gumama-kou-no banal di longon kondiri, supaya avantangan di kobuatano dikou it ongoulun di sid labus-po.

2. Tes. 3,10 Isai-nopo it amu engin gumama, osuhul ong amu-no makan iosido.

Hagai 2,4 Polombuso-no banal i gama dikou gumama, sabap ioku-no diti o monulung dikou, ka di Tuhan.

1. Kor. 15,58 Boros di Paulus, Sabap ino, tatap-kou-no om pihoto-no i ginavo dikou posurut di gamaon sid Tuhan, sabap nelaan-no dikou dot okonko porosuma i gama dikou sid Tuhan.

Lukas 10,7 Boros di Yesus, Ipat-ipat it ulun do gumama apatut do kisuul.

garal, hormat, bantug dot vokon-no ong bai kotungkusan antad sid molohing dau. Alambat kapakai sid Kitab.

ginavo, (Mal. makhluk, jiwa, English conscience) I ginavo, ino-no i pongitungan dot ulun di mad humatul di gama dot ulun om monodiri dit otopot om abanal om it araat sampai momorisa i ginavo di sokoviai i gama om pongitungan dot ulun. Antad sid ginavo o kohorotizan dot ulun i kenginan do Kinoringan.

1. Aso-po pongoretan do iadino ong sid Kitab Laid, nga noboros-no laid i hal dino.

Kinotimpunan 3,8 I Adam humarati di karaatan dau, na sumusut-no iosido.

Kinotimp. 4,13 Elaan-no i Kain i karaatan dau, na boros dau, I kasalaan-ku banal-noko agazo. Amu-nu-no milod kada, ka di Kain.

Zabur 90,8 Nunu-nopo i sala dahai di nokosusut, nga nensanan-no do nokembulai sid tinoguvangon-nu.

2. Sid Kitab Vagu

a) i ginavo monodiri om mongohukum di gama dot ulun.

Matius 6,23 Manjadi bang i katarang sid ginavo-nu o tumuvong, gumazo-no banal i kotuvangan dino.

Rom 2,15 i gama di pinonuhuan nokosurat-no sid ginavo dioti sampai i purimon di ginavo dioti o pongilaan, tu it ongopongitungan misasala-sala antawa mitataud-taud.

Rom 9,1 Boros di Paulus, Kopurimon-oku do kisasi sid ginavo-ku di nosuvangan do Sundu dot Osusi.

b) i ginavo tokou notontuan di katatapan do Kinoringan.

Rom 1,9 I Kinoringan o sambaon-ku sid saralom di ginavo-ku di mangahabal-oku di habal do kovosihan

c) Varo tasantanid-tanid o kobuatano do ginavo dot ulun.

Ibrani 9,14 asakau i ginavo Ibrani 10,22 araat i ginavo

Efesus 4,18 Nobolou i ginavo 1. Kor. 8,7 I ginavo dit okugui om orukung

2. Timotius 1,3 It osusi o ginavo Usuran Rasul 23,1 I ginavo dot okosog

UR 24,26 I ginavo dit omomos 1. Tim 3,9 I ginavo dot osusi, 1,19 I ginavo dot otulid.

Tanid-po ino harati sid Kitab, varo-po pamarasan sid Momogun dot, **Nokorikot i ginavo-ku, ka.** Ino-no o harati, I pongitungan dot ulun, i ginavo dau nakaharati dot a-milo-milo simbanan dau i kobuatano di gulu om sumuhut-no iosido sampai ozi iosido mangasip sid Kinoringan. It inantadon diti pamarasan dino sid BM: Sudah sampai hati. Na bianco, ong noubas-no it ulun do mamoros do iadino, asot elaan tokou do monimban diti pamarasan ko mogihim do vokon.

Asarok-no do bai tomod momoros it ulun do iadino, nga antadi sid ginavo dau, dot amu osodiri dit ulun do nunu banal ino ginavo dau, mad kopurimon ko mad pongitungan ko bai osorou. Amu oubas it ulun momoros, Ong ioku, iadino o kiroon-ku, inoi nga, Ong i dohon do ginavo, nga iadino, ka.

Varo-po harati vokon sid Momogun, ino-no, Bang aso ginavo di hakod ko i guvas, tantu napatai-no i hakod ko i guvas dino. Manjadi ino harati dino iadko kopolosizan, ko i mizau i sid saralom dot ulun.

I ginavo okonko otimpan ko kotudu, iadko sundu sid saralom dot ulun.

Ong varo gama dot ulun di mongoho banal sid iso o hal ko manarang di kenginan dau, iadino o boros dau, Ginavo-no, i harati, banal-neno

ko otopot ong ino. Iti-no o vaza mangalapik do boros dot ulun.

miginavo, koginavaan, guminavo, ginovoon, varo-po harati sid mingin it ulun do koruhang, ondu om kusai. Okonko i molohing ko it ongosukod mongitung sampai miupakat dot kopisavaan dot anganak, inoi nga it anganak kondiri, i kusai om it ondu mingin, sabap kopionong i ginavo dioti. Ino-no o harati, miginavo. Ko i kusai dit engin dot sumuni momoros dot, lalo o koginavaan-ku, sabap guminavo iosido dit ondu dino om it ondu nga ino-no kusai dino o ginovoon.

ginavo dit osibak, ko osibak o ginavo, ino-no, it ulun di mandus sid vokon. I ginavo dot osibak antad di kelaan dot osibak it ulun sid tinoguvangon do Kinoringan. Elaan it ulun dot ensanan iosido suvai mopud antad sid kovosihan do Kinoringan. Amu humarap iosido di kondiri dau sampai otudukan it ulun do kosusaan dau om i suntuan di Yesus. Sabap ozi i Kinoringan di ginavo dit osibak om it ulun di mandus.

Kinotimpunaan 32,11 Boros di Yakub, loku diti, amu-oku-po katanggol di sokovia i koruhunan-nu om i kovosihan-nu di nivozo-nu sid dohon. Zabur 119,67 I kakal-po amu osibak i ginavo-ku, kakal do malid-oku-nopo sampai nokozou.

Yesaya 13,11 Boros di Tuhan, Posibaon-ku-no i ginavo dit ongosasavat.

Lukas 5,8 Osibak-no i ginavo di Petrus, tu boros dau, O Tuhan, pogidu-no sid dohon, sabap ioku diti ulun do kisala, ka dau.

Lukas 22,61 Opus-no i Petrus do ponikok-nikokon-po mogihad, tu minongolim iosido do koruhang iosido di Yesus.

1. Petrus 5,5 I Kinoringan sumaap dit ulun di mokisasavat. Topot it

ulun dit osibak o ginavo, manahak iosido do kovosihan dau. Sabap ino, posibako-no it ongoginavo dikou di sid palad do Kinoringan, supaya mamangkat iosido dikou di hiza di kiguna.

gorija, pongoretan di nolombus sid sid boros do Yunani dot Kyriake > Dang Kinoringan. I harati, ensanan it umpug dit ongoulun Kristian sompomogunan om ipat-ipat i piumpugan ko i rombongan dot ongopiumpugan sid toriso-iso o pomogunan, nga gorija.

a) i gorija nokoput antawa nokototol sid Habal do Kovosihan, isuhut di tudukan dit ongorasul dot i Yesus Kristus ot ulion do gorija. Varo pongoretan vokon, ino-no i guvas di Kristus.

Matius 16,18 Ikau-no dino ot i Petrus om sid pampang-no dino o potimpakan-ku di piumpugan-ku, ka di Yesus.

Kol. 1,18 It Anak, ino-no ot ulion do gorija. I gorija dino, ino-no i guvas dau, ka di Paulus.

Rum 12,5 Minsanko ogumu tokou, najadi tokou dot iso o guvas sid saralom di Kristus.

b) suvai mopud i gorija, ong misasamod-samod it ongoulun Kristian do iadko songobpinai.

Efesus 3,17 Indomoon-ku dot i Kristus o mintoron sid ginavo dikou gima i kosipan dikou. Om ikou, nga mugamut om mutimpusod sid samod.

Efesus 4,3 I kopioondusan do Kinoringan o kogos di piniizaan dikou.

Gal. 3,28 Aso-no pitonidan-po vagu dot ulun do Yahudi om ulun do Yunani, tu ikou dino sokovia i ajadi-kou dot iso-no sid Kristus Yesus.

c) I gorija iadko valai do Kinoringan

1. Tim 3,15 Engat-no do kuran it avantang ot undang-undang sid valai do Kinoringan, o ino-no i piumpugan dot ulun Kristian.

1. Petrus 2,5 I kou dino iadko vatu do mizau, mokiturug-kou-no do valai dot osundu om piniizaan dot osusi.

d) i kosungguvo do gorija

Efesus 4,12 Ino-no i gamaon dioti, popitatabang dit ongoulun Kristian pengkakat di guvas di Kristus, supaya iseso o kosipan tokou om iseso o pongilaan tokou sid anak do Kinoringan sampai sumukod tokou om kosuhut di karangkapo di Kristus.

Ong onsizon i pongoretan gorija, iadino:

I Gorija, i piumpugan di dang Tuhan. Nunu o harati gorija?

I gorija, ino-no i bansa do Kinoringan sid tanga do riniba. Sokovia i it ongoulun di mangasip, nga mizo sid gorija. I gorija ino-no i guvas di Kristus. I Tuhan Yesus ot ulu di guvas dino. I Tuhan Yesus o mangahatul om manaud di gorija.

Siombo-ka i gorija? I gorija jumadi siombo-nopo varot ulun miuumpug om kaharati dot,

I Yesus Kristus o Tuhan dioti sampai sumasi di Tuhan sid tanga do razat om mongohormat di Yesus dot iseso o ginavo om pongitungan.

Boros di Yesus, Siombo-nopo ong varo duvo ko tolu ot ulun di miuumpug sid saralom di ngaran-ku, sino-okunod pialatan dioti dino, ka. (Matius 18,20)

Ino-no o kongkod do gorija:

sid saralom di tudukan ening dit ulun dit osipan do gorija om i vaza sumuhut om mongusaha di kenginan do Kinoringan.

sid saralom di kopodsuan mamung it ulun sid gorija.

sid saralom di poginakanan di Tuhan Yesus mizo it ongoulun Kristian sid gorija.

It ulun Kristian amu mopud dot iseso iosido, inoi nga suvai nakamung

iosido sid gorija di Yesus Kristus i nokotongkop do sompomogunan.

I gorija di Kristus amu engat o volit om rontob do boros ko bansa ko tasantanid-tanid o kulit om vuros, tu i piumpugan di dang Tuhan ino-no o Bansa dot vagu.

It ongotanda di boros do Kinoringan o momihot om manatap di kosipan dot ulun. Ong bai it ongotolingo o nokening, amu-po kosondot. Iti-no o sabap do varo-po tanda di nakamung it ulun sid gorija, ino-no i kopomodsuan om i poginakanan di Yesus.

gulian, gumulian, mongogulian, koguliaanan, kinogulianan

Sid ugama do Momogun diri, varo pongitungan om kiroon dot ulun do kodung minatai it ulun, mindakod i hatod dot ulun sid valai dau sid sodop kotolu dino. Iri-ogi, ong kodung nakanu do kokorui, lumombus-no i hatod sid Nabalu, tu sori-no ot intoronon dau mamung sid ongogulu-gulu, ka. Topot, ong varo't ulun di minatai, nga masi-no vagu, ino-no retanko gumulian vagu iosido, i harati, humijau-no vagu do makan om mamananau it ulun dino. Ino-no rontob, sid usul do Momogun, bai a-ko piro ot ulun retanko nogulian do vokon, ong baiko novunusan. (I harati Nabalu = kinogumu, tu ogumu-no banal sori)

Ong sid kosipan do Kristian, tanid-no ino hal. Na nokintahan-no laid sid Kitab Laid i kogulianan sid Kitab Laid dot vokon-no ong amu avalang banal, ino-no, it ulun varo kosungguvo di tumalib di kapatazan. Amu avi i kopolosizan dot ulun, hiza di moling iosido dot aso dangol, i mintoron momuhobo it ulun om engkod-no it undundu do popompa do raha sid boginisan i koburuo do guvas om it utok nga engkod-no mangahatul di kopolosizan dot ulun, inoi nga varo kopolosizan sid tanid o santak do vinangun dit amu koduzan banal di riniba, retanko kopolosizan penlaid ko hoturan om karajaan do Kinoringan. Ino

harapan dino okonko alangkas om kodori banal nokembulai sid Kitab Laid, retanko I Kinoringan monori di kuasa do huntung. Suvai nogulian-no i Tuhan Yesus om humarap-ogi it ulun Kristian do varo kopolisan penlaid. Amu-no rumosi it ulun Kristian di kapatazan dau, sabap i kapatazan dau bai vazaan sumuvang sid karajaan do Kinoringan. Sid saralom di korikatan vagu di Tuhan Yesus o kembulazan om kotulukan di karajaan dino sid tanga do riniba om i vinangun om varo kemvoguvan do vinangun. Ino-no i retan dot kopolisan om vangun vagu ko kourugan koduvo di kiguna sid sokovia i vinangun.

1. Sid Kitab Laid varo-no ong bai hovoron dino koponorian di kuasa do huntung, dot i Kinoringan o kamanang:

Kinotimpunan 49,18 I hiza di minatai i Yakub, varo boros dau dot, O Tuhan, harapon-ku-no i koponopulan-nu.

Ayub 14,14 Monginud-oku do sampai emvoguvan i kopolisan-ku

Ayub 19,25 Topot elaan-ku dot i Kinoringan o mangapad dohon.

Yehezkiel 37 Mongogulian vagu i Kinoringan di bansa dot Israel

Yesaya 26,19 Masi-no vagu it ongominatai-nu.

2. I kamanangan do Kinoringan kembulai sid di Kristus

Matius 16,21 minonuduk-no i Yesus dioti do kuran di matai iosido dot ogulian vagu sid kotolu't adau.

Matius 22,23-33 i kopolisan vagu tanid mantadko bai kiroon dot ulun (Saduki). Imatai-po sid Usuran Rasul 9,3; 1,22; 4,23; Markus 16.

3. It ulun di mangasip, apasi-no sid kopolisan vagu.

Yahya 5,24 Isai-nopo i mongining di boros-ku sampai mangasip sid

minonuhu dohon, tantu varo-no kopolosizan dau penlaid om amu-no onong iosido do hukum, inoi nga nokedu-no iosido sid kapatazan om nakavalaliu iosido sid kopolosizan.

Yahya 11,26 Ipat-ipat it ulun di mizau om mangasip sid dohon, amu-no matai iosido sampai penlaid, ka di Yesus.

Efesus 2,5 Pinasi tokou kavi dau, nivozo tokou di Kristus, ka di Paulus.

Kolose3,1 Ikou dino, nogulianan-no sid kopolosizan vagu, isuhut iadko i Kristus. Itungo-no dikou i kopolosizan sid tinoguvangon do Kinoringan, okonko i dang pomogunan.

4. It ulun di mangasip kanu do kopolosizan sid saralom di kapatazan dau.

Lukas 23,43 Adau biano diti, kovoza-ko-no dohon sid karajaan do surga, ka di Yesus.

Yahya 11,25 Boros di Yesus, loku-no diti o kogulianan om kopolosizan. It ulun di mangasip sid dohon, minsanko matai-no iosido, kakali dot apasi om ipat-ipat it ulun di mizau om mangasip sid dohon, amu-no matai iosido sampai penlaid, ka di Yesus.

Filipi 3,20 Sabap i di tokou dot ulion (i kinoginitan do pusod), ino-no sid surga.

1. Tes. 4,17 i tokou sumamung di Tuhan sid savat. Iri-ogi kentoron tokou sid tinoguvangon di Tuhan sampai penlaid, ka di Paulus.

2. Kor. 5,1 Elaan tokou-no ong humuzas i basalag dit intotoronon tokou di didino, o ino-no i guvas tokou, varo-not izonon tokou sid surga do nosodia-no do Kinoringan dit amu-no rumungoi.

5. I kanangan di kogulianan dit ulun minatai sid korikatan vagu di

Tuhan Yesus Kristus.

Yahya 5,28 Boros di Yesus, varo hiza do rumikot dot i soskoviai t ulun sid ongolobong nga korongou di dolou dit Anak do riniba sampai lumabus antad sid lobong. I minangagama dot avantang kotorima di kogulianan do kosuvang sid kopoulosan. Om i minangagama dot araat kotorima di kogulianan do kosuvang sid hukum, ka.

1. Kor. 15,22 Boros di Paulus, iadko matai kavi i rin iba sid saralom di Adam, iadiko ino sid saralom di Kristus ogulianan kavi i riniba.

1. Kor. 15,26 I sangod di tonuson dau sid tohudi-no, ino-no i kapatazan (i kuasa do huntung).

1. Tes. 4,16 Na gulu-po gumulian it ongoulun di minatai-no sid saralom di Kristus om iri-ogi i tokou-no, i kakal-po mizau om koopung-po siti, nga kovoza-no dioti minsavat sid saralom do kavut...

1. Kor. 15,52 I hiza di monguni i toburi dino, ogulian kavi it ongoulun minatai sampai kikobuatano-no dot amu-no obinsasa om i tokou diti, nga osiliu-no. Iri-ogi i kapatazan otolon-no do kamanangan.

Habal do Kovosihan, (Mal. Injil) Yunani Euangelion- avasih o habal.

Ino-no it onsi di sokoviai i habal antad sid Kinoringan kananganko i gama di Yesus Kristus manapul om mananggung om mangagazad om monuduk di songriniba om songvinangun. I puun di boros dino, ong varo kosusaan sid pomogunan ko sid iso o bansa, ong sumimban i kobuatano dino, tu nokopiandus di sangod ko nengkod-no i sakit di rumaliu ko i koruzahan ko kolizudan om i nunu-nopo, it ulun di muhabal do iadino, ino-no it ulun di mangatod di habal (Injil) dot avasih. Sabap ino, i nabi di minangahabal sid ulun Yahudi sid Babil dot nengkod-no i kinuripanan dioti dino sid Babil sampai kavasa-no ioti

muli vagu sid pomogunan dot Israel, i pomogunan dit inantadon dioti, retanko ulun di mangahabal dot avasih o habal. Antad diri varo pamarasan dot Euangelion = Habal do Kovosihan.

Kondiri di Yesus o kotulukan di Habal do Kovosihan, tu iosido o minongimbulai di karajaan om hoturan do Kinoringan. Lukas 4,21 Boros di Yesus, Bianco diti notuluk-no i boros do Kitab dino sid tinoguvangon dikou, ka.

Markus 1,1 lti-no i kinotimpunaan di Habal do Kovosihan di Yesus Kristus.

Markus 1,15 Nosukup-no it ontok om nokorikot-no i karajaan do Kinoringan, ka di Yesus.

Matius 11,5 Boros di Yesus, Habarai-no dikou i Yahya dot, it ulun do bolou kosirok om it ulun do kimai kapanau om it ulun do kibalang nga olingasan-no om it bongung nga kening-no i minatai ogulian-no vagu om i mosikim nga orikatan-no di Habal do Kovosihan, ka.

Ino-no it onsi di habal do kovosihan, Yesus Kristus.

1. I kobuatano om kogofoo di Habal do Kovosihan:

Matius 4,23 om 9,35 Manjadi tinumongkop-no i Yesus di vatas do Galilea dot ino-no i gama dau, minonuduk-no iosido sid ongopanambayanan dioti dino om minangaha bal di Habal di karajaan do Kinoringan sampai pinengkod-no dau i sokoviai it ongoruol om kokuguzan dit ongoulun, ka.

Matius 24,14 om i hab al do Kovosihan di karajaan nga kahabal-no sid pentongkop do pomogunan, om ososizan-no di sokoviai it ongobansa, om iri-ogi korikot i kopupusan.

Markus 1,14 Nokotorungku-po i Yahya, minamanau-no i yesus kumaa sid Galilea, tu mangaha bal di Habal do kovosihan do Kinoringan.

Galatia 1,7 Boros di Paulus, Varo't ulun di momudali di Habal do Kovosihan di Kristus, ka.

Rom 1,16 Boros di Paulus, Amu kamalu dohon i Habal do Kovosihan. Sabap i habal dino kuasa do Kinoringan di manapul dit ipat-ipat it ulun di mangasip.

Efesus 1,13 Kodungko nokorongou-kou di boros di katapatan, ino-no i Habal do Kovosihan di kosopulan dikou, nakasip-kou-no sampai natandaan-kou-no di Sundu dot osusi sid janji dino, ka di Paulus.

Efesus 2,17 Nokorikot-no i Yesus Kristus do minangahabal di kopioondusan do Kinoringan sid sokoviai-kou dit osodu-kou diri antad sid Kinoringan om sid dioti dit osomok-no laid.

Efesus 6,15 Boros di Paulus, Tompaai-no i hakod dikou di koriatan mangahabal di Habal do Kovosihan.

Rom 2,16 Ong adau-no do kopongohukuman do Kinoringan di sokoviai it ongolingob sid saralom do ginavo dot ulun, ishut di habal-ku do Kovosihan i sid saralom di Yesus Kristus.

Rom 15,15-15 i kovosihan di nakatahak do Kinoringan sid dohon pajadi dohon do ponuhu di Kristus Yesus sid ongoulun do labus om posurut-oku di gama dot osusi, o ino-no, pahabal-oku di kovosihan do Kinoringan..

Gal. 1,11 I habal do kovosihan di nakahabal-ku diri, okonko dang riniba.

Efesus 6,19 Boros di Paulus, atahakan-oku do Kinoringan do kopihatan mangahab al di Habal do Kovosihan, tu sid torungku-oku diti mangahabali.

2. Kor. 4,4 Amu kosirot ioti sid kanavau di Habal do Kovosihan.

1. Kor. 15,1-3 Boros di Paulus, Popuhondom-oku dikou sid Habal do Kovosihan di nakahabal-ku-no laid sid dikou, i notorima-no dikou, i

pinatatap dikou, i minanapul dikou, ong kinovidan-ogi dikou, i nihabal-ku sid dikou diri sampai amu-no malang-alang i gama dikou mangasip.

2. I gama mangambat om tumorima di Habal do Kivosihan.

Markus 1,15 Pangasip-kou-no di Habal do Kivosihan.

Kolose 1,23 Ong sukul kumavid-kou sid kosipan dot opihot o gama dikou kumavid om amu-kou asazou sampai amu-kou milod torikon pedu antad sid harapan di norongou dikou sid Habal do Kivosihan. Sabap nakahabal-no sid sokovia i vinangun i hab al do kivosihan om ioku-no diti ot i Paulus o ponulung di habal dino.

Filipi 1,27 Kingkakat-kou-no dot apapag sid iso-no i Sundu sampai iseso-no o ginavo dikou magavi bahagi di kosipan sid Habal do Kivosihan.

1. Kor. 9,16 Kosusa dohon ino ong amu-no ihabal-ku i habal (do kivosihan) dino.

Rom 1,9 I Kinoringan o sambaon-ku sid saralom di ginavo-ku di mangahabal-oku di Habal do Kivosihan dit Anak dau.

2. Timotius 1,8 Kada-no kamalu sumasi di Tuhan tokou antawa inot ongobalud-ku, gamko rundun-no momurimon di kapagasan dino, gima i Habal do Kivosihan sid kuasa do Kinoringan.

3. I sumaap di Habal do Kivosihan.

Rom 10,16 Topot okonko sokovia o sumuhut di Habal do Kivosihan.

2. Kor. 4,3 I habal do Kivosihan it ihabal-za, olingob ong sid ulun dit obintagak.

Gal. 1,7 loti momudali di Habal do Kivosihan di Kristus.

1. Kor. 9,18 Amu-oku mokihorogo sampai amu-oku kumavid di kuasa-ku sid Habal do Kivosihan dino.

1. Kor. 9,12 Amu-okoi kumavid di kuasa-za dino, supaya amu-okoi koponobon di ralan di Habal do Kovosihan di Kristus.

harap, harapan, i pongitungan ponong sid tohudi, i hal dit amu-po orikot ko kosunu

1. I harapan di ginavo kananganko i kosurupuvan om kosinangan dau
a) It riniba dit amu engat do varo Kinoringan

Khotbah 9,4 Isai-nopo it ulun di mizau, kiharapan iosido iadko it asu di mizau osuhul avantang mantadko i minatai-no i mondou.

Ayub 8,13 Iti-no o kosondoto dit ulun di nokotolikud sid Kinoringan, Aso-no harapan dit ulun dit amu-no mongohondom do Kinoringan. I harapan dau mutut iadko i tinai do buringot, ka di Bildad.

Sirak 34,1 it Ulun dot obungou monipu di kondiri dau sid ongoharapan dit aso tantu-tantu.

b) I harapan dit ulun dot okosog om elin.

Zabur 40,5 Osinang-no it ulun di humarap sid Kinoringan (62,6)

Zabur 9,11 Iti-no o sabap do humarap ioti sid dikou, gima notutunan-no i ngaran-nu.

Rum 5,5 Om i harapan amu kapangamalu, tu i samod do Kinoringan nokosuvang-no sid ongoginavo tokou, ino-no, i gama di Sundu do Kinoringan i nitahak sid di tokou.

Zabur 22,5 Ikau-no o hinarap dit angaki dahai. Hinumarap ioti dot ikau-no o manapul dioti.

Zabur 33,18 Rontob it ulun di rumonok di Tuhan o siratan dau. Om it ulun di humarap di samod dau, otulungan dau. Iosido-no o palabus dioti antad sid kapatazan om mamasi dioti di hiza di monombitil.

2. I panangan di harapan, ino-no i kotulukan di karajaan om hoturan

do Kinoringan.

a) Sid Kitab Laid varo harapan di hoturan di Almaseh

Yeremia 17,13 O Tuhan, ikau-no o harapan di bansa dot Israel

Yesaya 11,1 Manjadi antad sid tuod di Isai varo mulit. Varo gamut do mutolid sampai monguva.

Habakuk 2,3 Posurato-no banal kavi do pangahandaman, tu okonpo-ko bianco o kembulazan. Topot amu-no-ma songkuro ino om korikot. Nunu-nopo ma it oboros-ku sid dikau dino, nga kosunu kavi, mulongko alaid-po, nga inudai banal, tu i janji di koporikatan-ku dino, nga amu-no osimbanan.

Yehezkiel 37 Nosorou-no di nabi do kotungagan vagu di bansa dot Israel do iadko ogulian-no it ongoulun do minatai.

b) Sid Kitab Vagu varo harapan di kotulukan di gama di Kristus, ino-no kogulianan di minatai, kotulukan di kabanaran om kopoulosan penlaid.

1. Yahya 3,2 I tokou diti jinadi dot anganak do Kinoringan, nga kakali amu-po kembulai i kosungguvo tokou. Baiko iti-no ot elaan tokou. Ong kodungko korikot-no i Kristus, koluu tokou-no dau sampai kopimot tokou-no do kopitoguvang banal. Manjadi isai-nopo iadkeno o gama kumavid di harapan sid dau, tujuvon-no banal i ginavo dau iadko i Kristus.

UR 24,15 Boros di Paulus, Humarap-okou do varo kogulianan dit ulun minatai, it abanal om i kisala, iadko i gama dioti humarap.

Gal. 5,5 Tu i tokou diti sid saralom di Sundu o humarap di kabanaran dit antad sid kosipan.

Rum 5,2 Kiharapan tokou dot embulazan tokou di kohormatan do Kinoringan.

Titus 1,2 Kiharapan tokou do varo kopoulosan penlaid, tu najanji-no laid do Kinoringan, it amu momudut.

c) Notontuan-no ino harapan dino, gima nitantu di Sundu dot Osusi Efesus 1,13 Ikou-po di kodungko nokorongou-kou di boros di katapatan, ino-no i habbal do kovosihan di kosopulan dikou, nakasip-kou-no sampai natandaan-kou-no di Sundu dot Osusi sid janji dino. Ino Sundu dino o momihot di kotungkusan tokou.

1. Petrus 1,3 I Kinoringan o pindazou-nopo. Sabap iosido banalko kikosianan sampai nakalandai tokou-no vagu bahagi di harapan do koposizan, tu i gima kinogulianan di Yesus om bahagi di kotungkusan, i nakatahu-no laid sid surga bahagi dikou.

Ibrani 6,18 I tokou diti, nga olumbatos o ginavo mangavid di harapan di nigili-no sid tinoguvangon tokou. Manjadi i harapan dino iadko labu di ginavo tokou dit opihot om atahan.

d) it ulun di humarap okonko ginawatan, gam kotomon-no do varo-no rikoton di iadino.

Rum 8,25 Topot it a-tokou emot o harapan tokou, tantu monginud tokou-no dau dot alanut i ginavo.

Yakub 5,7 Ot ongoobpinai, polonuto-no it ongoginavo dikou sampai korikot it adau di Tuhan. Imatai-no dikou i kolonuto dit ulun do mukabun, monginud ioti di kosurutan om koulaan dit ongouva do kihorogo sid tana dioti. Toruntudon kavi dau antad sid kotimpuunan sampai kovian do pangi. Tatap-kou-no, tu sumomok-no i korikatan di Tuhan.

2. Kor. 3,12 Iti-no o nokosiou dahai mangahabal, tu kiharapan-okoi do iadino. Rum 12,12 Tomon-kou-no, tu kiharapan, kosog-kou-no sid kosusaan, sampai tatap-kou-no minta dua.

UR 24,15-16 Humarap-oku dot varo kogulianan dit ulun minatai. Ino-no o sabap do banalko magavi-oku mogihim di kotulidan do ginavo-ku sid tinoguvangon do Kinoringan om riniba.

Ong onsizon tokou i hal do harapan, pengkaa dino,
Nunu-ka i kosungguvon om rikoton tokou? Ino-no I Karajaan do
Kinoringan

Rumikot vagu i Yesus Kristus om mongimbulai sampai monuluk di
hoturan di karajaan do Kinoringan. Iri-ogi ogulian it ongoulun minatai
sampai ensanan i riniba di mizau ko minatai-no, kasamung kavi di
Tuhan. Iri-ogi mongohukum-no i Tuhan om monodiri dit avantang om it
araat, isuhut di suriban sid Matius 25,11-46. Iri-ogi mimbulai-no it Avan
vagu om pomogunan vagu om i riniba vagu om i vinangun vagu. Ino-
no i retan do KOPOSIZAN PENLAID.

It ongoulun Kristian mongindazou di harapan dino, sumusui di
pomintaan dua di Yesus dot,

Sabap ikau-no o sanganu di karajaan om i kokuasaan om i
kohormatan sampai penlaid.

Sinod karajaan dino atandas dot,

**Kopioondusan Kolobusan Kobebasan Kabanaran om
Kosusian.**

It ongoulun Kristian minud di korikatan vagu do Kinoringan.

hatod, pongoretan sid Momogun di manarang dot kodung minatai it
ulun, varo kiroon dot iso bahagi dot ulun kumaa sid Nabalun, bai i
buntung, i guvas di nobuntung-no o kopung sid pomogunan. I hatod
mad i koduvo-duvo dot ulun, ka. Ong kiroon banal, okonko bai iso o
hatod dot ulun, inoi nga turu dot inintonon dit ongohatod sid
ongopihalan. Varo-po hatod di mad i koduvo-duvo dot ulun. Ong
monginipi it ulun, okonko it ulun, bai i hatod dot ulun momurimon om
mangagama dit ongopangalaman dot epi. Ong monuturan it ulun dit
inipi dau, retanko, nemot-no di hatod-ku i valai do banalko agazo, ka,

ko, nakakaa i hatod-ku sid Kuala Lumpur, ka.

Ong kodori, varo-po retan do lovot. Ino lovot dino asu do rogon. Na i hatod dit ulun do mongoruol, usigon do lovot. Ong alabpaan-no do lovot i hatod di mongoruol, matai-no it ulun. Ong monginipi it ulun, mizon-no sid valai vagu i hatod, mudan-no sid alud it hatod, ko mozo-no mongivas i hatod om orulun sid vaig i hatod, tantu matai-no it ulun. Ong atalou banal it ulun, retan dot aso hatod. Neduan do hatod, banalko notigagang. Mad nongeduan do hatod it ongoondu dit antad sid lobong di Yesus, tu ongotomuk-no sampai aso-no kobosou mumbongut. Ong avantang o kematan do parai dot omoton-po, nga okudik ot onsi, retan dot aso hatod.

Ong sid Kitab, aso kiroon do iadino. I hiza di kinourugan diri, varo boros, dot kopiamung i tana dot osilou om i pomuhobo do Kinoringan o jinumadi do koposizan (kiginavo-no i guvas) dot ulun. Ong matai it ulun, masa-no i buntung sid lobong. Topot i pinuhobo it antad sid Kinoringan di mad Sundu antad sid Kinoringan iopung-no sid tinoguvangon do Kinoringan.

Na varo't a-ko piro bahagi sid Kitab Vagu do mamakai di pongitungan dit filosofia do Yunani, retanko i riniba varo tolu bahagi, ino-no, guvas, hatod om sundu. Topot it atag o vaza manalin dino, isuhut di 1. Tes. 5,23 dot, ensanan i ginavo dikou om i pongitungan om guvas dikou nga ataud dot asot ohino om aso sala ontok di korikatan vagu di Tuhan tokou Yesus Kristus, ka di Paulus. Okonko i hatod muli sid Kinoringan, inoi nga i ginavo dot ulun it inopud antad sid pinuhobo do Kinoringan.

Vokon-po i pongoretan koposizan mongontok di pongoretan dot ulun. Zabur 103, O ginavo-ku, pangarazou di Tuhan. O koposizan-ku, pangarazou di ngaran dau dot osusi. Natanggung-no dau i

koposizan-ku antad sid kobinasaan.

Imatai-po sid >**ginavo**

hormat, kohormatan, mongohormat, humormat, = mongoguna di kavazao di vokon. I hormat iadko pangkat om garal, iadko buatan dot avasih om ngaran dot avantang om kihak. Manjadi varo mad vangun dot ulun mokihormat, mogihim di dau do ngaran dot ohormat. Ombo i kikuasa, retanko YB yang Berhormat. Ong otopot i hormat bai dang Kinoringan, sampai rumbul satu o gama do riniba, ong atag, ino-no, mongohormat do Kinoringan.

Ong sid Kitab Laid, i pongoretan dino bai apakai ong ponong sid kavazao do Kinoringan: kabod. Aso pongoretan sid Momogun di miabal banal di pongoretan dino, tu ino-no it onsi = kavagato, kopondou, kompilingan, tu i hormat do Kinoringan tumalib di sokoviai it engat ong riniba sampai minsanko i Musa ko i Yesaya a-kogoos do sumonsob om sumirot sid kohormatan do Kinoringan, mad nobolou om nopondou ioti di hormat do Kinoringan.

1. I riniba mogihim do hormat om mokindazou.

Yahya 5,44 Boros di Yesus, Kuran-ka o kadapatan dikou mangasip, ong kakali momokihormat-kou sampai amu-kou mogihim di kohormatan antad sid Kinoringan dit iso-no.

Yahya 7,18 Isai-nopo i momoros antad sid kondiri dau, ino-no i mogihim di kohormatan kondiri. Topot i mogihim di kohormatan di minonuhu dau, ino-no ot abanal om aso karaatan sid dau.

Yahya 12.43 Tu lobipo ioti minogihim di kohormatan antad sid ulun mantadko i kohormatan antad sid Kinoringan.

Rom 1,25 Hinumormat om sinumamba ioti sid vinangun do sumaap di

Minamangun, i piindazou sampai penlaid, ka di Paulus.

Galatia 5,26 Kadan tokou mokihormat di baiko hormat do riniba om kadan tokou mianggan-anggan om kadan tokou-no miagil-agil, ka di Paulus.

1. Tes. 2,6 Boros di Paulus, Amu-okoi minokihormat dot ongoulun, ikou-ka antawa isai-nopo. Minsanko kavasa-okoi dara do monguasa dikou dot avagat o gama, tu rasul-okoi di Kristus, nga amu-okoi do iadino, ka.

Kinotimpunan 11,4 Tokou-no, Kutao tokou i pomogunan diti sampai pengkakat tokou dot iso valai dot asavat sampai kosunggu sid avan, supaya kibantug (hormat) tokou sampai amu katanzag it ongoulun tumongkop do pomogunan, ka dioti.

Matius 20,20 It idi dit anganak di Zabdi minogihim di hormat dit anganak dau

2. I hormat suvai anangan i Kinoringan.

Ulangan 32,3 Rontob i Kinoringan tokou o hormaton tokou, ka di Musa.

Yesaya 48,11 Boros do Kinoringan, Amu-oku mangakun do varo vokon di manganu di kohormatan-ku.

Zabur 115,1 Okonko dahai, okonko dahai, i dikau do ngaran o pihormatan.

Lukas 2,14 Boros di longoi di malaikat, Kohormatan sid Kinoringan sid savat...

1. Petrus 4,16 Topot ong asaadan tu ulun iosido do Kristian, kadan-no ekum iosido, gamko ipongohormat dau di Kinoringan sid ngaran dino.

3. Na i Kinoringan mongohormat dit ulun di dang Kristus om dang

Kinoringan.

Yahya 12,26 Isai-nopo it uripon-ku, iosido dino hormaton dit Ama, ka di Yesus.

1. Petrus 5,4 Manjadi i hiza di kembulazan di manaud i kipangkat, kanu-kou-no dot antub-antub dit amu-no tumanus, ino-no i kohormatan dit amu-no engkod.

4. Atag dot it ulun mihohormat-hormat songkoruhang, isuhut di hoturan do Kinoringan.

1. Petrus 3,7 Ot ongokusai, pongoguna-kou-no dit ongosavo dikou, tu andaman dot ioti nga kongotungkusi di kovosihan do koposizan, supaya amu ounang i gama dikou minta dua.

Kolobusan 20,12 Pongohormat-ko-no dit ama-nu om it idi-nu.

1. Timotius 5,17 It ongosukod, atag-no dot induvoon i gama dioti do gama mongohormat, lobipo ong it ongosukod di mangahatul di boros om i tudukan. ka di Paulus.

1. Petrus 2,17 Mongoguna-kou-no di sokovia i it ongoulun. Rumonok-kou-no do Kinoringan. Mongoguna-kou-no di Kaisar.

hukum, mongohukum, (mal. hakim =i mongohukum), hukuman, pihukuman, adau do kopongohukuman =i hukum do penlaid. Ino-no i gama do hakim, mamanal iosido dit ulun dot abanal om mongohukum sampai manala dit ulun di kisala. Bang varo karaatan, i hakim monodiri di sala om mangaratu di hukum.

Ong riniba o mongohukum, varo ong onong o hukum, varo ong amu onong, tu elaan do riniba mangagil om monimban i kabanaran om dumagang do sasi om i iadino. Topot sid Kinoringan aso iadino, tu i Kinoringan engat ombo-nopo i nokosusut sid ongoulun. Otopot i

hukum do Kinoringan om abanal i gama dau mongohukum. Amu monodiri i Kinoringan do mosikim ko lumundu, pasok ko bai ombuvoi, anak, osukod, ondu, kusai. Enizo kavi it ulun sid tinoguvangon do Kinoringan.

I tomodon di hukum do Kinoringan okonko monusa dot ulun o tomodon, inoi nga mangatag om mongimvagu, pemumui vagu dit ulun dit apalid om nakalandu sampai pengkakat vagu dit abanal.

I Yahya i minomodsu minangahabal di hukum do Kinoringan dot i hukum dino iadko kapak di nakanta ponong sid gamut do kazu. Topot isai-nopo i muli sid Kinoringan, anangan iosido do kovosihan do Kinoringan (Matius 3,7-12) I Yesus pengkaa dino mangahabal di hukum do Kinoringan. Suvai alazan it ulun di hukum, ong kouli iosido om mindamo iosido di kaadaan di sala dau.

I Paulus mangahabal di hukum do penlaid bahagi dit isai-nopo it amu opus i kasalaan dau (Rom 2,1-11). Ong sukul monimban it ulun di ginavo dau dot araat, varo katagan.

>Imatai, ong i Kitab Indonesia mamakai di pongoretan hukum sid >Taurat ko sid >pinonuhuan. Topot ong sid Momogun, amu koonong ong apakai i iadino!!

1. Korintus 5,5 It ulun di minonumbang, nga hukuman-no, supaya obinasa i guvas dau om kasapul-ogi i ginavo dau, ong orikot it adau di Tuhan, ka di Paulus.

Rom 5,9 Manjadi ong bianco, tu nabanal tokou-no sid saralaom di raha di Yesus, lobipo atalahas dot osopulan tokou dau antad sid hungot diri.

Rom 3,21 Bianco nokembali-no i kapamanaran do Kinoringan dot okonko i pinonuhuan o minongimbulai.

Yahya 5,22 Sabap minsanko i gama mongohukum, amu mogkorelo it

Ama om amu mongohukum iosido dit isai-nopo, inoi nga i gama mongohukum nitahak-no kavi sid Anak, ka di Yesus.

Yahya 3,17 Okonko pinorikot do Kinoringan it Anak dau sid riniba, tu popongohukum do riniba, inoi nga ponopulon do riniba.

1. Kinoringan o mongohukum dit ensanan i bansa dau om sokoviai it ongobansa.

1. Samuel 2,10 I Tuhan mongohukum di sompomogunan om manahak do kakansango sid raja di nopili dau.

Rom 3,6 Ong iadino, kurozon-no-ka di Kinoringan mongohukum i vinangun?

1. Kor. 5,13 Ong it ulun sid labus, i Kinoringan o kopongohukum.

1. Petrus 1,17 I Ama, i mongohukum dit ongoulun dot okonko mongitung iosido di kobuatano sid soribau, inoi nga i gama dit ongoulun ot hukumon dau.

2. I Kristus nakanu kavi di gama mongohukum

Matius 25,31 Ong rumikot-no it Anak do Riniba sid kohormatan dau mogom-no iosido sid ogomon do kipangkat om umpugon-no dau i sokoviai it ongobansa sid tinoguvangon dau sampai sodirizon-no dau it ongoulun iadko i manaud do domba di monodiri dit ongokambing om ongodomba.

Yesaya 33,22 I Tuhan, ino-no o mongohukum. I Tuhan, ino-no o monuduk, I Tuhan, ino-no o raja. Iosido-no o monulung di tokou, ka di nabi.

Matius 23,23 It ongohal di kiguna banal sid pinonuhuan, i kabanaran om kosianan om kosipan pinosimozoi dikou.

Matius 25,21 Boros di tuan, Avantang-no ino gama-nu, ot uripon-ku

dot avasih om atatap. Tu okudik i dikau, nga avantang i gama-nu manaud.

Matius 25,30 Na inot uripon dit aso kanangan dino, sunsubo-no dikou sid kotuvangan sid lamas. Tu siri-no o pogihadan om pogkikipan do nipon, ka di Yesus.

3. I hukum di Tuhan biano om i hiza-no do penlaid.

Yahya 3,18 It ulun dit amu mangasip, (n)ohukuman-no, tu amu nakasip iosido sid ngaran dit Anak do Kinoringan dit iso-no.

Usuran Rasul 17,31 Inot Anak do Kinoringan, i Yesus Kristus, i nogulian-no antad sid ulun minatai o momongohukum di riniba, ka di tudukan di Paulus.

4. It ulun di Kristian o tumabang mongohukum.

Matius 19,28 Boros di Yesus, Hiza-no di kopongurugan vagu, ong mogom-no it Anak di Riniba sid ogomon do pangkat dau, ikou dino i nongokovoza dohon, nga momongogom-no sid hopod om duvo ot ogomon, tu mongohukum-no di hopod om duvo i runrunan dot Israel, ka di Yesus.

1. Korintus 6,2 A-ka elaan dikou dot it ongoulun dot osusi o kopongohukum do vinangun it ontok do penlaid?

5. It ulun, ong mongohukum suvai atag o gama sampai engat dau i hukum do Kinoringan.

Matius 7,1 Kadan-kou-no mongohukum, supaya amu-kou ohukuman, tu iadko i gama dikou mongohukum osulian-kou mongohukum..

Rom 2,1 Boros di Paulus, Sabap ikau nga anangani di gama-nu manala dit ulun vokon. Sabap i gama-nu nga iadiko it ulun vokon di

sinusun-nu. Topot elaan tokou dot i sokovia i mangagama do iadino anangan di hukum do Kinoringan, isuhut dit otopot.

imam, sid Kitab Laid, ino-no sid bansa dot Israel varo hoturan antad sid di Musa do varo't imam. It ulion dit ongoimam, ino-no it Imam do kipangkat. I tugas dit imam dino, bantaran di bansa dot Israel sid tinoguvangon do Kinoringan (It ongorurundukan retanko bantaran do lumaag ko osundu). Sabap amu katama om amu kogoos it ipat-ipat it ulun dot Israel do tumoguvang sid Kinoringan (Bilangan 8,19 om 18,20), nihatul-no di Musa do varo a-ko piro't ulun di rurungan do Levi di mangahatul di gama pasamba sid Kinoringan dit ongoparsambaan sid panambayangan, hiza di sid belantara sid kema om iri-ogi sid Silo om sid Yerusalim sid panambayangan di ginama di Sulaiman (1. Raja 8). It imam mongontok di bansa dot Israel sid tinoguvangon do Kinoringan om manahak di parsambaan om polombus di barakat om hoturan sampai i kovosihan do Kinoringan sid bansa dino. Na i gama monogit ontok dit adau do kopioondusan (Yom Kippur), suvaiko it Imam do kipangkat om kavasa-ogi sumuvang sid ongekob di banalko osusi, tu mangatod di raha di domba (Imamat 16). Na i surat Ibrani sid Kitab Vagu manarang dot i gama di Yesus Kristus miabal di gama dit Imam do kipangkat mangaganti ko monogit di riniba.

Ibrani 4,14 varo't imam tokou do kipangkat dot agazo banal, i nokotongkop-no sid surga, o ino-no i Yesus, it Anak do Kinoringan. Na iri-ogi boros di Kitab Vagu dot ipat-ipat it ulun Kristian mad imam-no di mongimbulai om manahak do parsambaan dot kosunduvo

1. Petrus 2,5 mokiturug-kou-no do piniizaan dot osusi (koimaman), supaya kasamba sid Kinoringan do parsambaan dot osusi, gima i Kristus.

Kolobusan 19,6 lkou-no o karajaan dit ongoimam dot iseso o ginavo om obinsuhut dohon om bansa di sid palad-ku, ka di Kinoringan.

imbulai, kembulazan, alanta, kalanta, ombo it osusut, ino-no mimbulai ko varo pembulai.

a) kananganko i hal dit olingob om kalanta-ogi

Matius 10,26 Aso nokosusut dit amu embulazan om asot olingob dit amu kalanta.

1. Kor. 3,13 tantu mimbulai i kosungguvo di gama dau. Sid saralom dit apui o kembulazan, ka di Paulus.

2. Tes. 2,8 Iri-ogi mimbulai-no i sangod do Kinoringan.

b) Kinoringan mongimbulai ombo i nokosusut om i hal di rumikot-ogi

Daniel 2,28 Kinoringan o milo mongimbulai dit ongohal di kakal-po osusut.

Kinotimpuunan 17,1 minimbulai-no vagu i Tuhan sampai minomoros sid di Ibrahim

Kinotimpuunan 15,1 minimbulai-no vagu i boros di Tuhan sid di Abram sid saralom dit osorou dau..

Yesaya 52,10 I Tuhan minongimbulai di gama dau manapul di tokou sid tinoguvangon di sokovia i it ongobansa

Efesus 3,5 Topot bianco nembulai-no di Sundu do Kinoringan sid ongorasul om sid ongonabi dot it ongobansa om it ongoulun do Yahudi, sompi kotungkus di barakat do Kinoringan om sompi najadi o guvas di Kristus.

c) I kobatano do Kinoringan ot kembulai

Kolobusan 6,4 Boros di Tuhan, loku-no i Tuhan di nokembulai-no sid di Ibrahim om Ishak om Yakub. Topot amu-po nembulai sid dioti i ngaran-ku.

Zabur 98,1 I palad dau do vanan o minongimbulai di gama dot osundu.

Yahya 9,3 Okonko kisala ialo antawa i molohing dau, inoi nga supaya kembulai sid dialo i gama do Kinoringan.

Amos 3,7 Sabap aso-po ginama di Tuhan dit okonko nintahan-po (nipembulai) laid sid nabi dau.

d) I kinembulazan di Kristus

1. Tim 3,16 Opisasasi i suromo di kelinan, ino-no, nokoriniba-no i Yesus, nembanaran di Sundu...

e) i kbuatano dot ulun a-milo-milo kembulai

2. Kor. 5,10 Avantang ko araat, nga hiza-no dino o kembulazan om kotorimaan dit ipat-ipat it ulun sumuhut ombo i dau do nagama.

Gal. 5,19 I kanangan di gama do guvas nga atalahas-no dot kaagazan, kensasakahan...

1. Tim 5,24 Varo't ongosala dot ulun dit alanta sampai mogulu dau sid pihukuman. Varo-no ong alaid om kembulai-ogi. Pengkaa dino i gama do mongumbasih nga ilanta. Om nunu-nopo sangkavazao vokon, nga a-milo-milod kembulai.

ingut, kodim, suvai i Kinoringan mongingut om agazad-ogi it ulun sid tinoguvangan do Kinoringan.

a) sid Kitab Laid vokon-no ong toriso-iso't ulun iningutan, vokon-no ong ino bansa dot Israel.

Kinotimpunan 12,1 Manjadi minomoros-no i Tuhan sid di Abram dot, Pogidu-no sitid pomogunan...

Kolobusan 3,4 na kinodim-no di Tuhan i Musa antad sid saralom di kazu dino.

Hosea 11,2 makin do kodimon-ku i bansa dot Israel dot anak-ku,

makin-po minsodu ioti antad sid dohon.

b) Sid Kitab Vagu i gama do Kinoringan mongingut sid karajaan dau
Lukas 14,24 Boroson-ku-no sid dikou, Aso't iso't ulun dit iningutan-ku
laid diri do kotiim-po di poginakanan-ku, ka di Tuan, ka di Yesus.

Rum 9,24 Manjadi minongodim-no iosido di tokou dot ongopakakas do
kobinsianan dino...

Yahya 7,37 It adau di kovian di Hari Raya dino, miningkakat-no i
Yesus om minomoros-no dot ologod (minongingut) dot, Ong varo't
ulun do tuliohon, porikoton-no iosido sid dohon, tu minum, ka di
Yesus.

c) I Yesus minongingut (minongodim) di kinoruhangan dau

Matius 4,21 Iri-ogi kinodim di Yesus povozoon dau.

Rum 1,1 I Paulus it uripon di Yesus Kristus i nokodim om nisodiri do
mangahabal di Habal do Kovosihan do Kinoringan.

2. Tes. 2,14 I habal do kovosihan di nihabal-za sid dikou o vinazaan
do Kinoringan mongodim dikou, mamung sid kohormatan di Tuhan
tokou.

Kentalangan 19,9 Osinang-no it ulun di okodim mamung sid
poginakanan do mogontong dit Anak do domba, ka.

1. Kor. 7,20 om 7,24 Ipat-ipat it ulun ruruton banal i kavazao dau di
nokodim-no iosido sid tinoguvangon do Kinoringan.

intoron, izon, mintoron, mizon, rumusod, rumudson:

ino-no, amu sumimban, tumatap, mizon, rumusod sid ulun ko valai,
apasi sampai penlaid.

Sid ongozabur noboros-no dot i Kinoringan amu sumimban, gam
sampai penlaid Kinoringa-nopo. Na i Yesus Kristus nga pengkaa, kezo
iosido di koledo do Kinoringan. Kagi i Sundu do Kinoringan nokezon

sid Tuhan Yesus Kristus. Sabap ino, i Yesus tumalib dit isai-nopo i nabi. Pengkaa dino, i Kinoringan nokezon sid Tuhan Yesus (Yahya 14,10). I Kristus sampai penlaid (Yahya 12,34). Iri-ogi i Kristus nokezon-no sid isai-nopo i mangasip sid di Yesus (Yahya 15,4-7) sampai noboros-no dot it ulun Kristian a-milo-milo nga mizon iosido sid di Kristus sampai sid Kinoringan.

It ulun di nakasip-no, nokezon-no sid anavau. Topot ong it ulun dit a-kasip, nokezon-no sid kotuvangan om sid naraka.

1. I kentaranan dot ulun.

Ibrani 13,14 Sabap aso't intoronon tokou siti dot atatap. Topot ihimon tokou-no it ulion di rumikot-ogi.

1. Yahya 2,17 Isai-nopo i sumuhut di kenginan do Kinoringan, ino-no ot apasi (varo kentaranan) sampai penlaid.

2. I Kinoringan nokezon-no sid di Yesus Kristus

Zabur 45,7 I kinogomon-nu dino, nga sampai penlaid.

Zabur 119,89 I boros-nu dino, nga sampai penlaid.

Zabur 33,11 I kovosihan di Tuhan, nga sampai penlaid

2. Timotius 2,13 Ong amu tokou otuju, kakali otuju ong iosido.

Yahya 1,32 Sinumasi i Yahya dot, Nemot-ku-no i Sundu do Kinoringan mindahu antad sid avan iadko burung asang, sampai minintoron sid di Yesus.

3. I Kinoringan nokezon-no sid riniba, gima i Yesus.

Yahya 1,14 I Boros dino jinumadi do riniba sampai nokentoron sid di tokou..

Lukas 24,29 Boros dioti, Intoron-no sid dahai, tu sumodop-neti. Inot

adau nga osibak-no, ka.

Matius 28,20 Hondomo-no dikou dot, loku diti mozo-vozo (mintonon) dikou suva-suvab sampai sid kovian do pomogunan, ka di Yesus.

Yahya 14,16 Boros di Yesus, ioku-no o mindamo sid Ama-ku om iosido nga porikot sid dikou do Monginsasamod vokon, do mintonon sid dikou sampai penlaid.

Yahya 15,11 Ozi-oku do varo katamanan sid dikou dot antad sid dohon sampai arangkap banal i katamanan dikou (ko: i katamanan-ku mintonon sid tanga dikou, ka).

2. Yahya 2 Sabap i kabanaran dino nokentoron-no sid di tokou om mozo-vozo-no di tokou sampai penlaid.

Yahya 15,7 Ong mintonon-kou sid dohon om i boros-ku, nga mintonon sid dikou, indamo-kou-no do nunu-nopo i kenginan dikou, nga tantu atahakan-kou.

1. Yahya 2,10 It ulun di manamod dit obpinai dau ot otopot-no ko nokentoron sid anavau sampai aso-no kapangasau dau.

Yahya 12,46 Boros di Yesus, Nokorikot-oku do manganavau-oku di vinangun, supaya ipat-ipat it ulun di mangasip sid dohon, amu-no mintonon sid otuvong.

4. I Kristus suvai mizon sid ulun sid saralom di gama do Sundu dot Osusi rumudson sid ulun, ong

a) kikosipan it ulun dino:

Yahya 8,31 Ong tumatap-kou-no (mintonon-kou) sid boros-ku, ajadi-kou-no do koruhang-ku dot abanal, ka di Yesus.

2. Tim. 3,14 Topot ong ikou, toudo-no banal (intonono-no sid) sid katapatan, i pinisingilaan-nu diri sampai humarap-ko-no.

b) ong kisamod it ulun

Yahya 15,9 Intoron-kou-no sid samod-ku, ka di Yesus.

1. Tim. 2,15 Ong sukul mangasip iosido om manamod om posurut (mintoron sid) di kosusian sampai obinsuhut iosido.

1. Yahya 4,16 Isai-nopo i mintoron sid samod, mintoron-no iosido-no sid Kinoringan sampai i Kinoringan nga mintoron-no sid dau.

1. Yahya 4,12 Topot ong misasamod tokou, tantu kentoron-no sid di tokou i Kinoringan sampai rumangkap-no i samod dau sid di tokou.

c) ong kikosuhutan

1. Yahya 2,17 Isai-nopo i sumuhut di kenginan do Kinoringan, ino-no ot apasi (mintoron) sampai penlaid.

1. Yahya 3,24 Isai-nopo i sumuhut di pinonuhuan dino, ino-no o kentoron sid dau om intoronon-no iosido dau. Antad sid Sundu dau di nitahak sid di tokou o kinelaan tokou do nokentoron-no iosido sid di tokou.

5. I kouvaan di gama mintoron sid Tuhan Kinoringan

Yahya 15,5 Boros di Yesus, Isai-nopo i mintoron sid dohon, om ioku nga mintoroni sid dau, iosido-no o monguva dot asapou.

1. Yahya 3,6 Sabap isai-nopo i mintoron sid dau, mengkod-no monimbaru do sala, om isai-nopo i kakali monimbaru do sala, ino-no it amu-po kotutun di Kristus.

1. Yahya 4,13 Iti-no o tanda do nokentoron-no iosido (i Sundu dot Osusi (sid di tokou om i tokou nga nokezo-no sid dau.

izo, piniizaan, mizo, ong mizo it ongoulun, mad jumadi dot iso-no ko piniizaan sid gama, buatan, pongitungan, upakat, tomodon om panangan. Ino dino antad sid ginavo dot ulun.

1. Varo piniizaan do Kinoringan om it ongoulun

1. Yahya 1,3 Kezo-kou di piniizaan dahai sid Ama om sid Anak dau Yesus Kristus.

1. Yahya 1,6 Ong momoros tokou dot nokezo tokou-no sid Kinoringan, do kakal tokoui mamantau sid kanavahan iadko iosido, tu sid kanavaho, tantu nokezo tokou-no sampai i raha di Yesus o momoug di tokou..

1. Kor. 1,9 Atatap i Kinoringan di minongodim dikou posuvang sid piniizaan dit Anak dau Yesus Kristus.

2. Kor. 13,13 I kovosihan di Tuhan tokou Yesus Kristus om i samod do Kinoringan om i piniizaan di Sundu dot Osusi pentoron-no sid dikou sokoviai. (Filipi 2,1 ong sukul varo piniizaan di Sundu, ka.)

1. Kor. 10,20 B oros di Paulus, Amu-oku engin do kezo-kou sid rogon.

2. Varo piniizaan dot ongoulun di nokosuhut-no di Kristus.

Usuran Rasul 2,42-44 Atatap-no i sokoviai ioti dino sumuhut di tudukan dit ongorasul om sid piniizaan, sid poginakanan di Tuhan Yesus om sid gama minta dua. Manjadi sokoviai it ongoulun di nakasip-no dino, miniizo-no ioti manambarang dit ongobarang dioti.

3. I piiniizaan sid ginavo, nga mongimbulai di gama manamod om misasamod

2. Kor. 8,4 Boros di Paulus, Ginumorot ioti sid dohon do kumimamamaa mongorukut di piumpugan sid Yerusalim (rukut bahagi di piniizaan dot ulun Kristian sid Yerusalim).

Ibrani 6,10 A-olangan do Kinoringan i gama dikou om i samod dikou di nembulai dikou bahagi di ngaran dau di minonulung-kou dit ongoulun dot osusi (i piniizaan dot ulun Kristian).

4. Varo-po harati bahagi di kopiizaan sid barang ko kopurimanan om pangalaman

q. Kor. 10,16 I subung di binarakatan di Tuhan om rinazou tokou, okon-ka ko ino-no i piniizaan sid raha di Kristus?

Filipi 3,10 supaya kaharati-okou-no di Kristus om i kuasa di kinogulianan dau sampai i piniizaan di kinapagasan dau do peradon-no dau i buatan-ku di kinapatazan dau.

Efesus 5,11 Kada-kou-no kigavul (kezo) sid aso guna i gagamaon do musut-susut, gamko atag ong pembulazo-no dikou ino.

PINIIZAN, ino pongoretan dino, okonko bai iso-no o harati sid Kitab Vagu. Gam ino pongoretan dino poumpug dit a-ko piro o harati om panangan iadko kesaan, i kopudan sid iseso o inintonon iadko sid binatang ko kampong, it iseo o harapan om kosipan sampai i koilangan sid iso o hal om i vaza mamung it a-ko piro it ulun sid iseso o gama ko barang. Kagi ino pongoretan dino apakai sid vaza manarang di guvas di Kristus iadko i boros di Paulus sid 1. Kor. 12 om rom 12, ko sid Injil di Yahya, retanko nakamung sid di Yesus om mintoron sid di Yesus (Yahya 14,20. 23; 1. Yahya 3,19-24; 4,15-16) om sid suriban di puun dot anggur om it ongoraan (Yahya 15,1-10). i puun di boros dino sid boros Yunani, ino-no, koinoneo = milang, mamahagi, osinggazung o gama ko manansanganu ko momodsanganu. Pengkaa dino i pongoretan koinonia - communio, ino-no o harati, kesaan, piniizaan, piumpugan, gorija.

Manjadi ong onsizon i pongoretan dino, iadino it ongovaza mamakai di pongoretan dino sid Kitab Vagu:

a) Piniizaan, ino-no, nakamung sid di Kristus. Isuhut di boros sid 1. Kor. 12,16-21, i Kristus o puun om ovud di piniizaan. Sabap iosido o minongontok di tokou, popezo iosido di tokou, it isai-nopo i mamung

sid di Kristus. Iadko bai it iso i guvas di Kristus o noinrubat diri, isai-nopo i milang sid poginakanan di Tuhan Yesus jumadi do kesaan. I Kristus o popezo di tokou sid guvas dau sampai potugas di tokou. Sinuhu dau ioti kavi do mizo sampai mitatabang mongopud di piniizaan dino, isuhut di boros dau sid ayat 17, okonko tumongkizad ko tumohiang sid piniizaan di guvas dino. Ino piniizaan dino okonko gama do riniba, inoi itahak di Kristus. I panangan dino, ino-no mizo sid di Kristus. Isai-nopo i mizo sid di Kristus mamung om mintoron sid piniizaan om kesaan dino, ino-no i piniizaan dit ulun Kristian, iadko i noboros sid Kosipan dot ulun Kristian, bahagi kotolu.

Antad sid harati di kezaan sid di Kristus manarang i Paulus di suntuan di **guvas di Kristus**. I duvo dino, iseso o harati (1. Kor. 10,17). I piumpugan dot ulun Kristian di nokopiumpug sumambayang, i milang sid poginakanan di Tuhan Yesus (1. Kor. 11,20-24) nga milang sid di Kristus. Sid poginakanan dino kopezo i piumpugan sid di Kristus do jumadi dot iso o guvas (1. Kor. 12,12...) Isai-nopo i nakamung sid poginakanan di Tuhan, nakamung-no sid di Kristus. Sabap ino, i piumpugan dino, guvas di Kristus. Ipat-ipat i ahli di piumpugan dino, nga nokezo di Kristus om nokezo dit ongoahli vokon. I kogumuai dot ulun di nehas-no jumadi do piniizaan di Kristus. Iti-no i kongkod di piniizaan di gorija kodori diri, isuhut di panarangan sid UR 2,44-46 om 4,35: *Manjadi i sokoviai it ongoulun di nakasip-no dino, miniizo-no ioti manambarang dit ongobarang dioti sampai pinojuval-no dit ongobarang om bohogizo-ogi i horogo sid sokoviai it ulun dit aso balanja*. I kopiizaan sid di Kristus o sabap do kotonggungan jawab bahagi di sokoviai di nakamung sid piniizaan do mitotorundakai om miaamung.

b) I piniizaan nokosuntu sid kopomodsuan om i poginakanan di Tuhan Yesus. isai-nopo i nopodsu-no sid ngaran di Kristus, nokezo-no di

Kristus om nokezo-no di gorija (Rom 6,4-11 om 1. Kor. 12,13) Pengkaa dino, sid poginakanan di Tuhan, kondiri di Kristus o mongingut om nakatanga sid poginakanan dino. Isai-nopo i nakamung sino, milang om mizo di guvas om i raha di Kristus (1. Kor. 11,17-27) sampai jumadi do koruhang di Kristus. Nokezo-no ioti di Kristus. Sabap ino, sid piniizaan dino a-kavasa do varo-po pongitungan do monodiri om sumodiri do iadko parti di pokihi di vokon. Ino piniizaan dino amu monodiri dit inantadon ko i kokukurozo dot ulun, lumundu ko mosikim. Kodung milang ioti di kakanan om ponginuman di Kristus, jumadi-no ioti do piniizaan di nokopiaandus. Ombo i hal di pehas dara dioti, nga notoliban-no sampai mizo ioti do guvas di Kristus. Ino piniizaan dino jumadi do kopiobpinezan sid gorija. Ong aranggal ino kopiobpinezan dino, mabak-no i piniizaan. Ong iningatan di Kristus sid poginakanan dau, tantu a-milo-milo kitugas ponong sid kopitotunggungan di sokovia i om i piniizaan di sokovia i.

Varo-po harati do piniizaan sid Injil. It ulun Kristian amu mongitung do miuma-no ong iosido-po kondiri o nokotorima di Habal do Kovosihan om i koponopulan di Kovosihan do Kinoringan, inoi nga agazo o ginavo dau polombus di Habal om Kovosihan dino (1. Kor. 9,23 Boros di Paulus, *Manjadi iti sokovia i diti gamaon-ku, baiko posurut-oku di Habal do Kovosihan, supaya ioku nga kezo di Habal do kovosihan dino.*) It ulun Kristian tumorima di kosipan om pelang dit ulun vokon sid kosipan dau sid saralom di piniizaan do Kinoringan om i gorija (Filemon 6 Boros di Paulus, *Mindamo-oku, supaya sumurut i piniizaan do kosipan dikou om kaharati-kou di sokovia i kavantango tokou sid di Kristus, ka*). Sid piniizaan dino miopud it ongoulun Kristian sid saralom di kapangahabaran di Habal do Kovosihan om sid ongosusaan, gima asaap i Habal dino. (UR 2,42 *Manjadi atatap-no i sokovia ioti dino sumuhut di tudukan dit ongorasul om sid piniizaan, sid*

poginakanan di Tuhan Yesus om sid gama minta dua). Isai-nopo i nakamung sid piniizaan dino, nga jumadi-no dot Ahli di piniizaan om koruhang di vokon (2. Kor. 8,23 I Titus dino koruhang-ku, iseso o gamaon-za, ka di Paulus). Filemon 17 Boros di Paulus, Sabap ino, ong banalko tumanggihai-ko dohon somungo-no iosido do iadko ioku o ketungan-nu,)

Ombo i nakamung sid piniizaan, nga *tumabi-no ioti dohon om i Barnabas iadko tanda do piniizaan*. Ino dino vaza momihot om posuntu di kesaan do gorija. Kristian antad di bansa do Yahudi om ongobansa vokon kopiamung sid iseso piniizaan di Kristus.

c) Piniizaan varo-po harati, kopiamung sid kosusaan om kosinangan. Nakamung tokou sid kapagasan om kinapatazan di Kristus, isuhut di boros di Paulus sid Filipi 3,10 *supaya kaharati-oku-no di Kristus om i kuasa di kinogulianan dau sampai i piniizaan di kinapagasan dau do peradon-no i buatan-ku di kinapatazan dau, ka; Kolose 1,24: Otomon-oku sid tanga do kapagasan-ku mongontok dikou, tu iti-no o vazaan-ku rumompok di kinapagasan di Kristus, ka di Paulus. 1. Petrus 4,13: Ot ongosinamadan-ku, kadan-kou-no kumovongo di kolosuo di kapagasan di korikot sid dikou, inoi nga kopizo-koui di kapagasan diKristus, ka di Petrus*. Ong kopizo tokou sid di Kristus, tantu sumuntu tokou di Kristus sampai sid kapagasan dau (Rom 8,17; Gal. 2,19). Iadino laid i rasul om i gorija kodori (2. Kor. 1,6-7 om 7,3) ko i piumpugan sid Filipi (Fil, 4,14) om kuran i gorija sid Filipi monorundakai om monginsukup di rasul (Fil. 4,15-16).

d) Piniizaan mongimbulai di gama mamahagi di kosukupuau dau sid ulun vokon. I Paulus mongonsug di gorija sid Korintus om Rom do mongorukut bahagi dit ongopiumpugan sid Yerusalim, gima varo kosusaan dioti (Rom 15,26 om 2. Kor. 9,13: *Nokopiakun-no ioti sid Korintus, tu mad kiutang sid diolo sid Yerusalim. ko, norikatan-no ioti di tanda di gama dikou gumamit di Habal do Kivosihan dot omomos o gama dikou monikib dioti, ka*. I rukut diri mad tanda om sijil di

kopihatan di kesaan dit ongopiumpungan di tasantanid-tanid o pomogunan om bansa. Bai i Habal do kovosihan o koponimban di ginavo dot ulun do sampai mizo ioti, minsanko mitanid o bansa om pomogunan. Na i Paulus momungaran di rukut diri do piniizaan (Rom 15,26). I hal do rohani om jasmani kopiamung om kopiganti (Rom 15,27 *Sabap it ongoulun dit antad sid labus, ong nobohogizan-no dioti dit ongohal dot osundu om i koposizan penlaid, apatut-no do monulung dioti sid Yerusalim do koposizon.* I Paulus mongonsug dit ongopiumpungan om it ongoulun Kristian do mamahagi om popilang di kosukupan om kokurangan (Gal. 6,6 *Manjadi i mokituduk dino atag, ong varo-varo i barang dau do kovoza mongopud di monuduk dino, ka di Paulus,* Rom 12,13 *Bohogizai-no it ongoulun dot osusi do kosukupan. Tulungai-no it ulun di mapit sid dikou, ka.* Okonko bai it ulun do kikosukupan o kadapat monulung om mamahagi minsanko ulun om piumpungan do mosikim, nga pelang om monukup-po dit ulun di lobipo okurang om mosikim. (2. Kor. 8,1-5) *Minsanko mosikim ioti om ogumu i kapagasan, nga kakali dot nakalaba i katamanan dioti sampai agazo i ginavo dioti mitutulung-tulung, ka.* Ino dino sumuhut di gama di Kristus, di *minsanko lumundu iosido, nga sinumikim, tu polundu dikou sid kinomosikiman dau, ka* (2. Kor.8,9). Ino gama mamahagi tantu tanda do kosipan, okonko bai tanda dot obintahak ot ulun. I piniizaan sid di Kristus osuntu sid gama di iadino.

e) I Kristus o mongimbulai di piniizaan, sabap iosido nokezo dit Ama dau. I Ama om it Anak nga nokopezo-no (Yahya 10,3 om 14,9-11) Antad sid piniizaan dino varo piniizaan sid pialatan dot ulun Kristian om it ongopiumpungan om ongogorija sid sompomogunan. (1. Yahya 3,6.7.9 *Isai-nopo i najadi dot anak do Kinoringan, amu-no kotimbaru do sala, tu nokentoron-no sid dau i Sundu do Kinoringan. Kagi i Kinoringan mongodim di tokou sid piniizaan dit Anak dau* (1. Kor. 1,9) om i piniizaan sid Sundu do Kinoringan (2. Kor. 13,13 om Fil. 2,1)

f) I piniizaan nga kiharati ponong sid kovian do pomogunan om i korikatan om kembulazan di karajaan om hoturan do Kinoringan. I piniizaan okonko bai hal biano, ino nga humarap om sumuntu di kotulukan di hiza do penlaid (1. Kor. 9,23 om Rom 8,17) Mangasip tokou dot okonko bai sid kapagasan o kopiamung tokou di Kristus, inoi nga rumikot tokou sid piniizaan di kohormatan di Kristus, ontokko i penlaid om ontokko i kembulazan om kotulukan di karajaan om hoturan do Kinoringan (2. Kor. 1,7 Boros di Paulus, *Manjadi agazo o harapan-ku sid dikou, tu elaan-ku-no dot i kohompit-kou di kapagasan dahai o kohompitan dikou di koruhunan, ka.*

izon, intoronon, valai = tempat do kentaranan, vokon-no lobong, tu retanko i lobong mad valai dit ulun minatai. (Ibrahim, Yakub)

janji, >batos, ong janji, pongoretan do Malazu dit inolos-no. Topot varo pongoretan do Momogun do lobipo atarang, ino-no batos om taru. Ong janji mad oribau o harati sid vaza mamakai. Ong perjanjian Lama dan Bharu, ino-no i Kitab Laid om Vagu, moniim do pembulai di harati sid Inggeris bahagi di pongoretan Testament, i harati dino, boros humuntad dit ulun di matai, vaza manarang sid anganak di kenginan dau do kuran mamahagi di tinungkusan om tumorima di kovosihan dau. Na i Kitab Laid mongolombus sid di tokou di kenginan do Kinoringan, supaya mopud tokou sid tinoguvangon do Kinoringan dot anganak tokou do Kinoringan om sasi di kokuasaan dau. Pengkaa dino i Kitab Vagu mamalang di kenginan di Yesus, i pinorikot sid riniba di samod do Kinoringan, supaya ajadi i riniba do gorija om piumpugan om guvas di Kristus.

a) I janji mongopud do kopianggazan

1. Sam 18,3 Minangajanji-no i Yonatan sid di Daud dot iadko rantas

pusod banal dau i Daud om patahak-ogi dau i sulung dau om i sasadang om pana dau sid di Daud.

2. Sam 5,1-3 Minangajanji-no i Daud sid ongosukod dot Israel.

b) kopilumbatasan di miraraha

Yosua 24,25 Manjadi ino't adau diri o kinapangagamaan di Yosua do janji sid ongoulun dino sampai nigili-no dau sid ongoulun it ongohoturan om pinonuhuan di vozoon dioti. Iri-ogi minanganu iosido dot iso o vatu dot agazo do niingkakat dau sid sahau dot iso o kazu dot apapag di sid valai dot osusi, i boros dau, lti-no vatu diti o sasi tokou, ka di Yosua.

Kinotimpunaan 15,18 Hiza-no dino o minangajanji i Tuhan sid di Abram dot, Itahak-ku sid mongkupu-nu iti pomogunan diti antad sid volit do Masir sampai sid bavang dot Efrat, ka di Tuhan. I hiza diri varo tigondob-no dot apui do miginasazou sid ongolinapakan dit ongodupot di ginaras di Abram.

c) i janji do Kinoringan, nga bai ensanan antad sid kovosihan di Tuhan Ulangan 7,7-8 Okonko ogumu-kou-no it ongobansa vokon o kinopilian dikou om samadan-kou di Kinoringan, inoi nga manamod i Kinoringan dikou om monuluk iosido di janji dau sid angaki dikou..

Kinotimpunaan 9,8 Minomoros-no i Kinoringan sid di Noa om it anganak dau dot, Lumbotoson-ku-no sid dikou om sid mongkupu-nu om sid sokovia i kiginavo dot, Okon lusuvon-po vagu o mongorongoi di kiongoginavo sitid pomogunan. Amu-ku-no polusuvon vagu iti pomogunan, ka di Kinoringan.

d) varo janji vagu antad sid Kinoringan

Yeremia 31,31 Boros di Tuhan, amu-no songkuro om mangajanji-oku-no vagu sid bansa-ku dot Israel om Yahuda. Ino janji dino amu merad di janji-ku sid angaki dioti di hiza di pinalabus-oku dioti antad sid

Masir. I janji vagu di jonjizon-ku sid bansa dot Israel, ino-no, Isurat-ku i Pinonuhuan-ku sid ginavo om sid pongitungan dioti dino. Ioku-no diti, i Tuhan o mongolumbatos do iadino, ka di Tuhan.

Matius 26,28 Boros di Yesus, Iti-no raha-ku o janji vagu, kouza bahagi di kinogumuan, supaya varo kaadaan do kasalaan.

2. Kor. 3,6 Boros di Paulus, i Kristus minanahak dahai di kuasa pahabal di janji vagu sid sionggo-nopo. Ino janji vagu do Kinoringan dino okonko baiko hurup, inoi nga Sundu. Sabap i Sundu mamasi, ka. Ibrani 6,8 Topot i Yesus nokotorima-no bianco do gamaon di lobipo kiguna, sabap napangkat-no iosido do momialatan di janji di lobipo avantang mantadko it ongojanji laid diri.

e) suvai tumorima om monuluk di janji om apakai-ogi

Ulangan 7,12 Ong osuhut om agama dikou i sokoviai i hoturan diti, kosunu-no dot i Tuhan Kinoringan momihot sid dikou di janji om i kobinsianan dau, i nisumpa dau pajanji sid angaki dikou, ka di Musa.

Kinoringan, ong Momogun: antad sid puun haring= i keso do sokoviai, pinsan haring, ino-no i pinsan insan. Varo-no ong Kinohoringan = i hal di nokogulu banal i minongimbulai di sokoviai. Nengat-no laid do Momogun do varo Kinoringan, ino-no o harati, i kuasa di minongimbulai (Minamangun) di pomogunan om avan, nga tasantanid-tanid o kiroon dot Momogun: varo't a-ko piro o kinoringan, ka, turu, ka. Varo apat o pongoretan, ino-no: Kinoringan, Ingot, Minamangun, lurug kisundu. Kinoringan om Ingot mad pongoretan ko ngaran. Minamangun ko lurug kisundu baiko ngaran di maanalahs dot isai ko minonguro, ka. Nokensodu-no i Kinoringan antad sid riniba, ka. Kinoringan monunda dit ulun iadko pangazam sampai mangakani-po dit ongoulun, ka. Alambat o gama dot ulun mongohondom do

Kinoringan, alambat-no o gama sumamba sid Kinoringan om pasamba do barang. Suvai ahatul o poginakanan om pasamba-ogi. Ong sid Kitab: I Kinoringan o minongurug di sokoviai it avan om pomogunan, it ensanan i vinangun, it antad sid Minamangun. It Imam i minonurat di Kinotimpunaan 1, na katama mamakai di pongoretan do Kinoringan (ELOHIM = ong Arab EL ko Allah) dit apakai laid dit ongobansa vokon sampai sinumasi dot antad sid Kinoringan dino nokembali i sokoviai i vinangun, sabap iosido o minongurug do baiko i boros om kabang dau o minangajadi di sokoviai. Suvai i hiza di Musa do mokitarang banal i Musa dot varo-no ngaran banal do Kinoringan. Iri-ogi minanarang iosido dot i YAHVE o ngaran dau, i KAPAPASI, ka, ko i varo laid om bianco sampai penlaid, iri-no ko iri, ka. Vokon-no ong i Kitab mamakai i Yahve Kinoringan ko sid Momogun, i Tuhan Kinoringan, ka. Varo narait it malaikat do Kinoringan, i Sundu do Kinoringan, i Kinoringan di Ibrahim om Isaak om Yakub, ka, i kohormatan do Kinoringan ko i boros do Kinoringan ko i Kinoringan di kinasapahan.

koruhang, it ulun vokon di sid simbol ko it osomok om otoguvangan, ong mivozo i duvo it ulun, i harati, it iso kumoruhang di koduvo, tu kenginan dau mozo di koduvo, it elaan i ralan om rikoton ko it akansang mangapad sid tanga do ralan. Vokon-no ong bai kokoruhang sid iseso o rikoton, vokon-no ong alaid-laid, nga mikoruhang, nga kakali okonko mianggai. Ong mianggai, miobpuput banal i duvo it ulun dino sid gama, om siombo-nopo dot amu-no mitatak.

kinoruhangan di Yesus, I Yesus minongingut di hopod om duvo i kinoruhangan dau, isuhut di koubasan dit ulun Yahudi do kodung varo

rabi, varo koruhang dau di mozo-vozo mokituduk sid gama monorundakai di rabi. Momodsusui it ongokoruhang di rabi dioti. Ino dino miabal di gama do varo ongumulok ot ongondu di kumoruhang di bobolizan iadko kinambo do mitoruai om longon dau. Imatai sid Matius 10 om Lukas 9 om 10 do kuran i Yesus mongodim om monuduk di kinoruhangan dau.

kodim, mongodim, mongingut

I Kinoringan mongodim dot ulun sid kuasa om hoturan om karajaan dau. Ino gama dau mongodim dino o kembulazan di kovosihan do Kinoringan sid ulun. Ong okodim it ulun do Kinoringan, okonko porosuma i gagamaon dot ulun, gam it ulun humarati do kuran banal i tomodon om vazaan di gagamaon dau.

I Kinoringan mongingut dot ulun siombo-nopo o kentaranan dau, supaya it ulun jumadi dot ulun Kristian sino sampai sumasi sino di kovosihan do Kinoringan, dot ensanan i ginavo dau om gama dau pembulai di gama dau mangasip sid Kinoringan. Iadino it ulun dino suntuan di kovosihan om samod do Kinoringan.

It ulun humarati dot i gagamaon dau okonko kitomodon kondiri do mokilulundu ko mokisasavat ko mokisisiin om mokisisinang, inoi nga koburuo it ulun dino di samod do Kinoringan sid saralom di piumpugan dot ulun Kristian sampai tumabang iosido sid tanga do piumpugan sid dau dot intoronon posurut di karajaan do Kinoringan.

1. I gama do Kinoringan mongingut

a) Kinoringan o monimpuun.

Matius 20 I sanganu do kabun mongingut om pakaraja dit ulun di mokisusuul

Yahya 10,27 I domba-ku kening di dolou-ku, ka di Yesus.

b) I Kinoringan mamakai di Habal do Kovosihan om it ongoponulung do mongingut dot ulun.

2. Tim. 1,9 Nokodim tokou-no jumadi do bansa do Kinoringan, ka di Paulus.

Ibrani 3,1 Sabap ino, ot ongobpinai di nosusi-no om nakadapat-no di kodim do pakaa sid surga, tingaha-kou-no sid di Yesus, ka.

c) Nokogulu minongodim i Kinoringan di bansa dot Israel, iri-ogi it ongobansa vokon

Usuran Rasul 13,46 Boros di Paulus, lokoi diti, tantu ikou-no ot poguluvonon mangahabal di boros do Kinoringan. Topot ong amu-kou mongining om amu-kou sumuhut di ralan do koposizan penlaid, lumombus-okoi-no sid ulun vokon.

Matius 22,14 Ogumu-no i linigou, nga okudik o nopili, ka di Yesus.

Matius 19,30 Ogumu i nokogulu di kotohudi om ogumu i nokotohudi di kogulu, ka di Yesus.

Matius 11,28 Siti-kou-no o sokovia i it ulun di nopogos om nemvagatan, impanggalan-ku ikou, ka di Yesus.

1. Kor. 1,26 Hondomo-no do kuran i gama do Kinoringan mongodim dikou...Okonko ogumu ot ongoulun di kiongohukum o vangun o nokodim om okonko ogumu ot ulun di kiongokuasa om okonko ogumu ot ulun do kipangkat o tirsan.

Lukas 14,21 Pinggazadai-no siti it ongoulun do mosikim om i pukung om it ongoulun do bolou om kimai, ka di tuan.

d) I rikoton dit ulun dit iningutan do Kinoringan

1. Petrus 2,9 Ikou-no dino i varis di nopili-no om i piniizaan di pakarajaan om rurungan dot osusi, i bansa do pasok do Kinoringan, supaya mangahabal-kou di kogo zoo di nagama do Kinoringan, i

minongodim dikou antad sid otuvong, posuvang dikou sid kanavahan dit aso kerad, ka.

1. Tes. 2,12 supaya apatut i kavazao dikou sampai kopionong do Kinoringan, i minongodim dikou sumuvang sid karajaan dau om sid kohormatan dau.

1. Petrus 5,10 I Kinoringan, it ovud di sokoviai i kovosihan, i minongodim dikou posuvang sid kohormatan dau di sampai penlaid, avazaan-kou-ogi do kapagasan di baiko oduruk, iosido dino o mangatag om mangansang om momihot om monungkod dikou.

1. Kor. 1,9 Atatap i Kinoringan, i minongodim dikou posuvang sid piniizaan dit Anak dau Yesus Kristus.

Galatia 5,13 Ikou dino nokodim-kou-no sumuvang sid kolobusan, ot ongoobpinai, ka di Paulus.

1. Tes. 4,7 Tu okonko kinodim tokou do Kinoringan do posuvang di tokou sid kasakahan, inoi nga sid gama posurut di kosusian, ka di Paulus.

1. Kor. 7,15 I Kinoringan minongingut dikou sid kopioondusan.

Efesus 4,4 Nokodim-kou-no sid iso o harapan dit iso-no o guvas om iso-no o sundu om baiko iso-no o Tuhan om iso-no o kosipan om iso-no o kopomodsuan.

2. It ulun dit okodim

a) amu mongining it ulun

Matius 13,13 Kitolingoi dara ioti, nga amu kening antawa humarati, ka di Yesus.

Rom 10,21 Konoruvo-nopo dot adau nga mahang-kahang i palad-ku mongingut di bansa dit amu obinsuhut om obingguvail-po, ka di Kinoringan.

b) It ulun monorima di kodim do Kinoringan sampai sumuhut

2. Petrus 1,10 Pagavi-kou-no banal mihot, supaya opihot i kodim di kinopilian dikou.

Rom 8,30 Manjadi ombo i nahatul-no, tantu ioti-no o nokodim. Ong nokodim-no, tantu nembanaran.

Filipi 3,14 sampai mokiririkot-okou-no sid rikoton om sid pokioonuvan, o ino-no i kodim dit asavat, it antad sid Kinoringan.

c) I pigagama om i kinopilian dot ulun

1. Kor. 7,20 Manjadi ipat-ipat it ulun ruruton banal i kavazao dau di nokodim-no iosido. Bang nokodim-ko-no dot uripon-ko-no dino, kadan-no humongkob..

Kristus, (Mal. Almaseh, IBrani Masias) = it ulun di noumahan, tu nabakal-no bahagi di pangkat do raja. Amu-po kembulai i kuasa dit ulun dino, rontob noumba-ogi do Kinoringan om i bansa dot ulun dot Israel. Iri-ogi i Kristus, najadi-no do ngaran koduvo di raja di rumikot-ogi i palabus di bansa dot Israel antad sid kinuripanan, ka di boros di nabi sid Babil. Na sid habal di Matius, Markus, Lukas om Yahya ino pangkat dino napakai bahagi di Yesus om i gama dau. Iri-ogi sid di Paulus najadi-no do ngaran banal di koduvo di Tuhan Yesus.

1. Ong i raja di bansa dot Israel.

1. Samuel 2,10 I Tuhan mongohukum di sompomogunan om manahak do kakansango sid raja di nopili-no dau (noumahan).

Yesaya 45,1 I Tuhan i minamangkat di Kores do raja, ka di nabi..

1. Raja 16,22 Boros do Kinoringan, Kadan-kou-no tumudu di Masias-ku.

2. I raja do penlaid, di rumikot-ogi.

Zabur 2,2 It ongoulion sumaap di raja di nopili (noumahan) do Kinoringan.

Lukas 23,2 Minangakun i Yesus dot iosido-no ot i Kristus. om 23,38 i surat sid pinasangkapan, ino-no, I Kristus, i raja dit ulun Yahudi.

3. I Yesus manarang dot Kristus iosido.

Matius 26,63 Boros dit imam, Valangai-okoi-no ong banalko ikau-no ot anak do Kinoringan, i Kristus, ka. Boros di Yesus, Noboros-nu-no beno, ka.

Markus 9,41 gima koruhang-kou di Kristus..

Matius 16,16 Boros di Petrus, Ikau-nobo dino ot i Kristus, it Anak do Kinoringan i kapapasi, ka.

Yahya 4,25 Boros dit ondu sid talaga, Elaan-ku-no dot i mananggung rumikot, i retan dot i Kristus, ka.

Ponimpa-nopo i Yesus, ioku-no beti i piboro-boros-nu, ka.

4. I kososizan dot ongorasul

Usural Rasul 2,36 Boros di Petrus, i Yesus, i nisangkap dikou diri o pinangkat do Kinoringan dot Tuhan om Minananggung, ka.

1.Kor. 3,23 Boros di Paulus, Topot ong ikou dino di Kristus-no om i Kristus dang Kinoringan-no.

1. Yahya 2,22 Isai-ka i momudut ong okonko it amu mangakun dot i Yesus, ino-no ot i Kristus. I sangod di Kristus, ino-no it amu tumorima dit Ama om it Anak.

Yahya 20,28 Boros di Tomas, O Tuhan-ku om Kinoringan-ku, ka di Tomas.

Yahya 6,69 Nakasip-okoi-no sampai nohorotizan-za dot ikau dino it Osusi antad sid Kinoringan, ka di Petrus.

5. I Kristus, anak do riniba o pongoretan dau

Matius 16,13 Dinuat di Yesus dot, Isai-ka o pamarasan dot ongoulun dit Anak do Riniba?

Usuran Rasul 7,56 Boros di Stefanus, Imatai-no, emot-ku-no do nogiang-no i surga om it Anak do Riniba nga pengkakat-no sid vanan do Kinoringan, ka.

6. I Kristus, ino-no i Tuhan

Lukas 2,11 Boros di malaikat, Nakalandai-no biano sid dikou i Mananggung, o ino-no i Kristus, i Tuhan.

7. I Kristus dino, ino-no o Sundu

Yesaya 11,2 Sid dau-no ot intoronon di Sundu di Tuhan, i Sundu do kajangkaan om kohorotizan..

Matius 3,16 Emot-no di Yahya i Sundu do Kinoringan do minindahu-no iadko burung asang sumondot sid di Yesus..

1. Tim. 3,16 I Yesus nembanaran di Sundu, ka di Paulus.

8. I Kristus, it Imam do kipangkat.

Ibrani 4,15 Varo't imam tokou do kipangkat dot agazo banal, ino-no i Yesus, it Anak do Kinoringan.

Ibrani 7,24 Ong i Yesus, tu apasi iosido sampai penlaid, amu-no sumimban i gagamaon dau dot imam iosido.

1. Yahya 2,1 Varo mongontok di tokou sid Ama, ino-no i Yesus Kristus, it abanal

9. I Kristus ino-no koluu do Kinoringan.

2. Kor. 4,4 I kanavaho dino mongimbulai di kohormatan di Kristus om i Kristus dino mongimbulai di kohormatan do Kinoringan.

10. I Kristus-no i kotuaan di sokoviai i vinangun

Kolose 1,16 I Yesus o nipongurug di Kinoringan di sokoviai sampai iosido-no o korikoton di sokoviai.

Rom 8,29 I Yesus o suntuan, supaya iosido ajadi do kotuaan dit okonko piro-piro ot ongobpinai.

11. I Kristus o lumintang di Kinoringan om i riniba.

1. Tim. 2,5 Tu i Kinoringan iso-no sampai sid pialatan do Kinoringan om i riniba, iso-no, ino-no i Kristus Yesus i rinibai, i minanahak di kondiri dau..

12. I Kristus mongompus di gama dau

Pilipi 2,11 supaya sid ngaran di Yesus sumingkudou i sokoviai i sid surga om i sid pomogunan om i sid saralom do tana, om ipat-ipat i dila nga mangakun-no dot, i Yesus o Tuhan, tu mamantug di Kinoringan, it Ama.

Ibrani 13,8 I Yesus Kristus amu sumimban, konihab om iti bianco sampai penlaid.

kuasa, kekuasaan, I Monguasa di sokoviai

I hak do mangagama om mongusaha ontokko sid iso o tempat, pomogunan ko bansa.

Na sid Kitab asarok apakai i pangkat dot, I Monguasa di sokoviai bahagi do Kinoringan, tu i Kinoringan minongurug di sokoviai dot okudik nga aso dit a-kosuvang sid kuasa dau. Iosido mamarakat om

mangaratu do kovosihan. Na i Tuhan Yesus mamahagi-no dino kuasa do Kinoringan om i riniba dit aso kuasa sumahau di kuasa do Kinoringan ong sukul mangasip it ulun.

1. I Kristus nobohogizan di kuasa do Kinoringan

Matius 28,18 I sokoviai i kuasa sid savat om sid riniba, nitahak-oku-no kavi dit Ama-ku, ka di Yesus.

Matius 11,27 Sokoviai i nunu-nopo tinahakan-oku dit Ama-ku, ka di Yesus.

Matius 9,6 I Yesus kikuasa mangada do sala

Yahya 5,27 I Yesus kikuasa do mongohukum (Matius 25,31-46)

1. Kor. 15,27 I Yesus minangaladtak-no kavi di nunu-nopo.

2. I Kinoringan kikuasa do mamarakat

Kinotimpunan 17,1 Boros di Tuhan, loku-no diti o Tuhan i monguasa di sokoviai. Suhuto-no i sokoviai i kenginan-ku sampai tulido-no i ginavo-nu, ka.

Kinot. 28,3 Boros dit Ishak, I Kinoringan, i monguasa di sokoviai o mamarakat dikau, ka.

Ulangan 32,39 Boros do Kinoringan, Elooku do mamatai om mamasi-no vagu, ka.

Zabur 77,11 I palad do Kinoringan nokelo do monimban di sokoviai.

Markus 10,27 Tu sokoviai iti el-elaan kavi, ong Kinoringan, ka di Yesus.

Lukas 3,8 I Kinoringan kikuasa do posiliu dit ongovatu siti dot angaanak di Ibrahim.

3. I Kinoringan kikuasa do mongohukum

Ulangan 32,36 I Kinoringan mongohukum di bansa dau.

Amos 9,5 I Tuhan Kinoringan, i monguasa di sokoviai, Bang kamaon dau i pomogunan, tantu rumidi i pomogunan sampai momodhongkob-no kavi it ongoulun. 9,7 Sabap i mato di Tuhan Kinoringan o mongontupat di bansa do kisala, tu tonuson dau.

4. I riniba nga okugui, topot it ulun di mangasip kaanu di kuasa do Kinoringan.

Zabur 62,10 Ong i riniba, tantu aso-no.

Markus 10,27 Bang baiko riniba o mongitung di buatan dino, amu otinganan.

1. Kor. 2,14 It ulun di sumuhut di ginavo dau kondiri, amu katalahas iosido di Sundu do Kinoringan.

Galatia 6,3 It ulun di mongittung do kingaran iosido, baiko monipu di kondiri dau.

Filipi 4,13 Boros di Paulus, nokelo-okuku do iadino, tu i Tuhan gima pakansang dohon.

Zabur 18,30 Ong sukul kovozi-ko dohon, elo-okuku do lumapai dit ongokuta.

2. Kor. 12,9 Boros di Tuhan sid di Paulus, Ong kikovosihan-okuku-no sid dikau, osukup-no. Tu sid kokuguzo-nu o kembulazan di kokuasaan-ku, ka.

kusai, ondu, antad di kinourugan aso bida kananganko i garal om bantug do kusai om ondu. Ong sid undang-undang dot ulun Arab om Yahudi varo gama momingig di kuasa di kusai om it ondu. Vokon-no ong it ondu mad bai barang di kusai. I kusai manansanganu di savo dau. Iosido o kikuasa do manansavo om mangada. Ong it ondu bai

mokisavo om mokiada. Mad miabal it undang-undang dot Israel om Momogun, minsanko ong sid Momogun, banalko kihak it ondu sampai ajadi do bobolizan, it ulun di mongontok om momialatan ponong sid ongorogon. Antawa ong kopisavo, i kusai muli sid valai do molohing dot ondu sampai mad uripon iosido sid valai dit ivanon dau miabal di Yakub sid valai di Laban.

Kinotimpunan 1,27 ladno keno o kinourugan di riniba koluu di kobuatano do Kiningan, Kusai om ondu ot inurug dau.

Kinotimpunan 2,18 Boros vagu di Tuhan, Amu atag ong iseso i riniba dino. Osuhul-no ong tahakan-ku ialo do koruhang do kotimbang dau. 2,23 Banalnoko ohigak it ulun dino. Boros dau, Atok, varo-no koruhang-ku do iadko ioku, ka. Ondu ialo dino, tu antad sid kusai o pinongonuvan, ka dit ulun dino. Ino-no o sabap do tumongkizad dot ama om idi dau i kusai, tu mobpuput di savo dau sampai ioti miduvo dino iso-no o guvas (ko, varo kesaan). *Ong Ibrani kusai = ish, ondu =isha*

Galatia 3,28 Aso-no bida-po vagu dot uripon om tuan. Aso-no bida-po vagu do kusai om ondu, tu ikou dino sokoviai, ajadi-kou-no dot iso-no sid Kristus Yesus.

Ong varo't a-ko piro ot ongoboros om kovosihan di Paulus di momingig di kusai om ondu, ino dino antad sid gama dau mongoguna dit undang-undang dit ongoulun diri di minongusiba di kavazao dot ongondou, antawa ong varo't ondu di mongolumpatiu di koubasan dot ulun, iri-ogi i Paulus moniim do mangatag ombo it amu atag ko ombo it akahag om akanggau. Na mongonsug i Paulus dit ongokusai dot: Efesus 5,25 Ot ongokusai, samadai-no dikou it ongosavo dikou, iadko i gama di Kristus manamod do gorija. I kusai di manamod di savo dau, ino-no i manamod di kondiri dau.

labus, kolobusan, kinolobusan, kobebasan, >kemerdekaan
>kosopulan

i vaza mamakai dit a-konong, retanko it ulun dit okonko ulun Kristian, ino-no ulun labus. Palabus, nga i gama do palabus dot ulun, uripon, dupot antad sid kinuripanan ko insod ko kukurungan.

a) it amu ouripanan ko otorungku om oporintaan

I bansa dot Israel nouripanan sid Masir om iri-ogi sid Babil sampai hiza di Yesus nokosuvang sid kuasa di Kaisar do Rom. Iti-no o sabap banalko ginumrot it ongoulun i retan do Zelotes do lumabus sampai monunsub di porinta do Rom. Antad di gama om pongitungan do iadino, humalib om mogoduw ioti di Yesus, tu i boros dau, I kabanaran om katapatan o palabus dikou, ka dau. Ponimpa-nopo ioti, lokoi diti ranzat di Ibrahim sampai a-insan dot nouripon-okoi dit isai-nopo, ka. (Yahya 8,32) Sid Kitab ino pongoretan dino apakai bahagi di kolobusan dit ongoulun dot Israel antad sid Masir om Babil ko sid harapan dot it bansa dot ulun Yahudi kalabus sid hoturan do Rom.

Kolobusan ino-no i kavazao dot ulun ko bansa dit okonko nouripanan, okonko varo sanganu, okonko nohoturan do vokon ko kuran-nopo. Okonko okuasa do sala ko pinonuhuan, kinenginan kondiri dot ulun o mongohoturan om mangagazad dot ulun dot kalai okonko osizau it ulun iadko dupot, kokirai, i karabau di lumanjang sid kohubungan. I kolobusan ko kemerdekaan dot ulun Kristian ino-no, nilabus sid kuasa do huntung om kasalaan om karaatan, nga noboludan om nakakapit sid kenginan do Kinoringan. Sabap i boros do Kinoringan om i Habal do Kovosihan iadko kokovidon dit ulun om iadko ralan ko bantaran do sunsuzon dot ulun, supaya kemumui banal.

I kolobusan di mad kenginan kondiri, isuhut di buatan do dupot dit amu engat i ralan ko nunu-nopo songhoturan, iadko nouripanan di

kenginan om karalazan om koozian kondiri. Okonko it ulun o kumavid di koozian dau, inoi nga i koozian o momorinta dit ulun om i ginavo dau sampai bai uripon-po iosido di kenginan om koozian kondiri.

Na i gama di Yesus bahagi di riniba, losido o palabus di tokou antad sid torungku do karaatan om kasalaan.

Yesaya 61,1 I Tuhan minamangkat dohon do mangahabal sid ongoulun di nokotorungku do nohuzadan-no it ongobalud om palabus-no dioti.

Yahya 8,32 Boros di Yesus, i kabanaran dino o palabus dikou antad sid kinuripanan, ka di Yesus.

Yahya 8,36 Ong ilabus-kou dit Anak, tantu kalabus-kou-no antad sid kinuripanan, ka di Yesus.

Rom 6,18 Manjadi nakalabus-kou-no sid kuasa do kasalaan om najadi-kou-no dot uripon di kabanaran.

Rom 8,2 I Kristus o pinalabus dohon antad sid hoturan do sala om kapatazan, ka di Paulus.

Rom 7,24 Ai atok, isai-no-ka o kapanapul dohon potindal antad sid guvas i dang kapatazan diti?

Rom 8,21 Topot kiharapan do kalabusi i sokovia i vinangun antad sid kinouripanan di kobinasaan om osikiban di kohormatan dit anganak do Kinoringan dit amu-no okuasa di nunu-nopo.

Rom 8,23 monginud tokou di kojodizan tokou dot anganak do Kinoringan, o ino-no i kosopulan di guvas tokou, ka di Paulus.

Galatia 5,1 I tokou diti pinalabus di Kristus, posuvang sid kolobusan. Sabap ino, kavid-kou dino kolobusan dino om kadan-kou-no sumulung vagu di sulungan di kinouripanan diri.

Galatia 5,13 Ong ikou dino, nokodim-kou-no sumuvang sid kolobusan. Rontob, kadan-kou-no kumavid di kolobusan iadko sangkut do guvas

muli sid Kinoringan, ka di Paulus.

1. Kor. 6,12 Sokoviai kavasa bahagi dohon. Topot amu-oku mokiuripon di nunu-nopo.

1. Petrus 2,16 ladko it ulun di kikuasa do kakal-kou amu mamakai do kuasa dino iadko kurilib di posusut di karaatan, inoi nga iadko ongouripon-kou do Kinoringan.

1. Kor. 8,9 Topot ontupato-no banal, supaya ino kuasa dikou okonko jumadi do vatu di kosoduvon dit ongokukugui.

Galatia 3,28 Aso pitonidan-po vagu dot ulun do Yahudi om ulun do Yunani, uripon om tuan, kusai om ondu. Tu ikou dino sokoviai, ajadi-kou-no dot iso-no sid Kristus Yesus.

b) varo kolobusan antad sid kinouripanan do karaatan om kasalaan ko i kuasa do huntung (kapatazan) om it adat di momogos dot ulun. Kondiri dot ulun mongitung dot ombo it atag om amu, araat om amu. Sid nunu-nopo sanggama-gamaon mozo it ulun di kenginan do Kinoringan, iadko nohorotizan di ginavo dau dot okonko iadko bondira iosido di sumuhut di barat. Ong varo pongitungan dot ulun dot obebas iosido do sumuhut ko amu di kenginan do Kinoringan, tigogi, ouripon iosido do kenginan om kuasa vokon ko i kozian kondiri, minsanko a-elaan om ohorotizan dau.

Rum 8,21 Boros di Paulus, Kiharapan do kalabusi i sokoviai i vinangun antad sid kinouripanan di kobinasaan om osikihan di kohormatan dit anganak do Kinoringan dit amu-no okuasa di nunu-nopo.

kolobusan sid Kitab, I tudukan di Yesus sid Burul manarang do kuran it ulun sumuhut di pinonuhuan dot asamod, it antad sid ginavo dau, okonko tu ginara-garatani iosido.

a) ino kolobusan dino o patahak om karisma di Kristus, okonko vangun om buatan dot ulun.

Yahya 8,36 Boros di Yesus, Ong palabus dikou dit Anak, tantu kalabus-kou-no antad sid kinuripanan (do kasalaan om karaatan om kozian).

Rum 8,2 I hoturan do Sundu o pinalabus dohon antad sid hoturan do sala om kapatazan

2. Kor 3,17 Siombo-nopo i kisundu i Tuhan, varo-no kolobusan.

Gal. 5,1 I tokou diti pinalabus di Kristus, posuvang sid kolobusan.

b) Suvai kumavid di kolobusan dino ponong sid kenginan do Kinoringan, supaya amu otuntuvad vagu i hoturan,

Gal. 5,2 Kadan-kou-no sumulung vagu sid sulungan di kinouripanan diri.

Gal. 5,13 Rontob-nopo, kadan-kou-no kumavid di kolobusan do iadko sangkut di guvas muli sid Kinoringan, gamko mitutulung-kou-no sid saralom di gama dikou manamod.

1. Kor. 8,9 Ontupato-no banal, supaya ino kolobusan dikou okonko jumadi do vatu di kosoduvon dit ongokukugui.

laid > penlaid

lanut, alanut, kolonutan, amu tumipu, iadko bungug, kulit, kogoos, atahan,

malaikat, ino-no susuhoon do Kinoringan, iadko sundu dot okonko dang riniba. Vokon-no ong iti pongoretan napakai-no bahagi it ongoulun di manaud di piumpugan, iadko nabi ko imam (Hagai 1,13 om Kentalangan 2-3)

1. I malaikat kumavid di hukum do Kinoringan sampai manala om

mongohukum dit araat

Kinotimpunan 3,24 It ongomalaikat minangagajaga di lalavangon di kabun dot Eden.

2. Raja 19,35 It ongomalaikat minamamatai dit ongosojal dot Assur.

Usuran Rasul 12,23 I malaikat minongohukum di raja Herodis sampai minatai i Herodis dino.

Matius 13,49 It ongomalaikat monodiri dit araat om it avasih

2. Tes. 1,7 Ong kembulai-no i Tuhan Yesus antad sid surga vozo-vozon dit ongomalaikat di kikuasa.

2. Varo-po malaikat do dang karaatan:

Zabur 78,49 Pinapanau dau it ongomalaikat dot araat sid pialatan dioti dino.

2. Kor. 12,7 Boros di Paulus, varo rugi sid guvas-ku antad sid malaikat di vozon do rogon di nipomogos dohon, supaya amu-oku mokisasavat.

3. It ongomalaikat dino nga ponuhu di mongovit di kovosihan do Kinoringan.

Sid Kitab Laid sinumamung i malakiat di Ibrahim Kinotim. 22,15

di Musa Kolobusan 3,2

di Yosua Yosua 5,15

di nabi Elia 1. Raja 19,5

di nabi Yesaya Yesaya 6,6

Sid Kitab Vagu

di Zakarias Lukas 1,11

di Mariam Lukas 1,26

di manaud do domba Lukas 2,9 di Petrus Usuran Rasul 12

4. It ongomalaikat ponulung di Tuhan Yesus

Matius 4,11 Minogidu-no i vozon do rogon dino antad sid di Yesus

sampai rumikot-no it onongomalaikat, tu monulung di Yesus.

Matius 26,53 Ong mindamo-oku-ogi sid Ama-ku, tantu biano diti nga tahakan-okui dau do malaikat do hopod om duvo legion, ong mindamo-oku-ogi, ka di Yesus.

Yahya 1,51 Boros di Yesus, Kemot-kou dit ogiang it avan, om it ongomalaikat do Kinoringan mindahu mindakod rumikot sid Anak do Riniba, ka di Yesus.

Markus 16,5, Lukas 24,23 om Usuran Rasul 1,10 It ongomalaikat nokovozo i hiza di kinogulianan di Yesus.

5. It ongomalaikat mozo-vozo dit ongorasul i hiza di kembulazan di piumpugan dot ulun Kristian.

Usuran Rasul 5,19; 8,26; 10,3; 12,7; 27,23.

6. It ongomalaikat posurut di piumpugan.

1. Tim. 3,16 minokimot dit ongomalaikat, ka di Paulus

1. Petrus 1,12 Ino habal dino, minsanko it ongomalaikat nga tiimoti.

Lukas 15,10 Boros di Yesus, ladno dino i kotomon sid tinoguvangon dit ongomalaikat do Kinoringan, sabap it iso ot ulun do kisala di muli sid Kinoringan.

Matius 18,10 It ongomalaikat dioti sid surga soumul-umul potoguvang sid vuros dit Ama-ku sid surga, ka di Yesus.

7. It ongomalaikat mangatod di minatai

Lukas 16,22 Manjadi minatai-no it ulun do mosikim dino sampai inovit-no iosido dit ongomalaikat porikot sid kangkab di Ibrahim.

8. It ongominatai kolu di ongomalaikat

Usuran Rasul 6,15 Na nemot-no dioti do kibinahang-ogi i vuoro di Stefanus do iadko vuoro do malaikat.

Matius 22,30 I hiza do kogulianan aso-not ulun do manansavo om mokisavo, inoi nga iadko i kobatano do malaikat sid surga, ka di Yesus.

mosikim, (Mal. miskin) ulun dit aso kosukupan di nunu-nopo, kakanan, intaranan, barang, kosulungan

Ong sid Kitab, i mosikim it ulun koginavaan do Kinoringan. I kosikiman dot ulun okonko vangun dau ko nasip, inoi nga antad sid karaatan sid pialatan do riniba. Sabap i gama monongkudau it ulun mongimbulai di kosikiman dot ulun vokon, gima momodrusuk ko mokimamaha om manambarang it iso it ulun do monolod om manakau ko manganu sid ulun vokon. Na antad di kodori banal mogihim i Kinoringan do mangatag siombo varo karaatan dot it iso mangakan di koduvo. Iti-no o gama di kabanaran do Kinoringan, supaya sokovia i ongoulun varo kosukupan om kosinangan. Sabap norodsit-no i mosikim sid razat, i Kinoringan tumabang om monukung dit ulun do mosikim.

It Anak do Kinoringan minomili di kobatano do mosikim, tu sumapai dit ulun dot osusa. Sid tanga dit ongomosikim minogihim i Yesus di kinoruhangan dau om ginazad-no dau ioti sid ralan do mosikim. It ulun do mosikim amu osuba di kolunduan, tu otibang iosido humarap sid kovosihan do Kinoringan, tu amu gima humarap di kosukupan kondiri. Topot ong it ulun do Yahudi, om vokon-no ong ulun biano, minongitung dot i komosikiman dino iadko sala dot ulun. Kodung lumundu, tantu barakat do Kinoringan. Topot ong mosikim, tantu nolupu-no do Kinoringan, ka.

Ulangan 15,4 Polobuso-no it obpinai-nu (it ulun vokon) antad sid

longon-nu, supaya aso mosikim sid pialatan dikou, sabap nabarakatan-kou-no di Kinoringan sid pomogunan dit itahak dot ipotungkus dikou, ka do Kinoringan.

Matius 26,11 It ongoulun do mosikim soumul-umul sid dikou, ka di Yesus.

Vokon-no ong it ulun Kristian di lumundu mamakai di boros di Yesus sid Matius 26 do sangkut, retanko noboros laid di Yesus dot a-milo-milo varo mosikim, ka. Topot i boros sid Ulangan manarang dot aso kenginan do Kinoringan do varo mosikim ot ulun.

Zabur 72,14 I raha dit ulun mosikim gunaon do Kinoringan.

Zabur 9,10 I inoringan mangapad dit ongomosikim

Zabur 12,6 Sabap-pogi akasau-no it ongorukung om mongohomu it ongomosikim, mungkasut-oku, ka di Tuhan.

Zabur 69,34 I Tuhan mongining di dolou dit ongomosikim.

Zakaria 9,9 Imatai-no, i raja-nu rumikot do mosikim iosido.

2. Kor. 8,9 Nelaan-no dikou i gama di Tuhan tokou Yesus Kristus diri di minsanko lumundu iosido, nga sinumikim, tu polundu dikou sid kinomosikiman dau.

Matius 8,20 It Anak do Riniba minsanko i poulunan dit ulu dau, nga aso, ka di Yesus.

Yakub 2,5 Okon-ka ko Kinoringan-no o minomili dit ongomosikim sitid tanga do pomogunan dit alaba do kosipan do ponungkuson ioti di karajaan di najanji-no sid ongoulun di manamod do Kinoringan?

Matius 11,5 I mosikim orikatan di Habal do Kovosihan.

Matius 19,21 Bang banalko mokirarangkap-ko, patahak-tahako-no sid ulun do mosikim i barang-nu, ka di Yesus.

Matius 5,3 Osinang-no it ulun dot osibak i ginavo (i mosikim sid ginavo.), sabap kasanganu ioti di karajaan do surga.

Lukas 6,20 Osinang-kou-no ot ongoulun do mosikim, tu ikou dino kasanganu di karajaan do Kinoringan.

nabi, it ulun do kososorou di hal dit amu-po ajadi. i harati banal di pongoretan sid Ibrani om Yunani, kabang, i Momoros di kentalangan om kosorou antad sid Kinoringan sampai pentahan di kenginan do Kinoringan. Varo-po harati dot, Ulun di mongogutika.

1. Sam. 9,11 Tu i nabi nopungaranan-no diri do mongogutika.

Amos 3,7 Sabap aso-po ginama di Tuhan dit okonko niintahan-po laid sid nabi dau.

Yeremia 1,9 Iri-ogi tinudu-no di Tuhan i munung-ku om pomoros-ogi dot, Posuvangon-ku i ongoboros-ku sid kabang-nu. Hondomo-no dot iti-no't adau diti o pinangkat-ku ikau do nabi dit ongobansa om it ongoraja...

a) Kinoringan mongingut dot ulun do nabi om manahak do boros om habal om kentalangan.

Amos 3,8 Bang monokuk i mondou, isai-po-ka ot amu rumosi? Bang monuhu i Tuhan Kinoringan, isai-po-ka ot amu sumuhut om ajadi do nabi?

Ulangan 18,18 Pembulai-oku dot iso o nabi antad sid pialatan dioti, do iadko ikau. Itahak-ku sid dau i sokovia i boros-ku om sokovia i nisuhu-ku dau, nga iosido-no o poboros sid dioti.

Yeremia 20,9 Boros di Yeremia, Ong mongitung-oku dara sid ginavo-ku dot, Amu-oku mongohondom do Kinoringan, ka dara, ko, Amu-oku pahabal-po di boros do Kinoringan, kangku dara. Iadko apui i boros-nu mikit-sikit sid saralom di ginavo-ku om momusok di kangkab-ku. Minsanko magavi-oku mangamu, nga aso tinganan.

b) vokon-no i kentalangan ona boros, vokon-no ong mad suromo do

iadko inipi om osorou.

2. Petrus 1,21 Aso mimbulai di nosorou dino, ong baiko kenginan do riniba. Suvaiko nosuhu di Sundu dot Osusi it ulun dino do momoros sid ngaran do Kinoringan.

Yeremia 1,11 Dinuat-oku di Tuhan, O Yeremia, nunu-ka ot emot-nu, ka. Timpa-oku-nopo, Kemot-oku do songgi o raan do kumpat, kangku.

Amos 7,7 Manjadi pinepi-oku-no vagu di Tuhan, ino-no it inipi-ku: miningkakat i Tuhan sid timpak do kuta do kikinavid do ponukung, ka di Amos.

Zakaria 2,1 Na nokosorou-oku-no vagu dot ulun do kikinavid do susukat.

c) I nabi pembulai di karaatan do razat om pentahan dit ahajangan vagu ko i kovosihan do Kinoringan

2. Sam. 12 i nabi Natan pembulai di karaatan di raja Daud

1. Raja 17-18 i nabi Eliya pembulai di kasalaan di raja Ahab.

Yesaya 40 i nabi pentahan di koulian antad sid kinarakapan sid Babil.

d) i tinimpuuni, it ongonabi bai minomoros sampai poromot di boros do Kinoringan. Alaid-nopo, varo nabi di niposurat i boros dau. Vokon-no ong varo monurat kondiri, vokon-no ong i koruhang di nabi o minongohondom sampai pinosurat sid surat i boros di nabi. Vokon-no ong posuntu i nabi di boros do Kinoringan sid ginama dau: I Hosea minanansavo do sundal, i Yeremia minamakai do paud (28). I Yahya i minomodsu posuntu di habal dau sid kakanan om kosulungan dau sid tanga do belantara.

e) Okonko bai ulun di nokosikul om nokelo do surat ko nokoosukod ot inanu do nabi

Amos 7,14 Boros di Amos, ioku diti okonko nabi. Ino-no o gamaon-ku diti, manaud dot ongosapi om mukabun-oku dot Ara, ka.

Yeremia 1,6 Timpao-ku-nopo, Moku, Tuhan Kinoringan-ku. Tu amu-oku elo momoros, tu ioku diti omulok-po, kangku, ka di Yeremia.

Kolobusan 3 i Musa iadino, varo limo o sangkut mangamu di kodim di Tuhan.

f) Varo't ulun i retanko nabi dot ong otopot, baiko nabi dot ovudut

1. Raja 18,19 it ongonabi om bobolizan di rogon Baal.

Yeremia 14,14 Timpa di Tuhan sid dohon, Inot ongonabi dino bai momudut do retanko kiboros i Tuhan. Amu-oku nokoponuhu dioti. Amu-oku nokopongodim dioti. I gama dioti mamahanda okonko antad sid Tuhan. Baiko kopizo om hodzimat om pongitungan kondiri o nintalang dioti dino.

g) Sid gorija di Kitab Vagu, varo't ongonabi dit elo pentahan om pentalang di boros om tudukan di Yesus. Kondiri dit ongorasul kikuasa mongintalang iadko nabi. Rontob, minsanko sid gorija varo't ongonabi dit ovudut.

UR 11,27 I nabi Agabus pentahan di koruzahan do pomogunan

1. Kor. 12,28 Hinatul-no di Kinoringan it ongopiumpugan. I keso it ongorasul om i koduvo it ongonabi.

1. Kor 13,2 Mulongko nabi-oku om elaan-ku i sokoviai it ongosuromo om i sokoviai i keloo sampai kikosipan-oku do kapamaliu dit ongoiburul, topot ong samod-ku-ogi nga aso, tantu aso kogunaan-ku, ka di Paulus.

1. Yahya 4,1 Kadan-kou-no mangasip sid nunu-nopo i sundu, inoi nga impolonuvai-no dikou it ongosundu dot antad-ka sid Kinoringan ko okon. Tu ogumu ot ongonabi dot ovudut do nokembulai-no sid tanga do vinangun.

naraka, pomogunan dot ulun minatai, mad duvo o tempat ot oboros.

a) I pomogunan dot ulun minatai (ong sid Momogun kodori diri retanko sid Nabalu ino tempat dino), ino-no kiroon di Kitab Laid, varo't intoronon dit ongoginavo di minatai (imatai >hatod) di mad pomogunan do kotuvangan om karandaman (Ayub 10,21, mad luvang dot aralom inukad). Tempat ot ozom sid saralom do tana. Aso kopurimanan om pongitungan sino sampai a-kendazou do Kinoringan ong sino.

Kinotimpuunan 37,35 Boros di Yakub, Aso tinganan dikou dohon diti. Mogkorudu-oku sampai pempatai-ku, tu sumamung-oku dit anak-ku sid lobong (luvang dit aralom), ka di gama di Yakub mongupus.

Zabur 6,6 Sabap ong apatai-oku-no, amu-oku-no kopongindazou dikau. Sabap ong sid umpug dit ongoulun do minatai sid naraka aso-no monorima kaseh sid dikau.

b) Na varo pitonidan ong it ulun dit osinang-no minatai, tu kosuvang sid kovosihan do Kinoringan

Yesaya 57,2 It ulun dit okosog, i nokosuhut di kenginan do Kinoringan, momodsuvang-no sid kopioondusan do Kinoringan sampai minud sid ongoongkob dioti.

Lukas 16,19.. i Lazarus linumombus sid kangkab di Ibrahim. Topot it ulun do lumundu nokolombus sid naraka.

c) Kondiri di Yesus kinumaa sid pomogunan dot ulun minatai

1. Petrus 3,19 Ino hiza diri minagandaha om minangahabal-no i Kristus di habal do kovosihan sid ongosundu di sid torungku..

1. Petrus 4,6 Ino-no it ontok do kahabaran di habal do kovosihan sid ulun do minatai, supaya minsanko ohukum-no i guvas dioti, nga pasi ioti sid saralom di Sundu, sumuhut di hoturan do Kinoringan.

Rum 14,9 Sabap ino-no i tinomod di Kristus di minatai om nogulian iosido, supaya ajadi iosido do Tuhan dit ongoulun di minatai om i

mizau.

d) It ulun Kristian di sumuhut di Kristus sampai ajadi do dang Kristus, a-korikot sid pomogunan dot ulun minatai

Yahya 11,25 It ulun di mangasip sid dohon, minsanko matai-no iosido, kakali dot apasi om ipat-ipat it ulun di mizau om mangasip sid dohon, amu-no matai iosido sampai penlaid, ka di Yesus.

Matius 16,18 Minsanko i rongobon do naraka amu kotori di piumpugan-ku, ka di Yesus.

Lukas 23,43 Boros di Yesus sid ulun kisala sid kazu do sangkap, Boroson banal-ku-no sid dikau. Adau-no bianco diti, kovozi-ko-no dohon sid karajaan do surga, ka di Yesus.

e) Ontok dit adau do kopongohukuman om korikatan vagu di Yesus, koguli vagu it ulun antad sid pomogunan dot ulun minatai om i naraka Yahya 5,28 Varo hiza do rumikot dot i sokoviai it ongoulun sid ongolobong nga korongou di dolou dit Anak do Riniba, sampai lumabus antad sid lobong. I minangagama dot avantang kotorima di kogulianan om kosuvang sid kopolosizan om i mangagama dot araat kotorima di kogulianan om kosuvang sid hukum.

Kentalangan 20,12 Na emot-ku-no it ongoulun do minatai, anak, osukod do pengkakat sid tinoguvangon dit ogomon do kipangkat. I rahat nga pinembulai-no dit ongoulun di minatai sid rahat. I kapatazan om i karajaan di naraka, nga mongogulian-no dit ongoulun minatai sid dau sampai rotuan-no do hukum ioti dino sokoviai, isuhut di nagama dau. Topot ong i kapatazan om i naraka nisubo sid sinikit dot apui.

f) varo-po naraka di mad tempat dot apui dit amu opipisok om i korualan dit amu agasan ko tempat dot oholian kosogit.

Matius 8,12 Topot it anganak do karajaan dino iada-no sid otuvong dit aso kerad korondom sampai sino-no o pogihadan om pogkikipan do

nipon, ka di Yesus

Markus 9,47 Osuhul-po do kosuvang-ko sid karajaan do Kinoringan do baiko songihing o mato-nu ko iada-ko sid naraka do kopitalos i mato-nu. Tu sino dino nga amu matai i gizuk om it apui dino, amu misok, ka di Yesus.

Matius 25,41 Pogidu-kou-no siti, ot ongoulun di nolupu di Kinoringan. Sori-kou-nod apui dit aso kopisakan i nosodia dit Ama-ku do pentaranan di vozoon do rogon om i sakup dau.

navau, anavau, kanavahan, (kotuvangan, rondom, karandaman)

a) I kanavahan antad sid Kinoringan, iosido o minongurug (Kinotimpuunan 1,3, 2. Kor. 4,6)

om mintoron sid kanavahan: 1. Tim 6,15 I Tuhan, i mintoron sid kanavahan dot aso korikot dot ulun. Kinoringan kondiri mad kanavahan

1. Yahya 1,5 I Kinoringan, ino-no it anavau sampai a-kopitiim iosido do kotuvangan.

I boros do Kinoringan: Zabur 119,105 i boros-nu mad titiu di hakod-ku om panganavau di ralan-ku, ka.

I Kristus kondiri: Yahya 8,12 loku-no diti o panganavau do vinangun.

I Habal do kovosihan: 2. Kor. 4,4 I kanavau di habal do kovosihan mongimbulai di kohormatan di Kristus om i Kristus dino mongimbulai di kohormatan do Kinoringan.

I kinoruhangan di Yesus: Matius 5,13 lkou dino o panganavau do pomogunan

I kanavahan mad kondiri do Kinoringan: Yahya 3,19-21 Ino-no i hukum, nokorikot it anavau sid riniba. Topot it otuvong lobipo i kenginan dot ongoulun mantadko it anavau. Tu ipat-ipat it ulun di

mangagama do karaatan, asana dit anavau, supaya amu kentalang i kavazao dau. Topot isai-nopo i mangagama di katapatan, tumoronong-no sid anavau, supaya kentalang i kavazao dau, sabap i nanagama dau sid tinoguvangon do Kinoringan, ka di Yesus.

I kanavahan mad barakat do Kinoringan: Zabur 27,1 I Tuhan o titiu-ku. losido-no o manapul dohon.

Kol. 1,12 Kondiri dit Ama o minanahak sid dikou do kotungkusan, i nosodia-no laid dau sid bansa dau sid karajaan do kanavahan.

b) i kotuvangan, nga antadi sid hoturan do Kinoringan: Kinotimpunaan 1,4 Pinopitanid-no di Kinoringan it anavau om it otuvong dino sampai pinungaranan-no dau it anavau dino dot adau om it otuvong dino do sodop. Topot varo-po harati dot aralom, ino-no i kotuvangan dino pentaranan dau di vozon do rogon.

Efesus 6,12 Tu i saapon dino okonko bai riniba, inoi nga sumaap tokou dit ongokuasa dit amu emot sid pialatan dot avan om tana, i mangahatul dit ongokuasa do kotuvangan (ino-no i vozon do rogon).

Kol 1,13 Nosopulan tokou-no antad sid kuasa do kotuvangan sampai nivaliu tokou-no dau sid karajaan dit Anak dau di sinamadan. losido-no dino o kolobusan tokou. losido-no o kaadaan di kasalaan tokou.

c) Kinoringan o mongimbulai ombo i nokosusut sid kotuvangan:

1. Kor. 4,5 I Tuhan o pentalang di nokosusut sid otuvong

Sid Kitab Laid i kotuvangan nga miabal do kapagasan om kineduan antad sid tinoguvangon do Kinoringan.

Yesaya 60,2 Sabap rumondom-no iti pomogunan om otuvong banal i pomogunan di sid inintonon dit ongoulun. Topot ong i Tuhan, panavau dikau om i kohormatan dau, nga tumongkop sid pomogunan. Ohuzud-no it ongobansa it obinahangan-nu om it ongoraja momodrikot-no sid kanavaho-nu, ka.

Efesus 4,17 Kada-kou-no kisuhut iadko it ulun vokon di sumuhut di pongitungan kondiri dit aso tantu-tantu om otuvong i ginavo dioti. I kobungoho om koguelo dioti o mamalid di kopolisan dioti antad sid Kinoringan. Amu ekum ioti, gam tumolong-no ioti sid karaatan sampai aso-no nontobo sid aso tantu-tantu.

UR 26,18 Manjadi ikau-no o posirot dit ongomato dioti, supaya tumolikud ioti sid otuvong om tumoguvang sid anavau om tumolikud sid vozoon do rogon sampai tumoguvang-no sid Kinoringan.

Rum 13,12 Tumalib-no it otuvong om tororikoto-no dit adau di Tuhan. Manjadi padao tokou-no i buatan dot otuvong sampai manangrapo tokou-no dot anavau.

ngaran, i riniba di gulu banal minomungaran dit ipat-ipat i dupot om barang sid saralom do vinangun. Kinotimpunan 2,20. Ong Momogun kodori amu katama do mangarait di dau do ngaran ko i ngaran dit ivanon dau, retanko kovuzung ong arait. I ngaran dot ulun iadko i kumoduvo dau.

a) it ongongaran di dang riniba

Kinotimpunan 3,20 I Adam minomungaran di savo dau dot Hava. I Kinoringan minonimban di ngaran di Abram dot Ibrahim om i Yakub dot Israel (Kinotimp. 17,5 om 32,29)

I Yesus minonimban di ngaran dit a-ko piro i kinoruhangan dau Markus 3,16.

Lukas 10,20 Tomon-kou-no do nokosurat-no it ongongaran dikou sid surga, ka di Yesus.

Kentalangan 3,1 Ohorotizan-ku-no dot retan-nu ko, apasi-koi dot ong otopot, minatai-ko-no.

Kentalangan 3,14 Iti-no i boros di kingaran dot, Amin, i sasi dit atatap

om abanal, i minongimbulai di nunu-nopo it inurug do Kinoringan, ka.

b) It ongongaran do Kinoringan

Asarok i ngaran mongontok do Kinoringan, tu i ngaran iadko kondiri di Kinoringan.

1. Raja 8,43 mininta dua i Sulaiman do mindamo, supaya ensanan it ongobansa kotutun di ngaran do Kinoringan. Sabap i ngaran do Kinoringan mintoron sid panambayanan dot osusi i ginama di Sulaiman.

i pongoretan Kinoringan antad i gamut lohing > otuo, kodori, sampai i harati sid Momogun, nga i nokogulu banal dit asot elaan dot riniba, i minongimbulai di sokoviai (Minamangun).

Ong sid Momogun, ino-no it ongongaran do Kinoringan: Kinoringan, Ingot, Minamangun, Minongurug. It ongopongoretan vokon: lurug, Kisundu, Langun, Kelodun, Mizon Savat. It agazo banal sid Momogun, ino-no Minamangun. Ong mongurug, mongurug do gundol ko kiluvang antad sid tana. Mongurug do kuron ko togkol, sandangau. Ong mongurug, antad sid varo-no laid. Topot ong mamangun, aso kadapat tanid mantadko i Minamangun kondiri.

Ong i boros dot Ibrani, ino-no o harati, I kikuasa ko i monguasa di sokoviai. I ngaran Jahwe, i narait sid di Musa sid belantara diri (Kolobusan 3,15) o harati, i kapapasi. Na it ongoulun do Yahudi amu katama mangarait di ngaran do Kinoringan. Iti-no o sabap minamakai ioti, ong kodung nokosurat i ngaran Yahwe, i pongoretan Tuhan (ko ong Ibrani Adonai), tu rinumosi ioti do mongolupu di ngaran ko mamakai dot aso panangan. Varo-po ngaran i Tuhan di kinogumuai (Sabaot).

Ong mamarakat it Imam di piumpugan, itampal dau i ngaran do Kinoringan sid umpug dino (Bilangan 6,24)

c) I ngaran di Yesus Kristus. Keso i Yesus minonuduk do manangama do Kinoringan (Matius 6,9 Ot Ama dahai sid surga, ka).

Matius 1,21 Manjadi ong ousu-no iosido dilo, anak do kusai, punganaran-nu-no ilot anak dilo do Yesus, tu mamasi iosido di bansa dau antad sid sokoviai i kasalaan. Ong Ibrani, Yehoshua > i harati, I Yahwe o monulung om manapul.

Ong **Kristus**, inanu i solinan di pongoretan Almaseh (Masiak) sid Yunani, ino-no Kristos, it ulun di inumahan-no do Kinoringan.

It ulun mangasip sid ngaran di Kristus (Yahya 3,18). I ngaran di Kristus o harati, kuasa di Kristus. Iti-no o sabap dot it ongorasul monuduk om mangahabal sid ngaran di Yesus ko pengkod do sakit sid saralom di ngaran di Yesus. Opodsu it ulun sid ngaran di Kinoringan it Ama om it Anak om i Sundu dot Osusi. Kodung arait i ngaran di Yesus, nokovoza i kuasa om hormat om bantug dau.

Matius 18,5 Isai-nopo i kumahang dot anak di iadino, tu i gima ngaran-ku, ino-no o kumahang dohon, ka di Yesus.

Filipi 2,11 supaya sid ngaran di Yesus sumingkudou i sokoviai i sid surga om i sid pomogunan om i sid saralom do tana, om ipat-ipat i dila nga mangakun-no dot, I Yesus o Tuhan, tu mamantug di Kinoringan it Ama.

UR 4,12 Aso kosopulan do riniba om aso ngaran do kikuasa antad sid riniba, inoi nga iso-no, o ino-no i ngaran di Yesus, i Minananggung om pinalabus di tokou antad sid karaatan, ka di Petrus.

obpinai, mioobpinai, kopiobpinezan

It ulun di mirantas pusod dot iseso ot idi om ama, iri-ogi it ulun dit iseso o varis om bansa. Tanidko ino, it ulun Kristian om i vokon, tu sid di Yesus Kristus mioobpinai, gima i Yesus monongobpinai di tokou.

(Ong sid boros Momogun, varo kavantangan, ino-no, i pongoretan obpinai amu monodiri do kusai ko ondu. Ogumu o boros dot ulun monodiri. Manjadi kodung noboros sid Kitab dot obpinai, retan sid ongokosolinan dino, Obpinai do kusai do sampai bianco, mad alazan it ongoondu di nakamung sid piumpugan om gorija dot Kristian. Ong sid Momogun, atalahas-no laid dot ondu om kusai nokopiamung sid piumpugan om amu pokihizon it ongoondu).

1. I sala dot ulun potongkizad dot ulun, minsanko miobpinai.

Kinotimpuunan 4,9 Boros di Kain, loku naku o mongontupat dit obpinai-ku? ka. A-ku elaan do siombo it obpinai-ku, ka dau di opongo dau mamatai dit obpinai dau. I gama dau mongivogu dit obpinai dau i Habil minongorongoi di kopiobpinezan dioti dino. Ino kopivoguan o popitongkizad dit ongoulun sampai mongimbulai di kopisasanaan.

Kinotimpuunan 11 Sid Babil pinopitotongkizad i riniba, tu mokindazou banal ioti.

Lukas 22,24 Varo-no piguguvelan sid pialatan di kinoruhangan di Yesus dot, Isai dioti ot asavat.

2. Suvai i Kristus om elo-ogi do popioobpinai dit ongoulun. Isai-nopo i sumuhut di Tuhan Yesus, nokemot-no dot ongoobpinai.

Matius 12,50 Isai-nopo i posunu di kenginan dit Ama-ku sid surga, ino-no ot obpinai-ku do kusai om ondu om idi-ku, ka di Yesus.

Yahya 20,17 Boros di Yesus di nogulianan iosido, Pamanau-no sid ongoobpinai-ku om habarai-no ioti do minsavat-oku-po sid Ama-ku om sid Ama dikou, ka di Yesus.

Yahya 13,34 Manahak-okou dikou do ponuhuan dot avagu o ino-no, Pisasamod-kou-no iadko i gama-ku manamod dikou, iadiko ino

pisasamod-kou-no. Ino-no i pogintutunan dikou di sokoviai it ongoulun do koruhang-ku ikou, ong varo gama dikou misasamod, ka di Yesus. Matius 23,8 Ikou dino, kadan-kou-no mongoho do retan-kou do guru. Tu iso-no i guru dikou om ikou sokoviai mioobpinai, ka di Yesus. Usuran Rasul 1,14 om 16, varo-no ong, Obpinai di Yesus, varo-no ong harati, ensanan it ongoulun di nokoumpug sino.

1. Petrus 1,22 Uludo-no it ongoginavo dikou, supaya i gama dikou manamod dot obpinai okonko baiko tomod, inoi nga misasamod-kou dot omomos o ginavo, ka di Petrus.

1. Petrus 2,17 Misasamod-no i songobpinai, ka. ondu > imatai sid kusai

ompus, kompusan, >kapangaan, >kopupusan, >kovian, >kotonusan, pompod tana. Ong Momogun monodiri banal i boros di sid Kitab, mad iseso o pongoretan kananganko i rontob do pomogunan, sukud, musim, hiza, tugas om i nunu-nopo.

1. Sokoviai i vinangun, varo rontob i retanko kotonusan om kobinasaan. Na varo tudukan sid Kitab Laid om Kitab Vagu dot, Ong sukul mogihim do Kinoringan, amu tumanus it ulun om amu obinasa, gam sid penlaid o rikoton dot ulun, i retanko koposizan penlaid di mad sid sampaping do penlaid.

Zabur 90,12 Tudukai-oku-no mongitung di kisukud-okoi, supaya elo-okoi monguog.

Kinotimpuunan 6,13 Boros do Kinoringan, Navi-no iti ginavo-ku (opupusan). Tonuson-ku-no i sokoviai it inurug-ku diti, tu noponu-no iti pomogunan do karaatan dioti, ka.

Yesaya 38,12 Ikau-no o Tuhan o potonob (pompus) dit adau di hiza-

za dot amu-po sumodop.

Zabur 39,5 O Tuhan tudukai-oku-no, supaya kaharati-oku do mompus-oku diti om i kopoulosan-ku, nga varo kosungguvo dot aso tinganan moling-oku dot aso dangol, ka di Zabur.

Matius 5,18 Boros di Yesus, sampai orikot i kotonusan ditit avan om iti pomogunan, somputik nga asot ohino di Taurat, ka.

Matius 24,35 Itit avan om i pomogunan nga tumanus. Topot i boros-ku diti amu tumanus.

Matius 24,3 Nunu-ka i tanda di kopupusan diti vinangun? ka di kinoruhangan mongoduat di Yesus.

Matius 28,20 Boros di Yesus, loku diti mozo-vozo dikou suvab-suvab sampai sid kovian do pomogunan, ka di Yesus.

1. Kor. 15,24 om iri-ogi kovian-no it ontok do kapanahakan di Kristus di karajaan dau sid Kinoringan it Ama, tu notori-no dau sokoviai it ongoulion om kokuasaan.

Yakub 4,14 A-elaan dikou dot apasi-kou-po ko amu ong suvab-no. Tu ikou dino iadko songobu-no it inambun do kavut dit oruhai banal o kotonusan.

Lukas 12,20 Ot ulun do lovong, Sodop diti nga matai-ko, tu onuvon-no ino ginavo-nu antad sid dikau.

2. Kinoringan om i Dau do kavazao amu engat o rontob, aso kengkadan, aso kompuso.

Zabur 102,28 I dikau dot umul nga aso sukud om aso rontob.

Daniel 5,27 I hoturan do Kinoringan nga amu engkod.

Yakub 1,17 Sid Ama do kanavahan aso kosimbanan dot adau om sodop.

Daniel 4,19 I kuasa-nu sampai sid pompod tana, ka di nabi.

Zabur 98,3 Pentongkop do pomogunan nga nokemot-no kavi di gama do Kinoringan monulung di tokou.

Yesaya 62,11 I Tuhan onining sampai sid pompod tana.

Markus 13, 27 Ino hiza dino suhuon-no dau it ongomalaikat do mongumpug di sokoviai nongopili dit antad sid apat o puun do barat om antad sid pitangaban do tana om avan.

Usuran Rasul 1,8 Ikou dino amu-no alaid.. om ajadi-kou-no do sasi-ku sid Yerusalim om sid Yahuda om sid Samaria sampai sid pentongkop do pomogunan, ka di Yesus.

3. I kopupusan do pomogunan (vinangun) suvai notuluk-no it ontok, iadko mansak-no it omoton. Ino-no, rumikot vagu i Yesus do mongohukum om monuluk di karajaan om hoturan do Kinoringan.

Matius 13,39 Manarang i Yesus di suriban, i hiza do mongomot ino-no it ontok do penlaid, ka.

Matius 13,49 ladno dino i hiza do kovian do pomogunan. It ongomalaikat mamananau om monodiri dit ongoraat sid pialatan dit ulun dot abanal, ka di Yesus.

Ibrani 9,27 I tokou riniba nahatul-no dot amu milo-milo nga matai dot insan om iri-ogi hukuman penlaid.

Rom 6,21 Ong bianco, nakalabus-kou-no antad sid kuasa do kasalaan om najadi-kou-no dot uripon do Kinoringan, om i kosungguvo dikou nga sid kopoulosan penlaid.

Filipi 3,19 I kosungguvo dioti dino, nga i kotonusan, tu i tizan o pinokokinoringan dioti.

2. Kor. 11,15 Topot kembulai it onogama dioti dino, ong sid kopupusan-no.

Matius 24,13 Topot isai-nopo i kogoos sampai sid kopupusan, ino-no

ot osopulan, ka di Yesus.

Ibrani 13,7 Imatai-no dikou i kavazao om i kinopupusan dit ongoguru dikou sampai susui-kou-no di kosipan dioti, ka.

1. Petrus 1,9 tu kanu-kou-no di kosungguvon di kosipan dikou, ino-no i kosopulan di kosipan dikou, ka.

4. I kinorikatan di Tuhan Yesus om i kapagasan om kinapatazan dau o tanda do nokensomok-no i kovian di vinangun. Saba ino, banalko monginud it ongorasul om it ongoulun Kristian di gulu diri di kembulazan dit Adau di Tuhan.

Ibrani 9,26 Bianco, ontok di minangavi-no dit ongohiza, nembulai-no iosido do Kinooringan do baiko insan, tu mananus dit ongokasalaan sid saralom di kinasambaan dau.

1. Petrus 4,7 Tu i kovian di sokoviai i kobuatano dino, nga nokensomok-no. Sabap ino, atag-kou-no om vanus-kou-no sid saralom di gama dikou minta dua.

1. Kor. 10,11 Sabap tororikoto-no i kovian do vinangun, ka di Paulus.

1. Yahya 2,18 Ot anak-ku, nokorikot-no i kovian, ka di Yahya.

Usuran Rasul 1,7 Boros di Yesus, Amu-no tagal om elaan dikou i hiza di natantu-no dit Ama-ku. Tu ino dino sumuhut di hoturan om kuasa dau.

Matius 24,36 Topot ong it adau om it ontok dino, iso nga aso kelo, minsanko it ongomalaikat sid surga, nga amui, baiko i Ama, ka di Yesus.

ondu, > kusai

onsi, vokon-no ong onsi banal, vokon-no ong guvas o harati, vokon-no ong riniba, vokon-no ong vangun.

Kinotimpunaan 2,21 Minomutus-no i Kinoringan dit iso o tikagang antad sid inan dit ulun dino om tombolo-ogi vagu dot onsi.

2. Kor 12,7 Boros di Paulus, Varo rugu sid guvas-ku antad sid ponuhu di vozoon do rogon di nipomogos dohon, supaya amu-oku mokisasavat.

Rom 1,3 I Kristus, Anak do Kinoringan, ong i buatan do riniba(onsi) mongkupu iosido di Daud. Ong i buatan dot osundu, nahatul-no iosido dot Anak do Kinoringan, ka di Paulus.

1. Kor. 10,18 Imatai-pogi dikou it Ongoisrael do dang riniba (onsi).

Yesaya 40,6 I riniba iadko sakot..

Yahya 6,55 Tu it onsi-ku dino, ino-no i kakanan dit abanal, ka di Yesus.

Yahya 1,14 Om i Boros dino jinumadi do riniba(onsi).

Rom 7,25 Sid saralom di guvas-ku (onsi) sumuhut-oku di hoturan do sala.

ontok, >hiza, kolaido do hiza, hal di nokopionong dot umba om umpai sid hiza om tempat

hiza diti pomogunan om vinangun bianco (1. Kor. 3,19) Galatia 1,4 i karaatan dididino, ka ko Matius 13,22 i kobimpipitan diti hiza bianco o posusa dot ulun, ka.

It ontok vagu nokotimpunan-no sid Tuhan Yesus: Markus 1,15 om iri-ogi hiza di kinogulianaan di Yesus ko, isuhut di Matius 13,39 i hiza do mongomot sid suriban, ino-no it ontok do penlaid.

palid, mamalid, kopolidan, kopomolidan, tumongkihal.

I vaza dot ulun malid sid ralan, i harati, amu pakaa ponong sid rikoton om kosungguvon, ko i gama mamalid dot ulun, supaya a-kemumui sid

rikoton dau. Ong it ulun kondiri amu andaman i rikoton ko tomodon dau ko tomodon dot a-ozu rumikot sid kosungguvon dau, ino-no i hal di bai iso ot ulun, hal do monimbaru do sala di nunu-nopo. Topot ong ulun o mangagazad dot ulun vokon sid kopolidan, supaya amu kemumui iosido, ino-no i lobipo araat. Na sid Kitab asarakan apakai ino pongoretan dino ong sid gama dot ulun gumuvail di kenginan do Kinoringan ko tumagak om tumohiang sid ralan kakaa sid Kinoringan.

1. It inantadon do kopolidan

Matius 13,27 Siongo-ka antad it ongokutad? Boros di tuan, I sangod o minongirad dino, ka.

Matius 16,23 Boros di Yesus sid di Petrus, Pogidu-no, o vozoon do rogon. Ikau dino mad potongkihal dohon.

Lukas 17,1 Boros di Yesus, Amu milo dot aso rumikot do kopolidan. Topot sinusa-no dit ulun i porikot di kopolidan dino.

2. I vaza mamalid:

Kolobusan 23,33 Bang sumuhut-kou dit ongopinokokinoringan, tantu ioti-no o mamalid dikou.

Markus 13,5 Ontupato banal dikou, supaya a-kou apalid dot ulun.

Markus 9,42 Bang varot ulun di kapamalid dit isot ulun dit osibak i mangasip, osuhul-po do ginitan do kinsaran i liou dau om tumuhop-ogi sid rahat. Bang i palad-nu o mamalid dikau, pudongo-no i palad-nu, ka di Yesus.

1. Kor. 8,13 Boros di Paulus, Bang kasadu it obpinai-ku, sabap i kakanan-ku, tantu sampai penlaid amu-oku-no mangakan dot onsi, supaya amu-oku kapasadu dit obpinai-ku (kapamalid).

3. It Anak do Kinoringan jumadi do kasaduan (kopomolidan) dot ulun, tu i gima osibak i kobatano dau.

Matius 11,6 Osinang-no it ulun dit amu enggerit dohon, ka di Yesus.

13,57 hinumalib it ongobpinai di Yesus di Yesus, tu a-kaharati di kobatano dau.

17,27 Supaya amu tokou mongingirit dioti, pamanau-no sid rahat om pagapon-no om ombo it gulu kanu, kabango-no om kemot-ko-ogi do sangnalad o siin dot apat ringgit o horogo, ka di Yesus.

26,31 Boros di Yesus, iti sodop biano diti, ikou sokoviai enggirit-no dohon.

24.10 Iri-ogi ogumu it ongoulun o kasadu om miruruput sampai misasana-sana.

1. Kor. 1,23 i tokou mangahabal di Kristus dit nakasangkap-no. Ino habal dino ikasana (ikapalid) dit Ongoyahudi.

4. Ohukuman-no it ulun di kapasadu om kapamalid dit vokon do tomod miraraat.

Matius 13,41 It Anak do riniba monuhu dit ongomalaikat do mongumpug di sokoviai it ongomanasaad om it ongomonipu (mamalid), ka di Yesus.

Matius 18,6 Manjadi isai-nopo i mamalid sid kasalaan dit iso ot osibak di mangasip sid dohon, osuhu-no ong simbagatan do kinsaran i liou dau om potuhopon-ogi sid tanga do rahat. Osusa i vinangun, sabap gima i gama mamalid. A-milo-milo varo kopolidan. Topot osusa-no it ulun di mamalid. Bang ipalad-nu antawa i hakod-nu o mamalid dikau sid kasalaan, pundungo-no om padao-ogi.

Markus 9,47-48 Ong i mato-nu o mamalid dikua, tindalo-no i mato-nu. Osuhul-po do kosuvang-ko sid karajaan do Kinoringan do baiko

songihing o mato-n u ko iada-ko sid naraka do kopitalos i mato-nu. Tu sino dino nga amu matai i gizuk om it apui dino amu misok, ka di Yesus.

pandita, pongoretan di manarang di tugas sid gorija om piumpugan. I pongonuvan di pongoretan dino sid boros do Kaling: Pandit = it nokosikul sampai nokelo. Ong sid BM bai harati bahagi dit ulun di mangagazad om monunda do piumpugan. Ong sid Boros Ingggris, vokon-no ong Priest (imam), Minister (ponulung) ko pastor (manaud do domba). Ong sid Kitab a-insan apakai i pongoretan dino. Suvai sid tradisi dit ongorija do Reformasi om varo-ogi. Ong sid tudukan di Paulus sid 1. Kor. 12 varo rasul, nabi, guru, ulun di kisundu, ulun dit elo pengkod do sakit, ponulung, mangahatul om ulun di kumiboros di boros do Sundu. Sid panarangan dino atalahas-no dot aso-po hoturan tantu antawa varo harati do mad pangkat ko garal inot ongotugas dino. Ino-no i kiguna banal sid hal dino, ino-no i boros di Yesus sid Matius 20,25-28 Boros di Yesus, Elaan dikou dot it ongoulion dot ongobansa o momorinta om it ongosasavat, nga monguasa di razat. Topot ong ikou okonko iadino. Inoi nga isai-nopo it engin dot asavat, ponuhu iosido do sokoviai om it engin dot ulion dikou iosido, atag dot muripon iosido di sokoviai. Iadko it Anak do Riniba, tu okonko rinumikot do monguripon iosido dit ongoulun, gamko iosido-ogi o mokiuripon sampai itahak i koposizan dau, dot iponobus di sokoviai, ka di Yesus.

pasi, koposizan, mizau, i konoruvo di sukud dot ulun

1. I Kinoringan ot puun di sokoviai i mizau, sabap kondiri do Kinoringan o karangkapan do koposizan. I ngaran dau dot Yahwe ino-

no i kapapasi (Kolobusan 3,14) o manarang di iadino. Yeremia 2,14 Boros di Tuhan, loti tumongkizad sid dohon dot ioku diti ovud do vaig do kapapasi (ovud it a-mavi), tu manalaga ioti dot obingasak, ka.

Yesaya 44,6 Iti-no i boros di Tuhan, i raja dot Israel, i minananggung, i monguasa diti pomogunan. Ioku-no diti o Kinotimpunaan om i Kopupusan, dot iso nga aso Kinoringan vokon tanid-ko ioku, ka. Pengkaa dino sid Yesaya 41,4 om 48,12 om Kentalangan 1,8 om 5,14 Yesaya 49,18 Boros di Tuhan, ong kakal-oku-po, tantu ohormat i Yerusalim dioti iadko i sumuni di tinongon.

a) asarok arait i Kinoringan dot, I Kinoringan di kapapasi, supaya osodiri mantadko it ongorogon dit aso ginavo.

Zabur 42,3 Lumangad i ginavo-ku sid dikau, o Kinoringan di kapapasi. (om 84,3)

Yeremia 10,10 I Tuhan ino-no i Kinoringan it abanal, i Kinoringan di kapapasi, ka.

Matius 16,16 Boros di Petrus, Ikau-nobo dino ot i Kristus, it Anak do Kinoringan i kapapasi, ka.

1. Tes. 1,9 I tinomolikud-kou-no sid rogon, tu mokiuripon-kou-no do Kinoringan i kapapasi om it otopot.

b) It Anak do Kinoringan nakamung sid kopoulosan do Kinoringan di sampai penlaid

Yahya 5,26 Boros di Yesus, Ong it Ama dino nga puun do kopoulosan, it Anak nga iadino, natahakan-no iosido do jumadi do puun do kopoulosan.

1. Yahya 1,2 Nokembulai-no i kopoulosan sampai nemot-za-no om nakasasi-okoi-no sampai mangahabal-okoi-no sid dikou di kopoulosan penlaid dino it antad sid Ama di nokembulai-no sid dahai.

Yahya 14,6 Boros di Yesus, Ioku-no diti o ralan om kabanaran

(katapatan) om kopoulosan.

2. Antad sid Kinoringan i sokoviai i mizaui sampai Kinoringan-no o mangahatul di sokoviai i kopoulosan di mizau.

Kinotimp. 2,7 Minanganu-no i Tuhan Kinoringan do tana dot osilou om inurug-ogi dau do riniba sampai tinohugi-no di Tuhan Kinoringan it odung do riniba dino do pinuhobo do kapasi om iri-ogi kipinuhobo-no do kapasi (kiginavo) i riniba.

Zabur 104,29 Mavi ioti matai sampai osiliu vagu dot avu ong topulion-nu i pinuhobo-nu. Ong itopuli-nu vagu i pinuhobo-nu, kotungag kavi ioti sampai emvoguvan vagu i vinangun.

Iti-no o sabap do mindamo it ongoulun do kopoulosan dau, iadko i raja Hiskia 2. Raja 20 ko i Yairus sid Mat. 9,18 om i kopitan sid Kaparnaum Mat. 8,5. I Yesus mamasi dot ulun, minsanko adau do Sabat (Lukas 6,9)

Zabur 103,1 om 4 O ginavo-ku, pangarazou di Tuhan, O kopoulosan-ku, pangarazou di ngaran dau dot osusi, tu natanggung-no dau i kopoulosan antad sid kobinasaan...

Ayub 2,4 Sukul aso togu do kulit, mad kakali osinang i Ayub dino. Minsanko natanus-no kavi i kolunduo dau.

3. I kopoulosan dot ulun okonko bai makan om minum,

Matius 6,25-34 Kadan-kou-no kumobimpipitan do ginavo di kobuatano do kopoulosan dikou do nunu o kakanan om kenuman ko kosulungan. ... Ihimo-no banal dikou i karajaan di Kinoringan om i kabanaran dau, tu ong iadino, itahak sid dikou it ongohal vokon, ka di Yesus.

Matius 13,22 Ong i nokotizas sid tanga do korugizan pengkaa dino,

Mongining iosido di boros dino nga obimpipitan di kosukupan om it akal do kolunduan dot obingsolod-no i boros dino sampai amu-no koponguva.

Yahya 12,25 It ulun dit orubatan di kopoulosan dau, atagak iosido di dau do kopoulosan. Om it ulun di sumana di kopoulosan dau sid saralom di vinangun diti, iosido dino ataud i kopoulosan dau sampai apasi penlaid iosido.

Yahya 10, 15 I Yesus iadko i manaud do domba di rinumundun, tu manapul dit ongodomba dau.

4. I kobatano do kopoulosan:

a) i konoruvo do sukud

Kolobusan 20,12 Pongohormat-no dit ama-nu om it idi-nu, supaya oloun-ko sid pomogunan di nitahak di Kinoringan-nu sid dikau.

Zabur 91,16 Ponoruvon-ku i sukud dot arangkap banal i kopoulosan dau om pemoton-ku iosido di kotulungan-ku, ka.

Zabur 90,5 I riniba koluu di sakot, tu sumuni om mungkalad-no do sasarp, minsosodop-po lumondihu-no om kumorop-no. .. I konibako dit umul-za iadko insan-no pomuhobo.

Kinotimp. 47,9 Boros di Yakub, Odurukan-oku dino sampai sid kosusaan-oku-nopo dino.

Ayub 8,9 Sabap aso-pot elaan ong i tokou diti, tu konihab-ogi. Tu i kobatano tokou iadko it oluhung di mitalibi.

Yakub 4,14 Tu ikou dino, iadko songobu-no inambun do kavut dit oruhai banal o kotonusan. Lobipo atag ong momoros-kou dot, Ong sukul kenginan di Tuhan, apasi tokou om posurut di iaditi om iadino, ka.

b) I kogunaan do kopoulosan

Lukas 16 it ulun do lumundu amu mamakai di kolunduo dau bahagi dit ulun vokon.

1. Petrus 4,2 Sabap ino, i kopolizian dikou di kakal-kou-po mizau amu sumuhut di kozian do riniba, inoi nga i kenginan do Kinoringan ot suhuton dikou.

Rum 12,1 Mindamo-okou dikou dot, Patahako-no i guvas dikou do parsambaan do mizau om osusi om ikozi do Kinoringan. I 1. Kor 13 manarang dit atag o vaza mongoguna di kopolizian.

5. I kopolizian penlaid Rum 6,23 I suul do kasalaan ino-no i kapatazan. Topot ong i panahak do Kinoringan, ino-no i kopolizian penlaid sid saralom di Yesus Kristus i Tuhan tokou.

a) Tumorima tokou di kopolizian penlaid, ong sukul mangasip sid di Yesus Kristus

Yahya 5,24 Isai-nopo i mongining di boros-ku sampai mangasip sid minonuhu dohon, tantu varo-no kopolizian dau penlaid om amu-no onong iosido do hukum, inoi nga nokedu-no sid kapatazan, gam nakavaliu-no sid kopolizian.

Yahya 6,51 Boros di Yesus, loku-no diti o ruti do kapasi i nokendahu antad sid surga. Isai-nopo i mangakan di ruti dino, iosido-no ot apasi sampai penlaid.

Yahya 4,10 Bang nelaan-nu-ogi i panahak do Kioringan, tantu ikau nga mindamoi sid dau sampai atahakan-ko dau do vaig dot ovud (dit apasi).

Yahya 6,40 Ino-no i kenginan dit Ama-ku, engin iosido dot isai-nopo i kemot dit Anak sampai mangasip sid dau, kasanganu-no di kopolizian penlaid.

b) Ino kopolizian dino nga piniizaan sid Kinoringan om mopud sid

saralom di boros do Kinoringan.

Yahya 17,3 Ino-no i kopoulosan penlaid, ong humarati ioti dikau, i Kinoringan dit iso-no om abanal, sampai i sinuhu-nu, i Yesus Kristus.

Rum 8,2 Sabap i hoturan di Sundu, i manahak do kapasi sid saralom di Yesus Kristus o pinalabus dohon antad sid hoturan do sala om kapatazan.

1. Petrus 1,23 Ikau dino nakalandai vagu, okonko antad sid vangun, inoi nga antad sid boros do Kinoringan i kapapasi. Ino boros dino amu tumanus.

Rum 6,4 iadko i Kristus nogulian antad sid ulun minatai, iadno dino imumuzon tokou banal i ralan di kopoulosan vagu.

2. Kor. 5,17 Isai-nopo i nasanganu-no di Kristus, vangun vagu-no iosido. I vangun laid dau natanus-no, sampai nokembulai-no banal i vangun vagu.

Gal. 2,20 Sabap ino, okon-noko mizau-oku-po vagu, inoi nga i Kristus ot apasi sid saralom-ku. Nunu-nopo i kopoulosan-ku dino, nga apasi-oku sid saralom di gama-ku mangasip sid anak do Kinoringan, i minanamod dohon om i minongontok dohon.

Kol 3,3 Tu napatai-kou-no dino, sampai nokosusut-no sid di Kristus i kopoulosan vagu dikou sid Kinoringan. Ong mimbulai i Kristus, kembulai-po i kohormatan dit itahak sid dikou.

Yahya 6,54 Boros di Yesus, Isai-nopo i mangakan dit onsi-ku om monginum di raha-ku, iosido-no o manansanganu di kopoulosan penlaid sampai ioku-no diti o mongogulian dau ong hiza-no dit adau di tohudi banal.

Kentalangan 2,10 Tatap-no sid dohon sampai matai om tahakan-ku-ogi ikau do kopoulosan do iadko antub-antub do kamanangan.

Paska, > poginakanan di Tuhan Yesus

patai, kapatazan, ino-no i kosungguvo di sokovia i riniba om nunu-nopo i mizau. Ong sid Momogun kodori: Ong opupusan-no humongkob i Momogun, tu navi-no o manuk om vogok pasamba sid rogon, nga kakali amu engkod mongoruol, varo-no boros dot, *Minsan ong iaditi, hukumon-no do Kinoringan.*

1. i hal do kapatazan (ong Momogun varo-po retanko kuasa do huntung)

a). i kosungguvo di mizau

Zabur 90,3 Pouli-ko di riniba sid lisovu do tana dot, Uli-kou-no o riniba, ka di Tuhan.

Zabur 104,29 Mavi i riniba matai sampai osiliu vagu dot avu ong topulion-nu i pinuhobo-nu. Ong itopuli-nu vagu i pinuhobo-nu, kotungag kavi ioti sampai emvoguvan i vinangun.

Ibrani 2,14-15 I Yesus nga nokoriniba lumuu di riniba, supaya kapananus iosido sid saralom di kinapatazan dau di kuasa do huntung, o ino-no i vozoon do rogon. Om polobuson dau i riniba i nouripon pempatai sid saralom di gama rumosi di kapatazan.

b) Zabur 55,5 i korosizan do kapatazan monguasa dohon.

c) Na varo tilangad do kapatazan:

Ayub 3,21 monginud ioti do kapatazan, nga a-korikot. Magavi ioti mokipapatai do lobipo mantadko i gama mogihim do dapu. Suvaiko otomon ioti ong kemot do purun do lobong.

Kinotimp.25,8 Nosingkop-po do 175 toun it umul di Ibrahim, minatai-no iosido, tu nokonggu-no ot utok kolohing sampai nakamung-no iosido sid umpug dot inizonon di varis dau di minatai.

1. Raja 19,4 Boros di nabi Eliya, Amu-oku-no kogoos diti, o Tuhan.

Onuvo-no iti ginavo-ku, tu lobipo avantang do matai-oku diti, ka dau.
Filipi 1,23 Boros di Paulus, Duvo kagi i ginavo-ku. Engin-oku-ma matai, tu muli sid di Kristus. Ino iadino dino tantu lobipo avantang.
Topot i gama mintoron sid guvas diti, nga lobipo osusa, tu ikou gima.

d) Na atag ong osodia-no it ulun huntad moling dot aso dangol:

Zabur 90,12 Tudukai-okoi-no mongitung di kisukud-okoi, supaya elo-okoi monguog.

Zabur 31,16 I hiza-ku, nga sid palad-nu kavi ino.

e) Varo opiduvo o ginavo sampai suhulon matai ko mizau sampai katama mitinganu.

1. Sam 15,32 Na ohigak-ogi i raja Agag tumoronong sid di Samuel. Tu itungon-no dau i sana do mipapatai nakatalib-no. Tinumabpo-no i Saul sid rapo dau, tu rumosi do tingazamon.

Yahya 11,16 Boros di Tomas, Mozo tokou-no di Lazarus, supaya korundun tokou dialo, ka dau. f) Varo't ulun dit opupusan sampai mitinganu iadko i Saul 1. Samuel 31,4 ko i Yudas Matius 27,5. Rum 8,36 Dot otopot i boros di Paulus dot, Olumbatos-no dot elaan-ku: okonko i kapatazan ko i koposizan, i malaikat ko i nunu-nopo i monguasa, iso nga aso kopotongkizad di tokou antad sid samod do Kinoringan, i nokembulai sid di Kristus Yesus, i Tuhan tokou, ka.

2. I kopianggazan di kapatazan om i kasalaan (karanggalan)

a) i kapatazan ino-no i suul do kasalaan (Rum 6,23)

Kinotimp. 2,17 Ong mangakan-kou dit uva dilo, kapatai dikou, ka di Tuhan.

Yakub 1,15 Ong tumbozoon i karalazan do ginavo, kalandai-po, sala-no. Osukod-po i sala, kapatai-no.

Rum 5,12 Antad sid sala dit iso ot ulun nokembulai-no i huntung om

ensanan i riniba nokuasa-no do huntung.

b) I sala o ralan pakaa sid kapatazan

Yahya 8,24 Noboros-ku-no sid dikou dot, Matai-kou sid saralom di kasalaan dikou, kangku. Sabap bang amu-kou mangasip dot ioku-neti, matai-kou sid saralom di kasalaan dikou.

Kol. 2,13 I kobuatano dikou di gulu diri dit amu-po nosunatan di Kristus, napatai-no sid kasalaan. Topot biano pinasi-kou-no do Kinoringan sid di Kristus. Niada-no dau i sokoviai i kasalaan dikou.

c) i monguasa di kapatazan, ino-no i vozoon do rogon (Saitan).

Ibrani 2,14 I Yesus kapananus di kuasa do huntung, o ino-no i vozoon do rogon sid saralom di kinapatazan dau.

d) i kapatazan momorinta om momogos di riniba

Rum 5,14 Topot i huntung dino minonguasa di riniba antad-po sid di Adam sampai-no sid di Musa, minsanko it ulun dit amu kerad di sala di Adam nga nokuasa-no kavi.

Rum 5,12 Sokoviai i riniba nokuasa do huntung, tu sokoviai i riniba minonimbaru kavi do sala.

Zabur 90,7 Tumanus-okoi, sabap i hungot-nu. Sampai tigogi obinasa-okoi, sabap i sana-nu. Sokoviai i kasalaan-za nigili-nu-no kavi sid tinoguvangon-nu om i karaatan-za di nokosusut-no, nga nakalanta-no kavi sid tinoguvangon-nu. Ino-no o sabap do kisukud-okoi, tu atanus-okoi di hungot-nu.

1. Kor. 15,26 I sangod di tonuson dau sid tohudi o ino-no i kapatazan.

e) varo-po kapatazan di sid naraka (Markus 9,44 i naraka, sid apui dot aso kopisakan)

Gal. 6,8 Isai-nopo i mananom sid dau do guvas, ino-no mongomot do kobinasaan di guvas dau.

1. Yahya 5,16 Topot varo-po sala di kapatai.

Kentalangan 2,11 Isai-nopo i kamanang, amu-no kopurimon di kapatazan vagu.

Kentalangan 21,8 It ulun dit atalou om i mongolupu om mamalid om mamatai, i kukumiagai, i monindaat om i susumamba sid rogon om i sokoviai i momudut, kosubo ioti kavi sid sinikit dit apui do naraka. Ino-no i kapatazan koduvo.

3. I Yesus Kristus om i kapatazan dau

a) tinomod di Yesus moki-patai

Yahya 10,18 Isot ulun nga aso kapanganu di kaposizan-ku antad sid dohon, inoi nga ioku kondiri o manahak di kaposizan-ku, ka di Yesus.

Filipi 2,8 Sinumuhut i Yesus sampai matai, o ino-no minatai sid kazu do sangkap.

b) i kinapatazan di Yesus, inot ulun dit abanal, minongontok dit ongoulun dit amu abanal.

Matius 20,28 sampai itahak i kaposizan dau, dot iponobus di sokoviai.

Rum 5,6 Minatai i Kristus ontokko i noumpai-no laid bahagi dit ulun di pakaso do Kinoringan.

Rum 5,10 Sabap i hiza di kakal tokou-po sangod do Kinoringan, niandus tokou-no sid dau sid saralom di kinapatazan dit Anak dau.

c) it ulun Kristian kumoruhang sid kapatazan di Kristus

Rum 6,4 Mad nolobong tokou-no di nokezo tokou di kinapatazan di Kristus sid saralom di kinopodsuan, supaya iadko i Kristus nogulian antad sid ulun minatai sid saralom di kohormatan dit Ama, iadno dino imumuzon tokou banal i ralan di kaposizan vagu.

penlaid, ponong sid koledo, vaza manarang di rontob do hiza dit a-engat ong bai riniba. It utok do riniba a-koduzan i kavazao om

kobuatano do Kinoringan, it aso kinotimpuunan om aso kovian ko pangarantaban. Ong riniba rontob elo monukat do konoruvo, kosongoho om kasavato om i koledo do hiza, isuhut di jaham om adau om vulan om tinounan. Ong sid Momogun, ong manarang di hiza di gulu banal, varo pongoretan dot, Kodori, ka. Amu narait do sera ino. Pengkaa dino, i sid tohudi banal dot a-elaan do sera, ino-no retanko penlaid, topot amu manalahas do sera ino. Bai mamalang do rontob dit elaan mongitung om mongiro: po-in-laid =penlaid, ino-no i hal di ponong sid tahudi banal dot aso vokon di sumuhut-po dino.

1. Penlaid, ino-no o harati, aso kopupusan.

Kinotimpuunan 13,14 Iti sokoviai i tana diti, itahak-ku sid dikau om it anganak-nu sampai penlaid.

Kolobusan 12,24 Suhuto-no dikou it ongoimuhunan di iadino, ikou sampai tungkus-monungkus-kou.

Zabur 28,9 O Tuhan, tulungai-no i bansa-nu om pensavato-no ioti sampai penlaid.

2. I Kinoringan nga sampai penlaid dot aso karantaban dau do kogofoo om kasavato ko i hiza.

Kolobusan 15,18 I Tuhan, ino-no o monguasa sampai penlaid, ka di longoi dioti dino.

Zabur 90,1 O Tuhan, ikau-no o sunsudon-za antad di kodori-po om amu-ko tumanus sampai penlaid.

Zabur 92,9 Ikau-no o Tuhan it asavat banal om sampai penlaid.

Kentalangan 1,8 loku-no it Alfa om it Omega, i kotimpuunan om i kovian, i biano i gulu om i sid tohudi banal.

3. I gama mongindazou do Kinoringan, nga aso kopupusan.

Rom 1,25 I Minamangun, i piindazou sampai penlaid, Amin. (ino dino retanko tumalib di kovian dit ongohiza).

Zabur 41,14 Opiindazou-no i Tuhan sampai penlaid.

Matius 6,13 Sabap ikau-no o sanganu di karajaan om i kokuasaan om i kohormatan sampai penlaid.

4. I patahakan di Tuhan, nga sampai penlaid amu tumanus.

Zabur 117,2 I kovosihan dau monunda dahai sampai penlaid.

Zabur 118,1 I kamamasan dau nga sampai penlaid.

Yesaya 40,8 I boros do Kinoringan tokou sampai penlaid.

5. I Kristus mongovit dit ontok do penlaid sitid tanga diti ontok diti)

Ibrani 1,8 Kananganko i <Kristus minomoros-no iosido dot, I karajaan di kinogomon-nu, o Kinoringan, sampai penlaid-no, ka.

Yahya 8,35 It Anak kentoron sampai penlaid, ka di Yesus.

Yahya 12,34 I Kristus dino sampai penlaid.

Rom 9,5 I Kristus dino asavat ko i sokovia. Kinoringan-no it oiindazou sampai penlaid. Amin.

Ibrani 5,6 Ikau-no dino ot imam sampai penlaid, ka.

Kentalangan 1,18 Boros di Kristus, Apasi-oku-no sampai penlaid.

Ioku-no o monguasa di kapatazan om i naraka.

6. I gama di Kristus nga sampai penlaid.

Yahya 6,51 Isai-nopo i mangakan diti kakanan diti, ino-no ot apasi sampai penlaid.

2. Tes. 2,16 I Kristus-no o nakatahak sid di tokou di koponginsasamadan di sampai penlaid.

7. I hiza di korikatan vagu di Kristus nompus-no it ontok biano om kembulai it ontok do penlaid.

Yesaya 35,10 Isai-nopo i nosopulan di Tuhan, nga momonguli-no om rumikot-no sid burul do Sion pivozoon humigak, tu otomon it ongoginavo. It ongovuros dioti ongonavau iadko tumitiu i binahang do lampu. Kohigakan om katamanan o mozo-vozo dioti dot aso-no kengkadan, sabap nakatalib-no kavi i kahangkaban om i kopipitan dioti dino, ka di nabi.

Matius 19,29 sampai kotungkus ioti di kopoulosan penlaid.

Lukas 20,34-35 It ongoulun sitid vinangun diti manansavo om mokisavo. Topot it ongoulun di natahakan-no do pangkat do kamung sid urug vagu dino sampai sid kogulianan antad sid ongoulun minatai, amu-no manansavo ko mokisavo.

Gal. 1,4 osopulan tokou antad sid karaatan di didino.

Markus 10,29-30 Boros di Yesus, Iso't ulun nga aso di nokopongiduan di valai dau.. tu sumuhut dohon om i habal do kovosihan, dot okonko biano kaganti dot inghatas i neduan dau, om it ontok do rumikot kikopoulosan penlaid.

2. Kor. 4,4 I vozoon do rogon o monguasa diti riniba...

Kinotimpuunan 8,22 Salaid do kakal-po iti pomogunan diti aso kengkadan dit ontok do mangasok om mongomot, it azami om alasu, i manangadau om manampangi, it adau om sodop, ka di Tuhan.

Rom 6,23 Topot ong i panahak do Kinoringan, ino-no i kopoulosan penlaid sid saralom di Yesus Kristus i Tuhan tokou.

1. Yahya 2,17 Manjadi i vinangun om i karalazan dino obinasa. Topot isai-nopo i sumuhut di kenginan do Kinoringan, ino-no ot apasi sampai penlaid.

Matius 25,46 Manjadi ioti dino sumuvang-no sid kapagasan penlaid.

Topot ong it ongobanal sid kopolosizan penlaid, ka di Yesus.

2. Kor. 4,17 I kosusaan tokou di didino dit agaan o mongimbulai do hormat di sampai penlaid.

pili, momili, kopomilihan,

1. i gama monodiri ombo i gunaon antad duvo ko ogumu ot ulun ko barang

Yosua 24, 15 Boros di Yosua, Pomili-kou-no adau bianco dot isai o sambaon dikou, iri-ka't ongopinokokinoringan dit angaki dikou ko i Tuhan Kinoringan, ka dau.

Yesaya 7,15 sampai kaharati iosido monodiri dot araat om avantang.

Lukas 10,42 I Mariam minomili-no dit avantang o hal sampai amu onuvan vagu iosido di nopili dau dino, ka di Yesus.

2. i gama momili do bahagi pangkat om tomodon

Lukas 6,13 Minomili-no i Yesus antad sid dioti do hopod om duvo i retan dau dot Ongorasul, ka.

Usuran Rasul 6,5 Manjadi abanaran-no i sokoviai dit ongoboros di iadino sampai pinili-no i Stefanus.

3. I gama momili, tu avantangan dino mantadko i vokon

Kinotimpunan 13,1 Sabap ino, pinili-no di Lot i konopuan do Yarden..

Ulangan 12,11 Gamao-no dikou i sokoviai i nimuhun-ku dikou sid tempat di nopili di Kinoringan dot intoronon dau, ka di Musa.

4. i harati, mongitung dot randavi i hal ko ulun

1. Petrus 2,6 Itandon-ku sid Sion do vatu do nopili om kihorogo (mad

obisa banal)

a) Manjadi ong Kinoringan momili dot ulun, ino gama dau dino antad sid kabanaran dau. Okonko antad sid vuros ko kobuatano o gama do Kinoringan, inoi nga antad sid ginavo dot ulun om antad sid vaza dau mangatag ombo it amu atag. Antad ensanan i riniba nopili-no do Kinoringan i Ibrahim om it bansa dot Israel, supaya sumuhut ioti di hoturan om kenginan do Kinoringan sampai mongohormat om mongoguna do Kinoringan sid tanga do riniba. It ulun di nopili-no jumadi do piumpugan do Kinoringan. I kinopomilian dioti dino okonko antad sid kuasa ko pangkat ko keloo om garal dioti, inoi nga vazaan di kovosihan do Kinoringan pengkakat dit a-ko piro it ulun antad sid tanga do riniba di mad nangatagak-no om nokedu-no sampai napalid-no. Na ozi i Kinoringan dot it ulun di nopili jumadi do sasi om tanda di kovoishan do Kinoringan sid pialatan do riniba. Ong sid Kitab Vagu, i Yesus kondiri nopili-no do Kinoringan. Lukas 9,35 om 23,35 Iti-no it Anak-ku di kenginan-ku, ka di dolou antad sid savat.

Ulangan 7,6 Sabap ikou dino bansa dot osusi bahagi di Kinoringan om pinili-kou di Kinoringan antad sid sokoviai it ongobansa, supaya asamadan-kou Dau. Okonko ogumu-kou-ko it ongobansa vokon o kinopilian dikou, gam ikou-no it okudik banal mantadko it ongobansa vokon. Sabap I Kinoringan atatap om kohondom di janji om obinsianan iosido di sokoviai it ongoulun di manamod om tumopiri sid dau.

Iri-ogi minomili i Yesus di kinoruhangan dau. I tinomod di kinopomilian, komboon ioti tumabang di Yesus. Yahya 15,16 Okonko ikou o minomili dohon, gam ioku-no o nokopomili dikou sampai minonodia dikou, supaya ikou monguva sampai it uva dikou dino nga amu-no tumanus, ka di Yesus.

Suvai sumuhut om monumbozo i koruhang om kosunu-ogi i kinopilian. Suvai kogoos i piumpugan di nopili-no do minta dua om sumuhut sampai mangasip, gumoos ioti do manahan di sokovia i pensubaan om kopiduvaan do ginavo.

Usuran Rasul 9,15 Pomoros-no i Tuhan sid Ananias dot, Pamanau-no, tu pinili-ku i Saulus do ponuhu-ku di mangahabal di ngaran-ku sid sokovia it ongobansa.

b) Ong Kinoringan momili, okonko i keloo om kosilato dot ulun ot agazo o guna om tomodon, inoi nga it opodok om osibak om orukung o pilion do Kinoringan, supaya gumazo i hormat do Kinoringan, okonko i hormat di nopili.

1. Samuel 16,7 Boros di Tuhan sid di Samuel, Kadan-no pongimot di baiko avantang ot pomurasan om ohijau. Ong i Kinoringan, i ginavo dot ulun ot elaan dau, ka di Tuhan.

1. Korintus 1,27 Gamko it ongolovong sitid vinangun o pinili do Kinoringan, tu mangamalu dit ongoelo..., ka di Paulus.

1. Petrus 2,9 Topot ikou dino i varis di nopili-no om i piniizaan di pakarajaan om i rurungan dot osusi, i bansa do pasok di dang Kinoringan, ka di Petrus.

Matius 24,31 Manjadi suhuon dau it ongomalaikat monoburi dot opuhod, tu mongumpug ioti dit ulun di nopili antad sid sionggo-nopo, antad sid koribing dit avan sampai sid koribing.

Efesus 1,4 It amu-po nourug iti pomogunan, nopili tokou-no laid dau sid samod di Kristus, ka di Paulus.

c) Ong i Paulus o manarang, i Kinoringan minomili di Yakob, it obpinai di Esau dit a-po nakalandai ioti dino. Pengkaa dino i bansa dot Israel di mad kotuaan osusa do monginud sampai nokosuhut-no i kogumuai it ongoulun dit okonko bansa dot Israel, (Rom 11,25)

d) I kosungguvo do kopomilian.

Zabur 33,12 nopili-no bahagi di kotungkusan.

Ulangan 7,6 nopili.no do bansa di dang Kinoringan.

Efesus 1,4 nopili-no bahagi di kosusian om katatapan sid saralom do samod.

piniizaan >izo

pinta dua, pomintaan dua,

I gama minta dua ino-no i gama tumoguvang sampai mizo sid Kinoringan. It ulun kumiboros do Kinoringan dot onining iosido, supaya kening di kenginan do Kinoringan.

Varo tasantanid-tanid o vaza minta dua. Varo ong

a) minta dua do mongindazou-nopo do Kinoringan o tomodon.

b) minta dua do monorima kaseh sid Kinoringan o panangan.

c) minta dua do mindamo do kotulungan ko poromut sid Kinoringan di kosusaan om kosompitan kondiri o panangan.

d) minta dua do mongontok dot ulun vokon

e) minta dua do mokiada di kasalaan om karaatan dau do muli sid Kinoringan

Na i Kitab do Zabur ino-no it ongopomintaan dua dit bansa dot Israel. Kondiri di Yesus nga nokosunsui-no di Zabur dino (minongimbulit di Zabur 22 om 31 om i vokon). Pengkaa dino, i Yesus minonuduk di kinoruhangan dau di gama minta dua (Lukas 11 om Matius 6) Antad dino elaan tokou dot i gama minta dua okonko bai hal do hovo-hovoron ko kolu-koluvon om moniim do kaluto ong eningi di Kinoringan, inoi elaan tokou dot i Kinoringan mangambat di nunu-nopo songpinta dua dit onong o gama minta dua, isuhut di boros di Yesus Matius 6,9 om posunuo-no i kenginan-nu iadko i sid surga, iadino iti

sid pomogunan, ka.

Sabap ino, engat tokou dot,

1. Kinoringan ozi di pomintaan dua di tokou.

Zabur 50,15 Kodimo-okou-no sid tanga do kosusaan, tantu sopulan-ku ikau.

Matius 7,7 Indomoo-no dikou, supaya atahakan-kou.

Filipi 4,6 Kadan-kou-no humongkob di nunu-nopo i hal, inoi nga pelaa-i-no dikou di Kinoringan it ongoindomoon dikou sid saralom di gama minta dua om mindamo sampai monorima kaseh.

1. Tes. 5,25 Boros di Paulus, ot Ongoobpinai, pinta dua-kou-no bahagi dahai.

1. Tes. 5,17 Kadan-kou-no mintoron minta dua.

1. Timotius 2,8 Sabap ino, i doho do kenginan, Sid sokoviai it ongointoronon nga it ongokusai o pohintol dit ongopalad dot osusi, tu minta dua dit amu rumodus om amu humungot.

1. Tim. 2,1 Mongimuhun-okou do keso gamaon, mindamo, minta dua, mongontok minta dua om monorima kaseh bahagi di sokoviai it ulun, bahagi dit ongoraja om sokoviai it ongopomorinta, supaya i koposizan tokou oulud om a-ounang sid saralom di gama tokou sumuhut sid tinoguvangon do Kinoringan, ka di Paulus.

2. It ulun Kristian amu engkod minta dua.

Lukas 2,37 I nabi Hana amu tiuli-uli antad sid panambayanan, tu mininta dua iosido do momuasa om minta dua do sodop adau.

Markus 1,35 I Yesus minamanau sid belantara, supaya varo kotibangan dau minta dua.

Lukas 6,12 I Yesus mininta dua dot osuvaban sid burul om sid ozom.

Usuran Rasul 9,11 I Paulus mininta dua ontok di nosimbanan i ginavo

dau.

3. I vazaaan di gama minta dua.

a) opus i ginavo dot osibak om orukung

Zabur 34,19 Osomok-no i Tuhan sid ulun di kiginavo dot orukung om nomurok-no.

Yosua 7,6 I Yosua minonginis di sulung dau sampai mininta dua dot, O Tuhan, nokokuro-ka, tu pinalabus-nu i bansa diti sid Masir?

Daniel 9,18 Lokoi diti nokosingkudou sid tinoguvangon-nu, okonko i kabanaran dahai ot harapan-za, inoi nga i kobinsianan-nu ot harapan di gama-za minta dua, ka dau.

Yakub 5,16 Ong sumakit it ulun, okunon dau i kasalaan sid ongoobpinai dau om mongontok-ogi ioti minta dua, supaya engkod i sakit dit ulun dino.

b) suvai nakapangada-no laid it ulun di kasalaan dit ulun vokon om elaan-ogi dau mokiada sid Kinoringan, isuhut di Pomintaan dua di Yesus (Om padao-no i kasalaan-ku, iadko ioku nakapangada-no di sala dit ulun di kisala sid dohon).

Markus 11,25 Boros di Yesus, Ong ontok do minta dua-kou, padao-no dikou i nunu-nopo i kasaap do koruhang, supaya it ama dikou sid surga, nga pada di kasalaan dikou. ka.

Matius 18,19 Bang varo duvo sid dikou sitid pomogunan do miupakat mindamo, tantu atahak ioti dit Ama-ku sid surga, ka di Yesus.

c) Mangasip om humarap dit ambat do Kinoringan

Markus 11,24 Sabap ino, boroson-ku-no sid dikou, Sokoviai i nunu-nopo ong sukul mangasip-kou di minta dua om mindamo, tantu koatahakan-kou, ka di Yesus.

Yakub 1,6 Mindamo om mangasip it ulun dot okonko opiduvo i ginavo

dau.

Yakub 5,15 I gama minta dua di kovoza i kosipan, nga katabang dit ulun do sumakit.

d) It ulun di minta dua nga obinsuhut, omomos om okosog.

Yahya 9,31 Elaan tokou dot amu iningon do Kinoringan it ulun do kisala. Topot ong varot ulun di rumonok do Kinoringan sampai sumuhut di kenginan dau, ino-no ot iningon dau.

1. Petrus 3,12 Tu i mato di Tuhan mongontupat dit ongoulun dot abanal om i tolingo dau, nga mongining di pinta dua dioti. Topot mongorodus i Tuhan dit ulun di monimbaru do sala.

Yakub 5,16 I pomintaan dua dit ulun dot abanal banalko agazo o kogunaan,

1. Petrus 4,8 Sabap ino, atag-kou-no om vanus-kou-no sid saralom di gama dikou minta dua.

e) I gama minta dua okonko sid mara-garak ko monginggizak.

Matius 6,6 Ong minta dua-ko, suva-no sid ongekob-nu om lontobo-no i rongobon om pinta dua-no sid Ama-nu dot olingob o gama-nu minta dua. Manjadi it Ama-nu, i kosonsob dit nokosusut o monuli dikau. Ong minta dua-kou, kadan-no pingguli-guliai momoros iadko it ulun di sumamba sid rogon.

f) Ahanut-no i gama minta dua

Lukas 18,1 I Yesus minonuduk di kinoruhangan dau dot atag dot amu mintoron minta dua dot amu abasan kumiboros do Kinoringan. Sabap i garatan dit ondu diri o minongimbulai di kovosihan dit ulun dit okodou o ginavo. Ino dino, nga suntuan bahagi di gama-nu minta dua.

Usuran Rasul 1,14 Manjadi soumul-umul miumpug i kinoruhangan dino dot iseso o ginavo dioti minta dua om mindamo.

g) I gama minta dua nitudukan di Sundu do Kinoringan

Zakaria 12,10 Boros do Kinoringan, Tuntugan-ku do Sundu do kovosihan-ku om i pomintaan dua sid dioti dino, ka di nabi.

Rom 8,26 A-elaan tokou do nunu ot apatut ot indomoon di minta dua tokou. Topot antakan tokou di Sundu sid saralom di homu dit a-koumbongut, ka di Paulus.

Rom 8,15 Sid saralom di Sundu dino kopongodim tokou-no do Kinoringan dot, Abba,ka, ino-no, O Ama, ka.

h) I gama minta dua ajadi-no sid saralom di ngaran di Yesus, topot humarap tokou sid kabanaran di Yesus.

Yahya 14,13 Nunu-nopo it indomoon dikou sid saralom di ngaran-ku, posunuon-ku kavi, ka di Yesus.

Yahya 15,7 Ong mintoron-kou sid dohon om i boros-ku mintoron sid dikou, indamo-kou-no do nunu-nopo i kenginan dikou, nga tantu atahakan-kou, ka di Yesus.

4. I barakat di gama minta dua

Zabur 73,17 Amu-ku ohorotizan, suvaiko sumuvang-oku sid valai do Kinoringan om ontupaton i kosungguvon dit ulun di iadino om elaan-ogi dot tantu-noko kentoron ioti sid aralamou om ikau-no o paratu dioti sid kobinasaan.

Lukas 11,13 Iku dino di kikaraatan-kou, nga kapanahak-kou dot avantang o panahak, okon-ka-ko lobipo it Ama sid surga o manahak di Sundu dot Osusi sid ongoulun di mindamo sid dau? ka di Yesus.

1. Tim. 4,5 Tu nosusian-neno di boros do Kinoringan om i pomintaan dua, ka di Paulus.

podsu, kopodsuan, kopomodsuan,

1. I vaza monodia di kopodsuan sid Kitab Laid

Kolobusan 19,10 Pomoros-no i Tuhan sid di Musa dot, Pamanau-no kumaa sid ongoulun om suhuo-no ioti sumodia sumamung dohon, ino- no o gama, ipopupu-no dioti it ongokosulungan, supaya osusi sumamung dohon

Imamat 14,8 Ong osihat-no vagu i kibalang, suvai opupuan i kosulungan dau om mongohugus-no banal di modsu.

Yehezkiel 36,25 Podsuon-ku-no do vaig dot oliou, supaya osusi-kou sampai nedu-no i sokoviai i nokensasakau dikou antad sid gama dikou sumamba sid ongopatung.

2. I kopomodsuan di Yahya i minomodsu

Matius 3,11 Momodsu-oku dikou do vaig, ka di Yahya

Markus 1,4 Rinumikot-no i Yahya momodsu dit ongoulun sid belantara om minangahabal di kopomodsuan di koulian sid Kinoringan om i ralan do kaadaan do kasalaan.

UR 19,3 Dinuat-no vagu di Paulus dot, Nunu-ka sompomodsuan i notorima dikou? Ponimpa-nopo ioti, i pomodsuan di Yahya, ka.

Markus 1,9 minamanau-no i Yesus sid pomogunan do Galilea om minokipodsu-no di Yahya sid bavang do Yarden. Manjadi tumindalo- po i Yesus antad sid vaig, nemot-no dau do minitas-no it avan om minindahu-no i Sundu i buatan iadko burung asang, minontok sid di Yesus.

Matius 3,11 Topot ong i susumuhut dohon dino, lobipo kikuasa iosido sampai amu-oku-po apatut do tumudu di tompa dau. losido-no dino o momodsu dikou do Sundu dot Osusi om apui, ka di Yahya.

3. I Yesus minangahatul di kopomodsuan

Matius 28,19 om podsuo-no dikou ioti sid ngaran dit Ama om it Anak

om i Sundu dot Osusi.

Markus 16,16 Isai-nopo i mangasip om opodsu-no, ino-no ot apasi.

UR 2,38 Boros di Petrus sid Yerusalim, Piguli-kou-no sid Kinoringan sampai ipat-ipat it ulun nga mokipodsu-no sid ngaran di Yesus i Minananggung, supaya kaada i kasalaan dikou om kotorima-kou-ogi di Sundu dot Osusi.

UR 8,38 Manjadi pinentoron-no dioti (i panakavan om i Pilipus) i kurita dino sampai minivozo-no tumolong sid vaig, tu pinodsu-no di Filipus i panakavan dino.

1. Kor. 1,13 Antawa nopods-kou-no sid ngaran di Paulus?

1. Kor. 15,29 varo gama dit a-nokonong, ino-no, mongongontok do saralom tana mokipods (varo vaza mamakai di pamarasan *sid saralom tana*, ino-no Kadan-ko-no kumioduw do saralom tana = Kadan-no kumioduw dit ongoulun do minatai. Ko, Binobog saralom tana =kisakit do ginumazo ot inan sampai amu kapanau om i iadino).

4. I kogunaan do kopodsuan

a) kaadaan do kasalaan

UR 22,16 Ingkakat-no koduruk om pokipodsu-no om pongohormat-no di ngaran do Kinoringan, supaya kaada i kasalaan-nu, ka di Hananias.

1. Kor. 6,11 Nohugusan-kou-no sampai nosusi-kou-no om nembanaran-kou sid saralom di ngaran di Tuhan Yesus Kristus om i Sundu do Kinoringan tokou.

UR 2,38 .. om kotorima-kou-ogi di Sundu dot Osusi. Vokon-no ong amu-po opods, kotorima-no laid di Sundu (UR 10,45 om 8,12.15.16)

b) kodung nopods, nakamung it ulun sid piniizaan om piumpugan do Kristian

1. Kor. 12,13 I tokou diti nopods tokou-no kavi sid saralom dit iso-no

o Sundu, supaya kezo tokou sid iso-no o guvas. Manjadi ikou-no dino o guvas di Kristus (27).

Efesus 4,5 Nokodim-kou-no sid iso o harapan dit iso-no o guvas om iso-no o Sundu om baiko iso-no o Tuhan om iso-no o kosipan om iso-no o kopomodsuan..

1. Petrus 3,21 Manjadi ino iadino iadko suntuan biano bahagi dikou, tu osopulan-kou-no di pomodsuan dit okonko baiko ipomoug di guvas, inoi nga i harati, mindamo sid Kinoringan do ginavo dot otulid, tu i gima kinogulianan di Yesus.

Titus 3,5 I vaig di kinopomodsuan o minongimvagu di tokou sid Sundu dot Osusi.

Ong onsizon i hal do kopomodsuan, iadino: i tanda: **Vaig.**

Ong i suhu:

Pamanau-kou-no, jodizo-no dikou do koruhang-ku i sokoviai it ongobansa. Podsuo-no dikou ioti sid ngaran dit Ama om it Anak om i Sundu dot Osusi sampai tudukai-no dikou ioti sumuhut di sokoviai i nimuhun-ku sid dikou (Matius 28,18-19)

Ong i harati:

Iadko i vaig momoug dit asakau, i raha di Yesus o momoug di karaatan tokou. Ino vaig dino tanda di kinapatazan di Yesus. Ong kotolong sid vaig, matai it ulun, ino-no it ulun laid om iri-ogi tumindal om masi it ulun sid vangun vagu. Iadko i karabau ko it uripon natandaan-no di sanganu, i Kinoringan o mananda dit ulun sid saralom di kopomodsuan, dot iti-no o harati, Ikau diti, ioku-no o sanganu, ka di Kinoringan.

Ong i vaza:

Aso bida, pihidan do vaig ko itolong sid botung. Sabap ensanan i rahat do Kina Selatan amu-po miuma do mongohugus di bai iso o

sala dot ulun. I bai sontihi i vaig di kosondot sid ulu dot ulun, nga tanda-no di gama do Kinoringan monimbaru di guvas om ginavo dot ulun. Atagali ong i kogumuai do boloji ko bavang om botung. Sabap okonko i vaig o mangagama.

Ong anak do ragang-po opodsu antad sid kenginan do molohing, i molohing mindamo do pamung dit anak sid gorija di Kristus sampai mangakun ioti do mangagazad dit anak sid di Yesus Kristus. Sumukod-po it anak, mongoho-no iosido. Topot okonko i gama dit ulun mongoho o keso o guna di kopomodsuan, inoi nga i janji do Kinoringan sid ulun dino.

I kopomodsuan dino o tanda di boros do Kinoringan di manalahas om mamanal di Habal do Kovosihan, ino-no

I Kinoringan, i Minamangun om monguasa di sokovia, ino-no it Ama tokou.

I Yesus Kristus, it Anak do Kinoringan, i nakasangkap om nogulian bahagi di tokou o mongodim om manapul di tokou antad sid karaatan.

I Sundu dot Osusi mizon sid di tokou om monimbaru di kopolisan tokou, supaya i tokou ajadi dot ulun di sumuhut di kenginan do Kinoringan.

poginakanan di Tuhan Yesus, ong poginakanan, ino-no o harati, ahatul o gama monginakan. Hiza dot ulang toun ko mogontong, nga varo poginakanan. Manjadi kondiri di Yesus minangahatul di poginakanan dino, hiza di sodop guluko i kinapatazan dau, mad poginakanan di humuntad iosido moling sid Ama, ino-no i Kinoringan. I harati di poginakanan dino, posuntu sid kinoruhangan om sid sokovia it ongoulun Kristian di kogunaan di kinapatazan dau om i vazaan

monuduk di gorija dit ontok di kinapatazan dau dino.

1. It inantadon di poginakanan , ino-no i Paska dit Ulun Yahudi i nahatul sid Kitab Laid. I Paska diri pangahandaman di kinolobusan dit ongoulun dot Israel antad sid Masir.

Kolobusan 12, varo't anak dot domba nagaras-no, tu mongontok dit ulun dot Israel, supaya amu kaharub i kotuaan di dang Israel. Ino domba om i tinopis dit aso pangambang dino kakanan di huntad lumabus sid Masir, om i raha di domba nihigil-no sid lobokon do rongobon sid savat, supaya toliban di malaikat di mominasa.

Na sid Kitab Vagu kaharati it ongorasul dot i Yesus mad ino anak do domba di mongontok di riniba, supaya varo kolobusan antad sid karaatan om kasalaan.

Yahya 1,36 Boros di Yahya i minomodsu, Imatai-no, hodi-no it anak do domba di dang Kinoringan, ka.

1. Kor. 5,7 Varo't anak do domba nisamba do Paska, ino-no i Kristus.

Matius 26,26 i raha di Yesus najadi do pinonontuan om janji vagu di Kinoringan sid riniba.

Kolobusan 24,8 I Musa kinumavid di raha di pinongolumbatasan om nitizas-no dau i raha dino sid ongoulun sampai minomoros dot, Iti-no i raha di lumbatos do Kinoringan sid dikou sokovia, ka dau.

2. I piumpugan dot ulun Kristian om i poginakanan.

a) I piumpugan mongohondom di kinapatazan di Tuhan Yesus.

1. Kor. 11,26 Manjadi monikid-nikid ong mangakan-kou di kakanan diti om monginum diti, pazazad-kou di kinapatazan di Tuhan sampai penrikot vagu dau.

1. Kor. 11,24 .. tu pangahandaman dikou dohon, ka di Yesus.

b) I piumpugan monorima di kinapatazan iadko tahak om tanda bahagi dit ipat-ipat it ulun.

Matius 26,26 Boros di Yesus, Onuvo-no, akano-no, ka dau.

c) I piumpugan humarap di poginakanan vagu di sid tinoguvangon di Tuhan sid karajaan dau.

Matius 26,29 Boros di Yesus, Antad bianco amu-oku-no kenum vagu di vaig dot anggur dino sampai it adau di kenuman tokou vagu sid karajaan dit Ama-ku, ka di Yesus.

1. Kor. 11,26 pazazad-kou di kinapatazan di Tuhan sampai penrikot vagu dau.

d) Ino-no it ulun dot apatut milang sid poginakanan d.T.Y, ino-no mongohondom, monorima, humarap sampai sumuhut di suntuan di Yesus manamod dit ulun vokon (Yahya 13).

1. Kor. 11,28 Ipat-ipat it ulun porisaon-po laid i ginavo dau om akanon-ogi dau i kakanan om inumon-ogi dau i vaig sid subung dino. Tu isai-nopo i mangakan om monginum dot amu apatut o gama, ohukuman iosido di nakan om nenum dau, sabap okon gima ko mongoguna iosido di guvas di Tuhan, ka di Paulus. I harati, i nunu-nopo sangkaraatan dot ulun ponong sid ulun vokon mongunang di piniizaan sid poginakanan dino.

e) Bang varo't ulun di mangasau di poginakanan..

Lukas 22,21 i Yudas nokelang di Tuhan sid poginakanan diri.

Matius 13,27 Boros di Yesus, Amu atag do mangarabut di kutad di sid pialatan do gandum. Suvaiko mongomot-no om monodiri-ogi, ka.

Lukas 14,23 i suriban di karajaan do Kinoringan sid poginakanan do mogontong. Boros di tuan diri, Pamanau-no sid ongoalun-alun om sid ongoulun di pengkakat sid ongoansal om garatai-no ioti sumiti, supaya opusok iti valai-ku diti.

f) Nunu i tomodon di poginakanan dino?

Kinoringan monorima vagu dit ongoulun dot amu mongitung iosido di sala dit ulun (Yeremia 31,31 om Matius 26,28)

It ulun mizo sid Tuhan di nakasangkap, tu i poginakanan ino-no kopiizaan sid raha om guvas di Tuhan Yesus, ka di Paulus (1. Kor. 10,16)

It ulun tumorima di kopoulosan penlaid. Boros di Yesus, Isai-nopo i mangakan di guvas-ku om minum di raha-ku, ino-no o kanu di kopoulosan penlaid, ka.

I Poginakanan dino ajadi do kakansangan, iadko kokorui sid tanga do ralan dot ulun Kristian, miabal di Mana sid belantara, hiza di bansa dot Israel linumombus pakaa sid Kanaan.

I poginakanan di Tuhan Yesus popezo dit ongoulun Kristian. Iadko iseso o lopot pengkaa dino isesi tokou sokoviai, ka di Paulus. (1. Kor. 10,17)

Kasalaan-nopo dot ongogorija om ongoulun Kristian, sampai bianco, kakali a-nokezo it ongogorija om ongopiumpugan sid gama mongohormat di poginakanan di Tuhan Yesus. Tasantanid-tanid o vaza mangaharati di poginakanan dino om i gama monunsub dit ongogorija vokon sid dau do vaza moginakan, retanko it ongogorija vokon a-kaharati om a-apatut tumorima om milang sid dioti do gama mongohormat.

pogun, pomogunan (Momogun) i puun do harati pogun, ino-no i tempat i pinuvalazan. Nopuvalazan-po laid di neduan (nopogunan-no) dot ulun. Koubasan sid tempat dino, abaris it enggaton om kipopol, pinggan, mangkuk om ongoagum sampai etom o tana om

orombung it ongokazu om kouvaan. Sabap sid vatas dot iso rurungan varo't a-ko piro o pogun, gima bai toduruk-duruk it ongoulun kavasa mintoron sid iso o binatang, retanko ino tempat dino pomogunan, iadko tempat dot iso kampong. Na it ongoulun di mangagama dit ongopogun, gima mirangkat-rangkat sid tempat vokon, varo ngaran dioti, ino-no, Momogun, i bansa dit ulun di rurumangkat. (Duvo o sabap mirangkat-nopo i Momogun, keso, Ong mimbulai i sakit sid binatang dino, mesti iduan, tu retan do kirogon om i-pot ongokopizo om inipi i tanda do tumoduk i binatang [mimbulai o sakit]. Koduvo, Ong hopod-no toun sid tempat dino, osodu-no o pongumoon, baiko govuton-po sid mintutuk. Manjadi rumangkat-no, tu sumuhut di pongumoon. Manjadi ong koririkot-po sid tempat dino, retan do lodion-po o pomogunan, tu nunu-nunu nga varo). Sabap minsanko it agazo o tempat, iadko negara ko ensanan songvinangun, nga kakali apakai ino pongoretan pomogunan (iadko pomogunan do Kaling ko Kina) ko sompomogunan.

Na i Kitab momingig do *vinangun*, i harati, ensanan it inurug ko vinangun di Minamangun, ko, *tana* om pomogunan ko pentongkop do pomogunan om sompomogunan. Ong i koribing do putanaon, retanko pompod tana. (Ong isan do rahat retan do koribing dot avan).

1. I sompomogunan di inurug do Kinoringan

a) i tana

Ulangan 28,49 varo bansa antad sid pompod do putanaon do monimbit dikou iadko koniu.

Yosua 3,11 Manjadi ino pati di pinosuvangan di Janji do Tuhan Kinoringan, i Minongurug *di sokoviai* o mogulu dikou tumupak...

Yesaya 54,5 Varo kotinangan vagu, ino-no i Tuhan, i manansanganu

di sompomogunan.

Zabur 2,8 Pokitahako-no sid dohon it ongobansa om itahak-ku-ogi dot ipasanganu-ku dikou i sokoviai it ongobansa sid pentongkop do pomogunan.

Matius 4,8 I vozoon do rogon potimpanai di Yesus i sokoviai i karajaan do sompomogunan.

b) I sompomogunan iadko songbinatang o bangunan

Yahya 17,24 gulu di kinotimpuunan di vinangun (it amu-po nourug i vinangun).

UR 17,24 I Kinoringan, ino-no i minongurug di pomogunan om sokoviai i suvang o monguasa dit avan om i tana.

Ibrani 11,3 Sid saralom di kosipan ohorotizan tokou dot i sokoviai i nunu-nopo, jinadi di boros do Kinoringan.

c) I riniba di nokezon sid pomogunan (tana).

Kinotimp. 11,1 I kodori diri, ensanan i riniba dot iseso i boros om kopiha-harati.

Yesaya 45,22 Sisiti-koui, ioku-no o monulung dikou sokoviai ot ongoriniba sid sompomogunan.

Habakuk 2,20 Atag ong mozom kavi i suvang do pomogunan sid tinoguvangon dau.

Markus 16,15 Boros di Yesus, Pamanau-kou-no sid pentongkop do pomogunan sampai pangahabal-kou-no di habal do kovosihan sid sokoviai i vinangun.

Yahya 12,19 Boros dit Ongofarisi, Tu i sokoviai i riniba mogidu-no, tu momodsuhut-no di Yesus.

Rum 1,8 Tu i gama dikou mangasip nokoronuw-no sid pentongkop do pomogunan.

Kental.11,15 Sid palad-no kavi di Tuhan tokou om i Kristus i kuasa di

mangahatul do vinangun.

d) I kotimpuunan om kovian do sompomogunan

Zabur 25,6 O Tuhan, hondomo-no i kovosihan-nu om i samod di varo-no laid antad-po di kodori banal.

Yesaya 64,3 Ikau-no o minongimbulai do kosunduvo dit a-pitiiman di riniba

Yesaya 44,8 Kadan-no tumalou om kadan-kou-no rumosi, tu antad di kinotimpuunan nakahabal om nipelo-ku i hal dino sid dikau. Ikau-no o sasi-ku.

Matius 24,21 Sabap i hiza dino o kikapagasan dot agazo dit amu-no opitiiman antad di kinotimpuunan sampai biano.

Matius 13,39 Om i sangod i minionizas do kutad dino, ino-no i vozoon do rogon om i hiza do mongomot, ino-no it ontok do penlaid.

Matius 28,20 Hondomo-no dikou dot, loku diti mozo-vozo dikou suvab-suvab sampai sid kovian do pomogunan, ka di Yesus.

e) Sid pomogunan o kopudan di riniba om vinangun.

Yahya 16,21 Ong torousuvo-no dit ondi, osusa i ginavo dau, tu rumikot-no i kapagasan dau. Topot ong nakalandai-no it anak (nokosino sid pomogunan o harati), amu-no andaman i kosusaan di ginavo, tu i kotomon do varo-not iso ot ulun nokosino.

Yahya 17,13 Momoros-oku-po do iadino sitid vinangun, supaya varo katamanan sid dioti dot arangkap, it antad sid dohon. 15 Okonko mindamo-oku do peduon ioti antad sid vinangun diti, inoi nga mindamo-oku dot ikau-no o mongorinding dioti antad sid karaatan, ka di Yesus.

Efesus 2,12 Na i hiza dino, osodu-kou antad sid di Kristus, mad ulun dit aso harapan om aso Kinoringan.

1. Tim 6,7 Tu asot inovit tokou sid pomogunan ontok di kinosinaan om

asot oviton tokou vagu dit antad tokou sitid pomogunan.

2. I vinangun, it amu engat i Kinoringan

a) I riniba di sumaap do Kinoringan

Matius 18,7 Osusa i vinangun sabap gima i gama mamalid.

Matius 13,22 Mongining iosido di boros dino, nga obimpipitan iosido di kosukupu om it akal do kolunduan do riniba dot osingsolod-no i boros dino sampai amu-no koponguva.

Lukas 16,8 Sabau it anganak di vinangun diti kihukum ong hal-po di bansa dau kondiri mantadko it anganak di kanavau.

Lukas 20,34 Ponimpa-nopo i Yesus, It ongoulun sitid vinangun diti manansavo om mokisavo

Yahya 8,23 Ponimpa-nopo i Yesus, Ikou dino antad sid sibak, Ikou dino antad sitid vinangun.

Yahya 15,18 Ong asana dikou i vinangun, horotizo-no dikou dot sinumana-no laid dohon i vinangun.

Yahya 18,36 Boros di Yesus, I karajaan-ku okonko antad sid vinangun diti.

1. Kor. 1,20 Okon-ka ko i Kinoringan o pinobungou di keloo do riniba?

1. Yahya 5,19 Elaan tokou-no dot i tokou diti, Kinoringan-no o sanganu. Topot ong i songvinangun, sid palad-no kavi di vozoon do rogon.

1. Yahya 2,16 I karalazan do guvas om i karalazan dit ongomato om i koburuvako di kobuatano dino, antad kavi sid vinangun, okonko antad sid Ama.

Yakub 4,4 A-ka elaan dikou dot i gama dikou tumanggih sid vinangun kagama do sumaap do Kinoringan? Tu i banalko ogorot tumanggih diti vinangun diti, ino-no i sangod do Kinoringan.

b) amu tumorima i vinangun di kovosihan om boros do Kinoringan

Yahya 1,10 I vinangun amu hinumarati di Boros do Kinoringan.

Yahya 14,17 O ino-no i Sundu do Kabanaran it amu otorima di vinangun, tu amu emot om amu ohorotizan di vinangun.

Yahya 3,19 Nokorikot it anavau sid riniba om it otuvong lobi-po i kenginan dot ongoulun mantadko it anavau.

Yahya 12,31 Iti bianco diti ohukuman i vinangun diti. Iti bianco diti osunsub sampai padaon i raja di vinangun diti.

2. Kor. 4,4 Amu mangasip ioti, tu binolou di vozoon do rogon, i monguasa diti riniba, i ginavo dioti, supaya amu kosiroi ioti sid kanavau di habal do kovosihan.

3. kakali ino vinangun om riniba dino asamadan do Kinoringan

Yahya 3,16 Tu i Kinoringan banal-noko minanamod do riniba...

Yahya 4,42 elaan-za-no dot i Yesus dino tantuko ino-no o mananggung do riniba, ka.

Yahya 8,12 loku-no diti o panganavau do vinangun.

Yahya 12,47 Nokorikot-oku, okonko mongohukum di vinangun, inoi nga manapul di vinangun.

Yahya 1,29 Imatai-no it Anak do domba do Kinoringan i mamabo di kasalaan di vinangun.

Gal. 1,4 supaya osopulan tokou antad sid karaatan di didino(diti vinangun).

1. Tim 1,15 I Kristus Yesus rinumikot sid riniba, tu manapul dit ongoulun do kisala.

4. it ulun Kristian sid tanga do riniba om vinangun

Yakub 1,27 Iti-no it otopot o gama sumamba sid Kinoringan, Monorundakai dit ongousan-usan om it ongobituanon di sid tanga do kosusaan om manangkis di karalazan diti riniba.

1. Yahya 2,15 Kadan-kou-no manamod di vinangun sampai i nunu-nopo i dang vinangun.

2. Petrus 1,4 Tinahakan tokou dau i janji dot agazo om banalko kiguna, supaya kedu-kou-no antad sid kobinasaan di kakangahan do riniba om kezo-kou-no sid vangun vagu.

Gal. 6,14 Tu sid Kristus nakasangkap-no i vinangun bahagi dohon om ioku bahagi di vinangun.

Filipi 2,15 Muompiling-kou-no sid tanga dioti do iadko panganavau do vinangun do kumavid-kou-no di boros do kapasi. (Matius 5,13-15)

5. Varo vinangun di rumikot-ogi i harapan tokou

Matius 12,32 Topot isai-nopo i momoros do sumaap di Sundu dot Osusi, ino-no it aso kaadaan di kasalaan dau, biano antawa i hiza do penlaid.

Markus 10,30 dot okonko nogontian-no biano dot nenghatus i neduan dau, it ongovalai om ongobpinai, om ontok do rumikot kikoposizan-no penlaid.

Lukas 20,35 Topot it ongoulun di natahakan-no do pangkat do kamung sid kourugan vagu dino sampai sid kogulianan antad sid ongoulun do minatai...

Efesus 1,21 Manjadi i Kristus dino asavat mantadko it ongopomorinta om it kiongokuasa om it ongoulun om nunu-nopo sangngaran di didino ko sid penlaid.

Ibrani 6,5 Kuran-ma dit ongoulun di nokosuvang sid ginavo dau dot avantang i boros do Kinoringan om nokotiim-no di kuasa di vangun vagu, nga kakali do tumolikud sid Kinoringan?

poniagan >tiag

ponuhuan, pinonuhuan >suhu

ponulung >tulung

porinta, momorinta, ong Momogun momingig di porinta om hoturan ko momorinta om mangahatul. Nunu-nopo songrazat ko rombongan dot ulun, a-milo-milo varo hoturan. Topot ino hoturan dino, nga it rombongan ko razat kondiri o pengkakat om mangahatul. Ong varo sangod ko ulun do tanid o bansa ko rombongan om hoturan antad sid vokon, apakai-no i pongoretan do porinta ko momorinta. Sabap ino hoturan dino okonko antad sid kondiri o pongitungan om kenginan om upakat om kolumbatasan, inoi nga ginaratan dot ulun vokon. Ong sid Kitab, amu osodiri ino duvo o vaza do gama pengkakat om posurut do kopudan do rombongan ko razat. Topot ong sid Kitab Momogun kadapat momingig om manantu dot nunu i vaza dino. Gam ong oholian i kopomorintaan, varo-po pongoretan monguripon.

Kinotimp. 1,26 Boros do Kinoringan, mongurug-okou tokou-po do riniba do kerad di buatan tokou, tu pongohoturanon-ku ioti dit ongosada om ongoombolog om it ongopangazam ...

Kinotimp. 4,7 i sala monguripon dikau. Ontupato-no, om torio-no i sala dino, ka.

Ulangan 15,6 Om kapangahatul-kou dit a-kopiro i bansa. Topot ong ioti amu kapangahatul dikou.

Zabur 22,29 Sabap i Tuhan, ino-no o raja. losido-no o mangahatul di sokoviai it ongobansa.

Zabur 103,19 I karajaan dau nga mangahatul sid pentongkop.

Zabur 110,2 I Tuhan o minamangkat dikau do raja-ko sid Sion. Porintao-no i sangod-nu..

Yesaya 14,4-5 Navi-no banal i gama momorinta. Binabak-no di Tuhan

i kuasa di momogos (porinta), i minamambang dit ongobansa dot oholian o gama om i minangaladtak dit ongoulun di sinumaap dau.

Yesaya 40,10 Hodi-no i Tuhan Kinoringan, tu porikot di kakansangan dau om i kuasa di longon dau (o mangahatul).

Yehezkiel 34,4 It ongodomba dit okugui, amu toudon dikou om i kioruol, nga amu ubatan dikou. I kiongonuko, nga amu hongkosen dikou, i natagak,nga amu ihimon dikou. Om it ongodomba dit ohijau nga pogoson (porintaon) dikou sampai asaadan.

Matius 20,25 Elaan-no dikou dot it ongoulion dot ongobansa o momorinta om it ongosasavat, nga monguasa di razat. Topot it Anak do riniba, okonko rinumikot do monguripon iosido dit ongoulun, gamko iosido dino mokiuripon sampai itahak i koposizan dau, dot iponobus di sokoviai, ka di Yesus.

Lukas 19,14 It ongoulun sid pomogunan dau sinumana dau sampai minomoros dot, Amu-okoi engin dot ialo o momorinta dahai, ka.

Rum 5,21 supaya iadko i kasalaan o najadi do raja sid kapatazan (ko, i kasalaan o minomorinta dot i kapazazan o panangan), iadnoko ino i kovosihan ajadi do raja (mangahatul) sid kabanaran om mongimbulai di koposizan penlaid, gima i Yesus Kristus.

Rum 6,9 I Kristus amu-no okuasa (oporinta) do huntung. 12 Kadan-no dot i sala o raja (momorinta) di guvas dikou dit obingbinasa om sumuhut-kou dit ongokenginan dot araat.. 14 Sabap i kasalaan dino amu-no koponguasa (kopomorinta) dikou, tu okon-noko sid hoturan-kou-po di pinonuhuan, inoi nga sid hoturan-kou-no do kovosihan.

1. Kor. 15,25 Amu milo-milo nga mangahatul i Kristus sampai ladtakan kavi dau it ongosangod.

Efesus 2,2 Nosuhut-ku-no kavi di hoturan do riniba om it ongokuasa di momorinta diti vinangun.

Efesus 6,12 I saapon dino okonko bai riniba, inoi nga sumaap tokou dit ongokuasa dit amu emot sid pialatan dot avan om tana, i mangahatul dit ongokuasa do kotuvangan.

2. Tim. 2,12 Ong sumakup tokou momurinon di kapagasan di Kristus, kasakup tokou dau mangahatul di sokovia.

1. Petrus 5,3 okonko iadko momorinta dit ongoulun di sid kuasa dikou, inoi nga ajadi-kou do suntuan.

puasa, momuasa, (Mal.), it amu mangakan it ulun ko mangakan dot osodiri o hiza iadko mogilin. Ong Silam amu mangakan hiza dot adau ontok di vulan Rhamadan. Suvai sodop om mangakan-ogi. Minsanko it ivou do kabang amu tolonon ong ontok do momuasa. I harati, otibang banal it ulun mamasa om mongohondom di Quoran, ino boros do Kinoringan. Sabap, ong ovizau it ulun, amu tantu kotibang iosido mongohondom om mongitung sampai sumuhut di boros do Kinoringan, ka.

Sid Kitab Laid, it ongoulun dot Israel sampai Yahudi minomuasa, tu patatap di ginavo sumuhut sid Kinoringan. I gama momuasa iadko manahan di kenginan do bai rumusuk om monginum, supaya atarang i ginavo om elin om omomos-po it ulun. Iti-no o sabap dot it ulun di momuasa retanko elin banal, iadko it ongoulun do Parisi dit atatap momuasa dot insan ko induvo somminggu.

Matius 6,16 It ulun do Parisi minomuasa sid tinoguvangan dot ulun, dot opoit o vuos dioti, supaya ohormatan ioti dot ulun om kingaran ioti dot elin banal. Na boros di Yesus, Ong momuasa-kou, kadan-kou-no lumungui iadko it ongoulun di mangakal, tu monimban ioti di vuos, supaya emot dit ongoulun do momuasa ioti. Boroson banal-ku-no sid dikou, Tantu aso suul dioti dino. Topot ong ikou dino, ong momuasa-

ko-no, umahai-no it obuk-nu om indogupai-no i vuos-nu, supaya i gama-nu momuasa olingob sid ongoulun. Baiko sid Ama-nu sid surga i kosonsob di nokossusut o kalantaan.

Lukas 18,9 It ulun do Parisi minokindazou sid saralom di gama dau minta dua, i boros dau, Induvo-oku momuasa sid saralom do songminggu, ka.

Tanidko ino, i Tuhan Yesus minomuasa sid belantara dot 40 tinadahan om sinadapan, supaya osodia iosido do bahagi di tugas dau. Ino gama dau do iadino olingob-no, okonko sid tinoguvangon dot ulun. Amu momurimon iosido do vitil ko tuliou ko nunu songkapagasan, inoi nga vaza dau tumorima om sumuhut di kenginan do Kinoringan. Antad sino elaan tokou dot i gama momuasa okonko antad sid pinonuhuan iadko ginaratan, gam omboko i ginavo dot ulun dit engin sumuhut sid kenginan do Kinoringan.

Usuran Rasul 10,30 I Kornelius minomuasa di minta dua iosido.

Usuran Rasul 13,2 It piumpugan sid Antakia minomuasa guluko i papanau dit ongorasul.

Usuran Rasul 14,23 Nahatul-po dioti it ongosukod sid ipat-ipat i piumpugan do mininta dua om momuasa, minindamo-no ioti di barakat do Tuhan bahagi dit ipat-ipat i piumpugan.

1. Kor. 7,5 Boros di Paulus, Okonko kadasan banal i kenginan dikou, topot avantang ong miupakat-kou mongodos dot oduruk, supaya ong orikot i sumambayang, osinang i ginavo dikou minta dua (i hal do momuasa) Opongo-po, miolunung-kou-no vagu, supaya a-kou onong di pensubaan di vozoon do rogon, tu amu-kou kadapat kumodos dino.

pupus >ompus

raat, karaatan, < sala, kasalaan, >ranggal, karanggalan, >sadu,

kosoduwan, >bungou,

kobungahan >landu, kolonduhan. I gama om kobuatano dit amu atag om amu onong it antad sid araat o pongitungan, i harati, tomodon rumaat om mangaraat, bolikung om okilong o gama om kavazao.

Kinotim. 2,9 sid tanga-no banal di kabun Eden varo kazu do kopoulosan om kazu do pongilaan do kabanaran om karaatan. 3,5 boros di vulanut, Ong kakan-kou, elaan-no dikou i kabanaran om karaatan, ka. 6,5 i hiza diri nemot-no di Tuhan do gumazo-no i karaatan do riniba sid pomogunan om i pongitungan dioti nga posurut-nopo do karaatan.

Kinotim. 8,21 Boros di Tuhan, Amu-ku-no lupuon vagu i putanaon diti, gima i karaatan do riniba. Minsanko araat i pongitungan om ginavo do riniba antad dit opodok-po...

Kinotimp. 50,20 Boros di Yusup, Mulongko minongindaraat-kou dohon di hiza diri, topot gamko iri-no o pinavazaan do Kinoringan mongumbasih.

Kolobusan 23,2 Kada-no kivozo di kinogumuai dot ulun do mamung, mozo sid karaatan o tomodon dioti.

Kolobusan 32,22 Boros di Harun, Kada-oku-no hungatai, tu elaan-nu-no laid i karaato di bansa diti.

1. Sam. 2,12 It anganak dit Imam Eli ongobubungou, tu ongobanakau. Ioti dino amu kabantug di Tuhan, minomudali ioti di hoturan kondiri.

1. Sam. 16,14 Manjadi nedu-no i Sundu do Tuhan sid raja Saul sampai korikot-no it ongokaraatan sid di Saul dino

Zabur 139,24 om imatai-no i vazaan-ku. Kabambol-oku dati do karaatan om tudukai-oku-no di vazaan sid penlaid.

Amos 5,14 Ihimo-no dikou i kabanaran om pogidu-kou-no sid karaatan. 15 Sana-kou-no do karaatan om panamod-kou-no di kabanaran ...

Matius 5,45 I Kinoringan o posilau dit adau sid ulun dot araat om sid ulun dit avantang..

Matius 12,35 It ulun dot araat mongimbulai do karaatan antad sid barang dau dot araat.

Matius 13,38 i kutad ino-no it anganak do karaatan.

Rum 12,17 I karaatan kadan-no sultan do karaatan, gamko ihimon-no dikou it avantang sid tinoguvangon di sokovia i ulun.

Rum 12,21 Kadan-ko-no mokitori do karaatan, inoi nga torio-no do kovosihan i karaatan.

Rum 13,10 I samod dino amu mangagama do karaatan sid koruhang.

1. Kor. 5,13 Topot ong it ulun dot araat sid pialatan dikou, peduo-no dikou.

1. Kor. 13,5 I samod amu patahu di karaatan dot ulun sid ginavo dau.

1. Kor. 15,33 Kadan-kou-no mokipalaid, tu rumungoi i kavazao dot avantang, ong kumoruhang dit ulun dot araat, ka di kodori.

Yakub 1,13 Banalko amu monuba ong i Kinoringan sampai amu mamalid iosido (sid karaatan).

Kentalangan 2,2 Elaan-ku dot amu agasan-nu posimozo it uun dot araat.

raha ino-no i kansang do kopoulosan

1. I vaza humarati do raha sid Kitab:

a) Amu kavasa do mamatai dot ulun, retanko amu kavasa monguza di raha dot ulun (dit aso sala).

Kinotimpuunan 4,10 I raha dit obpinai-nu diri o mongodim dohon antad sid tana, ka di Kinoringan sid di Kain.

Matius 27,24 Boros di Pilatus, Aso sala-ku sid raha ditit ulun dot abanal. Boros di razat, lokoi-no o mamabo di raha dau, iokoi om it

anganak-za, ka dioti.

b) Amu kavasa mangakan do raha

Imamat 3,17 Ino-no ot adat sid dikou, Kada-kou-no mangakan do raha, ka.

Usuran Rasul 15,20 Boros dit ongorasul, Ino-no rontob, atag dot amu moniim ioti do raha, ka.

c) I raha iuli vagu sid Kinoringan. Sid saralom di gama pasamba i raha do dupot, i raha manantu di janji om kabatasan om i kopiondusan.

Kinotimpunaan 4,4 I parsembaan di Habil, tanda do monorima kaseh.

Kinotimpunaan 8,20 I parsembaan di Noa, tanda di janji sid Kinoringan

Kinotimpunaan 15,10 I kabatasan di Ibrahim sid Kinoringan

Kolobusan 24,8 I parsembaan sid sahau di burul Torsina, tanda di janji om taru.

d) I raha di dupot kiguna, tu monusi di sala, sabap i sala iadko otimpak-no sid dupot (boli). I raha di dupot di ouza-no sid padaha om itahak sid Kinoringan. Sabap ino, i raha mad tanda do kosusian.

Kolobusan 12,23 I raha nohigil-no sid navaon do valai, supaya tumalib i mangaso.

Imamat 17,11 I raha ino-no o kopiondusan, tu kikoposizan ino raha dino, ka.

Yesaya 53,4 Banal-no iosido o minanaan di sakit tokou sampai i varan dau, ino-no o kosihatan tokou.

2. *I raha di Tuhan Yesus*, nga pongoretan sid Kitab Vagu di manalahas di kinapatazan di Tuhan Yesus, asangai di *sangkap di Yesus*. Sid saralom di poginakanan di Tuhan Yesus, i raha iadko tanda di kaadaan do saala om i kembulazan di batos om janji vagu. Okonko kondiri di raha o kiguna, inoi nga i tanda di manarang dot kondiri di

Yesus minokipatai, sumuhut di kenginan do Kinoringan (Filipi 2,8; Rom 5,19, Ibrani 5,8)

Yahya 1,29 Boros di Yahya i minomodsu, Imatai-no, hodi-no it uzog do domba di dang Kinoringan, i manaan di sala do riniba.

Yahya 6,54 Isai-nopo i mangakan dit onsiom monginum di raha-ku, iosido o nakasanganu di koposizan penlaid

Matius 26,27 Boros di Yesus, Inumo-no dikou sokovia. Tu iti-no raha-ku o janji vagu kouza bahagi di kinogumuan, supaya varo kaadaan do kasalaan.

Ibrani 13,20 I Kinoringan pinajadi di Yesus dot agazo o panaud dot ongodomba, gima i raaha di iadko tanda di janji do penlaid.

a) I raha di Tuhan Yesus monobus ko mangahatang

Usuran Rasul 20,28 Boros di Paulus, Ikou-no o manaud di gorija di dang Kinoringan, i tinobus di raha dit Anak dau.

1. Petrus 1,19 I raha di Kristus di banalko kohorogo o minonobus dikou di iadko domba iosido dot omomos om osusi.

Matius 20,28 it anak do riniba, nga mokiuripon sampai itahak i koposizan dau, dot iponobus di sokovia

Kentalangan 1,5 I Yesus o manamod di tokou om pinalabus di tokou antad sid ongo kasalaan, gima i kinapatazan dau.

b) I raha di Tuhan Yesus mongohugus om monusi

1. Yahya 1,7 I raha di Yesus o momoug di tokou do mongidu di sokovia i karaatan.

1. Petrus 1,2 i piumpugan di nopili-no, supaya osuhut i kopongohigilan di raha di Yesus Kristus.

Kentalangan 7,14 Nohugusan-no it ongogaun dioti dino sampai nosiliu-no dot opurak, gima i raha dit Anak do domba dino.

Ibrani 13,12 Sabap-pogi om i kinapagasan di Tuhan Yesus diri dit

ontok kinoponusan dau dit ongoulun di raha dau kondiri, nga sid lamasi di kavavalazan.

c) i raha di Tuhan Yesus mamanal

Rom 5,9 Nabanal tokou-no sid saralom di raha dau, lobi-po atalahas dot osopulan tokou dau antad sid hungot diri.

d) i raha di Tuhan Yesus popiandus

Kolose 1,20 I raha di Kristus sid kazu do sangkap o vazaan dau pandus di sompomogunan sampai i surga.

e) I raha di Tuhan Yesus o mongogiang di vazaan di natabanan-no

Ibrani 10,19 Varo harapan di ginavo tokou do sumuvang sid panambayanan dot osusi, gima i raha di Yesus, ka.

Efesus 2,13 Ong bianco, osomok-kou-no sid Kinoringan, gima i Kristus.

Tu i raha di Kristus o minangapus dit utang dikou.

f) I raha di Tuhan Yesus popizo di tokou sid Kinoringan

1. Kor. 10,16 I subung di binarakatan di Tuhan om rinazou tokou, okon-ka ko ino-no i piniizaan sid raha di Kristus?

3. vokon-no i pongoretan raha mongontok di pongoretan *riniba ko ulun*, asaap di pongoretan do *Sundu ko surga ko savat*.

Matius 16,17 Pomoros-nopo i Yesus, Osinang-ko-no dino o Simun, sabap okonko (raha) riniba o minonuduk dikau di kinelaan-nu dino, inoi nga it Ama-ku sid surga, ka.

1. Kor. 15,50 Boros di Paulus, it onsi om raha om guvas tokou amu kotungkus di karajaan do Kinoringan, om i kobuatano dit obingbinasa, amu kotungkus di kobuatano dit amu obingbinasa.

Efesus 6,12 Tu i saapon dino okonko bai (onsi om raha) riniba, inoi nga sumaap tokou dit ongokuasa dit amu emot sid pialatan dot avan om tana, i mongahatul dit ongokuasa do kotuvangan.

raja, karajaan, ong kodori, i kogumuai it ongobansa ko rurungan varo mangahatul dot amu enizo o pongohorotizan di tugas om garal dit ulun dino. Vokon-no ong mad bai nokosukod, tu antad sid kenginan do razat, sabap i razat o minomili iadko miundi om minamangkat, vokon-no ong baiko monungkus, tu iso't tirsan do kumavid di hoturan dino. Vokon-no i raja ong mad manangsanganu di razat om i pomogunan sampai it razat baiko uripon-po. Kagi, asarok do kopiamung di kuasa do pomogunan om i gama di bobolizan, antawa varo-no ong retanko i raja mad kuasa antad sid savat, mad anak om mongkupu di pinokokinoringan di toriso-iso o bansa (iadko i Kaisar sid Jipun i retan mongkupu di Shinto antawa i Kaisar do Rum i retanko mad kinoringan-no iosido, ka). Kuran kuran i raja o kinumavid di hoturan do razat om pomogunan. Ong bianco, tanid o kavazao om kuasa do raja sid ongobansa, Na i vatas di kuasa do raja, ino-no retanko karajaan. Na varo pongitungan sid Kitab dot okonko enizo it ongoraja om it ongoulion, nga otopotko kihoturan dit atag, isuhut di kenginan do Kinoringan. Varo boros di Yesus di mad mangagauk di kavazao dino, Matius 20,28 It ongokikuasa di misingulion dit ongobansa, ka. Bai ino hal do bai mising- amu nokembulai sid Kitab Momogun ko sid ogumu it ongosolinan do Kitab.

I hiza dit i bansa dot ulun Israel minogihim do raja, varo boros do Kinoringan dot amu avantangan iosido dino kenginan dioti, tu, ka dau, Kinoringan kondiri o mangahatul di bansa dau. Ong raja iadko it ongobansa vokon mad hal do tumolikud sid kenginan do Kinoringan. Sabap i raja mongitung dot iosido-no i randavi om ulion di sokoviai sampai iosido okon-noko kiulion-po, ino-no i Kinoringan. Manjadi i raja

minangahatul dot iosido kondiri, amu engat do hoturan dit asavat-po di raja. I raja minamanal om minanala, minsanko amu nokonong i gama dino sampai ong iosido kondiri amu nokosuvang sid hoturan dau.

Kolobusan 15,18 I Tuhan, ino-no o monguasa (raja) sampai penlaid, ka di Musa.

1. Sam. 8,7 Boros di Tuhan, Pongining-no di gama dioti mindamo dino, tu okonko ikau o saapon, gamko ioku-no ot saapon dioti sampai amu mangakun ioti dot raja-oku dioti dino.

1. Sam. 12,12 dot ong otopot i Tuhan Kinoringan o raja dikou, ka di Samuel.

Zabur 2,6 It ongoulion sumaap di raja di nopili do Kinoringan.

Zabur 5,3 O raja-ku om Kinoringan-ku, ka (68,25 om 84,4)

Zabur 93,1 I Tuhan, ino-no o raja 95,3 I Tuhan, ino-no i raja do keso om banalko apangkat (om Ulion di sokoviai it ongopinokokinoringan).

Yesaya 6,5 Nemot di mato-ku kondiri i raja, i Tuhan, i monguasa di sokoviai, ka di Yesaya.

Zakaria 9,9 Tomon-kou-no ot ongoulun do Yerusalim, tu rumikot-no i raja dikou, omomos om avanus iosido. Ongololomomoi iosido om sumako do kaladai.

Zakaria 14,9 Iri-ogi i Tuhan o mangahatul di sokoviai it ongobansa do sompomogunan dot iosido-no o raja dioti dino.

Lukas 1,33 boros di Gibrael sid di Mariam, om ajadi iosido (i Yesus) do raja sid rurungan di Yakub sampai penlaid om aso kovian di karajaan dau dino, ka di malaikat.

Yahya 6,15 Manjadi nohorotizan-po di Yesus do kponiat ioti do rumikot sid dau, tu mongogorot dau do pajadi do raja, minogidu-no vagu iosido tumakad sid burul dot iseso iosido.

Yahya 18,37 Boros di Pilatus, Topot raja-koi-ma? ka. Timpao-no di

Yesus, Noboros-nu-no beno. Raja-oku diti, ka di Yesus.

Yahya 19,14 Boros di Pilatus, Imatai-no i raja dikou, ka. 15 Ino raja dikou naku ot isangkap-ku? ka di Pilatus.

1. Tim 1,17 Na i raja di sampai penlaid, I Kinoringan dit amu tumanus, dit a-opiimot do riniba om iseso iosido, hohormaton iosido om iindozohon biano, sampai penlaid, Amin.

1. Tim 6,15 I raja dit ongoraja om Tuhan dit ongotuan, ka di Paulus.

Ong varo raja di bansa dot Israel, suvai engat di raja dino dot i Kinoringan ot ulion dau. Sabap antad sid Kinoringan o kuasa om kovosihan dau om kakali nokosuvang i raja dino sid hoturan om hukum do Kinoringan. I kinapamangkatan di raja, sid Zabur 2. 110 om 118 varo liturgia om hoturan bahagi di gama do iadino.

raja dot Israel > Yesaya 44,6, Zefania 3,15, Yahya 1,49 om 12,13

raja do Yahudi, > Matius 2,2; Matius 27,11,29,37; Markus 15,9

riniba, ensanan it ongoulun sid sompomogunan nosodiri mantadko it ongodupot, antawa i bai iso't ulun o pinongolukan di kavazao dit ensanan i riniba (**sandad riniba**)

Kinotimp. 1,26 Mongurug tokou-po do riniba koerad di buatan tokou. 27 ladno keno o kinourugan di riniba koluu di kobuatano do Kinoringan.

Kinotimp. 2,7 om inurug-no di Tuhan Kinoringan i riniba sampai tinohugi-no dau it odung do riniba dino do pinuhobo do kapasi om iri-ogi kipinuhobo-no do kapasi i riniba.

Kinotimp. 5,2 Inurug-no dau i riniba do kusai om ondu om binarakatan-no dau sampai pinungaranan-no dau ioti do riniba.

Zabur 8,5 Nunu-po o kogunaan-nu do kakal-kopo mongohondom di riniba sampai manaud-nopo dit anganak do riniba.

Zabur 22,7 Topot ong ioku diti mad okon-noko riniba. Mad kutu-no dot uusibaon om gougoukon di kinogumuai dot ulun.

Zabur 36,7 Riniba ko dupot nga sopulan-nu kavi o Tuhan.

Zabur 103, 15 Sabap it umul do riniba iadko sakot om iadko it ongovusak sid govuton.

Zabur 118,8 Lobipo atag do humarap sid Tuhan mantadko bai i sandad riniba.

Yehezkiel 1,26 Sid timpak di sirung varot mad ogomon dot intan o ginama om varot emot-ku do mogom-ogom iadko riniba.

Markus 2,27 Nohoturan-no it adau do pongintaranan, tu i gima riniba. okonko kiriniba, tu kipongintaranan. Sabap it Anaak do Riniba o manansanganu dit adau do pongintaranan,

anak do Riniba, mad bantug di Yesus do iosido kondiri o minamakai, dot i bantug dino, ino-no i kosibako di gama dau om tanda di kohormatan dau. Ino bantug dino inanu-no sid Buuk di Daniel 7,13 I nosorou di sodop dino, nokemot-okou do iadko riniba. Riumikot iosido do nolimput do kavut. Tinahakan-no iosido do kokuasaan do iadko raja, sampai i sokoviai it ulun i tasantanid-tanid o bansa om boros om suku bansa, nga mokiuripon dau. I karajaan dau nga aso kopupusan. Ong minamakai i Yesus dino pongoretan dino, ino-no vaza dau posusut di kuasa om hormat dau, mad sundait ino bantug dino.

Matius 17,22 Boros di Yesus, Amu milo-milo nga katahak it Anak do Riniba sid palad dit ongoulun sampai patazon iosido dit ongoulun.

Matius 16,27 Tu it Anak do Riniba ong rumikot vagu, kikohormatan antad sid Ama dau iosido om kiongomalaikat-po.

Matius 26,64 Antad bianco emot-no dikou it Anak do Riniba mogom-ogom sid vanan di kuasa om rumikot sid kavut dot avan, ka di Yesus.

Yahya 12,34 Isai-ka it Anak do Riniba dino? ka dioti.

Matius 16,20 Manjadi tiniag-no di Yesus i kinoruhangan dau dot, Kadan-no pahabaro dikou do ioku-no diti ot i Kristus, ka.

Yahya 5,27 Sampai natahakan iosido dit Ama do kuasa do mongohukum. Sabap iosido dino it Anak do Riniba.

UR 7,55 Boros di Stefanus, Imatai-no, emot-ku-no do nogiang-no i surga om it Anak do Riniba nga pengkakat-no sid vanan do Kinoringan, ka.

rasul, (Mal.) susuhoon, ponuhu, it ulun di mongontok dit ulun di monuhu.

Ong sid Kitab, apakai bahagi dit ongokoruhang di Yesus, ino hopod om duvo di nopili-no om i Paulus-po, tu sasi ioti di kinoguliananan di Tuhan Yesus om susuhoon, tu pahabal di Habal do Kovosihan.

1. Isai-ka o rasul

Ibrani 3,1 Tingaha-kou-no sid di Yesus, ino-no i rasul (susuhoon) do Kinoringan om it imam do kipangkat di sid kosipan.

Usuran Rasul 14,14 Nohorotizan-po dioti ongorasul Barnabas om i Paulus i iadino, kinini-kinis-no dioti i banat dau.

Matius 10,1-2 Minongodim-no i Yesus di hopod om duvo i kinoruhangan dau..Ino-no it ongongaran di hopod om duvo rasul dino, I gulu i Simun..

Lukas 9,10 Manjadi miniguli-no vagu it ongorasul sampai minonuturan-no sid di Yesus dit ongohal dot agazo i nangagama dioti.

2. Varo misingrasul

2. Kor. 11,13 Sabap it ongoulun di iadkeno baiko misingrasul di

monipu o gagamaon, rasul di Kristus ong kematan. (Kentalangan 2,2)

3. I tugas di rasul

a) pasasi di Yesus om i karajaan do Kinoringan (mangahabal di habal do kovosihan)

Matius 10,7 Boros di Yesus, Ong kapanau-kou-no, pengkaa dino ot ihabal dikou. Nokensomok-no i karajaan do surga (2. Kor. 5,20 lokoi diti ponuhu di Kristus, tu inanu-okoi do Kinoringan do mongingut dot ongoulun.)

Yahya 15,27 Topot ikou dino nga sasih, tu nokovoza-kou-no dohon antad di tinimpuuni.

b) popodsu om monuduk

Matius 28,18 Boros di YESus, Pamanau-kou-no, jodizo-no dikou do koruhanga-ku i sokovia i it ongobansa. Podsuo-no dikou ioti sid ngaran dit Ama om it Anak om i Sundu dot Osusi sampai tudukai-no dikou ioti sumuhut di sokovia i i nunu-nopo i nimuhun-ku sid dikou, ka.

Rom 1,1 I Paulus, i nokodim om nisodiri do mangahabal di habal do kovosihan do Kinoringan.

c) pembulai di tanda do kosunduvo

Matius 10,8 Boros di Yesus, Pengkodo-no dikou it ongosakit dot ulun, pongogulian-kou-no dit ongominatai, polingoso-no dikou i balang dot ulun om sunsubo-no dikou it ongorogon. ka.

d) i rasul jumadi do suntuan di gama mangasip om sumuhut

Matius 5,14 I kou dino o panganavau di vinangun. Panganavau-kou sid tinoguvangon dit ongoulun, supaya kemot ioti di gama dikou dit abanal.

Filipi 3,17 Boros di Paulus, Susuzai-okoi-no dikou ot ongobpinai, tu suntuan-okoi-no dikou.

e) it inantadon di kuasa di rasul, ino-no i Sundu

Matius 10,20 Boros di Yesus, okonko ikou ot momoros, inoi nga i Sundu dit Ama dikou o momoros sid saralom di ginavo dikou, ka.

Usuran Rasul 1,8 Kotorima-kou-no di kuasa do Sundu dot Osusi sampai ajadi-kou-no do sasi-ku sid Yerusalim...sampai sid pentongkop do pomogunan, ka di Yesus.

1. Tes. 1,5 I habal do kovosihan di nihabal-za sid dikou nga okonko rontob boros do riniba, inoi nga nokovozo-no i kokuasaan om i Sundu dot Osusi om ogumu-po o tanda do kosunduvo do Kinoringan, ka di Paulus.

Yahya 20,22 Boros di Yesus, Torima-kou-no di Sundu dot Osusi.

f) aso kuasa om hak di rasul kondiri

Yahya 20,21 Boros di Yesus, ladko i minonuhu dohon it Ama iadino monuhu-okou-no dikou, ka di Yesus.

rikot, korikatan vagu,

Zabur 96,13 Tu rumikot iosido. Rumikot i Tuhan, tu mongohukum di pomogunan. Manahak iosido do kovosihan dau sid riniba om i kotulido dau sid ongorurungan.

Yesaya 40,10 Banal-no, hodi-no i Tuhan Kinoringan, tu porikot di kakansangan dau om i kuasa di longon dau.

Yesaya 60,1 Ungkazut-no o Sion, tu rumikot i kanavaho-nu om mimbulai i kohormatan di Tuhan sid tinoguvangon-nu.

Amos 9,13 Boros di Tuhan, varo rumikot dot ontok do tana sosogulian, tu mihiza-no mangaradu om mongomot.

Zakaria 9,9 Higak-kou-no ot inuvung do Sion. Tomon-kou-no ot ongoulun do Yerusalim Tu rumikot-no i raja dikou.

Matius 3,11 Boros di Yahya, Topot ong i rumikot, susumuhut dohon

dino, lobipo kikuasa iosido sampai amu-oku-po apatut do tumudu di tompa dau.

Matius 6,10 Porikoto-no i karajaan-nu.

Matius 12,28 Topot bang ioku monunsub dit ongorogon sid saralom di kuasa di Sundu do Kinoringan, atalahas-no dot nokorikot-no sid dikou i karajaan do Kinoringan.

Matius 16,27 Tu it Anak do Riniba, ong rumikot vagu, kikohormatan dit Ama dau iosido om kiongomalaikat.

Markus 9,1 Boroson banalku-no sid dikou, Varot a-ko piro sid tanga dikou dit amu kopurimon di kapatazan, ong a-po kemot-po di korikatan di karajaan do Kinoringan do kikuasa, ka di Yesus.

Lukas 17,20 I korikatan di karajaan do Kinoringan okonko emot om aso momoros dot, Imatai-no sino, ka. Sabap i karajaan do Kinoringan nga dikou-no, ka di Yesus.

1. Tes. 5,2 Sabap elaan-no banal dikou kondiri dot rumikot it adau di Tuhan dino, iadko it ulun di manakau rumikot hiza do sodop.

Kentalangan 1,7 Imatai-no, rumikot-no iosido sid tanga do kavut sampai emot-no iosido di sokoviai it ongoulun.

Kentalangan 6,17 Tu nokorikot-no it adau di hungot dioti dino dot iso nga aso-no kadapat sumaap. om 22,20 Amu songkuroom rumikot-oku, ka. Banal ino, Siti-ko-no o Tuhan Yesus, kangku.

rodus, hungot, 1. dang riniba

a) varo rodus ko hungot dit apakai, gima varo karaatan

Matius 18,34 Na hinumungot-no i tuan dino om nipotorungku-no it uripon dino sampai nakapus it utang sid dau.

Zabur 139,21 Asana-oku banal dit ongoulun di sumana dikau o Tuhan

b) it amu onong o gama, gima vaza monuli dot araat o gama.

Gal. 5,20 It uva di guvas, ino-no rumodus, humungot, mioduw om i iadino

Yakub 1,20 Tu i hungot dot ulun amu kopongimbulai do kabanaran do Kinoringan.

Lukas 4,28 Norongou-po dioti i iadino o boros, minomodhungot-no kavi it ongoulun sid panambayanan

c) i bahanda do kadan-no humungot ko rumodus

Efesus 4,26 Kuozon-po ong humungot-kou. Topot kadan-no ong sampai asadapan nga mahu-tahu i hungot sid ginavo dikou.

Rum 12,19 Kadan-kou-no mononsuli, inoi nga inudai-no dikou i hungot do Kinoringan.

d) Kada-no momurangit dot ulun

Amsal 30,33 Ong monginsasana-ko dot ulun (rumodus), kosubo-ko sid kopioduhan.

Amsal 15, 1 i timpa dot avanus pozom di hungot dot ulun.

Efesus 6,4 Ot ongomolohing, kada-kou-no ponginsasana dit anganak dikou, gamko gazado-no ioti sid avantang do popuhondom di kovosihan di Tuhan.

2. rodus om hungot do dang Kinoringan

a) i sabap do varo hungot do Kinoringan, ino-no i kotolikudan do riniba om i karaatan

Rum 1,18 Sabap koiintalang-no di kotigiran do Kinoringan antad sid surga bahagi di sokoviai i koguvail do riniba om i kavazao dot araat di monobon di katapatan do posurilog di karaatan.

1,24 Sabap ino niuripon di Tuhan ioti di kensasakahan, isuhut di korusuko di ginavo dioti.

Matius 3,7 Boros di Yahya, Isai-ka o minonuduk dikou lumabus antad

sid hungot di rumikot-ogi?

Kentalangan 6,17 Tu nokorikot-no it adau di hungot dioti dino dot iso nga aso-no kadapat sumaap.

Yesaya 10,4 Mulongko iadino, nga amui kumurang i hungot do Kinoringan om kakali do nakaanta i longon dau.

Ayub 9,13 Amu ikodos do Kinoringan i hungot dau.

b) i vaza mokisian di hungot do Kinoringan, i mad pakakas di kosianan di Tuhan

Yehezkiel 7,19 Perak ko amas a-kopongozom dit adau do hungot di Tuhan.

Zabur 30.6 i hungot di Tuhan, bai toduruk-duruk, topot ong i kovosihan dau, soumul-umul sampai pengakvi di sukud dot ulun.

Yesaya 54,8 I hiza di humungot-oku dikau, tinolikudan-ku-po ikau dot oduruk. Topot biano sumanod-oku-no dikau dot aso kengkadan, ka di Tuhan, i mangalabus dikau.

1. Tes. 5,9 Sabap i tokou diti nahatul-no do Kinoringan, okonko ponong sid hungot, inoi nga nahatul tokou do manansanganu di kosopulan, gima i Tuhan tokou Yesus Kristus.

Rum 5,9 Manjadi ong biano, tu nabanal tokou-no sid saralom di raha dau, lobipo atalahas dot osopulan tokou dau antad sidhungot diri.

rondom, tuvong, karandaman, kotuvangan, >imatai sid **navau**

rosi, korosizan, ino-no i kosusaan do ginavo, tu varo sangod, kotuvangan, hukum, kuasa dot asavat, om kahajangan dit a-opitiiman ko varo nagama dit amu nokonong, sala ko korotuan, ko amu kogoos it ulun sumuhut ko mangasip ko mangagama.

1. i gama rumosi do kosunduvo, hukum, kuasa dot asavat ko bubuha Kinotimpunaan 3,10 Rinumosi i Adam, tu alabas iosido (tu nakaranggal iosido di pangarantaban do Kinoringan)

Lukas 2,9 Nemot-po dit ulun manaud do domba i iadino, rinumosi-no banal ioti.

Matius 14,26 Nemmot-po di kinoruhangan dau iosido (Yesus) manau-panau sid soribau do vaig, nongokotigog-no ioti sampai nongokogizak dot, Rogon-neno, ka dioti, tu rumosi.

Matius 17,6 Noronou-po di kinoruhangan dau i dolou dino, minomodrosi-no ioti sampai nonghaba sid tana, tu lumohon-no.

2. i kavazao dot ulun di mongoguna om rumonok di kabanaran om hukuman do Kinoringan(antad di kelinan dot ulun om i kiroon dau dot amu kopionong iosido sid kovosihan do Kinoringan).

Ayub 28,28 I korosi sid Tuhan, ino-no o kelaan, ka.

Zabur 111,10 I korosi sid Tuhan, ino-no o kotimpunaan do kelaan

Zabur 128,4 Osinang-no it ulun di rumosi di Tuhan.

Zabur 103,11 Sabap iadko i kasavato dit avan om iti pomogunan o kogofoo di kovosihan dau di panaud dit ulun dit obingrosi di Tuhan.

1. Petrus 1,17 Atag-no dot i kavazao dikou di kakal-kou-po sitid tanga do riniba, obingrosi...

Pilipi 2,12 Pembulai-kou-no banal di kosopulan dikou kondiri dot obingrosi-kou om mogkip-kou.

3. It ulun Kristian, tu anak iosido do Kinoringan, amu-no rumosi do Kinoringan iadko rumonok,inoi nga it ulun Kristian engat i samod om kosipan om harapan (1. Korintus 13,13).

Kinotimpunaan 26,24 Kadan-ko-no rumosi, tu ioku diti mozo-vozo dikau.

Yesaya 54,4 Kadan-ko-no rumosi, amu-ko omoluan dino

Yesaya 43,1 Kadan-ko-no rumosi, ioku-no o minanapul dikau.

Lukas 2,10 Kada-kou-no rumosi, sabap ioku diti mangahabal dikou do habal dot avasih om otomon bahagi di sokoviai it ongoulun. Tu nakalandai-no i Mananggung.

Matius 14,27 Kada-kou-no korosi, ioku-neti, ka di Yesus sid tanga do rahat.

Yahya 14,27 I ginavo dikou nga amu kotigog ko korosi. Pangasip-kou-no do Kinoringan om pangasip-kou dohon, ka di Yesus.

1. Yahya 4,18 Ong i samod dino amu monguroros do korosizan, tu i samod dot abanal monunsub di korosizan.

4. korosizan, ino-no kosusaan do ginavo dit amu kogoos sumuhut ko mangasip ko mangagama. Na i korosizan mongimbulai di gama minta dua om mindamo do kakansangan di sumaap di korosizan. Vokon-no i korosizan dot ulun Kristian ong iadko poriksaan di kosipan dau dit alalau. Topot ong i korosizan di Yesus sid Matius 26,37 om i kamanangan dau sid saralom di korosizan diri, ino-no o kopongingkadan di sokoviai i korosizan dit ulun di mangasip. Sabap sid gama di Yesus notori-no i nunu-nopo i pongindorosi dot ulun.

a) i korosizan mongimbulai di gama minta dua:

1. Samuel 22,7 it osusa-oku diri, nga kinodim-ku i Tuhan, ka di Daud.

Nehemia 9,27 I hiza di rumosi ioti, okodim-oku didoti, ka di Kinoringan.

Zabur 22,12 Kadan-ko-no minsodu, tu rumosi-oku diti, ka dit uripon di Tuhan.

Zabur 31,10 Sianai-oku-no, tu rumosi-oku diti, ka.

Zabur 118,5 Sid tanga do korosizan, minongodim-oku di Tuhan.

Yunus 2,3 Kinodim-ku-no i Tuhan sid saralom di korosizan-ku.

Yesaya 26,16 Ong pogoson-nu ioti, nga kodimon-ko-no dioti dot orosi i ginavo dioti dino.

Zabur 51,19 Ino-no it isamba di kenginan do Kinoringan, i ginavo dot okugui, i ginavo dot osibak om obingrosi, ino-no ot amu-nu kihizon, o Kinoringan.

b) Kinoringan-no o monginsasamod dit ulun dit rumosi.

Zabur 4,2 Ikau-no o monginsasamod dohon sid tanga di korosizan-ku.

Zabur 32,7 Ikau-no o Tuhan mangapad dohon, supaya amu-oku kemot do korosizan.

Zabur 138,7 Bang mamananau-oku-no sid saralom do korosizan, kakali dot ikau-no o mongohigak dohon.

Yesaya 8,23 Okonko sampai penlaid otuvang sid ongoulun di sid tanga do korondom.

Matius 26,37 I Yesus diri tinumimpun-no it oruol i ginavo sampai otomuk-no iosido.

Yahya 16,33 Sid saralom di vinangun varo korosizan dikou. Topot tama-kou-no banal. Sabap ioku-no o minonori di vinangun diti, ka di Yesus

Rom 8,22 Elaan tokou dot i sokovia i vinangun nga mogodoi (mad rumosi) om kopurimon dot orualan do mad hingoton sampai biano.

2. Kor. 4,8 Minsanko pogoson-okoi di sokovia, nga kakali dot amu-okoi-po osompitan (rumosi)

rudson >intoron, izon

ruol, oruol, korualan, > susa, kosusaan, >pogos, kapagasan: i kopurimanan do guvas ko toriso-iso koburuo do guvas, tizan, hakod,

kazab, antawa ong oruol o ginavo, nga i kosusaan do ginavo, gima varo hal dot amu osinang it ulun, gima varo minatai, varo kahangkaban ko nunu-nopo.

Kinotimp. 3,16 Minomoros i Kinoringan sid di Hava, Omungan-ku-no i kapagasan-nu dino. Kodung mogontizan-ko, orualan-ko sampai opogos-ko ong musu-ko-no, ka.

Ayub 2,13 Minogom-no ioti sid toning di Ayub do songlinsou o boros nga aso, tu notongob di iadino kagazo di kosusaan (om korualan) di Ayub.

Yesaya 35,10 Kohigakan om katamanan, nga mozo-vozo dioti dot aso kengkadan, sabap nakatalib-no kavi i kahangkaban om korualan dioti dino, ka di nabi.

Yesaya 53,3 Sokovia i pokihi om minsodu antad sid dau, tu natandaan-no dot oruol i guvas dau. Banalko asakahan-okoi di kobuatano dau.

Lukas 2,48 Boros di Mariam, lokoi di ama-nu nopogos mogihim dikau, ka.

Rum 9,2 Ino-no o boroson-ku, banalko oupus-oku om aso kengkadan dit oruol i ginavo-ku.

Kentalangan 21,4 Kinoringan-no o momihid dit ongoromou dioti om aso-no kapatazan om aso-not oruol o ginavo om aso-no mogihad antawa mongoruol, tu natanus-no it ongohal gulu.

rusod, rumusod >intoron

Sabat > Sambayang > Adau do pongintaranan

sadu, kosoduvon, mad kotongkihal om kolombus sid aso tantu-tantu, vokon-no ong bai sid panahon, vokon-no mad nakakaraving sid karaatan om kasalaan. Ino dino okonko tomodon ko kenginan dot ulun, bai kopunavatan.

Zabur 17,5 Toudo-no i panahon-ku, supaya amu kasadu i hakod-ku.

Zabur 121,3 I Tuhan monunda dikau, supaya amu kotongkihal i hakod-nu.

samba, 1. Sumamba sid Kinoringan

i vaza tumoronong sid Kinoringan do mongoguna om mongohormat om mongindazou do Kinoringan o tomodon. It ulun sumahau sid kovosihan do Kinoringan om pasamba di dau kondiri sid Kinoringan

a) varo-no laid sid surga

Yesaya 6,2 It ongomalaikat songingkakak mintutuk di kinogomon do Kinoringan do miaambat-ambat dot ino-no i boros, Osusi, osusi, osusi i Tuhan i monguasa di sokoviai. (imatai Kentalangan 4,8-11)

b) sid riniba, nga iadinoi:

Zabur 95,6 Siti-kou-no tumoronong tokou-no sid tinoguvangon dau om sumingkudou-ogi, tu mangarazou tokou di Tuhan, i minongurug di tokou.

Zabur 66,4 Sokoviai it ongopomogunan sumamba om mindolongoi sid dikau, o Tuhan sampai mangarazou di ngaran-nu.

Kolobusan 34,8 Manjadi sinumingkudou i Musa om sinumamba di Tuhan i tinumalib sino.

c) Sid Kitab Laid, i Panambayangan o tempat di gama sumamba

Zabur 132,7 Tokou-no kumaa sid panambayangan, tu sumamba sid tinoguvangon dit ogomon dau.

Usuran Rasul 8,27 I panakavan di raja Kandake nokosori sid Yerusalim, tu sinumambayang iosido sori.

d) Minonuduk i Yesus dot siombo-nopo nga atag sumamba sid Kinoringan.

Yahya 4,21-24, varo hiza do rumikot dot sumamba-kou sid Ama nga

okonko sid Garizim ko sid Yerusalim, inoi nga sid saralom do Sundu om sid katapatan o gama sumamba.

Topot sid Matius 6,6 boros di Yesus, Ong ikau o minta dua, suva-no sid ongkob-nu om lontopo-no i rongobon om minta dua-ogi sid Amanu dot olingob o gama-nu minta dua.

2. Kadan-no sumamba sid ongopinokokinoringan

Kolobusan 20,3-5 om Matius 4,10 Rontob i Tuhan Kinoringan-nu ot sambaon-nu om iseso o Kinoringan o gunaon-nu, ka.

a) I bansa dot Israel, asarok rumanggal di pinonuhuan dino: imatai sid Kolobusan 32, 2; Raja 17,16; Yesaya 44,12.

b) Iri-ogi ohukuman ioti di hukum do Kinoringan: Hakim 2,12;1. Raja 9,9;

c) Amu atag do sumamba sid malaikat ko riniba

Kentalangan 22,8 loku diti i Yahya, sumamba-okun-no dara sid malaikat. Topot pomoros-nopo iosido sid dohon, Kada-no.

Usuran Rasul 10,25 I Kornelius sinumamba sid tinoguvangon di Petrus. Topot pinudik-no di Petrus om pomoros-no dot, Ingkakat-no, ioku diti nga rinibai, ka di Petrus.

3. Sumamba sid Yesus.

It ongomajus sinumamba sid anak-po i Yesus (Matius 2,1-12)

Lukas 5,8 i Petrus sinumingkudou sampai sinumamba sid di Yesus..

om i-po't ulun di kibalang Matius 8,2; Yahya 9,38 ko i Tomas Yahya 20,28.

Iri-ogi it ongomalaikat sinumamba sid di Yesus Ibrani 1,6: Varo boros sid sokovia i it ongomalaikat dot, Lumoub-kou-no kavi sumamba sid dau, ka.

sambayang, i gama sumahau om sumuvang sid kenginan do Kinoringan sid gama minta dua, sumambayang sid umpug dot ulun ko sid panambayangan sumusi di gama di Yesus monuluk di kenginan do Kinoringan. Ong otopot, ensanan i kobuatano om kavazao om gagamaon, nga jumadi do kasambayangan sid Kinoringan, gima i sokoviai i gama tokou ponong sid ulun vokon, nga vaza tokou monulung om mongopud dit anganak do Kinoringan.

1. It atag o gama sumambayang.

Ibrani 10,5-8 Minomoros i Kristus sid Kinoringan i hiza dit amu-po nokoriniba iosido dot, Amu-ko engin di parsambaan om panahak. Topot nakapanahak-ko-no do guvas sid dohon. It isamba do tunuvan i parsambaan bahagi di kasalaan, okonko koozian-nu ino. Na minomoros-oku-no dot, Imatai-no, nokorikot-oku-no, tu monuluk di kenginan-nu, o Kinoringan. Iti-no i vazaan di Kristus do mananus di parsambaan laid diri om manantu di koduvo dino. Nokoponuluk-no i Kristus di kenginan do Kinoringan sid saralom di kinasambaan di guvas dau dot insan-no.

a) It ongomalaikat om ensanan i suvang do surga sumambayang om sumamba sid Kinoringan

Daniel 7,10 om Kentalangan 5,11 Nokening-oku-no di dolou di kinogumuan do malaikat songingkakat sid mintutuk sid ogomon ...do rinibuvan om linizangan o kogumuo dioti dino. Ino-no i longoi dioti dot ologod: It anak do domba di nagaras-no ot apatut do manganu do kokuasaan om i kolunduo, i keloo om i kakansangan, i kohormatan om i kapangkatan om i kendazahan, ka.

Zabur 103,20 Ot ongomalaikat, pangarazou-kou-no di Tuhan.

Suhuto-no dikou i kovosihan dau. Ot ongomononsiou, ot ongouripon di Tuhan, o Vinangun, pangarazou-kou-no di Tuhan, ka.

b) Pengkaa dino i tokou Kristian sumambayang om sumamba do mongindazou om monorima kaseh sampai sumuhut di kenginan do Kinoringan dot iseso o ginavo om katamanan tokou.

Matius 6,10 Posunuo-no i kenginan-nu, iadko i sid surga, iadino iti sid pomogunan

Yosua 22,5 Boros di Yosua sid bansa dot Israel, Harapon-ku dot ikou dino manamod di Tuhan Kinoringan dikou om mozo di ralan dau sampai sumuhut di pinonuhuan dau om sumokot sid kenginan di Tuhan sampai sumambayang sid dau dot iseso o ginavo om pongitungan dikou.

Zabur 100,2-4 Samba-kou-no sid tinoguvangon dau dot ounsopot i ginavo dikou. Hondomo-no dikou i Tuhan, o ino-no i Kinoringan. Iosido-no o minongurug di tokou om i tokou diti, nga ino Tuhan o sanganu. Suvang-kou-no sid ongonavaon di valai do Kinoringan, tu monorima kaseh. Rikot-kou-no sid natad di panambayang, tu mindolongoi do torima kaseh sid dau.

c) Ong otopot, i tokou a-kadapat posurut-po di kohormatan om kogofoo do Kinoringan, nga kakali avantangan i Kinoringan i ginavo dot osibak om i gama tokou humarap sid dau sampai sumuhut di kenginan dau.

U.Rasul 17,25 Okonko suvai apasi iosido, ong toudon do riniba. Gam iosido-no o mamasi do riniba om manahak di nunu-nopo i kosukupu ddo kopouloson.

Zabur 51,18 Sabap amu-ko engin ong mangagaras-oku do pangazam om isamba sid dikau. Ino-no it isamba di kenginan do Kinoringan, I ginavo dot okugui, i ginavo dot osibak om obingrosi, ino-no ot amu-nu

kihizon, o Kinoringan.

Rom 12,1 Patahako-no i guvas dikou do parsambaan di mizau om osusi om ikozi do Kinoringan. Ino-no ot apatut om atarang o padsamba dikou.

d) Engin i Kinoringan dot bai i Kinoringan ot sambaan tokou, aso vokon.

Ulangan 6,13 Rumonok-kou-no do Kinoringan om sumamba-kou-no sid dau sampai monumpa-kou sid ngaran dau. Kadan-kou-no mangaqsip do Kinoringan vokon i Kinoringan dit ongobansa vokon sid mintutuk dikou. Sabap i Kinoringan dikou mongivogu, supaya amu kohungot i Kinoringan do mominasa dikou sitid pomogunan.

Matius 4,10 Rontob i Tuhan Kinoringan-nu ot sambaan-nu om iseso o Kinoringan o gunaon-nu, ka di Yesus.

Matius 6,24 A-el-elaan ddikou do sumamba sid Kinoringan om sumuhut di kolunduo do pomogunan (Mamon).

e) I gama sumambayang isuhut di jangkaon om Sundu do Kinoringan
Matius 15,9 Porosuma o gama dioti mongoguna dohon, tu monuduk ioti dit ongoadat di baiko hoturan do riniba.

Yakub 1,26 Ong varo't ulun mongitung dot elin iosido, topot amu nobukakangan i dila dau, tantu aso kanangan i kelino dau sampai iosido monipu di kondiri dau. Iti-no it otopot o gama sumamba sid Kinoringan, It Ama dot alus om atatap o vazaan: Monorundakai dit ongousan-usan om it ongobituanon di sid tanga do kosusaan om manangkis di karalazan diti riniba.

Mikha 6,8 Nokentahan-no di Tuhan sid dikou i nunu-nopo it avantang, om ombo it onggohon dau sid dikou, o ino-no, Posurut-kou do kabanaran om i gama misasamod om soumul-umul-kou sid tinoguvangan di Kinoringan dikou dot osibak o ginavo, ka di Mikha.

Rom 7,6 Naakalabus tokou-no antad sid kuasa do pinonuhuan, supaya kosuhut tokou-no sid kavazao vagu i dang Sundu, om okonoko sid kavazao di sumuhut di hurup kodori.

Rom 14,17 Sabap i karajaan do Kinoringan okonko hal do kakanan om kenuman, inoi nga kabanaran om kopioondusan om katamaanan sid saralom di Sundu dot Osusi. Isai-nopo i mokikoburuo di Kristus do iadino, iosido-no ot ikozi do Kinoringan sampai oguna dot ulun.

2. I kinosuruto di gama sumambayang sid bansa dot Israel antad di kodori-no

a) **Hal do tempat:** I kodori banal, isuhut di usuran di Kitab Laid, aso-po tempat bahagi di gama sumambayang. Kagi i gama sumambayang tantu pasamba sid Kinoringan do dupot (Kinotimpuunan 12,7) Manjadi minangagama i Abram do pinadaha do pinongoropuhanan tu mongohormat di Tuhan, i minokemot dau.

Kinot. 28,16 Boros di Yakub, Siti bala ot inintonon do Kinoringan dot a-ku-no nel-elaan, om lalavangan kumaa sid surga, ka, sampai pinungaranan-no dau it tempat dino dot, Betel, i harati, Valai do Kinoringan.

Kolobusan 20,24 Siombo-nopo i pembulai-ku i ngaran-ku, sino-no om minsamung-okou dikou om mamarkat dikou, ka do Kinoringan.

Iti-no o sabap ogumu ot tempat sid tana do Palestina i retanko popisomungon do Kinoringan.

Alaid-nopo, bai iso-po tempat, ino-no sid tanga ralan kaka sid Palestina it bansa dot Israel, hiza di nakalabus antad sid kuasa do Masir, ino-no i tempat, i dundung do panambayangan. Iri-ogi i valai do panambayangan i notunggol di raja Sulaiman sid Yerusalim. Ino dino nohoturan sid Imamat 17 om Ulangan 12. Ino-no o sabap, i hiza di

sinumuvang i bansa dot Israel sid Palestina, ogumu o tempat do panambayangan dit ongo-pinokokinoringan dit ongo-bansa vokon sampai varo pensubaan dot it ongo-lun dot Israel sumusui dit ongo-bansa vokon, retanko i tasantanid-tanid o pinokokinoringan ko rogon, nga kikuasa sid tasantanid-tanid o pomogunan. Retanko ikid pomogunan, varo dau do rogon om pinokokinoringan. Iti-no o sabap otiag i bansa dot Israel do tumanid antad sid tempat di nohoturan dit ongo-imam dot ugama Israel. (imatai sid 2. Raja 18,4 om 23,8 i raja Hiskia mananus dit ongo-panambayangan sid tana dot Israel). Otoliban-po i kinarakapan sid Babel, iri-ogi minagavi it ongo-imam mangahatul do bai iso-po o panambayangan, ino-no i sid Yerusalim i retanko panambayangan dot osusi.

Na i dundung sid belantara di napakai sampai i kinoturugan di Sulaiman i panambayangan dot osusi sid Yerusalim, om i panambayangan dino, iri-no ko iri o kogunaan, varo natad. Sid natad dino, ensanan it ongo-lun dot Israel kavasa sumuvang. Iri-ogi varo iso onkob i retanko onkob dot osusi do bai it ongo-imam kavasa sumuva. Tanid mantadko ino, varo-po onkob i retanko onkob di banalko osusi. It onkob dino dit aso gondila, inintoronon di pati di pinosuvangan di vatu di pinosuratan di pinonuhuan om a-ko piro pangahandaman dit usuran di kinapanahan sid belantara, iadko i tungkat di Musa, i sambahagi do Mana, om i iadino. Inot onkob di banalko osusi, retanko inintoronon do Kinoringan, mogom sid timpak di pati di pinosuvangan di vatu di pinonuratan do pinonuhuan. Sid onkob dino, bai hiza dit adau do kopioondusan i Imam do kipangkat sumuva do pasamba sid Kinoringan di parsambaan do mokiaandus. Ino hoturan do iadino ilombus sid panambayangan di Sulaiman om iri-ogi i di Serubabel, ontok di nakatalib i kinarakaban sid Babel om i-po

panambayanan di Herodis, hiza di Tuhan Yesus.

Okonko ensanan i razat kavasa sumuvang om pasamba sid Kinoringan, inoi nga varo imam (i gulu banal it obpinai di Musa, ino-no i Harun sanganak, antad sid rurungan di Levi).

Alaid-nopo, sabap a-kogoos it ongoulun sid ongokampong dot Israel do kumaa sid Yerusalim ontok dit adau do pongintaranan, ipat-ipat i kampong, varo valai do pongumpugan, i retanko sinagoge. Sino dino miuumpug it ongoulun, iadko i Yesus sid Nasaret Lukas 4,16-30. Topot sid Sinagoge aso gama pasamba do dupot sid Kinoringan, bai mamasa do Kitab om mongining di khotbah dit isai-nopo it elo monuduk. Sid sinagoge varo iso't ulun di retanko osukod do sinagoge om osukod do piumpugan sino.

b) **It onghiza do sumambayang.** Iadko sid Ongomomogun kodori diri varo't ongoadau dit a-kavasa mangagama, tu adau do rogon, ka, pengkaa dino, sid bansa dot Israel, ong kodung nakalabus sid pomogunan do Masir, nadanda-no it a-ko piro't adau sid saralom do toun bahagi do Kinoringan. Keso, isuhut di hoturan do kinourugan, it adau do Sabat i retanko adau do pongintaranan. I riniba amu kogoos do minggama-gama dot adau adau dot aso korehatan. Ino dino, nohoturanan laid do Kinoringan antad di kinourugan.

Iri-ogi it adau do pangahandaman di kinolobusan antad sid Masir, nga najadi dot adau dot agazo, ino-no adau do Paska. (Kolobusan 23,15 om Imamat 23,5) I vaza mongoguna dit adau dino, nga i kakanan isuhut di hiza di kinolobusan dino, ino-no, onsi dot uzog do domba dit umul sontoun dot ovion makan om i roti dot aso pangambang. Na hiza do poginakanan dino mongimbulit dit usul di kinolobusan dino.

Adu do Pentakosta Imamat 23,15-21 ino-no i poginakanan di turu o minggu ko kotimpunaan do mongomot om mongotu di kouvaan. i

ngaran Pentakasto, ino-no antad boros do Yunani, ino-no adau kolimo nopod, ka. Iri-ogi it Poginakanan do mizon sid Ongodundung sid kabun dot anggul ontok di vulan koturu hiza dot ovokou i vulan. Turu't adau mintoron it ulun sid kabun do bai dundung ko sulap ot intoronon, ihondom i hiza di sid tanga do belantara i bansa dot Israel. I kogunaan dino, adau do kamatan om adau do monorima kaseh sid Kinoringan, gima i kopouloson antad sid Kinoringan.

Varo-po adau do Kopioondusan. Imamat 16. Ino-no adau do mokiada di kasalaan om kranggalan di bansa dot Israel, supaya i Kinoringan pada di sokovia i hal dit amu nokonong. Iti-no o sabap dot i Imam do kipangkat minangatod di parsambaan sid ongekob di banalko osusi, tu pasamba sid tinoguvangon do Kinoringan.

sala, kasalaan, pongoretan dit apajak manarang dit tasantanid-tanid o hal dit amu atag ko amu nonong, iadko karaatan, karalazan, kosoduvon, karanggalan, kobungahan, kolonduan, kovudutan, kasaapan, koguvelan, misingkinoringan. Vokon-no ong mamakai i Kitab di BM **dusa**, dot iri-no ko iri o harati. imatai sid Kolobusan 34,7 I Tuhan pada di karaatan om karanggalan om kasalaan dioti, ka.

1. i kavazao do sala, ino-no sumaap do Kinoringan, minsanko bai olingob sampai amu sumuhut di hoturan om kabanaran dau.

1. Yahya 3,4 Isai-nopo i monimbaru do sala, karanggal di pinonuhuan do Kinoringan. Tu i sala ino-no o karanggalan di pinonuhuan do Kinoringan.

1. Yahya 2,16 I karalazan do guvas om i karalazan dit ongomato om i koburuvako di kobatano dino, antad kavi sid vinangun, okonko antad sid ama.

Matius 15,19 Tu antad sid ginavo o kembulai i pongitungan dot araat, kapamatazan, kaagazan, kezutan, katahakan, kososizan dot vudut, kopongusakan. Iti-no i monginsasakau dot ulun.

Rum 14,23 Nunu-nopo o gama ong okonko antad sid kosipan, ajadi do sala.

2. It inantadon do sala: i ginavo, pongitungan, i vozoon do rogon di mamalid

Kinotimp. 3,5 Ong kakan-kou dit ongouva dino, kosonsob-kou-no om koirad-kou-no di kasavato do Kinoringan sampai elaan-no dikou i kabanaran om karaatan, ka. Manjadi siniratan-no dit ondu i kazu dino sampai oroloi-no iosido mangakan dit uva. Sabap kendoroloi i kobuatano dit uva dino, tu banalko avantang om i kogunaan dit uva dino popintal dot ulun. *I sala dino, tumongkizad sid Kinoringan om mokierad do Kinoringan.*

Yakub 1,15 Ong tumbozoon i karalan do ginavo, kalandai-po, sala-no. Osukod-po i sala, kapatai.

1. Yahya 3,8 I vozoon do rogon o monimbaru do sala antad sid kinotimpuunan.

Yahya 8,44 I vozoon do rogon antad di kinotimpuunan mamatai di riniba sampai amu tinumatap sid kabanaran. Ong momudut iosido, sumuhut iosido di kobuatano dau kondiri. Iosido dino ama do vudut.

Matius 4,1 supaya osuba i Yesus di vozoon do rogon.

Lukas 22,31 Iningo-ka, banalko indomoon-kou (sinuba-kou) di Saitan, ka di Yesus.

2. Kor. 4,4 Amu mangasip ioti, tu binolou di vozoon do rogon, i monguasa diti riniba, i ginavo dioti, supaya amu kosirot ioti sid kanavaho di Habal do Kovosihan.

Kentalangan 12,9 Iti-no i vulanut kodori di retan do vozoon do rogon om Saitan, i minonipu di sompomogunan.

3. Isai-ka o kisala: mad ensanan i riniba nokotombil sid kasalaan om karaatan

1. Raja 8,46 Boros di raja Solomo, Iso nga aso't ulun dit aso sala dau. Lukas 11,13 Manjadi ikou dino di kikaraatan-kou, nga kakali do kapanahak-kou sid anganak dikou dot avantang o panahak, okon-ka ko lobipo it Ama sid surga o manahak di Sundu dot Osusi..

Rum 3,23 Sokoviai kisala om aso't kendazahan sid tinoguvangon do Kinoringan..

Rum 5,12 Nokembulai i kasalaan sitid vinangun antad sid iso ot ulun om antad sid sala dino nokembulai i huntung om ensanan i riniba nokuasa do huntung. Tu sokoviai i riniba minonimbaru kavi do sala. 5,18 ladko i sala dit iso't ulun o kinohukuman di sokoviai i einiba, iadkeno it avantang o gama dit iso ot ulun o koimbulazan di kapamanaran om kapasi di sokoviai i riniba.

Zabur 51,7 Sabap inusu-oku sid karaatan om inontizan-oku dit idi-ku sid dusa. 51,6 Rontob sid dikau o kisala-oku. Nakaranggal-oku di kenginan-nu. (*ong i Daud, minonolod di savo di Uria, ino-no i Batseba*).

Kinotimpunaan 6,5 Manjadi nemot-no di Tuhan do gumazo-no i karaatan do riniba sid pomogunan om i pongitungan dioti, nga posurut-nopo do karaatan.

Zabur 90,8 Sokoviai i kasalaan-za, nigili-nu-no kavi sid tinoguvangon-nu om i karaatan-za di nokosusut-no, nga nakalanta kavi sid tinoguvangon-nu.

1. Yahya 1,8 Ong boroson tokou dot aso sala tokou, monipu tokou di

kondiri sampai amu-no kentoron i katapatan sid di tokou.

4. I kavagato do kasalaan.

Matius 5,45 I Kinoringan o posilau dit adau sid ulun dot araat om sid ulun dit avantang sampai manahak do darun sid ulun dit abanal om sid ulun di kisala.

Markus 12,34 Ikau dino amu-no osodu antad sid karajaan do Kinoringan, ka di Yesus.

Matius 11,22 Agaan-gaan-po i kosusaan sid Turus om Sidon ko ikau din ong adau-no do kopongohukuman. 23 Kaparnaum lobipo kisala mantadko Sodom om Gomora.

Matius 12,31 Nunu-nopo sansala om gama mongusok nga varo kaadaan. Topot ong i gama mongusok di Sundu, tantu aso kaadaan.

1. Yahya 5,16 Topot varo-po sala di kapatai.

2. Tes. 2,3 Gulu-ko i korikatan di Tuhan dino, kembulai-po laid it oholian o gama dit ongoulun tumolikud sid Tuhan sampai it ulun dit aso hoturan, it anak do karaatan, i sumaap di sokoviai om mongusiba di nunu-nopo i dang Kinoringan sampai mingkakat sid panambanyagan do Kinoringan dot retanko iosido o kinoringan.

5. I kosungguvo do kasalaan

a) bianco: Kinotimpuunan 3,16 olupu i tana om osusa it ulun, tu varo kapagasan sid gama om korualan, ong musu. 3,19 matai i riniba om sumiliu vagu do tana.

Rum 6,23 I suul do kasalaan, ino-no i kapatazan (Yakub 1,15 imatai sid savat)

Kinotimpuunan 4,12 Boros di Kain, Agazo-no banal i kasalaan-ku dino sampai amu-ku-no ovit. Sumsut-oku-no, tu rumosi-oku do kotoguvang-

oku sid dikau. Isai-nopo i kasamong dohon, patazon-okoi, ka di Kain.
Yesaya 6,5 Atuk, tumanus-oku-no diti, kangku, tu riniba-oku om i
munung-ku nga asakau sampai mintoron-oku sid bansa dot asakau i
munung, ka di Yesaya.

Yahya 8,34 Ipat-ipat it ulun di monimbaru do sala, iosido-no ot uripon
do kasalaan.

Kolobusan 20,5 loku-no diti o Tuhan Kinoringan-nu di banalko
mongivogu, i mononsuli sid anganak om muaki om muaki lombus di
karaatan do molohing..

1. Tes. 5,6 Isai-nopo i baiko rumusuk sid tanga do koposizan dau,
iadko napatai-no laid.

b) ontok do penlaid: Matius 5,29.. mantadko ensanan i guvas-nu do
kisala do kosuvang sid kobinasaan. Markus 9,44 ko ensanan i guvas-
nu do kosuvang sid naraka, sid apui dot aso kopisakan.

6. I kosopulan antad sid kasalaan okonko antad sid pinonuhuan, inoi
nga gama di Kristus.

Rum 3,20 I pinonuhuan baiko pentalang di kasalaan. Topot ong biano
nokembulai-no i kapamanaran do Kinoringan dot okonko i pinonuhuan
o minongimbulai. Sabap i Kinoringan o mamanal dit ipat-ipat it ulun di
mangasip sid di Yesus Kristus. 23 Sokoviai kisala om asot
kendazahan sid tinoguvangon do Kinoringan om nembanaran-no ioti
do baiko nisian di kovosihan dau, gima notobus-no sid saralom di
gama di Yesus Kristus.

Rum 7,8 Ong aso-ogi pinonuhuan, amu-po apasi i sala. 7,13 I sala o
najadi do kapatazan-ku, supay kentalang i kobuatano do sala, i
mongimbulai di kapatazan-ku minsanko sid saralom dit avantang,
supaya i pinonuhuan dino pentalang dot rumaat-no banal i sala.

Kolobusan 34,6 I Tuhan o pada di karaatan om karanggalan om kasalaan.

Yesaya 1,18 Bang aragang i kasalaan dikou iadko tongog, murak-po-ka vagu iadko baalsu. Bang aragang iadko raha, murak-po-ka vagu do iadko ruli?

Yesaya 44,22 Huguson-ku-no i kasalaan-nu iadko i kavut om tonuson-ku-no i karaatan-nu iadko i kavut di notilib.

Zabur 103,3 Nakada-no dau i sokoviai i kasalaan-ku..

Yahya 1,29 Imatai-no it Anak do domba do Kinoringan i mamabo di kasalaan di vinangun.

Matius 9,2 Boros di Yesus, Nakada-no i kasalaan-nu.

Matius 26,28 Iti raha-ku o janji vagu, kouza bahagi di kinogumuan, supaya varo kaadaan do kasalaan.

2. Kor. 5,21 It aso sala jinadi do Kinoringan do kisala, tu mongontok di tokou, supaya embanaran tokou sid tinoguvangon do Kinoringa.

Kolose 2,13 Topot ong bianco, pinasi-kou-no do Kinoringan sid di Kristus. Niada-no dau i sokoviai i kasalaan dikou. I surat di tanda dit utang (karaatan, kasalaan) tokou, nga niada-no dau sampai nipaku-no sid kazu do sangkap ino surat dino.

Rum 6,6 Nohorotizan tokou-no dot i vangun tokou laid novit-no dau sid sangkap, supaya i guvas do kisala atanus om amu tokou-no mokiuripon vagu do kasalaan. Sabap it ulun do kisala sampai nohukuman do patazon, ong kodung minatai-no, nabanal-no iosido sampai nakalabus-no antad sid sala dau. I kopoulosan vagu, ino-no banahgi do Kinoringan. 12 Sabap ino, kadan-no dot i sala o raja di guvas dikou dit obingbinasa om sumuhut-kou dit ongekenginan dot araat..

1. Yahya 3,9 Isai-nopo i najadi dot anak do Kinoringan, amu-no

kotimbaru do sala, tu nokentoron sid dau i Sundu do Kinoringan. Amu-no monimbaru iosido do sala, tu najadi-no iosido dot anak do Kinoringan.

Kentalangan 21,5 Bianco imvoguvan-ku-no i sokoviai, ka di Yesus di nokensavat-no ong rumikot vagu iosido.

samod, manamod, misasamod, it inantadon di pongoretan dino, ino-no i gama dit idi monorundakai om mamasi dit ragang-po it anak dit amu-po milo do mongugad do togonok sid vuos dau. Iti-no o sabap dot it idi mongontupat, supaya minsanko togonok nga amu monusa dit anak. Ino gama dit idi do iadino antad sid kogozoo di ginavo dau posinang om mongopud dit anak dau. (Pongoretan di vaza do molohing dit anak dau sid tangon: *A-asakatan namuk ko togonok*). Amu aharagaan i gama manamod, inoi nga antad sid koginavaan om ensanan o kavazao o gama ponong sid ulun vokon om ponong sid Kinoringan, tu Kinoringan-no laid o suntuan di gama manamod sid saralom di gama di Yesus. Ong manamod okonko bai engin om miingin ko tumanggaii.

Yahya 3,16 I Kinoringan banal-noko minanamod do riniba sampai nitahak it anak dau it iso-no!

1. I Kinoringan ot ovud do samod

1. Yahya 4,7 Pisasamod-samod-kou-no, tu i samod dino nokembulai-no antad sid Kinoringan. Isai-nopo i manamod, ino-no ot anak do Kinoringan.

Yahya 17,24 tu sinamadan-oku-no laid dikau, guluko i kinovongunan i vinangun, ka di Yesus.

Yesaya 43,4 Sabap ikau kihorogo sid mato-ku om kohormatan-ku, om

ikau-no i koginavaan-ku.

Rum 5,8 Niintalang-no do Kinoringan i kogofoo di samod dau sid di tokou, tu minatai i Kristus do minongontok di tokou di kakal tokou-po ulun do kisala.

Rum 8,35-38 Isai-ka o kopotongkizad di tokou sid samod di Kristus? Kosusaan,ka, kosompitan,ka, karakapan, ka, vitil, kopunavatan, sapadang? Sid saralom di sokoviai ino iadino kamanang tokou banal, gima sinamadan tokou dau.

1. Yahya 3,1 Imatai-no dikou i kogofoo di samod dit Ama sampai nopungaranan tokou-no dot anganak do Kinoringan om otopotko najadi tokou-no do iadino.

2. supaya i tokou nga manamodi, sumuhut di Tuhan

Yahya 14,31 supaya ohorotizan di vinangun dot manamod-oku dit Ama sampai sumuhut-oku di suhu dit Ama.

1. Yahya 4,19 Manjadi manamod tokou-no, tu nasamadan tokou-no do Kinoringan.

3. I Yesus nga mongolombus di samod do Kinoringan.

Yahya 12,47 Sabap i nokorikot-oku, okonko mongohukum diti vinangun, inoi nga manapul diti vinangun.

Yahya 13,1 I sinamadan dau laid, samadan dau sampai sid kopupusan.

Efesus 5,25 Samado-no dikou it ongosavo dikou, iadko i gama di Kristus di nakapanamod-no do gorija, nitahak i koposizan dau gima i gorija dau dino.

4. I pinonuhuan dot asamod: Imamat 19,18 Kadan-ko-no mononsuli

dot araat antawa monguri di bansa-nu, gamko manamod-ko-no dit ulun vokon iradon-nu ko i kondiri-nu. Tu ioku-no diti o Tuhan Kinoringan. > Matius 22,37; Markus 12,30; Lukas 10,27 om sid vokon-po.

Zabur 133 Imatai-no do banalko avantang ong iseso o ginavo dit ongoobpinai.

Mikha 6,8 Posurut-kou do kabanaran om i gama misasamod om soumul-umul-kou sid tinoguvangon di Kinoringan dikou dot osibak o ginavo, ka di nabi.

Yahya 13,34 Manahak-oku dikou do ponuhuan dot avagu, o ino-no, pisasamod-kou-no, iadko i gama-ku manamod dikou, iadiko ino, pisasamod-kou-no. Ino-no i pogintutunan dikou di sokovia it ongoulun do koruhang-ku ikau, ong varo gama dikou misasamod, ka di Yesus.

- ogumu-po o boros di iadino sid 1. Kor. 13; Gal. 5,22; 1.Tim 1,5; Efesus 5,2; Ibrani 13,1.

Rum 13,10 Sabap ino i gama manamod o kotulukan di pinonuhuan.

Yahya 15,13 Aso't isot ulun dot agazo o samod dau mantadko it ulun di manahak di koposizan dau bahagi dit anggai-anggai dau.

Matius 5,44 Boros di Yesus, Manamod-kou-no dit ongosangod dikou om pinta dua-kou-no bahagi dit ulun di mangaraat dikou.

Lukas 23,34 I Yesus mininta dua bahagi dit ulun di minamatai dau, tanda di samod dau sid sangod: Ot Ama, padao-no i kasalaan dioti, tu a-ohorotizan dioti ino gamaon dau dino.

1. Yahya 2,15 Kadan-kou-no manamod di vinangun sampai i nunu-nopo i dang vinangun. Tu isai-nopo i manamod diti vinangun, amu-no manamod iosido do Kinoringan.

Yakub 4,4 A-ka elaan dikou dot i gama dikou tumanggungai sid vinangun kagama do sumaap do Kinoringan. Tu i banalko ogorot tumanggungai diti

vinangun diti, ino-no i sangod do Kinoringan.

Matius 6,24 Iso nga aso kopokiuripon dot duv o o tuan, tu a-milo-milo nga sanaon dau it iso om samadan i koduvo...

sangkap, ong BM salib, i kazu dit apakai sid gama mamatai dot ulun do kisala dit apatut patazon. 1. It ulun opokuan sid kazu dino ko bai oboludan do sampai engkono, vaza di karajaan do Rum mamatai dit ulun do kisala. Hiza di Yesus Kristus varo labaan dot 40 000 ot ulun Yahudi dit norotuan do kapatazan do iadino, gima minongodurhaka ioti di porinta do Rum. Na i koubasan, i tiang nokotonduk-no laid sid tana. Bai i kazu dit nitimpadang dino, ot it ulun di kisala o sumaan kumaa sid tempat do kapamatazan. Na i sojal kihak do mamahagi ombo i barang dit ulun dino, minsanko it sulung di kinini-kinis, nga binahagi-no. Ong ohukuman do iadino, banalko norungoi i ngaran dit ulun dino dot aso-no hormat om aso-no garal.

Manjadi i kinapatazan di Yesus sid kazu do sangkap o tanda dot okonko bai nokoriniba i Yesus, inoi nga nokorompok iosido dit ulun do kisala dit oholian o sala, vaza dit anak do Kinoringan momurimon di nunu-nopo o korualan om vaza mongorongoi do ngaran dot ulun om mongusiba. Na it ongoulun Kristian hinumarati di kinapatazan di iadino do vaza do Kinoringan minsomok om manamod di riniba, supaya varo kolobusan tokou antad sid kasalaan om osodia i ralan muli sid Kinoringan, i ralan, di natabanan hiza sid kabun dot Eden, i nosunsub-no i Adam om i Hava.

Ontok di kinapatazan di Yesus dino natanggung-no i riniba, gima i Yesus o minananggung. Varo vaza koduvo manarang, ino-no nembanaran i riniba, gima i Yesus minananus dit araat, ko i Yesus minangapus di mad utang do riniba ponong sid Kinoringan. Gam sid

Surat Ibrani varo vaza manarang dot i kinapatazan di Yesus iadko parsambaan di mad boli di monogit do pomogunan, supaya ombo it alasu sid pomogunan ponong sid tinoguvangon do Kinoringan, nga nensogitan-no di raha di Yesus sid saralom di kinapatazan dau.

1. Petrus 2,24 I di tokou do sala iovit-no dau sid kazu do sangkap do nitahak i guvas dau, supaya kedu i kasalaan tokou. Na apasi tokou bahagi di kabanaran, tu gima it ongogama dau. Om i varan dau nokopongolingos di tokou, ka di Kitab (Yesaya 53)

Gal. 3,13 I Kristus o minonobus di tokoou antad sid kinolupuan di pinonuhuan, tu minongontok di tokou. Manjadi iosido-no o nanangan di lulupu, tu nokosurat-no dot, Isai-nopo i nakasangkap, ino-no o nolupu-no, ka.

Rum 8,32 Kagi it Anak dau kondiri okonko a-nizuhu, gamko nitahak do mongontok di tokou.

2. I habal di sangkap mad onsi di sokoviai i Habal do Kovosihan, kosopulan bahagi dit ulun di mangasip om kobungahan bahagi dit ulun dit amu mangasip

1. Kor. 1,18 I habal di kinasangkapan, obungahan it ulun di tumagak. Topot ong i tokou ulun dit osopulan, najadi i habal dino do kuasa do Kinoringan.

1. Kor. 2,2 Boros di Paulus, Iso o nengat-ku, i Yesus Kristus i nakasangkap.

3. It ongoulun Kristian a-milo-milo mizo om kumoruhang di Yesus sid sangkap dau.

Rum 6,3 Amu-ka elaan dikou dot i tokou sokoviai di nopods, tu mamung sid di Kristus, tantu sid kinapatazan dau o kinopodsuan om kinoomungan tokou?

Gal. 5,24 sampai i nasanganu-no di Kristus, nakasangkap-no i guvas om i kenginan om i kozian dau. 6,14 Sid di Kristus nakasangkap-no i vinangun bahagi dohon om ioku bahagi di vinangun.

Matius 16,24 Isai-nopo i sumuhut dohon, suvai kumodos iosido om saanon dau i sangkap om mozo-no dohon.

Ibrani 6,6 Ong mogidu sid Kristus, mad pasangkap vagu di Kristus: tu i gama dioti dino iadko pasangkap-no vagu dit Anak do Kinoringan sid saralom di ginavo dioti dino sampai mangamalu-no vagu dau.

sapul, manapul, kosopulan, cf. tanggung om tindal ko tobus

i gama manapul, varo't ulun ko dupot ko barang di rumungoi ko matai, ong aso kosopulan, iadko it ulun di naratu sid vaig ko talaga, ko it anak ko barang di sid rinivang do valai dit ahandab.

I manapul iadko ngaran banal do Kinoringan sid Kitab Laid. Kinoringan o minanapul i hiza dot osusa i bansa dot ulun Israel. Ong varo sangod ko vitil dot agazo, ko sid kinuripananan ioti sid pomogunan dot osusa, iri-ogi i Kinoringan minanapul dioti dot i gama dau, monunsub ko monori di sangod, pengkod di vitil om koruzahan do pomogunan om mongimbulai do kosukupu do kopouloson, palabus antad sid kinuripanan om karakapan om pouli vagu dioti sid pomogunan di pasok dioti, ko pentoron di nunu-nopo o kosusaan do pada di karaatan om kasalaan dioti.

Ong sid Kitab Vagu, atandas i harati bahagi di kosusaan om karaatan di kasalaan o boroson. Yesus Kristus o manapul antad sid kasaanaan di rumikot-ogi (Rom 5,9 om 1. Tes. 1,10, antad sid kobinasaan (Matius 16,25 om 18,19) om antad sid kuasa do huntung (Yakub 5,20).

1. I minanapul: Zabur 18,3 Tuhan-no i minanapul dohon

Zabur 40,18 I Tuhan, ino-no i minonulung dohon om i minanapul dohon

Titus 3,4 Topot nokembulai-no i minanapul dohon.

2. Okonko i riniba elaan do monulung om manapul.

Zabur 33,16 I pandangan amu kasapul, tu i gima kansang dau dot ahatul banal.

Yehezkiel 7,19 Okonko i perak ko i bulavan dioti ot kasapul dioti dino i hiza dit adau di Tuhan.

3. I nabi pentahan: I Tuhan o manapul

Ayub 5,19 Antad onom-no o kosusaan nosopulan-ko di Tuhan.

Yesaya 46,4 Boros dit uripon di Tuhan: loku-no o mongingkakat om mamabo om manpul dikau

Zabur 50,15 Kodimo-oku-no dikau di hiza do banalko opogos-kou. Tu ioku-no o manapul om monulung dikou om pongindazou-kou-no dohon.

Zabur 34,18 I Tuhan o manapul antad sid nunu-nopo songkosusaan.

Lukas 18,8 Boroson-ku-no sid dikou, Humago iosido mamanal (manapul) dioti, ka di Yesus.

4. I kobatano dit ongokosusaan.

1. Samuel 17,37 Ikau-no o minanapul dohon antad sid kabang do mondou om kogiu

Zabur 56,14 Ikau-no o minanapul di ginavo-ku antad sid kuasa do huntung, ka.

Zabur 68,21 Sid di tokou-no i Tuhan. Iosido o kapanapul antad sid kuasa do huntung (om 120,2.. antad sid vudut dit ulun di

mamangagauk. Zabur 43,1 antad sid ulun di mangakal om araat o pongitungan. 91,3 antad sid rabpo do sangod.

Zabur 79,9 Sopulai-okoi-no om pangada-ko-no di saala-za.

Galatia 1,4 supaya osopulan tokou antad sid karaatan di didino, tu i Yesus Kristus i minokipatai.

Lukas 19,10 Nokorikot-no it Anak do riniba do mogihim om maanapul dit ulun di natagak, ka di Yesus.

Matius 1,21 Iosido o manapul (mamasi) di bansa dau antad sid sokoviai i kasalaan dioti.

Matius 24,22 Ong okonko pinoduruk-no ino hiza dino, tantu iso nga asot osopulan.

Yahya 3,17 Tu okonko sinuhu-no di Kinoringan it Anak sid vinangun, supaya mongohukum iosido di vinangun dino, gam supaya osopulan-no i vinangun gima it Anak dino.

Usuran R. 2,40 Pokisopulon-kou-no antqad dino bansa do miraraat-raat.

Usuran R. 16,33 Boros di kuasa do torungku sid Pilipi, Kuran-no-ka o gamaon-ku diti do kemot-oku do kosopulan?

Usuran R. 4,12 Kagi-po aso kosopulan sitid pomogunan om aso ngaran do kikuasa bahagi di riniba do tanidko iso, i manapul di tokou, ka di rasul.

5. Isai-ka ot osopulan do Kinoringan?

Usuran R. 2,21 Isai-nopo i mongodim di ngaran di Tuhan, ino-no ot osopulan

Matius 9,22 I gama-nu mangasip o minanapul dikau, ka di Yesus.

Markus 16,16 Isai-nopo i mangasip om opodsu-no, ino-no ot osopulan.

1. Kor. 1,21 Manjadi kenginan vagu do Kinoringan manapul dit ongoulun di mangasip di Habal do Kovosihan di mad obungou o habal.

1. Tim. 1,15 I Kristus Yesus rinumikot sid riniba, tu manapul dit ongoulun di kisala.

1. Petrus 3,21 Tu asapul-kou-no di pomodsuan, dit okonko baiko ipomoug di guvas.

6. It ulun di nosopulan, ino-no monorima kaseh

Zabur 50,15 Iri-ogi mongindazou-ko dohon.

Zabur 32,7 supaya osopulan-oku dino, nga agazo o ginavo-ku mangarazou do Kinoringan.

sasi, sumasi, kososizan, > akun. Sumasi, ino-no o harati, mumbongut sid tinoguvangon do hakim ombo i nokemot ko sid tinoguvangon dot ulun, ombo it otopot, ombo i kosipan om harapan dau. It ulun Kristian sumasi di gama do Kinoringan do mongindazou om monorima kaseh iosido.

a) kodung mangasip it ulun, sumasi iosido di kosipan dau. Ong osusa it ulun dumahava, ino-no o harati > mangakun. Topot ino duvo pongoretan akun om sasi, nga bai amu meradi banal o panangan Usuran R. 4,20 lokoi diti aso tanganan dot amu momoros di sokoviai i nemot om norongou-za, ka di Petrus om i Yahya.

1. Kor. 4,13 Varo nokosurat dot, Mumbongut-oku, tu nakasip-oku-no gima, ka.

Matius 16,16 Boros di Petrus, Ikau-nobo dino i Kristus, it Anak do Kinoringan i kapaapasi, ka.

b) i gama sumasi di Kinoringan om i Kristus

1. Yahya 4,15 Isai-nopo i mangakun dot i Yesus dino Anak do Kinoringan, ino-no o kentoron sid dau. Iti-no o kososizan om kosipan tokou dot, I Kinoringan o manamod di tokou.

Matius 10,32 Isai-nopo i sumasi dohon sid tinoguvangon dot ongoulun, ino-no ot isasi-ku sid tinoguvangon dit Ama-ku sid surga, ka di Yesus.

c) i gama sumasi okonko bai boros, inoi nga gamaon:

1. Petrus 2,12 sampai i kavazao dikou sid tanga dot ulun dit amu kasip, nga apatut, supaya minsanko nokopongindaraat ioti dikou dit avantang o gama dikou, nga sera ong korikot i Kinoringan mongindazou ioti do Kinoringan, tu ohorotizan ioti dot avantang i gama dikou.

d) aso sangkut do sumasi

Yahya 12,42 Minsanko iadino, kakali dot ogumu ot ongosukod dioti minangasip sid dau. Topot amu niintalang dioti, supaya amu ilabus ioti dit ongoulun do Farisi antad sid piumpugan. Tu lobipo minogihim ioti di kohormatan antad sid ulun mantadko i kohormatan antad sid Kinoringan.

Rom 1,16 Amu kamalu dohon i Habal do Kivosihan

Filipi 2,11 om ipat-ipat i dila nga mangakun-no (sumasi) dot i Yesus o Tuhan, tu mamantud di Kinoringan, it Ama.

Rom 10,10 I ginavo di mangasip o kanu do kabanaran om i mongoho (sumasi) i kabang o kadapat do kotindalan.

savo, musavo, manansavo, mokisavo, kopisavaan I hoturan do kinourugan ozi do miopud i duvo it ulun di minisavo do pempatai mozo-vozo om migazad-gazad om mioopud-nopo.

1. Antad sid hoturan do Kinoringan ino hoturan dino. Kinotimpunaan 2,24 Ino-no o sabap do tumongkizad dot ama om idi dau i kusai, tu mobpuputd id savo dau sampai ioti miduvo dino ise-no o guvas.

2. I tomodon do misavo: Suvai kikoruhang it ulun om otimumg-ogi i riniba. It ondu monulung di kusai, supaya i kusai okonko iseso dot aso koruhang (Kinotimpunaan 2,17). Topot ino dino okonko it ondu mad uripon di kusai ko bai ponulung dit a-milo-milo sumuhut di hoturan do kusai, inoi nga suvai kisavo it ulun om otimumg banal i riniba. Ong sid laporan keso di kinourugan (Kinotimpunaan 1,27) kodung riniba, ondu om kusai ot inurugi do Kinoringan, ka.

Kinotimpunaan 1,28 Paganak-kou-no om gumumu-kou-ogi sampai pusoko-no dikou iti pomogunan diti, ka di Kinoringan. I minisavo mangaranzat di riniba.

1. Kor. 7,9 i hoturan do minisavo monobon di kaagazan om kakanggahan. Boros di Paulus, Bang amu akadasan i pongitungan dau, osuhul-no ong musavo. Sabap lobipo avantang do kisavo ko manggau-kanggau it ulun, ka. Ong minisavo, i duvo it ulun dino mioopud sid saralom di gama misasamod. Ong bai mangagai ko mokiagai it ulun, i kaagazan bai vaza momorinta om mamakai dot ulun vokon iadko momoi om pakakas di karalazan dau. Ino dino okonko antad sid samod om koginavaan.

3. I Yesus posondot di harati minisavo sampai pempatai.

Matius 19,5-6 Tumongkizad it ulun sid ama om idi dau, tu tumopiri sid savo dau, sampai ioti miduvo dino iso-no o guvas. Sampai ioti dino okon-noko duvo-po, inoi nga iso-no. Sabap ino, kodungko pinopiamung di Kinoringan, kadan-no pitongkizad do riniba, ka di

Yesus.

Matius 5,28 Ipat-ipat it ulun do sumirot sid oso't ondu tu sumolon iosido, tantu iadko nakagai-no iosido dit ondu sid saralom di ginavo dau.

Efesus 5,25 Ot ongokusai, samadai-no it ongosavo dikou iadko i Kristus i nakapanamod di piumpugan sampai minokipatai-no bahagi di piumpugan.

1. Tim. 3,2 Topot it ulion (do piumpugan om gorija) suvaiko avanus om kisavo iosido dot iso.

4. It ulun minisavo ohoturan do boros do Kinoringan.

1. Petrus 3,7 Pengkaa dino ot ongokusai, i gama dikou lumuzung dit ongosavo dikou, nga hondomo-no dot it ongondou okugui ko ikou sampai mongoguna-kou-no dioti, tu andaman dot ioti nga kongotungkusi di kovosihan do koposizan, supaya amu ounong i gama dikou minta dua.

1. Tes. 4,3-5 Ino-no i kenginan do Kinoringan, i kosusian dikou do tumolikud-kou-no sid kaagazan om ipat-ipat it ulun sid dikou nga osusi om avantang i gama misavo, okonko oroloi-nopo om aso bahazan, iadko it ongoulun dit amu kasip om amu elaan dau i Kinoringan.

Galatia 5,16 Bang sukul mozo-vozo-kou di Sundu, tantu amu-kou monuluk di kohigakan di guvas.

Ibrani 13,4 Gunaon-no di sokoviai it ongoulun i hoturan do misavo om kadan-no monginsasakau dit odopon dikou.

1. Kor. 6,12 Sokoviai kavasa. Topot okonko sokoviai atag. 15-16 A-ka elaan dikou dot ino guvas dikou dino koburuo di Kristus? M;anjadi kuran-ma o gama-ku mongidu do sampapas do koburuo di Kristus om pezoon-ogi sid sundal? Antava a-ka elaan dikou dot it ulun di

kumigobu do sundal, iadnoko nokopiluzung-no ioti?

5. I miluzung i minisavo, nga vaza pembulai di samod sid savo dot amu engat i rontob. Sid kopiluzungan dino mioopud i minisavo sid katamanan di bai i duvo it ulun engat.

1. Tim. 4,4 Tu avantang-no i sokovai it inurug di Kinoringan dot iso nga asot araat, ong sukul agamit sid saralom do gama monorima kaseh.

sian, monian, kosianan, kobinsianan,

i kbuatano dot ulun di kodung nokemot do kosusaan dot ulun vokon, nga monulung-nopo iosido om monginsasamod om peva do kosusaan, ko i gama dot ulun manamod ombo it osusa, dot ino gama dino antad sid ginavo dot ulun. I kosusaan dot ulun mad pongoruol di guvas-ku (it atoi-ku).

Ong i Paulus manarang dot i kobinsianan do Kinoringan ino-no i gama do Kinoringan sid saralom di kavazao di Kristus (Titus 3,5; Rom 9,23 om 15,8).

1. I kosianan do Kinoringan

Yesaya 49,15 Varo-ka ondu dit olingan it anak dau dot amu monian iosido dit anak dau kondiri?

Lukas 1,78 Boros di Zakarias, Sabap gima i kobinsianan do Kinoringan, orikatan tokou do kovosihan antad sid savat, ka dau.

Matius 9,36 Nemot-po di Yesus i kinogumuan dino, banalko osinanan iosido dioti, tu ioti dino nopogos om nasaadan iadko it ongodomba dit aso manaud.

Lukas 15,20 Notimpan-po dit Ama, oruol-no i ginavo dau tu banalko

osinanan iosido dit anak dau sampai tinumangkus-no iosido sumamung.

Zabur 23,6 I kovosihan om kobinsianan mozo-vozo dohon suvab-suvab sampai mintoron-oku sid valai do Kinoringan sampai penlaid.

Yeremia 3,22 mogkorudu i Yeremia dot, I kovosihan di Tuhan, ino-no, amu-no nopunso-okoi diti, tu i kobinsianan kakal-po mozo-vozo dahai, ka.

Yeremia 3,12 Monian-oku sampai amu-oku humungot sampai penlaid. Rontob-nopo, intutunai-no i karaatan-nu di navaal-nu sid Tuhan.

Yunus 4,2 Elaan-ku-no dot kikobinsianan-ko sampai moupus-ko-no di karaatan.

Zabur 25,7 O Tuhan, kada-no hondomo i sala-ku di kakal-oku-po omulok sid saralom di kosianan-nu.

Daniel 9,18 Sumingkudou-okoi sid tinoguvangon-nu, o Tuhan, nga okonko kiroon-za i kabanaran-za, gam ino kobinsianan-nu o harapan-za, ka.

1. Petrus 1,3 I Kinoringan o piindazou-nopo, sabap iosido banalko kikosianan.

1 Tim. 1,13 Topot nosomungan-oku di kosiaan.

1. Kor. 7,25 tu ioku diti nentaranan do kosianan di Tuhan.

2. i tokou nga apatuti do kikobinsianan.

Matius 9,13 Ozi-oku di kobinsianan, okonko i sasambaon.

Matius 23,23 nga pinosimozo ioti di kabanaran om kosianan om i katatapan, do bai mongontupat do jintan om lumpodos om songki.

Lukas 10,37 Boros di Yesus, inot tolu ulun dino, isai-no ot osomok sid ulun do nabambang? Iri-nobot ulun do minonulung sampai minionian dinot ulun dino, ka.

Lukas 6,36 Monian-okou iadko it ama dikou nga kikobinsianan.

Matius 5,7 Osinang-no it ulun dit obinsianan, tu iosido dino nga sianani.

Yakub 2,13 Sabap i hukum amu monian dit ulun dit amu obinsianan. Topot ong i kobinsianan monori di hukum.

sogit, monogit. Ino pongoretan dino amu apakai sid Kitab, tu manarang i vaza kodori do povizau dit ongorogon. Ong varo kosusaan, retanko alasu i pomogunan, tu varo karanggalan dot adat, i bobolizan o moguhok dit iponogit do pomogunan do mangagaras do boli... Ino gama dino osomok sid gama dit imam sid bansa dot Israel kodori do pasamba do dupot sid Kinoringan, do mokiada do kasalaan om mokipasi-no vagu di Kinoringan, varo kiniro diri dot amu apatut do mamakai di pongoretan dino sid gama ponong sid Kinoringan.

suba, pensubaan, moniim dot ulun ko momorisa ko moniim mamalid om palandu dot ulun (ponong sid karaatan). Ong bubukon, bai vaza moniim do kolonuto om kakansango ko katatapo dot ulun >binubukan-no do Kinoringan i Ibrahim (Kinotimpunaan 22)

Markus 8,11 Manjadi rinumikot-no it Ongofarisi. I tomodon dioti kumiguvail di Yesus. Ino-no i gama dioti, minokimbulai di Yesus do kosunduvo, tu moniim. (Matius 22,35)

1. Kor. 10,9 Kadan tokou-no moniim di Tuhan, iadko a-ko piro ioti minoniim, nga nongopatai ioti pinintindukan do vulanut.

1. Kinoringan moniim om mobubuk (monuba) di kosipan dot ulun.

Kinotimp. 3,1 mangakun i Kinoringan dot osuba i riniba

Kinotimp. 22,1 Amu songkuro antad diri, binubukan-no di Kinoringan i

Ibrahim.

Zabur 66,10 Ikau-no o minonuba dahai sampai sinusi-okoi iadko perak.

Yahya 6,6 Topot ino boros dau dino baiko moniim iosido di Filipus, sabap nelaan-no laid di Yesus do kuran o gama dau.

Zabur 139,23 O Kinoringan, impurasai-oku-no om intutunai-no i ginavo-ku. Porisao-oku-no sampai horotizo-no i pongitungan-ku om imatai-no i vazaan-ku.

Yahya 17,15 Okonko mindamo-oku do peduon ioti antad sid vinangun diti, inoi nga mindamo-oku dot ikau-no o mongorinding dioti antad sid karaatan (sid tanga do pensubaan).

Matius 6,13 om amu-ko mangagazad dahai sid pensubaan, inoi nga polobuso-okoi-no antad sid karaatan, ka.

Yakub 1,13 Isai-nopo it ulun sid tanga do pensubaan kadan-no momoros iosido dot, Kinoringan o monuba dohon, ka. Tu banalko amu monuba ong i Kinoringan sampai amu mamalid iosido. Baik o ongekenginan dit ulun kondiri o monginloloduk om monungkoliu dau.

2. I monuba dot ulun, varo't a-ko piro ot ongo kuasa

Ayub 1,12; 2,6-7 i vozoon do rogon minonuba di Ayub om i kelinan dau

Markus 1,13 Sid belantara sinuba-no i Yesus di raja do rogon (Matius 4,3)

Lukas 22,31 O Simun, iningo-ka. Banalko indomoon-kou sinuba-kou-no di Saitan, tu engin mangatap dikou iosido iadko gandum.

1. Kor. 7,5 supaya a-kou onong di pensubaan di vozoon do rogon, tu amu-kou kadapat kumodos dino.

Amsal 1,10 Ot anak-ku, ong varo't ulun dot araat di mamalid dikau,

kadan-ko-no sumuhut

1. Kor. 15,33 Kadan-kou-no mokipalaid, tu rumungoi i kavazao dot avantang, ong kumuruhang dit ulun dot araat.

1. Tim 6,9 Isai-nopo it ogorot mokilulundu, nga aratu-no iosido sid pensubaaan om sid sungkoliu om it ongekenginan dot obungou om araat, ino-n o o mamalid dit ulun sid kobinasaan.

3. I Kinoringan mangapad dit ulun di atatap sid tinoguvangon dau.

1. Kor. 10,13 Sampai biano nga amu-kou-po opionong do pensubaaan dit amu agasan do riniba. Sab ap atatap i Kinoringan. Amu ozi iosido dot oholian o pensubaaan dikou, gam i kakal-kou pisusuba, nga manahak-no iosido do kolobusan antad sid pensubaaan, supaya agasan dikou.

1. Petrus 2,9 atarang-no do kapanapul i Tuhan dit ongoulun dit abanal sid tanga do pensubaaan om i sokoviaai, i monimbaru do sala, itahu dau sid hukuman penlaid.

Ibrani 4,15 Nosuba-no i Yesus sid sokoviaai it ongothal do iadko i tokou, amui nakasala iosido.

Ibrani 2,18 Sabap iosido kondiri, nga nokopuriman-no di pensubaaan. Sabap ino kadapat-no iosido monulung dit ongoulun di sid saralom do pensubaaan.

Kentalangan 3,10 Manjadi sopulon tekau di hiza do varo pensubaaan sid sompomogunan, it ponuba di sokoviaai i riniba.

Kinotimp. 39,9 I Yusup sinuba-no di savo di Faraun.

Matius 26,41 Ontupat-kou-no om pinta dua-kou-no, supaya amu-kou onong do pensubaaan.

Gal. 6,1 Bang varo't ulun di naratu iosido sid pensubaaan di minonimbaru iosido do sala, atag-no dot ikau-no ot ongoulun di

kisundu o pemumui vagu dau dino dot avanus o gama dikou, sampai ontupato-no i kondiri dikou, supaya a-kou kosuvang sid pensubaan.

Yakub 1,2 Ong anangan-kou do boginisan o pensubaan, tomon-kou-no, tu elaan-no dikou dot oporisa-po i kosipan dikou, kosurut-kou-no sid katatapan.

suhu, **pinonuhuan, (Taurat), hukum**, ong suhu okonko bai hal do sadangan ko mindamo om mogkovosihan, inoi nga hal dit a-milo-milo suhuton om gamaon, kopionong di kenginan dit ulun di monuhu. I sid savat ko i molohing monuhu dit ulun ko it anak sid kuasa dau om mangahatul di dau do gama. Ong sid Kitab, i pongoretan do pinonuhuan mongontok di pongoretan do *Taurat* di Kitab Ibrani, ino-no i hoturan do Kinoringan bahagi di bansa dau di nilabus dau antad sid kuasa do Masir. I hiza diri, aso-po hoturan om aso-po bahazan di bansa dino. Iti-no o sabap dot i Kinoringan minanahak di pinonuhuan dau do hopod, supaya ahatul i kavazao om kobuatano di bansa dot Israel sid tinoguvangon do Kinoringan om sid tinoguvangon dot ulun, dau do bansa om it ongobansa vokon. Sabap ino dino, nga kenginan do Kinoringan, i bansa dot Israel posunu om posuntu di kenginan do Kinoringan bahagi dit ensanan i riniba. Na i hiza diri, bai i bansa dot Israel o kotutun di kenginan do Kinoringan, dot i Musa o nakaramit di kenginan dino om nilombus-no dau sid bansa dino sampai nisadi sid vatu, supaya varo pangahandaman (Kolobusan 20-23 om 34).

Topot minsanko it ongobansa vokon nga kaharati-no ngaran dot ombo i kenginan do Kinoringan, dot i kenginan do Kinoringan mad nitanda sid ginavo dot ulun (Rom 2,15: ioti kondiri o pentalang dot i gama di pinonuhuan nokosurat-no sid ginavo dioti sampai i purimon di ginavo dioti o pongilaan).

1. I mad origi di Taurat, ino-no i hopod i pinonuhuan di Musa, i nitaru di Kinoringan sid belantara, ontok sid burul Torsina do kopijanji di bansa dau o tomodon (Kolobusan 20,2-17 om Ulangan 5,6-21)

I nalad di keso watu manarang di tugas tokou sid tinoguvangon do Kinoringan, tu isono o Kinoringan dit aso tinganan lukisan ko gambaron, om i kingaran dot osusi, i gama mongoguna dit adau do pongintaranan, tu adau di Tuhan om i-po gama mongohormat di molohing di mongontok do Kinoringan ponong sid anak.

I nalad koduvo manalahas di kobuatano tokou ponong sid ulun vokon, supaya orinding i koposizan, it ongakob, i barang, i ngaran om bantug sampai i nunu-nopo i dang vokon, supaya amu ohoturan it ulun sid karalazan dau.

I Zabur 19 om 119 ouji-no i pinonuhuan iadko ralan di banalko arantang om avasih, supaya amu kotongkihal om kasadu it ulun, gam kemumui om korikot sid rikoton ponong sid Kinoringan.

Yesaya 1,11 om 16: Ontupato-no dikou i hukum di Kinoringan tokou. Vaugai-no, susio-no. Iduo-no i kasalaan dikou. Iduo-no sid tinoguvangon-ku. Engkod-kou-no mangagama dot araat. Pisingilo-kou-no mangagama dot avantang. Ihimo-no dikou i kabanaran. Tiago-no dikou i mongindoronok dot araat o gama. Tabangai-no dikou it anganak dit aso-no molohing. Ponulung-kou-no dit ongondou di bituanon, ka di Tuhan.

2. Na sid Kitab Vagu varo-po harati vokon ong pinonuhuan. Kenginan di Yesus dot it ongoulun okonko bai sumuhut di hurup do pinonuhuan di iadko adat di monodiri ombo kavasa om amu, inoi nga pavalang dot ombo i kenginan do Kinoringan antad sid saralom do ginavo, dot it

ulun otudukan di Sundu dot Osusi.

a) Ino dino nipentahan-no laid di nabi Yeremia 31,33 I janji vagu di jonjizon-ku sid bansa dot Israel, ino-no, Isurat-ku i Pinonuhuan-ku sid ginavo om sid pongitungan dioti dino. Okonko sidvatu o posuratan-ku. I hiza dino amu-no ossusa do monuduk di koruhang ko kumiboros dit obpinai dau dot, Intutunani-no i Tuhan, ka. Tu i sokoviai ioti dino, nga kotutun dohon. It ulun di kokihizan om it ulun di kibantug nga kotutun-no kavi dohon.

Yehezkiel 36,27 Suvangan-ko-no ikou do Sundu-ku om jodizon-ku-no ikou do riniba vagu di sumuhut di kenginan-ku om mongontupat om tumumbozo di pinonuhuan-ku.

b) Kondiri di Yesus manarang sid Matius 5,17 dot iosido-no i monuluk di Taurat. I harati dino, minonuduk i Yesus di kotulukan di kenginan do Kinoringan di tumalib di vaza sumuhut do bai i hurup om bai ngaran (Matius 5,21-48) Suvai oponu it ulun do samod do Kinoringan dit amu engat i rontob (minsanko i sangod asamadani), nga kogoos do monumbozo di Yesus.

Yahya 13,34-35 Boros di Yesus, Manahak-okou dikou do ponuhuan dot avagu, o ino-no, Pisasamod-kou-no, iadko i gama-ku manamod dikou, iadno-keno pisasamod-kou-no. Ino-no i pongintutunan dikou di sokoviai it ongoulun do koruhang-ku ikou, ong varo kopisasamdan dikou, ka di Yesus.

Rom 5,5 I samod do Kinoringan nokosuvang-no (iadko nituntug-no) sid ongoginavo tokou, ino-no i gama di Sundu do Kinoringan, i nitahak sid di tokou.

Rom 13,10 Sabap i gama manamod o kotuluk di pinonuhuan.

c) Okonko i pinonuhuan di mad adat o kiguna-po: Matius 12,8 It Anak do Riniba maanansanganu dit adau do pongintaranan. (Iti-no o sabap

do minsanko it adau dino kadapat manapul dot ulun ko monulung dit ulun dot osusa).

Matius 15,11+20 Okonko i sumuvang sid kabang o monginsasakau dot ulun. Iti-no i monginsasakau dit ulun, i pongitungan dot araat, kapamatazan, kaagazan, kezutan, katahakan, kososizan dot vudut, kopongusakan, i kembulai antad sid ginavo dot ulun.

Matius 23,23 It ongothal di kiguna banal sid pinonuhuan, kabanaran om kosianan om kosipan pinosimozo dikou.

Rom 10,4 Sabap i Kristus, ino-no i kinompusan di pinonuhuan, supaya ipat-ipat it ulun di mangasip kasanganu di kabanaran.

d) i tudukan dit ongorasul kananganko i pinonuhuan

Galatia 3,24 Sabap ino i pinonuhuan iadko guru tokou di mangagazad sid di Kristus, supaya kanu tokou do kabanaran gima i kosipan.

Rom 7,7 Amu-ku ohorotizan i sala, ong okonko i pinonuhuan. Na i kasalaan o kinumavid di pinonuhuan do vazaan mongimbulai sid ginavo-ku di sokovia i it ongokoozian. I pinonuhuan di mangagazad dara dohon sid kopolosizan, ino-no o najadi do kapatazan-ku. Sabap kodungko nanu di sala i pinonuhuan do vazaan dau tumoronong sid dohon, pinalid-oku-no dau om iri-no pinonuhuan dino o nipamatai dohon. 13 supaya i pinonuhuan dino pentalang dot rumaat-no banal i sala. 25 loku diti sumuhut-no di pinonuhuan do Kinoringan sid saralom di ginavo-ku. Topot sid saralom di guvas-ku suzmuhut-oku-no di hoturan do sala.

Usuran R. 15,11 Boros di Petrus, i tokou diti suvaiko humarap sid kovosihan om sid kosianan di Tuhan om kosuvang-ogi sid kopolosizan penlaid. Okonko i gama tokou monuluk di pinonuhuan dino o kotorimaan di kopolosizan penlaid.

Galatia 6,2 Mitutulung-kou-no mamabo dot avagat, supaya otuluk

dikou i pinonuhuan di Kristus.

Yahya 1,17 | Taurat ino-no nitahak-no di Musa. Na i kovosiahn om katapatan nokembali-no sid Yesus Kristus.

e) Ong kopiopot sid piniizaan di Kristus, nakalabus-no it ulun sid hoturan do kasalaan om karaatan.

Rom 8,2 | hoturan do Sundu, i man ahak do kapasi sid saralom di Yesus Kristus o pinalabus dohon antad sid hoturan do sala om kapatazan. Ino-no i gama do Kinoringan, sinuhu-no it Anak dau kondiri lumuu di kobuatano di riniba do kisala, sabap gima i kasalaan, sampai minongohukum-no iosido di sala sid saralom di buatan do riniba, supaya otuluk tokou i kabanaran di nisuhu di pinonuhuan dot amu-no sumuhut tokou di koozian do guvas, inoi nga sumuhut-no di koozian do Sundu.

sukod, osukod, sid Kitab Laid: it ongoosukod i mangagazad di bansa dot Israel. Kibantug ioti sid tinoguvangon do Kinoringan, gima it umul om i tugas dioti

Imamat 19,32 Pongoguna-kou-no dit ulun do lumohing-no om pongohormat-kou-no dit ulun dot opurak-no ot obuk, om ronok-kou-no do Kinoringan, tu ioku-no diti o Kinoringan, ka.

Ezra 5,55 Topot tinunda-no do Kinoringan it ongosukod dit ongoulun dot Yahudi dino sampai nokosuruti i gama dioti mangagama di panambayanan dot osusi.

Bilangan 11,15 i Sundu di Musa o polombuson-ku sid ongosukod dino, ka di Kinoringan.

1. I tugas dot osukod ino-no, monuduk om monuda om mongontupat di bansa, supaya osuhut i pinonuhuan. Pengkaa dino it ongosukod

mad hakim di bansa.

Ulangan 32,7 duato-no it ama-nu. Iosido o pogili sid dikau di kenginan do Kinoringan om it ongosukod manarang, ombo it atad sid tinoguvangan do Kinoringan.

Ulangan 25,7 Ong amu engin it obpinai sumuhut di hoturan, mangahabal-no it ondu dino sid sokoviai it ongosukod dot i longuon-ku amu mamasi di ngaran dit obpinai dau sid bansa dot Israel.

2. Samuel 5,3 Manjadi minangajanji-noi Daud sid ongosukod dot Israel om niogom-no dioti i Daud do raja dot Israel.

1. Raja 8,1 Manjadi kinodim-no di Sulaiman i sokoviai it ongosukod om i mangagazad om duduaton dot Israel do porikoton sid dau sid Yerusalim.

2. Sid Kitab Vagu: it ongosukod jinumadi dot uskup (bishop), i harati, i mangajaga di piumpugan, nga suvai avanus om alus o bahazan dau.

UR 14,23 Nahatul-po dioti it ongosukod sid ipat-ipat i piumpugan do mininta dua om momuasa, minindamo-no ioti di barakat do Tuhan bahagi dit ipat-ipat i piumpugan.

UR 20,17 Manjadi inindamo-no di Paulus it ongosukod di piumpugan sid Efesus do sumamung dau sid Milet.

Titus 1,7 I manaud do piumpugan iadko mandul do Kinoringan. Suvai aso borotuduon di nunu-nopo. Amu magatas ko monginggirit ko magavuk ko arampus iosido antawa mokisusuhul. Gamko poindakod iosido dot ongoulun om rorohonon di kavantango om osilat om abanal om elin sampai alanut om kikodos iosido.

1. Tim 3,2 suvaiko atatap om kisavo iosido dot iso om atahan i kondiri dau om amu obinsuhut sid nunu-nopo, kibahazan iosido om elo monuduk dot ulun.

UR 20,28 | Tugas: Piontupat-kou-no kondiri om i piumpugan di nipataud di Sundu dot Osusi sid palad dikou. Ikau-no o manaud di gorija di dang Kinoringan, i tinobus di raha dit Anak dau.

1. Tim 4,12 Jumadi-ko-no do suntuan dit ongomangasip, i boros-nu om i kobuatano-nu om i samod-nu om i kosipan-nu.

1. Tim 5,17 It ongosukod, it atag o gama dau mangahatul, atag-no dot induvoon i gama dioti do gama mongohormat, lobi-po ong it ongosukod di mangahatul di boros om i tudukan. Tu boros di Kitab, Kadan-no manabaung di munung di karabau di mangaladtak do parai, ka, om iri-ogi, lpat-ipat it ulun di gumama, nga varo suul dau, ka.

Ibrani 13,7 Hondomon-no dikou it ongosukod di minangahatul dit ongopiumpugan dikou, i nakapangahabal sid dikou di boros do Kinoringan. Imatai-no dikou i kinavazao om i kinopupusan dioti sampai susui-kou-no di kosipan dioti.

sunat, I sunat, ino-no i tanda dot ulun Israel do lumbatos dioti sid Kinoringan. I harati, i kusai natanid-no bahagi do Kinoringan. Antad sid Kinotimpunan 17,10 varo hoturan do monunat di kusai dit antad sid rurungan di Ibrahim. Sabap i sunat nga tanda do nakamung sid bansa do Kinoringan, ka. Ino hoturan dino nahatul-no vagu sid Imamat 12,3 Minsanko it ombuvoi di mamung sid Paska a-milo-milo osunatan. Ino tanda dino pogintutunan dot okonko ulun di bansa do Masir ko Kana om Pilisti, dot alaid-nopo ajadi do tanda do mokindazou, retanko it ongoulun dit aso sunat, ulun dit amu kotutun do Kinoringan. Alaid-nopo mongohodtol it ongonabi om i Musa dot okonko i tanda sid guvas ot agazo o harati, i bai mongidu di kulaput sid toli o tomodon, gam mongidu di karaatan di sid ginavo dot ulun, ino kavazao di ginavo di mad nosunatan, i harati, i ginavo di sumuhut

di kenginan do Kinoringan (Ulangan 10,16; Yeremia 4,4; 6,10; 9,24; Yehezkiel 44,9)

Ontok di sinoda dit ongorasul sid Yerusalim (Usuran R. 15) minongolumbatos ioti di hoturan dot it ongobansa amu-no osusa mokisunat, ong mamung sid gorija om piumpugan dot ulun Kristian. Ong i Paulus asarakan momoros om momingig di retanko, i sunat iadko i bansa dot ulun Israel ko Yahudi ot oboros. Om it amu osunatan, iadko it ongobansa vokon.

1. I sunat do kekuman

Kinotimpunaan 17,10 Nunu-nopo i kusai sid dikou, nga sunatai-no kavi dikou. Lukas 2,12 Nosingkop-po i valu't adau antad kinosinaan, nosunatan-no it anak Yesus.

2. I gama monuluk di pinonuhuan

Ulangan 10,16 Sabap ino posunatai-no i kulaput di ginavo dikou, ka di Musa.

Yeremia 4,4 Iduai-no dikou i kulaput di ginavo dikou.

Kolose 2,11 Sid di Kristus dino nosunatan-kou-no di sunat dit okonko ininturu mangagama, inoi nga i gama dikou tumolikud sid karaatan do guvas. Ikou dino iadko nolobong-no sid kinopomodsuan di Kristus.

Rom 2,29 Ino-no ot ulun Yahudi, i sid saralom do ginavo om ino-no o nosunatan-no, it atarang i ginavo sid pongitungan, okonko sid sunat rontob.

Galatia 5,2 Bang mokisunat-kou-po dino, tantu aso-no kogunaan di Kristus bahagi dikou, ka di Paulus.

Gal. 2,3 Minsanko i Titus i nokovozo-no dahai, nga amu ginaratan dioti do sunatan do iosido dino ulun do Yunani.

Gal. 5,6 Tu sid di Kristus Yesus okonko i sunat o kiguna antawa it amu osunatan, inoi nga i kosipan di mongimbulai do samod, ka di Paulus.

Sundu, Sundu dot Osusi, Sundu do Kinoringan.

1. I pongoretan om i harati dau. I pongoretan dino mongontok di sid

Boros Ibrani Ruach kadosh ko ruach Elohim (Yahve)

Boros Yunani Pneuma hagios ko Pneuma tou Theou

Boros Latin Spiritus sanktus

Boros English Holy Ghost ko Holy Spirit.

Boros Dusun Rusod dot olidang

Ong ruach bai harati barat, pomuhobo. I pangalaman di Musa om i Elia sid burul dot Torsina, varo **barat dot opian om olomomoi (1. raja 19,12), nga i kaharati di Musa om i Elia ino dino kondiri di Kinoringan.**

Ong pneuma, mad kotolu bahagi di riniba isuhut di Filosofia do Yunani, ino-no it ulun nga varo tolu o bahagi, ino-no, guvas, nyawa om roh = body, soul and spirit. Topot ino dino amu kopionong di tudukan di Kitab. Tu boros sid Kinotimpunaan 2,6, i tana dit osilou om i pinuhobo do Kinoringan kopiamung pajadi dit ulun di kiginavo =nafas hidup.

Ong Spiritus, spirit ko Roh, kakali amu-po osodiri dot avantang ko araat, bai manarang do varo kuasa dit okonko dang vinangun ko riniba.

Ong Rusod, tantu ngaran do rogon di nokezon sid onkob dot ulun, tu monusa dot ulun. Banalko apagon do monimban di harati dino, tu kodung araat, songkuro-nopo o gama monginvavantang dit araat, kakali araat.

Ong sid Momogun, varo-no laid osodiri do kuasa ponong sid

kavantango om kotulungan om i ponong sid karaatan om i gama mangaraat di riniba, ino-no, Sundu om rogon. Sabap ino, i boros Momogun kiguna banal siti, tu manarang sid gama monodiri dit ongopongoretan dot ombo ot anangan.

2. I kosipan tokou manarang do varo tolu o vaza manarang dit ong otopot, aso tinganan taranganon, ino-no i Kinoringan it Ama, anak om Sundu dot Osusi. Varo boros tokou sumusui dit ongogulu-gulu Kristian, dot, Tritunggal ko Trinity. Ino duvo pongoretan sompi popogolivong. Tu kuran,-ma, tolu dot iso. Kodung tolu, okonko iso, kodung iso, okonko tolu, ka di pongitungan dot ulun. Iadino ot horotizan di Muhammad di pokulau dit ongokristian di retanko Monoteismus, nga retanko varo tolu o kobuatano do Kinoringan.

Dot ong otopot, i sokoviai it ongopanarangan kananganko i Kinoringan it AMA; Anak om Sundu, nga amu miuma, amu koduzan tokou, amu orusod sid pongitungan om ginavo di kogofoo om korolomo om kosongoho om kolonuto do Kinoringan. Iadko i Musa om Elia, Korud, nga okon, gonit, nga okon, Apui, nga okon, bogizu, nga okon, bai Barat dot opian om olomomoi, ka. Iri-ogi boros di Yesus: I Kinoringan dino osundu (Yahya 4,24) ko i Paulus sid 2. Korintus 3,17: I Tuhan, ino-no i Sundu.

Kuran-kuran o vaza do riniba gumamit, humarati di kavazao do Kinoringan, nga aso tinganan horotizon, gomiton. A-korusod sid keloo, utok, pongitungan tokou. Ong riniba bai engat do varo tolu o dimensi, ino-no, alaab, asavat, aralom. Topot ong sid Kinoringan nakamung-po dot alaid-laid, aso kengkadan. Sabap ino, sokoviai it vaza manarang bai hovoron, suribanon, posuntuon, kolu-koluvon, tu iso nga aso nokemot do Kinoringan. Buatana, nga amu nokonong, person nga amu

nokonong. I sokoviai i panarangan nga amu miurma manarang dit aso tinganan tarangon.

3. I Kitab Ibrani om Yunani amu monodiri di pongoretan bahagi do Kinoringan om i riniba di kiharati keso: barat om pomuhobo. Ino dino antad sid pongitungan dot a-emot om amu okovidan, nga kakali opurimanan iadko barat om pomuhobo sampai i hal dino puun do koposizan. Ong Momogun, tanid o kohorotizan, ino-no, keso, ong aso ginavo, tantu amu-no mizau i guvas ko bai i koburuo di nokedu sid guvas. Koduvo, ino ginavo mad puun do pongitungan dot ulun. Iti-no o sabap dot i Kitab Momogun monodiri dot, vokon-no ong polombus di boros dot Ibrani Ruah ko Yunani Pneuma do ginavo, vokon-no ong pongitungan.

a) Ong i Kitab Ibrani mongitung dot i guvas di dang tana kopiamung di pinuhobo do Kinoringan, ino-no pajadi dot ulun. Ong i filosofia do Yunani manarang dot it ulun, varo tolu o bahagi, ino-no guvas (soma), mad hatod (psyche) om ginavo (pneuma). Kagi sid Kitab Vagu, varo-no kagavul ino tudukan di filosofia do Yunani di kasaap di tudukan di Kitab Ibrani.

Kinotimpunan 2,7 Manjadi tinohugi-no di Kinoringan it odung do riniba dino do pinuhobo do kapasi om iri-ogi kipinuhobo-no do kapasi i riniba (ko kiginavo i riniba).

Usuran R. 7,59 Boros di Stepanus, O Tuhan Yesus, onuvo-no iti ginavo-ku (pneuma), ka.

Lukas 1,46 Longoi di Mariam, I ginavo-ku (psyche) monginsavat di Tuhan om i pongitungan-ku (pneuma) otomon, sabap i Kinoringan i minananggung dohon...

Khotbah 12,7 Ong mavi-no i timbagos, sumiliu do lisovu do

pomogunan it ongoguvas om i pinuhobo do kapasi nga muli-no sid Kinoringan, tu iosido o minanahak diri.

b) Vokon-no sid Kitab ino duvo kavazao dot ulun dit osodiri sid boros do Yunani, ino-no psyche om pneuma kopigavul ko kopiamung.

Lukas 1,46 i ginavo om i pongitungan

1. Tes. 5,23 I Kinoringan kondiri, i puun do kopioondusan dino, o monusi dikou dot osukup banal, om ensanan i ginavo (psyche) dikou om i pongitungan (pneuma) om guvas (soma) dikou nga ataud dot asot ohino om aso sala ontok di korikatan vagu di Tuhan tokou Yesus Kristus, ka.

Ibrani 4,12 I boros do Kinoringan dino, nga mizau om kikuasa.. sampai kogutas di kinopigaganggazan di guvas (soma) om ginavo (psyche om pneuma), i puihalan om tulang, tu kelo sampai kopongohukum di nunu-nopo sid saralom di ginavo (ong boros banal: i pongitungan sid undundu, sabap sid boros Yunani it undundu, ino-no i puun do koposizan).

4. I Sundu do Kinoringan ko Sundu dot Osusi sid Kitab

Yahya 4,24 Boros di Yesus, I Kinoringan dino osundu, ka.

Kinotimpunan 1,2 Topot i Sundu do Kinoringan mulud-tulud -no sid soribau do vaig.

Zabur 33,6 Nourug i vulan om i korimbutuon nga antad sid pinuhobo dau o kinembulazan

1. Samuel 10,10 I Sundu do Kinoringan nga sinumuvang sid di Saul sampai tinumimpunan-no iosido mamahanda iadko it ongonabi vokon.

Mikha 3,8 Topot ong ioku diti, nengkansangan-oku di Tuhan.

Nemponuan-oku di Sundu dau om kabanaran sampai katama-oku do mamalang di kasalaan di Yakub.

2. Petrus 1,21 Suvai nosuhu di Sundu dot Osusi it ulun dino do momoros sid ngaran do Kinoringan.

5. Kinoringan manahak di Sundu dau sid ongoulun, supaya it ulun sumuhut di kenginan do Kinoringan

Topot ino Sundu dino okonko dang riniba, inoi nga kakali dang Kinoringan, ino-no i kuasa do Kinoringan di mozo-vozo sampai sumuvang sid ulun, supaya agazad it ulun di kenginan do Kinoringan.

Rom 8,14 Sabap songkuro-nopo kogumu dot i Sundu o mangagazad, ino-no it angaanak do Kinoringan.

Yehezkiel 36,26 Tahakan-ku-no ikou do ginavo vagu om pongitungan vagu (undundu om sundu).

Yoel 2,28 Iri-ogi potuntug-oku-no di Sundu-ku sid sokoviai it ongoulun.

Usuran R. 2,38 Piguli-kou-no sid Kinoringan, sampai ipat-ipat it ulun nga mokiopodsu sid ngaran di Yesus, supaya kaada i kasalaan dikou om kotorima-kou-ogi di Sundu dot Osusi.

6. Ino Sundu dino di bai iso-no, nga mongimbulai dit uva do Sundu

Gal. 5,25 Topot it ongouva do Sundu o ino-no samod, otomon o ginavo, kopioondusan, kamamanan, kolomian, kovosihan, katatapan, kovonusan, kotulidan.

1. Kor. 12,4 Manjadi varo tasantanid-tanid o panahak di Sundu. Topot iseso o sundu ot inantadon.

suntuan, i kobatano dit atag suhuton, tu avantang banal, ulun ko barang.

Zabur 44,15 i bansa dot Israel, ong atag, suntuan bahagi dit ongobansa.

Yehezkiel 4-5 i nabi posuntu di kapagasan dit ongoulun sid Yerusalim, suntuan do kousibaan, kogoukan om suntuan di suromo do Kinoringan.

Yahya 13,5 I Yesus:loku-no diti o suntuan dikou, supaya ikou nga mangagamai do iadko i gama-ku sid dikou.

2. Kor. 9,2 Gamko nanu-ku-no ikou do suntuan, ka di Paulus.

suriban, vokon-no ong >suntuan, i vaza momoros om manarang dot amu olondoki boros, bai mad iadino om iadilo ko mongusul do hal di iadko it otopot. Asarok o gama di Yesus monuduk do suribanon o pavazaan monuduk om manarang.

Matius 13 om Markus 4 sampai Lukas 5 om ogumu vokon sid Injil di Lukas

Matius 22,1 Minonuturan-no vagu i Yesus sid dioti do minonuriban do pengkaa dino: I karajaan do surga iadko i raja di minoginakan do mogontong it anak dau...

Ibrani 9,9 Inot onkob keso (sid panambayanan) dino mad suriban dit ontok didino.

susi, osusi, kosusian, it aso borotuduon, alus, aso't igavuli, ovogan, tanid mantadko i sokoviai i vokon di ohigilan om ogovulan om ensakahan. It onsi di harati kodori ong sid Ibrani, *kadosh =osodiri mantad sid vokon*. (kadosh - kudus). I Kinoringan minomili sampai minonodiri di bansa dot Israel antad sid di Ibrahim, supaya i bansa dino ajadi do bansa dot osusi.

Yesaya 6,3 It ongomalaikat dino miaambat-ambat dot ino-no i boros, Osusi, osusi, osusi i Tuhan, i manguasa di sokoviai. Noponu di kohormatan dau i sompomogunan.

1. Samuel 2,2 Baiko ikau-no ot osusi. Sabap aso Kinoringan tanidko ikau.

1. Petrus 1,15 Inoi nga susio-no sokovia i kobatano dikou. Sabap osusi i Tuhan i minongodim dikou. Tu nokosurat-no laid dot, Susio-no dikou, tu ioku diti osusi, ka di Tuhan.

Yosua 24,19 Minomoros-no vagu i Yosua dot, Topot amu-kou dati kogoos sumamba sid Tuhan Kinoringan, tu iosido dino osusi.

1. Ombo it osomok sid Kinoringan, nga rumaliu i kosusian

Kolobusan 20,8 Hondomo-no it adau do koturu om susio-no it adau dino (i harati, osodiri it adau diti)

Kolobusan 19,6 Ikou-no o karaajaan-ku dot osusi dot iseso o ginavo om obinsuhut dohon, om bansa di sid palad-ku. 3,5 Boros di Kinoringan, Kadan-no kensomok. Iduo-no ino tompa-nu, sabap pengkakat-ko dino sid tana dot osusi, ka.

Imamat 19,2 Boroso-no sid ongoulun dot Israel dot, Susi-kou-no, sabap ioku diti i Kinoringan dikou nga osusi, ka.

Zabur 24,3 Isai-ka i kengkakat sid intoronon dot osusi? O ino-no it ulun dit aso sala i palad dau om osusi i ginavo dau.

2. Sid Kitab Vagu it ongoulun di mangasip retanko ulun dot osusi, gima otunda di Sundu dot Osusi. Okonko i kavazao om gama dot ulun mongimbulai di kosusian, inoi nga i kosusian dino nitahak di Sundu.

1. Kor. 3,16 A-ka leaan dikou dot ikou dino valai do Kinoringan om i Sundu do Kinoringan o mizon sid saralom dikou.

1. Tes. 4,3-4 Sabap ino-no i kenginan do Kinoringan, i kosusian dikou do tumolikud-kou-no sid kaagazan om ipat-ipat it ulun sid dikou nga osusi om avantang i gama misavo.

2. Tes. 2,13 Nopili-kou-no laid di Kinoringan dit amu-po nourug i pomogunan, supaya osopulan-kou sid kosusian di Sundu dau sid saralom di katapatan sid kosipan.

Yahya 17,19 Boros di Yesus, Posusion-ku-no i kondiri-ku mongontok dioti, supaya ioti nga osusi sid saralom di kabanaran.

Efesus 5,27 Ino-no i kenginan di Kristus dino, i gorija koluu di kenginan dau dot alus om oludou sampai minsanko kurubit om kukus nga aso-no, gamko osusi om omomos-no kavi.

1. Tes. 5,23 I Kinoringan kondiri, i puun do kopioondusan dino o monusi dikou dot osukup banal, om ensanan i ginavo dikou om i pongitungan om guvas dikou nga ataud dot asot ohina om aso sala ontok di korikatan vagu di Tuhan tokou Yesus Kristus. Orintuod i minongodim dikou om iosido nga kapangagama do iadino.

suromo, i hal di osusut om olingob, okonko kembulai antad sid keloo ko inuagan, inoi nga notudukan dot sundu. Amu elaan do kumuro ko antad sionggo om sabap. Tigogi, varo. Alambat i boros dino sid Kitab Vagu om okonko pongoretan di nolos-no sid ugama do Yunani. Sid Kitab Ibrani, guluko i nabi Daniel retanko suromo, ino-no i hal di sid tohudi banal di pentahan di karajaan do Kinoringan di rumikot-ogi. I kinoruhangan di Tuhan Yesus notudukan do suromo dino om i Paulus minonuduk di suromo di suvai antad sid kanavau di Sundu dot Osusi kembulai.

1. It uog do Kinoringan di nosusut sid ongoulun bahagi di hiza di sid tohudi, nga otudukan it ongonabi.

Amos 3,7 Sabap aso suromo di Tuhan dit okonko nentahan-po laid sid nabi dau.

Daniel 2,22 | Tuhan mongimbulai di nosusut-no sid aralom.

Daniel 2,47 | Kinoringan, agazo-ko i pinokokinoringan om Tuhan dit asavat ko i sokoviai it ongoraja. losido elo mongimbulai dit ongosuromo.

Rom 11,25 Amu-oku engin dot amu ohorritzan dikou iti suromo (suriban) diti, supaya amu sumavat i pongitungan dikou, ka di Paulus.

1. Kor. 15,51 Iningo-no, varo-po suromo o boroson-ku sid dikou, ino-no, i tokou diti okonko sokoviai matai. Topot sokoviai tokou diti osiliu dit insan-no kilap di hiza do monguni i toburi di hiza do kovian.

Kentalangan 10,7 Ong otoburi-no di malaikat koturu i dau do toburi, posunu-no i Kinoringan di sokoviai i suromo di noumba laid dau, iadko i nokentahan-no laid sid ongouripon, ino-no it ongonabi, ka.

2. I habal do kovosihan nga suromo, tu nokosusut-no i harati banal. Suvai it ulun di nopili o kaharati di suromo dino.

Matius 13,11 I kou dino atahakan di gama mongintutun di suromo di karajaan do surga. Topot ong ioti dino amu.

Rom 16, 25 | habal di Yesus Kristus o mongimbulai di suromo di nokosusut-no sid vinangun.

Efesus 6,19 supaya atahakan-oku do Kinoringan di kopihatan mangahabal di suromo di habal do kovosihan.

Kolose 4,3 Pinta dua-kou-no mongontok dohon, supaya giangan do Kinoringan i rongobon di suvangan dahai mangahabal di suromo di Kristus.

1. Kor. 4,1 Atag-no dot ino-no i pongitung dot ulun pasalko iokoi, uripon-okoi di Kristus om nipataud do Kinoringan dahai it ongosuromo dau.

1. Tim 3,16 Kagipo piasasi-no i suromo di kelinan, o ino-no,

nokoriniba i Yesus Kristus, nembanaran di Sundu. Minokimot dit ongomalaikat. Nakahabal-no sid ongobansa. Nakasip-no i riniba. Nakavaliu-no sid kohormatan.

suul, > gaji

tana, > pogun, pomogunan

**tanggung, >tindal, >hatang, >tobus, >palabus, >sapul
Mananggung, Minananggung**

I Kitab mamakai do tasantanid-tanid o suntuan sid gama manarang dot nunu i gama di Yesus Kristus bahagi di riniba. Topot sokovia it ongosuntuan dino, iso-no o panangan, ino-no manarang di kogozoo di gama di Yesus manapul om mamasi di riniba di nokonong sid kapatazan om nokedu sid tinoguvangon do Kinoringan.

a)I riniba iadko ulun dit nisanda-no, tu kiutang. Ong okonko varo-po mananggung, tantu aso-no kotindalan, tu aso pongohorogo tanidko i Yesus i monindal di riniba antad sid panandaan.

b)I riniba iadko ulun di nokotorungku, tu i gima sala dau dot i sala dino, tatad nginan nokotorungku dot aso-no kolobusan vagu. Iso nga aso dot elo palabus, tu i horogo dit iganti di sala, nga aso't elaan momoros, pasa dila. Topot i Yesus o mongohorogo di kolobusan di riniba sid saralom di kinapatazan dau I no dino harati monobus ko mangahatang dit agazo banal ot sala om utang

c) i riniba iadko uripon di pempatai sid kuasa di sanganu, topot varo-no palabus dau antad sid kinouripanan dino, iadko it ongoulun dot Israel i sid Masir.

d)I riniba iadko noutang-no sid kuasa antad sid savat, iadko i rogon ko pinokokinoringan, nga varo mongontok om monogit. I Yesus o minongolukat di sala do riniba.

e) i riniba iadko it ulun di nakatanga sid rahat dot a-kotindal vagu, ong okonko varo manapul

1. I kophonobusan ko kophonoggungan

a) kophonindalan antad sid kapagasan om kasansaraan

Ayub 5,20 I hiza do monombitil, minonindal i Kinoringan dikau antad sid kuasa do huntung

2. Tes. 3,2 Indamo-kou-no, supaya osopulan tokou antad sid ongoulun dot araat.

Zabur 103,4 natanggung-no dau i koposizan-ku antad sid kobinasaan.

2. Kor. 1,10 supaya humarap tokou sid Kinoringan i mongogulian dit ongoulun minatai, tu iosido-no o nakapananggung di tokou antad sid kinapatazan sampai kakali totonggungan tokou dau.

Ibrani 2,15 sampai i Yesus mananggung dit ulun di pempatai kikorosizan di kuasa do huntung sampai nouripanan dino kuasa dino.

b) Kophonobusan antad sid kiutang.

Matius 20,28 supaya iosido o kapananggung om kapanahak di koposizan dau dot iponobus di sokoviai, ka di Yesus.

Efesus 1,7 Tu i Yesus Kristus dino, ino-no o kotonggungan tokou gima i raha dau, inot kaadaan di kasalaan tokou, gima i kalaba di kovosihan dau.

Rom 3,24 nga nembanaran-no ioti di kovosihan do Kinoringan, gima i gama di Yesus Kristus monindal di tokou.

c) I kophonobusan antad sid pinonuhuan

Galatia 4,5 supaya iosido-no (i Yesus) o monobus dit ongoulun di sid hoturan do pinonuhuan, supaya kotungkus tokou di kuasa dit angaanak om ajadi tokou do varis (do Kinoringan).

Gal. 3,13 Manjadi i Kristus o minonobus di tokou antad sid kinolupuan

di pinonuhuan, tu minongontok iosido di tokou. Manjadi iosido-no o nanangan di lulupu, tu nokosurat-no dot isai-nopo i nakasangkap, ino-no o n olupu-no, ka.

d) I kophonobusan antad sid pensubaan.

2. Petrus 2,9 Elaan di Tuhan do mananggung dit ulun dot osusi antad sid pensubaan.

2. I vazaan di kopononggungan.

a) i kopononggungan antad sid kosusaan do bai guvas om koposizan

2. Kor. 1,10 kagi harapan-za dot iosido o mananggung di tokou vagui, tu i gima gama dikou mindamo bahagi dahai, ka di Paulus.

b) antad sid kasalaan, gima i raha di Tuhan Yesus

Zabur 49,8 Iso nga aso't elaan do mananggung dit obpinai dau.

1. Petrus 1,18-19 Om elaan banal dot okonko baiko bulavan antawa perak o nipongolukat di minangahatang dikou antad sid kobuatano laid dikou dit aso tantu-tantu, inoi nga i raha di Kristus di banalko kihorogo o minonobus dikou di iadko domba iosido dit omomos om osusi.

1. Tim. 2,6 Yesus Kristus i minanahak di kondiri dau, tu ipanapul di sokoviai.

1. Kor. 1,30 Yesus Kristus o kolobusan tokou.

c) I kopononggungan dino nokosunu-no.

Yesaya 43,1 Kadan-ko-no rumosi, tu ioku-no diti o nakapananggung dikau.

Zabur 31,6 Ikau-no o nakapananggung dohon o Kinoringan dit atatap-ko banal.

Efesus 1,7 Tu i Yesus Kristus dino ino-no o kotonggungan tokou..

d) I kopononggungan kembulai i hiza di kovian om i hiza di

kembulazan di kohormatan do Kinoringan.

Lukas 21,28 Sera do tumimpuuni do iadino, otomon-kou-no tu elaan-no dikou dot tororikoto-no i kophononggungan dikou.

Efesus 1,14 Tu i Sundu dino, ino-no o tanda di kotungkusan do kophononggungan di tokou.

Rom 8,23 Inudan tokou dot i Kinoringan o palabus di tokou antad sid kuasa om hoturan dit onogovas tokou.

Rom 7,24 Osusa-oku diti. Isai-ka ot elo monindal dohon antad diti guvas-ku di dang huntung?

1. Tes. 1,10 ino-no i Yesus, i manapul di tokou antad sid kasanaan di rumikot.

tantu >topot

tatap, katatapan, tumatap

It ulun Kristian nakanu-no do kovosihan do Kinoringan, topot kotoguvang iosido do hukuman do Kinoringan sampai oporisa iosido dot atatap-ka iosido ko amu. Ino-no o katatapan dit ulun Kristian, Sid saralom di nunu-nopo sangkapagasan om kosusaan ko pensubaan mavid-kavid iosido di kosipan dau om mapit-kapit sid kovosihan do Kinoringan. Amu opiduvo i ginavo dau. Kagi it ulun Kristian engin mokitalahas do nunu-nopo i kenginan do Kinoringan sampai momorisa di kondiri dau dot atatap iosido ko amu. Amu humarap it ulun Kristian di kovosihan om kohukuman do bai riniba, inoi nga i kenginan om hukuman do Kinoringan ot engaton dau.

1. I Kinoringan ino-no ot atatap.

Zabur 12,7 I boros di Tuhan, ino-no oliou om atatap iadko perak di nosusi-no sid pogozevan sampai inturu-no osusi.

Yesaya 28,16 Pogomon-ku sid Sion i vatu dot atatap, i lumavus dit

avantang banal.

Usuran R. 9,22 Topot i Paulus dino magavi-no banal sumasi (patatap-no) dot i Yesus ino-no i Minananggung, i nokentahan-no laid.

2. It ulun Kristian di nakanu do kovosihan sampai nakasip-no, tumatap sid saralom di nunu-nopo kosusaan. I pensubaan om kapagsan iadko gama do Kinoringan patatap dit ipat-ipat it ulun Kristian.

2. Kor. 8,2 Minsanko mosikim ioti om ogumu o kapagasan, nga kakali do nakalaba i katamanan dioti (natatap) sampai agazo o ginavo dioti mitutulung-tulung.

1. Petrus 1,7 supaya i kotontuan (katatapan) di kosipan dikou lobipo atarang ko i bulavan dit amu mutogol om nosodiri sid apui.

1. Kor. 3,13 Tu sid saralom dit apui o kembulazan om inot apui dino o manarang do kuran o gama dit ipat-ipat it ulun (dot atatap ko amu). Manjadi isai-nopo it atahan (atatap) i gama dau, iosido-no i kisuul.

1. Tes. 2,4 Okonko mokiguna-okoi dot ongoulun, inoi nga mokiguna-okoi do Kinoringan, i momorisa dit ongoginavo tokou (dot atatap-okoi ko amu).

Rom 16,10 Panansalamat-kou-no di Apolos, it atatap sid di Kristus.

Yakub 1,12 Osinang-no i kusai di sumakap sid pensubaan. Tu notiiman-po iosido sampai atatap, atahakan-no do Kinoringan dot antub-antub do kopolisan, i najanji-no sid isai-nopo i manamod do Kinoringan.

1. Kor. 9,27 Boros di Paulus, inoi nga pogoson-ku sampai niuripon-ku i guvas-ku, supaya i monuduk-oku dit ongoulun vokon (di Habal do Kovosihan), amu kada i kondiri-ku (ko: ioku-no nga atatap sid Habal do kovosihan dino).

2. Kor. 10,18 Okonko ino-no o katatapan dot ulun, ong kondiri dit ulun

o mongindazou dau. Tu suvai kigaral it ulun, ong i Tuhan o mongindazou, okonko iosido kondiri.

3. It ulun Kristian momorisa ombo-nopo i kenginan do Kinoringan sampai momorisa di kondiri dau, supaya kogoos om tutatap iosido sid tanga do kapanatapan.

Rom 12,2 Simbanai-no i kobuatano dikou do mongimvagu-kou-no di ginavo dikou, supaya kaharati-kou do nunu i kenginan do Kinoringan, o ino-no it avantang om it ikozi om it arangkap (supaya atatap-kou-no).

1. Kor. 11,28 Sabap ino, ipat-ipat it ulun porisaon-no laid i ginavo dau om akanon-ogi dau i kakanan antawa minum di subung dino.

Matius 21,42 I vatu di niada dit ongotukang kakali koginavaan do Kinoringan, (tu atatapi).

Taurat >suhu

Teologia, antad sid boros Yunani Theos = Kinoringan om logos =boros, ino-no i tudukan di hal do Kinoringan. I kosipan sid Kinoringan okonko rontob harapan o tomodon, inoi nga nakamung-po i kelaan om kohorotizan. Ino-no i tugas do Teologia, mongonsi di kosipan, nunu i puun do kosipan, kuran i sokoviai it ongohal do kosipan kopiamung om kopiopud sampai nunu o panangan om rikoton do kosipan. Pengkaa dino, ong it ulun poromut om manarang sid ulun di hal do Kinoringan, ino, nga retanko teologia, isuhut di boros di 1. Petrus 3,15 Posusion-no di Tuhan Kristus sid saralom di ginavo dikou, do suvab-suvab nga osodia i ginavo sumasi (di kosipan dikou).

Manjadi sid gama mamasa di Kitab om popitalad dit ongoayat do Kitab dit enizo o harati ko mad tumanid antad di harati do ayat vokon, iri-no i

kosurutan dit ulun misingilo om humarati sampai rumalom sid teologia. Pengkaa dino, sid Pusat Latehan Alkitab om sid Seminar do Teologia iadko i Sabah Theological Seminary kadapat i murid misingilo om monodiri do Teologia, sampai sid Universiti. Rontob-nopo, i gama misingilo do Teologia okonko iadko hal do misingilo do keloo o tomodon, iadko rumbul ko ekonomi ko makama, inoi nga suvai nokovoza i ginavo dot antad sid ginavo agazo o kosipan do sumuhut di kenginan do Kinoringan. Varo boros di Martin Luther, it ulun di minongimbulai dit Ongogorija Protestant ontok di Abad ko-16 dot, Ong misingilo do tukang modzupu ko tukang kayu, nga tolu toun om nokotukang-no. Ong misingilo do lawyer om makama, suvai hopod toun om nokodokutol-no do lawyer. Topot ong misingilo do Teologia om i Kitab, sampai turu nopod toun, nga kakali bai murid do Kitab om Teologia, tu kakali amu-po karamit om kodokutol do Kitab, ka dau.

tindal, kotindalan, monindal, apakai sid Kitab bahagi iso vaza manapul dot ulun ko mogidu kondiri sid kosusaan ko i kavazao di pakaso do Kinoringan. Tindal, ino-no i tana. okonko i vaig sid bavang, botung ko rahat. Ong sid vaig, aso kopudan, gam oruhai matai, tu lumosod. Na ino dino mad suntuan di gama do Kinoringan manapul dot ulun, ko it ulun tumindal sid kovosihan do Kinoringan antad sid kohorotizan do bai sid Kinoringan, varo kopudan om kopolosizan. Ong varo barang di nakasanda, ong aso-not iponindal, lumolob-no i sandangau ko tana ko rantai dot amas. I harati, norungoi-no, nololob-no. Sid Kitab, i Yesus minonindal di riniba di nakasanda di vozoon do rogon sid kapatazan. - > imatai-po >sapul, >kapus, >labus, >posusi, >tobus, >tanggung om vokon.

tobus, monobus, kotobusan, i gama dumagang do barang dit agazo banal o horogo. Ino pongoretan dino inanu di Kitab sid gama manarang di gama di Yesus manapul dot ulun di mad uripon. Ong uripon, mad barang di tuan dau dot aso kolobusan kondiri. Uripon kadapat mongojuval om dumagang, ombo ko i sanganu om i manansanganu. Na i riniba mad inuripanan do karaatan om kasalaan. Antad di kobuatano di iadino i Yesus monobus dit ulun, supaya obebas iosido om nokosuvang sid hoturan do Kinoringan. (imatai sid >tindal) Varo-po suntuan vokon, ong kiutang it ulun, ong varo mangapus dit utang dino, iri-ogi nakapus it utang dino sampai obebas it ulun.

Kinoringan-no o monobus, nga mamakai dot ongoulun iadko pakakas di koponobusan dau,

Yesaya 63,16 Sabap ikau-po o Tuhan, ot Ama dau dot otopot. Ikau-no o minonobus (minanapul) dahai (antad sid kinuripanan do Masir).

Imamat 25,47 Ong inuripanan it ulun dot Israel, kakali i koruhang dau kadapat monobus dit ulun dino.

Zabur 126,1 I hiza di monobus i Tuhan dit ongonarakop do Sion...

Matius 20,28 iadko it Anak do Riniba di mokiuripon iosido sampai itahak i kopolosizan dau, dot iponobus di sokoviai, ka di Yesus.

Zabur 51,3 Sabap gima i kosianan-nu di mangapus di sokoviai i kasalaan-ku.

Zabur 130,8 Sabap i kovosihan di Tuhan om ogumu-po i vaza dau monobus sampai i Tuhan o palabus dit ongoulun dot Israel antad sid sokoviai i kasalaan dioti.

Yesaya 44,22 Huguson-ku-no i kasalaan-nu iadko i kavut om tonuson-

ku-no i karaatan-nu iadko i kavut di notilib. Uli-no sid dohon, tu sopulan-ku-no (tobuson-ku-no) ikau.

Matius 16,26 Antawa nunu-ka ot iponopuli dit ulun di koposizan, ong nokudamus iosido di dau do koposizan?

1. Petrus 1,18 om elaan banal dot okonko baiko bulavan antawa pirak o nipongohorogo di minangahatang dikou antad sid kobuatano laid dikou dit aso tantu-tantu, inoi nga i raha di Kristus di banalko kihorogo o minonobus dikou di iadko domba iosido dit omomos om osusi.

Rum 3,24 embanaran-no ioti do baiko nisian di kovosihan dau, gima notobus-no sid saralom di gana di Yesus Kristus.

tomod, tomodon, i hal dit okonko bai abambaran ko ahajangan, inoi nga varo panangan di noumbai, ino-no nokiro-no om netung-no dot iadino om atag-ogi.

tanggung

tomon, katamanan, kenginan do Kinoringan dot it ongoulun, it inurug do Kinoringan, nga masi sid katamanan. Sabap antad sid katamanan minongurug i Kinoringan di vinangun om i-po riniba, supaya i riniba mongimbulai sid tanga do vinangun di kohormatan om samod do Kinoringan (Rom 1,20 om Usuran R. 14,17 Minsanko notunda-no di Kinoringan i sokoviai it ongoulun, minanahak-no iosido do darun om hiza do monguva it ongokouvaan sampai sinumo-kou do kakanan om katamanan, ka di Paulus). Sid katamanan minongurug i Kinoringan di riniba: Kinotimpunan 1,26 Mongurug tokou-po do riniba koerad di buatan tokou, tu pongohoturon-ku ioti dit ongosada sid rahat om it ongoombolog sid savat om it ongo pangazam om i sokoviai i

momondoi sid tana sampai iti pomogunan, ka.

Ayub 38,7 Otomon-no it avan i hiza do kinourugan: Ayub 38,7 it ongokorimbutuon miambat-no mongindazou om it anganak do Kinoringan, nga minangarazou dohon, ka.

Lukas 2,10 Boros di malaikat, Mangahabal-okou sid dikou do habal dot avasih om otomon bahagi di sokoviai it ongoulun, ka.

Zabur 51,10 Porongoho-okou-no vagu di kohigakan om katamanan, ka.

1. I Kinoringan ot ovud do katamanan

Yakub 1,17 Sokoviai i nakatahak dit avantang om arangkap, antad kavi sid savat, sid Ama do kanavahan. I boros do katapatan o nipamasi di tokou, supaya i tokou-no o momuradsung di sokoviai i vinangun.

Zabur 118,24 Iti-no it adau do poginakanan di nitahak di Tuhan. Tumurut tokou-no banal (tumomon tokou-nobo dot aso kovian). om 15 Antad sid ongobasalag di bansa do Kinoringan agara-ogi tumomon, tu nakamanang-no. Nokembulai-no i kuasa di Tuhan.

Zabur 126,1-2 I hiza di pinouli-okoi-no di Tuhan sid burul do Sion mad rontob iadko monginipi o kopurimanan dahai. Banalko ohigak-okoi om otomon-okoi-no mongindazou di hiza diri.

Zabur 96,11 Tomon-kou-no ot avan om higak-kou-no o rahat om i sokoviai i suvang.

2. Sid Kitab Vagu i katamanan dot ulun Kristian antad sid kamanangan di Kristus

Filipi 4,4 Soumul-umul tomon-kou-no sid saralom di Tuhan. Boroson-ku-no vagu, Tomon-kou-no.

Rom 14,17 I karajaan do Kinoringan okonko hal do kakanan om

kenuman, inoi nga kabanaran om kopioondusan om katamanan sid saralom di Sundu dot Osusi.

Lukas 10,20 Boros di Yesus, Tomon-kou-no do nokosurat-no it ongongaran dikou sid surga, ka.

Lukas 15,10 Boros di Yesus, ladno dino i kotomon sid tinoguvangon dit ongomalaikat do Kinoringan, sabap it iso ot ulun do kisala di muli sid Kinoringan.

Filipi 2,17 Boros di Paulus, minsanko kouza i raha-ku do iadko parsambaan di kamung sid parsambaan om sambayang di kosipan dikou, kakali dot otomon-oku sampai kumoruhang-oku dikou sid saralom do katamanan. Tomon-kou-no om koruhang-kou-no dohon sid katamanan.

Rom 12,12 Tomon-kou-no, tu kiharapan, kosog-kou-no sid kosusaan, sampai tatap-kou-no minta dua.

Lukas 6,22-23 Osinang-kou-no ong sumana dikou it ongoulun om monunsub dikou om imbuhalan-kou dioti om indaraatan i ngaran dikou, sabap gima it Anak do Riniba. Tomon-kou-no om tumindak-kou-no it adau dot ajadi ino iadino, tu imatai-no, agazo i suul dikou sid surga.

Rom 12,15 Higak-kou-no sid ongoulun dit ohigak om pogihad-kou-no sid ongoulun di mogihad.

Matius 25,21 Boros di tuan sid uripon dau, Suvang-no sid katamanan di tuan-nu, ka.

3. Varo-po katamanan sid karaatan.

Amsal 2,14 kiotomon ioti di monimbaru ioti do karaatan

topot, katapatan, i hal dit otopot om abanal, okonko ovudut om amu

onong, okonko bai kalu-kalu om indozone ko hovoroni.

Ino pongoretan do Momogun banalko aralom o hal om hal dit amu oruhai osodiri om embanaran. Sabap varo koubasan dot ipat-ipat it ulun varo dau do katapatan om dau do sabap do mongintopot di dau do pongitungan om kiroon. Dot ong otopot, bai iso-nopo katapatan sid tinoguvangon do Kinoringan, aso vokon. i hal dino, amu oruhai rumamit om tumorima ko kumavid. Sabap, tu asarok mad agaan om oribau i vaza sid Momogun mamakai di pongoretan katapatan om otopot, vokon-no i Kitab mamakai di pongoretan kabanaran om abanal ko atantu.

Yahya 4,37 Bianco nonong-no banal (otopot) i pamarasan diri dot, Tanid i mangasok om tanid i mongomot, ka.

1. I hal do katapatan

Yahya 19,35 I nokemot do iadino, iosido o sumasi dino om i kososizan dau nga otopot om elaan dau dot it otopot o boroson dau, supaya ikau nga mangasip-no.

3. Yahya 12 Om elaan-nu-no dot otopot kavi i boros-za, ka di Yahya.

1. Yahya 2,8 Natanus-no it otuvong om kiompiling-no it anavau (otopotko varo kanavahan).

1. Tes 1,9 tu mokiuripon-n o di Kinoringan, i kapapasi om it otopot.

2. Kinoringan o puun do katapatan

Zabur 19,10 It undang-undang di Tuhan atantu sampai otulid (otopot).

Zabur 119,86 It ongopinonuhuan-nu nga ensanan katapatan

Zabur 25,10 It ongovazaan-nu nga otopot om atatap.

Zabur 117,7 I ginama di palad-nu, nga katapatan om kabanaran.

Zabur 43,3 Porikoto-no sid dohon i kanavau om i kabanaran-nu

(katapatan-nu), supaya agazad-oku om ovit-oku sid burul dot osusi.

Yahya 1,17 I pinonuhuan nakatahak antad sid di Musa. Topot i kovosihan om i kabanaran (katapatan om kotontuan) jinumadi-no sid di Yesus Kristus.

Yahya 1,14 I Boros dino jinumadi do riniba sampai nokentoron sid di tokou, om nokemot tokou-no di kohormatan dau, ino-no i kohormatan dit Anak dit iso-no i noponu do kovosihan om kabanaran (katapatan om kotontuan).

Efesus 1,13 Ikou-po di kodungko nokorongou-kou di boros di katapatan, ino-no i Habal do Kovosihan di kosopulan dikou, nakasipkou-no sampai natandaan-kou-no di Sundu dot Osusi sid janji dino.

1. Yahya 5,6 I Sundu o sasi dit inantadon dau dino, tu ino-no Sundu dino o katapatan.

2. Kor. 11,10 Boros di Paulus, Sid katapatan di Kristus boroson-ku-no dot, Sid pentongkop dot Akaia diti dot aso't iso kopongorungoi di garal-ku dino.

3. i ralan pakaa sid katapatan

a) i vozoon do rogon mongohigong di vaza posurut di katapatan

Yahya 8,44 I vozoon do rogon amu tinumatap sid kabanaran (katapatan), sabap aso katapatan sid dau. Momudut iosido, tu iosido-no dino it ama do vudut.

Rom 1,25 Tu i katapatan do Kinoringan nga ginontian dioti do vudut sampai hinumormat om sinumamba ioti sid vinangun do sumaap di Minamangun.

2. Tim 3,8 Ioti ongomamalid sumaap do katapatan. Norungoi-no i ginavo dioti sampai nokedu-no antad sid kopoulosan.

2. Tes. 2,12 Isai-nopo it amu mangasip sid katapatan dino, ohukuman

iosido.

b) ong sukul kumavid di katapatan, varo rikoton

Yahya 18,37 Boros di Yesus sid di Pilatus, Ipat-ipat it ulun di nakantad sid katapatan (kabanaran), ino-no i mongining di dolou-ku, ka. Ponimpa-nopo i Pilatus, Nunu-keno katapatan dino. (Ong otopot, ino duaton di Pilatus, nga it oholian o kobungoho, tu nokotoguvang iosido di katapatan, nga kakali mongoduat iosido do nunu-keno-ka?)

Yahya 14,6 Boros di Yesus, loku-no diti o ralan om i katapatan om i koposizan. Isot ulun nga aso korikot sid Ama, ong okonko ioku o vazaan. ka.

Yahya 8,32 I katapatan dino o palabus dikou antad sid kinouripanan, ka di Yesus.

2. Petrus 2,2 Ioti-no o kousiba di ralan do katapatan. Mingvaal-no it onogoguru dot ongotangon, tu mogihim ioti do kohuntungan antad sid dikou.

1. Tim. 3,15 Boros di Paulus, Engat-no do kuran it avantang ot undang-undang sid valai do Kinoringan o ino-no i piumpugan dot ulun do Kinoringan i kapapasi. Iosido-no ot origi om kopihatan di katapatan.

torima kaseh, (Mal), ino-no o harati, agazo o ginavo sid vokon, tu natahakan ko varo nanangan do kovosihan. Ong Momogun kodori diri amu oubas do mamakai do pongoretan di iadino. I vaza mongoguna di natahakan, do vaza mangarazou ko pokovantang di barang dino. Kokiraai, ong atahakan dot akanon, nga varo boros dot, Atag neti, ka ko apakai-neti (neni) ka. Boros dit keso, Tulungai tekau ko vozoo tekau, ko kovidai-ku dikau, ka. lambat di koduvo, Ba, atag-neni, ko, Apakai-neni, ka ko Atag-poma, ka. Kagi, ong hukum maanansavo: Atag-po-ma, tu kikinoringan-okoi. Atag-po-ma, tu sinianani do

Kinoringan, ka om, Atag-po-ma, tu kioviti i Odong, ka.

Ong biano, tu nokosuhut di koubasan do Malazu, apakai i boros do Malazu.

Sabap-pogi, tu antad Kinoringan kavi i koposizan om koposizon om kopudan do riniba, atag dot i riniba kiginavo dot agazo ponong sid Kinoringan. Manjadi antad-no sid gama monorima kaseh sid Kinoringan o gama mongindazou om mongoguna di kenginan do Kinoringan.

1. Antad kavi sid Kinoringan i nunu-nopo i katagan dot ulun

1. Kor. 4,7 Nunu-ka i sid dikau dit okonko i nitahak sid dikau?

Lukas 16,25 Hondomo-no i kakal.ko-po mizau, osinang-ko diri.

2. Antad sid ginavo dot agazo sid Kinoringan kaharati it ulun di kovosihan do Kinoringan.

Zabur 50,25 Isai-nopo i monorima kaseh sid dohon, ino-no i iadko mongindazou dohon. Manjadi iti-no o vazaan do monuduk dit ulun di kovosihan-ku, ka di Kinoringan.

3. Antad di ginavo dit amu elo monorima kaseh o kotuvangan dit ulun om i karaatan dau.

Rom 1,21 Sabap sid minsanko nelaan-no dioti i Kinoringan, kakali dot amui ginuna dioti iosido do monongkinoringan, sampai amu minonorima kaseh ioti, inoi nga malang-alang i gama dioti mongitung om i ginavo dioti obungou om nokotuvong.

4. Isai i mimpulanu di kovosihan do Kinoringan, a-milo-milo monorima kaseh sid Kinoringan.

Kolose 1,12 Boros di Paulus, mindamo-oku sid Kinoringan, supaya empihatan-kou di kuasa om kakansango dau sampai kogoos-kou tumahan di nunu-nopo i kosusaan sid saralom di gama monorima kaseh sid dau.

Kolose 3,15 I kopioondusan di Kristus o mangahatul dit ongoginavo dikou, tu kinodim-kou kavi dino sid kopioondusan, supaya ajadi-kou dot iso o guvas sampai monorima kaseh-kou-no.

5. Ong sukul elo monorima kaseh bahagi ino dino, tantu okonko hal dot araat ino dino.

1. Tim. 4,4 Tu avantang-no i sokoviai it inurug di Kinoringan dot iso nga asot araat, ong sukul agamit sid saralom di gama monorima kaseh. Tu nosusian-neno di boros di Kinoringan om i pomintaan dua.

Matius 14,19 I Yesus minonorima kaseh bahagi di tinopis om i sada.

Trinitas, I kosipan tokou manarang do varo tolu o vaza manarang di Kinoringan ong otopot, aso tinganan taranganon, ino-no i Kinoringan it Ama, anak om Sundu dot Osusi. Varo boros tokou sumusui dit ongogulu-gulu Kristian, dot, Tritunggal ko Trinity. Ino duvo pongoretan sompi popogolivong. Tu kuran,-ma, tolu dot iso. Kodung tolu, okonko iso, kodung iso, okonko tolu, ka di pongitungan dot ulun. Iadino ot horotizan di Muhammad di pokulau dit ongokristian di retanko Monoteismus, nga retanko varo tolu o kobuatano do Kinoringan.

Dot ong otopot, i sokoviai it ongopangaran kananganko i Kinoringan it AMA; Anak om Sundu, nga amu miuma, amu koduzan tokou, amu orusod sid pongitungan om ginavo di kogoosoo om korolomo om kosongoho om kolonuto do Kinoringan. Iadko i Musa om Elia, Korud, nga okon, gonit, nga okon, Apui, nga okon, bogizu, nga okon, bai

Barat dot opian om olomomoi, ka. Iri-ogi boros di Yesus: I Kinoringan dino osundu (Yahya 4,24) ko i Paulus sid 2. Korintus 3,17: I Tuhan, ino-no i Sundu.

Kuran-kuran o vaza do riniba gumamit, humarati di kavazao do Kinoringan, nga aso tinganan horotizon, gomiton. A-korusod sid keloo, utok, pongitungan tokou. Ong riniba bai engat do varo tolu o dimensi, ino-no, alaab, asavat, aralom. Topot ong sid Kinoringan nakamung-po dot alaid-laid, aso kengkadan. Sabap ino, sokoviai it vaza manarang bai hovoron, suribanon, posuntuon, kolu-koluvon, tu iso nga aso nokemot do Kinoringan. Buatan, nga amu nokonong, person nga amu nokonong. I sokoviai i panarangan nga amu miuma manarang dit aso tinganan tarangon.

Ong posuntu ko posuriban sid Teknik biano, pengkaa dino: i karan sid elektrik

Varo dynamo di mongimbulai do karan, ong oturugi. Na it enjin poturug di dynamo.

Iri-ogi varo dawai di porikot di karan sid bulb. Korikot-po, iri-ogi varo-no binahang.

Ong kiroon i enjin dot i Ama, om i Dynamo it Anak, om i karan i kuasa do Kinoringan ko i Sundu dot Osusi, iri-ogi i dawai, i boros do Kinoringan-Habal do Kovosihan om i bulb, i tokou di nokosuput sid Kinoringan gima i Habal do kovosihan sampai tumorima di kuasa om Sundu do Kinoringan, ino-no i karan. Na ino karan a-kemot. Varo't ulun di minomudung di dawai, indoson ko varo luvang om kadapat memot do kuran i karan rumikot sid bulb. Ino Sundu momuka di ginavo tokou sampai sumikit tokou om panganavau di vokon. I bulb, aso karan kondiri, suvai sumokot sid dawai om i dawai nokosokot sid dynamo om i daynamo oturug dit enjin, iri-ogi i karan mongizau di

bulb. Na minsanko iadino o vaza manarang, kakali amu miurna humarati, tu aso tinganan do paladon kumavid i Kinoringan iadko pakakas ko barang di kadapat tokou mongimpuras om mangaharati ko mongohuzas. Ong jaham, minsanko amu elo mangagama, isai-nopo i kispanner, kadapat momuka om mongohuzas. Bai it gama mamasang dit ongobahagi ot amu elaan. Topot ong i Kinoringan okonko sid di tokou do palad, inoi nga i tokou sid palad do Kinoringan.

tuduk, tudukan, >habal, mangahabal, manarang di rikoton ko pasandatan, i tomodon poubangan di bahazan, i gama mongira om manarang do hal. Ong sid Kitab, i Habal do Kovosihan.

Matius 4,23 Manjadi tinumongkop-no i Yesus di vatas do Galilea dot ino-no i gama dau, minonuduk-no iosido sid ongopanambangan dioti dino om minangahabal di Habal do Kovosihan di karajaan do Kinoringan sampai pinengkod-no dau i sokoviai it ongoruol om kokuguzan dit ongoulun. (9,35; Markus 1,14; Lukas 20,1.)

1. Kor. 2,13 Iti habal diti o boroson-za okonko iadko it ongotudukan do rinibba dit elo banal, inoi nga iadko i tudukan do Sundu, tu manarang-okoi dit ongohal do Sundu sid ulun di nosuvangan do sundu.

Matius 26,55 suvab-suvab-oku-no mogom-ogom sid panambayanan, tu monuduk-oku dit ongoulun..

Matius 5,2 Manjadi tinumimpun-no iosido monuduk dioti do iadino i boros..

Sid Injil di Matius varo limo o tudukan, ino-no i Tudukan sid Burul (5-7), i Tudukan sid kinoruhangan dau (10), i tudukan dit ongouriban (13), i tudukan bahagi di piumpugan /18) om i-po tudukan kananganko i kovian (23-25). Iki tudukan dino, varo kinompuso do pengkaa dino *nopongo-po di Yesus monuduk do iadino, ongovangaan-no it ongoulun (7,28), 11,1; 13,53; 19,1; 26,1.*

tuluk, kotulukan, >opongo, arangkap, ompus, opupus, otimung, i hal di suvai kagama kavi i noumba ko i najanji-no, iri-ogi otuluk i hal.

Yahya 19,28 Na elaan-no di Yesus dot nopongo-no i sokoviai, minomoros-no vagu iosido, supaya otuluk i Kitab dot, Tuliohon-oku, ka.

Gal. 5,16 Iti-no o boroson-ku, Bang sukul mozo-vozo-kou di Sundu, tantu amu-kou-no monuluk di kohigakan di guvas.

Kinotimp. 2,1 ladno dino i kinotulukan (kinapangan) di kinourugan dit avan om i tana om i sokoviai i suvang do pomogunan.

1. Samuel 3,12 I hiza dino monuluk-oku-no sid di Eli di nunu-nopo i nongoboros-ku sid dau kananganko it ongkob dau antad di gulu sampai biano. Sabap sokoviai nga nokentahan-ku-no dau..

Yesaya 44,28 I Kores o ponuhu-ku. Tu i sokoviai i kenginan-ku, iosido-no o posunu (monuluk).

Kentalangan 17,17 Korisison do Kinoringan i ginavo dioti monuluk di kenginan do Kinoringan sid saralom di gama dioti manahak di kuasa sid dupot dino pengrikot di boros do Kinoringan.

tulung, monulung, kotulungan, ponulung, (tumabang, katabangan), ino-no o harati, mangagama bahagi dit ulun vokon dot okonko mokisuul ko mokigaji, monulungo tomodon, tu iosido dino a-kogoos ko a-kelo ko a-kadapat. It ulun di sumuhut di kenginan do Kinoringan manamod do Kinoringan om it ulun vokon, ino-no monulung ko tumabang do Kinoringan om it ulun vokon, gima i kovosihan do Kinoringan. I gama dot ulun om i sokoviai i kopoulosan dot ulun, iseso o tomodon, posurut di kovosihan do Kinoringan sid ulun vokon om polombus di samod do Kinoringan di nokorikot sid

riniba sampai sid ulun Kristian, supaya i vokon nga orikatan dino samod dino.

Ong it onsi banal dino pongoretan: i gama di panakavan ko i gama di migaralo i kinambo, iadko i Tuhan Yesus di minomoug di hakod di kinoruhangan dau. Minanangabot i Yesus di songkotojungan i kumut, tu mangagama di gamaon dit uripon, okonko i gama di tukang masak ko i mangahatul di poginakanan ko i mangahatul dit inumon, ino-no momoug di hakod dit ulun di nokosombol om noligou-no sid valai di minonginakan. Iri-ogi minanarang i Yesus di gama monulung, iadko i nisurat sid Matius 25,31-46: Pakan dit ulun mosikim, penum dit ulun dit aso valai, posulung dit ulun dit okurang o sulung, mogkodimot dit ulun di sumakit ko kioruol om i nokotorungku, inot ongoulun dit iseso banal om pendakod-po dit ulun dit aso't intoronon pm monozupo di kikihizon.

Iadko i Yesus Kristus apasi om gumama bahagi di riniba di napalid om nosusa, it ipat-ipat it ulun Kristian, ong varo't osomungan o koruhang dau ko ulun di kikosusaan, ino-no o kelaan dau dot iosido dino ulun do kitugas sid ulun dino (Lukas 10,37). Kondiri di Yesus minokipatai do mamasi dit ongoulun o tomodon. Na it ulun Kristian mongontok di vokon, ong varo kosusaan do iadino.

Aso bida do monulung ko tumabang ko mangambo do Kinoringan om it ulun vokon. Ombo i nakanu-no di samod om kovosihan antad sid Kinoringan, mad kiutang-no sid ulun vokon. I gama monulung om tumabang ko manapul do vokon okonko iadko gumaji ko mokihormaton ko ngaran ko pangkat om okonko iadko monobus do surga ko mongohorogo di surga, inoi nga mambat it ulun di ginama di Tuhan Yesus Kristus sid dau.

Na antad ino, varo-po gamaon sid piumpugan di kodori diri di retanko

ponulung. Pilipi 1,1 narait-no i rasul om it ulion di piumpugan om i ponulung. Sid Timotius, nga pengkaa dino (1. Tim 3,8). I ponulung iadko koruhang dit ulion ko panakavan om kinambo. Ino ngaran do *ponulung* dino antad sid gama mangambo sid puginakanan di Tuhan Yesus. Varo-po't ondu di retan do ponulung sid Rom 16,1 om 1. Tim. 3,11

1. Kinoringan o minonulung

Lukas 22,27 Boros di Yesus, Topot ioku-no diti i iadko uripon (ponulung) sid pialatan dikou.

Matius 20,28 Boros di Yesus, ladko it Anak do Riniba, tu okonko rinumikot do monguripon iosido dit ongoulun, gamko mokiuripon iosido(monulung) sampai itahak i koposizan dau, dot iponobus di sokoviai, ka.

Yahya 13 I Yesus minomoug di hakod di kinoruhangan dau

2. I gama tumabang om monulung sid Kinoringan, asarok-no noboros-no do sumamba ko mongoguna.

Zabur 100,3 Sumamba-kou sid Tuhan dit otomon-kou.

Matius 4,10 Boros di Tuhan Yesus, Rontob- i Tuhan Kinoringan-nu ot sambaon-nu om iseso o Kinoringan o gunaon-nu, ka.

Matius 6,24 A-el-elaan dikou do sumamba sid Kinoringan om sumuhut-po di kolunduo do pomogunan.

Titus 3,3 I hiza diri nakapangambo-okoi di kozian om nunu-nopo i kenginan di kakanggahan.

Matius 15,9 Porosuma i gama dioti mongoguna (monulung) dohon, tu monuduk ioti dit ongoadat di bai hoturan di dang riniba, ka di Yesaya, ka di Yesus.

3. I gama monulung dit ulun vokon, gima i Kristus nga sumambai sid Kinoringan

1. Petrus 4,10 Kerad di nakatahak sid dikou, mitutulung-kou-no iadko it ongomandul dit apatut o gama mamakai di kovosihan do Kinoringan di madlaba-laba sid dikou.

Yahya 13,14 Boros di Yesus, Ong ioku diti, tu guru-no om Tuhan dikou, nga minomoug dit ongohakod dikou, ikou nga apatut-no do momougi di hakod do koruhang.

Markus 10,43 Topot ong sid dikou okonko iadino, gamko it engin dot asavat iosido, ino-nno mokiuripon dikou om it engin dot ulion iosido, ino-no ot uripon (ponulung) di sokovia.

Galatia 5,13 Gamko mitutulung-kou-no sid saralom di gama dikou manamod.

Efesus 6,5-7 I gama dikou sid dioti iadon-ko i gama sid di Kristus, okonko bai momoluk dioti, inoi nga iadko it uripon di Kristus di monuluk di kenginan do Kinoringan. Osinang i ginavo dikou sid gama gumama, tu i Tuhan o panangan, okonko i riniba.

Matius 24,40 I gama dikou monulung sid osibak it ongobpinai-ku, iadko-no ko ioku o tinulungan dikou dino, ka di raja.

Yakub 1,27 Ino-no it apatut o gama sumambayang sid Kinoringan it Ama, mogkodimot dit ongousan-usan om ongobituanon i hiza do kikosusaan ioti dino.

4. I ponulung sid piumpuganm.

Usuran R. 6 I hiza di varo kosusaan sid piumpugan, tu amu-po nahatul i gama mamahagi di kosukupu bahagi dit ongoulun do mosikim, miniuupakat-no it ongorasul do mamangkat do turu ot ulun dit atatap,

tu mangahatul ioti di gama manaud dit ongoulun do mosikim. Inot ulun dino retanko ponulung di piumpugan.

Rom 16,1 | Phobe nga ponulungi sid piumpugan do Kenkrea.

tumbozo, > suhut, >turut

tumbuk, >sijil, i tanda sid janji, pangkat, surat rasmi do manantu dit kolumbatasan. Ong kodori varo iso bansa do rilin di kodung azami, okodou-no dot amu obimbabak. Ong kakal-po alazu i rilin, otumbukani do tanda di raja ko kumpani, supaya i vuos do tumbuk dino karaliu sid rilin. Azami-po, aso tanganan do monimban di janji om batos ko ong ohongkos-no, a-obuka i hongkos di surat dino ong amu ababak i tanda do tumbuk. I tumbuk momihot om mamanal di janji. Ong miundi, banalko apakai i rilin dino.

Hagai 2,22 Ot uripon Zerubabel, ikau-no dino o sinsing di tumbuk-ku (o pangakaton-ku do momorinta sid ngaran-ku). Sabap ikau-no dino o nopili-ku, ka di Tuhan.

Kentalangan 5,9 Ikau-no ot apatut manganu di Kitab dino om mamabak dit ongotumbuk dino.

1. Raja 21,8 Manjadi minonurat i Isebel do niantad (nitumbuk) dau sid di Ahab.

Yeremia 32,10 Minonurat-oku do surat sampai minonumbuk di surat dino.

Daniel 6,18 Na varo vatu dot agazo do nitombol sid timbabaon di luvang dino do tinumbukan di raja om i tumbuk dot ongokunsil, sampai iso-no ot ulun nga aso kadapat palabus di Daniel antad sid ongomondou dino.

Matius 27,66 Manjadi minamanau-no ioti dino do mangaput di lobong

dot onuvon do pogintutunan do nougal om amu om inontupat-no dioti om it ongosojal i lobong dino.

Rum 4,11 Notorima di Ibrahim i tanda, ino-no i sunat do pogintutunan (tumbuk) di kabanaran dit antad sid kosipan di gulu-po ko i sunat.

1. Kor. 9,2 Okon-ka ko ikou-no o tanda (tumbuk) di nagama-ku sid tinoguvangon di Tuhan?

Yahya 6,27 Tu it Anak do Riniba o notontuan (notumbukan) di Kinoringan, it Ama, ka di Yesus.

Efesus 4,30 Kadan-no dikou pohungoton i Sundu dot Osusi, it inanu dikou antad sid Kinoringan, tu i kolobusan dikou n otumbukan-no di sap do Sundu.

tumpuk, tumpuk do kopitatabangan, barang di noumpug dit okonko okudik, nga amu nokopirorompit, inoi nga tosontumpuk-tumpuk, ka. Rombongan dot ulun dit a-ko piro-no kazu di kipanangan om iseso o gamaon ko upakat. Na i PCS varo hoturan do tumpuk do kopitatabangan, isuhut di gama di Yesus potugas di kinoruhangan dau sid gama pazazad di Habal do Kovosihan dot okonko toriso-iso ot osuhu, inoi nga pinapanau di Yesus ioti do toduvo-duvo ioti mikoruhang, supaya i kososizan dioti dino, nga ilapiki. Iti-no o sabap i tumpuk do kopitatabangan kumavid di tugas sid gorija sid gama mivozo-vozo om miaambat-ambat om miganti-ganti om mitatabang sid tugas dino. Iadko it ongondou di nokorikot sid lobong di Yesus di kitugas do pentahan sid ongorasul, ko i duvo i kinoruhangan antad sid Emaus di novovoza di Yesus sid tanga do ralan. Suvai sompi nakaharati ioti miduvo dot isai it ombuvoi di nokovoza dioti dino om iri-ogi minungkazut-no vagu ioti miduvo dino, tu pahabal sid kinoruhangan vokon sid Yerusalim.

Matius 18,16 supaya i hal dikou dino ososizan di duvo antawa tolu ot ulun. 20 Siombo-nopo ong varo duvo antawa tolu ot ulun di miuumpug sid saralom di ngaran-ku, sino-okunod pialadan dioti dino.

Markus 6,7 I hiza diri kinodim-no di Yesus i kinoruhangan dau di hopod om duvo, tu papanau iosido dioti do toduvo-duvo sampai patahak di kuasa do monunsub do rogon dot araat. (Lukas 10,1)

tungkus, kotungkusan, i tumungkus, i vaza polombus di dapu ko pangazam, valai ko tinungkusan om barang dot ulun sid anganak, hiza di matai i sanganu, Ong sid Kitab okonko bai iadino apakai, inoi nga i gama tumorima di kovosihan do Kinoringan

Zabur 37,9 It ulun di humarap sid Tuhan o kotungkus di pomogunan. 22 i nabarakatan di Tuhan o monungkus di pomogunan, 29 it ulun dit abanal tumungkus di pomogunan, ka.

1. Kor. 15,50 It onsi om i raha om guvas tokou amu kotungkus di karajaan do Kinoringan om i kobuatano dit obingbinasa amu kotungkus di kobuatano dit amu obingbinasa.

Gal. 5,21 Inot ongoulun di iadino o gama amu kotungkus di karajaan do surga, ka.

1. Petrus 3,9 Mamarakat-kou-no, tu andaman dikou dot ikou o monungkus do barakat.

Ulangan 10,12 Sera do kotupak-kou sid bavang do Yarden om kentoron-kou-no sid pomogunan dit ipotungkus do Kinoringan dikou, ikou-no o sanganu.

Zabur 2,8 Pokitahako-no sid dohon it ongobansa om ipotungkus-ku-ogi dot ipasanganu-ku dikau i sokoviai it ongobansa sid pentongkop do pomogunan.

Markus 12,8 lalo-no dino o monungkus diti kabun diti. Tokou-no

patazo tokou ialo dino om otungkusan-tokou-ogi iti kabun, ka dioti.

Lukas 12,13 O guru, boroso-no sid obpinai-ku, supaya obohogizan-oku dau di tinungkusan dahai, ka dit ulun sid di Yesus.

Efesus 1,14 Ino Sundu dino o momihot di kotungkusan tokou. 5,5 Isai-nopo it olugagai om rumaat om obinsolon, ino-no ot amu kotungkus di karajaan do Kinoringan om i Kristus.

1. Petrus 1,4 bahagi di kotungkusan dit amu tumanus om amu rumunus om amu mapal, i nakatahu-no laid sid surga bahagi dikou.

Kinotimp. 15,4 Inot ulun dino amu koponungkus dikau (i Elisar, it uripon di Ibrahim), inoi nga it anak dit inimpusadan-nu, iosido-no o monungkus dikau, ka di Tuhan.

Rum 8,17 Ong anganak tokou-no do Kinoringan, tantu kotungkus tokou, o ino-no ponungkuson tokou-no di Kinoringan om pokoruhangon tokou-no di Kristus monungkus, ong sukul kumoruhang tokou dau sid kapagasan, supaya kokoruhang tokou vagu dau sid kohormatan.

Gal. 4,1 I hiza di kakal-po omulok i monungkus, minsanko anak di sanganu, amu osodiri iosido dit ulun di baiko uripon di sanganu. 7 Bang anganak-kou-no dau, tantu monungkus-kou-no, gima i Kristus, ka di Paulus.

Titus 3,7 Nembanaran tokou-no di kovosihan dau dino sampai kotungkus tokou di harapan di kopoulosan penlaid.

Ibrani 1,2 I Kristus, it Anak dau, i tinantu dau do ponungkuson di sokovia i nunu-nopo.

tutun, mongintutun, mitutun,

1. humarati om elaan i hal ko isai it ulun, ino-no i mato memot om iri-ogi it utok monuduk dot ulun dot ombo i hal ko isai it ulun ko humarati i

kobuatano om kavazao, minsanko i hal do Kinoringan om kosunduvo.
Lukas 24,31 Na nobuka-ogi i mato dioti miduvo dino dot otutunan-no i
Yesus.

1. Samuel 3,20 Ensanan-no ioti Ongoisrael dot otutunan-no i Samuel
do nabi iosido di Tuhan di banalko atatap.

Yahya 4,42 Mangasip-okoi-no, tu okonko bai i tuturan dit ondu, gamko
norongou-za-no kondiri sampai elaan-za-no (otutunan-za) dot iosido
dino tantuko ino mananggung do riniba, ka dioti.

2. Ino kohorotizan di iadino, nga antad sid kinourugan. Kinoringan
minanahak sid riniba di keloo do mongintutun.

Amsal 1,2 I pentutun di keloo om inuagan dot avantang om paharati
dit ongoros dot aralom. It ongoimuhun dino monuduk dit atarang o
kobuatano supaya abanal om otopot it ulun om mangagazad dit
ongomulok om it ongoulun dit aso-po pangalaman, supaya elo ioti om
anamit mongitung...

Rom 1,20 Antad di kinourugan atalahas-no i kokuasaan do Kinoringan
dit a-emot, o ino-no i kokuasaan penlaid om i kosunduvo dau, ong
sukul mongontupat di ginama dau, supaya isot ulun nga aso
kopokimahap. (Kasalaan-nopo, a-kotutun ioti)

Matius 7,16 Sabap sinod kouvaan o kotutunan dikou dioti.

Amsal 1,7 I rumonok di Tuhan, ino-no i kotimpuunan do keloo
(kotutunan).

Yahya 7,17 Isai-nopo it engin sumuhut di kenginan di minonuhu
dohon, iosido-no o kaharati (kotutun) do siombo ot inantadon di
tudukan-ku, antad sid Kinoringan antawa antad sid kondiri-ku, ka di
Yesus.

Amsal 2,6 I Tuhan manahak do keloo om sid kabang dau mimbulai do

kotutunan om kosilato.

Efesus 1,8 Nituntug sid di tokou i keloo om i sokoviai i pongohorotizan (kotutunan), sampai nipelo di tokou i kenginan di noumpai laid sid saralom di ginavo do Kinoringan.

Matius 13,11 Boros di Yesus, lkou dino pohorotizon (intutunon) di suromo di karajaan do surga

1. Kor. 13,12 Bianco diti ngaran-ogi-ko kotutun. Topot ong orikot-no i hiza dino, kotutun-oku-no, iadko i kotutun do Kinoringan dohon.

Zabur 139,6 Nunu-nopo i gamaon-nu dot osundu, amu-oku katalahas (kotutun) ino iadino.

Zabur 139,1 O Tuhan, ikau-no o mongimpuras (mongintutun) dohon

3. Varo kotutunan di mad pokolovong dot ulun ko posumbung.

Rom 1,22 I pokelo ioti dau kondiri o nokolovong dioti.

Rom 10,2 Sabap sosizan-ku ioti do magavi sid Kinoringan, rontob-nopo amu kaharati (kotutun).

Yesaya 5,21 Atok sinusa dikou, i humarap di hukum (kotutunan) dau kondiri sampai mongitung do kaharati iosido.

4. Varo-po't aralom o harati, ino-no sid pialatan do duvo ot ulun varo kopitutunan ko sompikotutun ioti. Ino dino ajadi do bai guvas om ginavo o kovoza, iadko i misavo it ulun mitutun, i harati, mirompit om mizut, ino-no, i duvo it ulun dino ondu om kusai kopihaharati om kopiaamung dot aso't nalazan, ko sid rohani, nga i gama do Kinoringan ponong sid riniba di mad kumiginavo.

Kinotimpunan 4,1 Ong sid KM bai: Manjadi minaganak-no ioti Adam, dot i boros banal sino, i Adam om i Hava minitutun sampai mogontizan i Hava om minaganak-ogi. Asarok sid Kitab Laid iadino o boros, i

Ibrahim, i Daud om vokon-no.

Hosea 2,22 Sid dikou nga boroson-ku-no dot, Ikou dino o bansa-ku. Manjadi iadino ot (kotutun om) ambat dioti, Ikau-no dino o kinoringan dahai, ka.

Zabur 1,6 Tu elaani (kotutuni) do Kinoringan i ralan dit ulun dit abanal dino.

Amos 3,2 Boros do Kinoringan, Ikou dino ot otutunan-ku do bansa-ku sid tanga dot ongobansa vokon.

Gal. 4,9 Bianco notutunan-no dikou i Kinoringan, om notutunan-kou-no do Kinoringan.

Yahya 10,14 Boros di Yesus, loku-no diti o manaud dit avantang o panaud. om otutunan-ku it ongodomba-ku sampai it ongodomba-ku, nga kotutuni dohon.

1. Yahya 4,7 Isai-nopo i manamod, ino-no ot anak do Kinoringan sampai pentalang iosido do nokotutun-no iosido do Kinoringan.

tuvong, kotuvangan, > navau, kanavahan

uli, muli, kouliau, muli sid Kinoringan. I pongoretan dino mongontok di pongoretan dot Ibrani shub, i harati tumolikud di vaza laid om tumoguvang dit inantadon. Ong sid Kitab Yunani varo apakati ipongoretan di kiharati dot, monimban di pongitungan. Ong sid Malazu *taubat*. Sid duvo i pongoretan dino varo pitonidan. It Ibrani o harati, ensanan it ulun, guvas om ginavo otompiku, tumolikud di kavazao laid om tumoguvang-no vagu sid kavazao dit atag. Ong bai monimban do pongitungan, amu-po kovoza i harati dot it antad sid pongitungan dino varo gama om varo kosurutan ponong sid katagan. Sabap ino, i pongoretan do Momogun *uli* banalko kiharati om kopionong di boros

Ibrani, tu kodung muli it ulun, mamananau-no iosido sid inantadon dau, sid valai dau, ko ong sid hal do kosipan, kotoguvang-no vagu it ulun sid Kinoringan sampai sumuhut di umba om kenginan do Kinoringan bahagi dit ipat-ipat it ulun. Manjadi, iti-no it onsi di harati di pongoretan dino sid Kitab om sid gorija:

Tumolikud-no it ulun di kavazao laid dit amu nokonong sampai tumoguvang-no sid kovosihan om kenginan do Kinoringan.

Sid Kitab Laid, asarok it ongoulun dot Israel minuli dara sid Kinoringan dot opus o gama dau mononsulung do bai gansing ko kulit do karong om modsu dot avu dot iri-no o harati, mongogorot do Kinoringan do monimban di kavazao do pomogunan di vokon-no ong nolizudan, vokon-no ong nahandab dot apui ko banalko aso darun ko gizuk om butu ko noruzahani. Na minomoros it ongonabi dot ino dino aso guna, tu ino gama di iadino bai sid soribau o gama dot ulun tumoguvang sid Kinoringan. Ong i ginavo dioti kakali osodu om bolikung. Iri-ogi ginaratan-no dit ongonabi i kouliau di ginavo dit ipat-ipat it ulun om ensanan i bansa dot Israel. (Yesaya 58,5 Ozi-okunaku di gama dikou momuasa ong baikou amu-kou makan om minum sampai olungui i kobuatano dikou om monompindung-kou do karong om mogomkou sid avu? Retan dikou naku ino puasa do iadino o kenginan do Kinoringan? Amu. Puasa ong dohon do kenginan, nga tanid-no banal. Zazako-no dikou it ongobalud om iduai-no dikou it ongopaud sid kazab dit ongobpinai dikou. Polobuso-no dikou it ongouripon sampai i sangod dikou i kuran-nopo i gama dikou monguripon. Posizo-no dikou it ulun di monombitil om pendakod-kou-no dit ulun dit asot intoronon om sulungai-no dikou it ulun di mosikim sampai tulungai-no dikou it isai-nopo it osusa sid bansa dikou. Amos 4!)

Pengkaa dino, i Yahya i minomodsu minongingut dit ongoulun pouli

sid Kinoringan dot amu minonodiri iosido dot ulun do kisala o buatan om it ulun dot retanko elin om okosog, tu boros di Yayha, Ensan-an-no it ulun nokedu-no sid tinoguvongon do Kinoringan om onong do hukuman do Kinoringan, iadko i kapak di nakanta-no managad i puun do kazu. Iri-ogi minonuhu-no i Yesus di koulia sid Kinoringan (Matius 4,17 Piguli-kou-no sid Kinoringan, tu i karajaan do surga nokensomok-no.)

Na antad sid koulia sid Kinoringan mimbulai i gama mangasip (Markus 1,15: Uli-kou-no sid Kinoringan om pangasip-kou-no di habal do kovosihan, ka di Yesus).

It ongorasul, nga pengkaa dino. Minonuhu i Petrus di koulia i hiza di tuturan dau sid panambayanan ontok dit Adau do Pentakosta om minomodsuo iosido dit isai-nopo i minuli sid Kinoringan. Pengkaa dino i pongohorotizan di Petrus, i koulia dit ulun , nga gama dot ulun tumolikud di karaatan di gulu om tumoguvang sid Kinoringan. Na atabangan it ulun do kovosihan do Kinoringan. Kodung kouli-no it ulun, mangasip-no iosido om humarap dot i Yesus o manapul dit ulun antad sid karaatan dau.

Na ino koulia sid Kinoringan dino, okonko bai insani om opongo-ogi. Sabap it ulun, asarok do mad tumohiang vagu om kabambol antad sid ralan dot avasih om otulid. Iti-no o sabap do pempatai it ulun osusa do tumorontok vagu ponong sid Kinoringan. Kodung mad malid dara, osusa tumoguvang vagu sampai muli om iulit vagu i panahon dit onongi.

Ong i Paulus, okurang apakai i pongoretan do *muli sid Kinoringan*, ka, inoi nga ino-no i nihodtol dau, I kosipan om i gama matai sid kinapatazan di Kristus om gumulian vagu sid kinogulianan di Yesus. I gama muli sid Kinoringan iadko lumandai vagu ponong sid Kinoringan.

1. I kinulian sid bansa dot Israel diri.

1. Samuel 7,3 Boros di Samuel sid dioti, Bang sukul kouli-kou sid Kinoringan dot iseso o ginavo dikou, atag dot iada dikou i pinokokinoringan sid dikou om sumamba-kou-no sid Tuhan Kinoringan. Iri Tuhan o manapul dikou antad sid palad do sangod.

Yunus 3,4 Baiko apad-no nopod tinadahan om atanus-no i sokovia i kavavalazan do Ninive, ka di Yunus. Na minangasip-no it ongoulun sampai miniupakat-no ioti do momuasa, tu oupus banal di kasalaan dau. 10 Nemot-po di Kinoringan do nokotolikud-no ioti sid araat o kobuatano, amu-no sinusa dau i nunu-nopo i boros dau, gam orubatan iosido ong orungoi i kavavalazan diri.

Daniel 9,3 Tumoguvang-okou do Tuhan Kinoringan, om minta dua-okou om suming kudou do pakazan-okou do kulit do karong o kosulungan-ku om ovuvan-ku-po it ulu-ku.

Yoel 2,12-12 Simbanai-no dino ino ginavo-nu. Uli-no sid dohon dot ensanan ino ginavo-nu. Pomuasa-no om pogihad-no sampai poruolono ino ginavo-nu. Amu miuma ong baiko i kosulungan dikou o kini-kinison, inoi nga i ginavo dikou dot otopot ot atag dot emot-ku, ka. Piguli-kou-no vagu sid Tuhan Kinoringan dikou.

Yesaya 30,15 Bang sukul muli-kou-no sid Kinoringan, sampai humarap, tantu kogoos-kou-no kavi sampai akansang-kou vagu.

2. I Tudukan di Yahya i minomodsu.

Matius 3,2 Boros di Yahya, Piguli-kou sid Kinoringan, tu nokorikot-no i karajaan do surga, ka.

Matius 3,11 Momodsu-okou dikou sid vaig bahagi di koulia. Topot ong i sumuhut dohon dino, lobipo kikuasa iosido sampai momodsu dikou

do Sundu dot Osusi om apui, ka di Yahya.

3. I Tudukan di Yesus om it ongorasul.

Lukas 5,32 Nokorikot-oku, tu mongodim-oku dit ulun do kisala muli sid dohon, okonko it ulun dot abanal ot kodimon-ku, ka di Yesus.

Matius 11,20 I hiza diri tinumimpun-no i Yesus mamajal dit ongopomogunan di nakasasi di kosunduvo dau, lobipo ko it ongopomogunan vokon, sabap kakali dot amu minuli ioti sid Kinoringan.

Lukas 13,5 Bang ikou nga amu muli sid Kinoringan, ikoui nga pengkaa dino, tu korundun dioti.

Usuran Rasul 2,38 Boros di Petrus, Piguli-kou-no sid Kinoringan om mokipodsu-kou-no sid saralom di ngaran di Yesus Kristus bahagi di kaadaan di kasalaan, sampai kanu-kou-no di Sundu dot Osusi.

Rom 6,8 Bang minatai tokou kumoruhang di Yesus, mangasip tokou-no do kokoruhang tokou Dau sid kopolosizan vagu.

Yahya 3,5 Isai-nopo it amu-po nakalandai vagu antad sid savat, - ino-no i harati, nopodsu di vaig om Sundu dot Osusi - amu kosuvang sid karajaan do Kinoringan, ka di Yesus.

4. It ulun do kisala tumolikud sid kavazao dau laid.

Yehezkiel 18,21 tumolikud sid sokoviai i kavazao dau di gulu, ka di nabi.

Yeremia 25,5 tumolikud sid ralan dau dit araat.

5. Muli sid Kinoringan

Usuran R. 11,21 Ogumu-no it ongoulun di minuli sid Kinoringan.

Usuran R. 26,18 Na tinumolikud-no ioti sid kotuvangan sampai

tinumoguvang sid kanavaho sid Kinoringan, ka di Paulus.

1. Petrus 2,25 Tu ikou diri napalaid-no iadko it ongodomba di natagak. Topot biano nokemumui-kou-no sid manaud om ulion dit ongoginavo dikou.

6. I kanangan di koulian sid Kinoringan.

Usuran R. 3,19 Natanus-no i kasalaan dikou.

2. Kor. 3,16 Topot edu i tokop dit ulun dino, ong sukul tumoguvang sid Tuhan, ka di Kitab.

Matius 13,15 Na minuli-no ioti sid Kinoringan sampai Kinoringan -no o mongining sampai manapul dioti.

7. I koulian dino, ginama do Kinoringan.

Yeremia 31,18 Pouli-no dohon, supaya muli-oku diti, ka di pomintaan dua di Yeremia.

Filipi 2,13 Tu sompi antad sid Kinoringan, iosido-no o poingin dikou sampai pakansang dikou, isuhut di kenginan dau dit avasih.

Matius 19,26 Bang bai riniba mongitung, tantu aso tinganan. Topot ong Kinoringan, el-elaan-no kavi.

8. Kakali iningutan-no i riniba muli sid Kinoringan om sumuhut sid saralom di kansang di dang Sundu.

Yeremia 3,14 Piguli-kou-no, ot anganak di nokokozou-no.

Maleaki 3,7 Piguli-kou-no sid dohon, supaya ioku nga tumoguvang-no sid dikou, ka.

9. It ulun di muli sid Kinoringan oupus-no i ginavo dau sampai tumolikud-no sid karaatan om osusa i ginavo dau, gima i kinaraatan di

nigama diri om tumoguvang-no sid Kinoringan om monimban-no di ginavo.

Matius 12,41 Boros di Yesus, It ulun do Ninive, nga oupus-no ioti sampai minuli-no sid Kinoringan ong kodung norongou-no ioti di tudukan di Yunus.

Usuran R. 17,30 Boros di Paulus sid Athen, Topot ong bianco-no monuhu-no i Kinoringan di sokoviai i riniba muli sid dau, tu nakapangajanji-no sid riniba dot adau do kopongohukuman di sokoviai i riniba.

Lukas 15,17 Na tinumimpun-no iosido mongitung sampai minomoros-no dot, Sid di ama diri, okonko piro-piro ot ongouripon dit osukup o kakanan sampai kilaba-po dot ong ioku diti obinasa-no do vitil. Ba, muli-oku-no sid di ama om boroson-ku-no sid dau dot, loku diti kisala-no sid Kinoringan om sid dikau, ka.

urug, kourugan, kinourugan, ino-no i vaza do Kinoringan mongurug ko mangagama di vinangun. Ong sid Momogun, varo-no laid pongitungan om keloo dot i Kinoringan minamangun di vinangun. Na okonko enizo i kososizan di Kitab kananganko i vaza do Kinoringan mongurug di vinangun sampai i riniba. Ong sid Kinotimpunan 1,1-2,4a retanko kodung Nokoboros i Kinoringan, jinumadi-no navangun-no. Ong sid f. 2,4b-25, mad palad do Kinoringan minongurug di riniba iadko i tukang di kiluvang mongurod di tana dot osilou sampai kikobuatano do varo kiluvang, gumoroi ko panding om kuron.

utang, kiutang do siin ko samod, karaatan, rogop, buru ko nunu-nopo, ko i horogo do barang di kadagang-no, dit osusa mangapus, tu nakadagang do barang ko harta di nunu-nopo. Ong mongutang-utang,

ulian dot okon-noko iri-po nanu. Ong molos, iuli vagu: dangol, kurita, saging. Na sid Kitab varo-po harati dot aralom, ino-no, i kavazao dit amu atag sid tinoguvangon do Kinoringan, varo pamarasan dot mad utang sid Kinoringan, utang, tu kisala om kikaraatan.

a) utang di siin om barang

Matius 18,24 inovit-no dot ulun it iso it uripon di kiutang do salasa tolinta.

Filemon 18 loku diti, Paulus, palad-ku kondiri monurat. loku-no o gumanti. Aso-ogi boroson-ku dot b aiko inutang-nu sid dohon i kondiri-nu.

Rum 13,8 Kadan-kou-no miinumpalad (do kiutang-kou sid ongoulun), gamko misasamod-kou-no. Varo kosolinan vokon dot, Kada-kou-no utangan tanid mantadko varo utang do samadan it ongoulun. Varo kiroon di Paulus dot songkuro-nopo i gama tokou manamod, kakali amu-po miuma. Mad osusa tokou dot omungon-po manamod, tu kiutang tokou ong hal do samod, tu aso tinganan mangapus di samod do Kinoringan sid gama polombus di samod dino sid ulun vokon.

Ulangan 24,10 Ong monunggu-ko dit utang dot ulun sid dikau, kadan-ko-no sumuva sid ongekob do manganu di barang dit isanda dit ulun, inoi nga monginud-koi sid apad. Ong mosikim it ulun, kadan-no sampai kodop i barang di nisanda dot ulun sid dikau. Sumodop-po, poulion-nu-no i barang di nisanda dit ulun dino, supaya kodop iosido, tu kitimog om abarakatan-ko dau.

Yehezkiel 18,9 amu kopitiim mokibunga dit barang dit inangkat dot ulun.

Nehemia 5,10 Boros dioti, Tonuson-za-no it ongoutang dit ongoobpinai-za sid dahai diri, ringgit, ka, ko gandum. Amu-okoi-no mokikapus. Manjadi tonuson-no dikou it ongoutang dit ongoulun sid

dikou diri, ringgit-ka, ko gandum, ka umau do Zaitun, ka ot inutang.

Lukas 7,42 I toki dino, tu banalko asot ipangapus dioti dino, sompi tinanus dau it utang di duvo it ulun dino.

Lukas 17,10 lokoi diti baiko uripon dot aso guna. Rontob i nipagama dahai o nagama-za, kanto dikou ko (Rontob it utang-za o nokopusan-za)

b) i kasalaan sid tinoguvangon do Kinoringan ko riniba di mad utang. Sabap ino a-milo-milo anangan it ulun di kiutang do danda ko hukum, supaya varo kotonusan dit utang dino.

Kol. 2,14 I surat di tanda dit utang tokou, nga niada-no dau sampai nipaku-no sid kazu do sangkap.

Rum 1,14 Kiutang-oku diti sid ongoulun do Grik om it ongobansa vokon.

uva, monguva, kouvaan. it ula dit ongototonomon antad sid hoturan di kinourugan

Kotimp. 1,11 Boros di Tuhan, mumbasih-no i putanaon sampai momodsuni-no kavi i kouvaan om totonomon. 1,28 Puranzat-kou-no om gumu-kou-no sid suvang do pomogunan diti sampai songonuvu-no dikou i putanaon.

a) i barakat do Kinoringan mongimbulai dot uva

Zabur 1,3 losido dino iadnoko i puun do kazu di tinanom sid timbang do bavang.

Filipi 1,11 dot osukup banal sid dikou it uva do kabanaran it agama di YesusKristus, tu mamantug om mongindazou do Kinoringan.

Lukas 3,8 Boros di Yayha: Pembulai-kou-no do kouvaan dit apatut,o ino-no simbanai-no dikou i ginavo dikou.

Gal. 5,25 Topot it ongouva do Sundu ino-no, samod, otomon o ginavo,

kopioondusan, katatapan, kolomian, kovosihan, kotulidan.

Efesus 5,9 It uva dit anavau, ino-no i kavantango om kabanaro om katatapo.

Matius 7,16 Sid kouvaan o kotutunan. Kopipongotu-kou-ka dot anggur sid puun dot orukakang?

b) I habal do Kovosihan (i karajaan do Kinoringan) mad monguva

Markus 4,26-29 i suriban di kosunizan dot linsou dit asot elaan

Matius 13,19-23 i linsou ino-no i boros do Kinoringan, ka

Yahya 15,4 ladko i raan di nogii-no antad sid puun amu-no koponguva, ikou nga iadino, ong okonko mintoron-kou sid dohon, ka di Yesus.

Yahya 12,24 Bang amu rumatu sid tana i linsou do gandum sampai matai sino, tantu iso-no iosido. Topot ong matai-no iosido, monguva-no dot ogumu ot uva.

Rum 1,13 supaya kopongimbulai-oku dot uva sid dikou, iadko i gama-ku sid ongoulun do labus sid ongopomogunan vokon.

Filipi 1,22 Bang ino gama do mizau-po sid guvas o pembulai dot uva di gama-ku, tantu amu elaan-ku do nunu o pilion-ku.

c) ombo i monguva, ino-no anangan do barakat do Kinoringan

Zabur 126,6 Mogihad ioti di hiza do mamananau-ogi mangasok, topot aramai ioti di hiza di muli-no antad sid minongulok.

Matius 13,30 Topot ong ino gandum dino umpugon om posuvangon sinod sulap-ku dino, ka di Yesus.

Yeremia 17,10 loku diti i Tuhan o monuli sid ipat-ipat it ulun isuhut dit uva di ginama dau.

Rum 6,22 Ong bianco-no, nakalabus-kou-no antad sid kuasa do kasalaan om najadi-kou-no dot uripon do Kinoringan sampai i guna dikou pongimbulai di kosusian om i kosungguvo (uva) dikou nga sid

koposizan penlaid.

vangun, vinangun > pogun, pomogunan

vanus, kovonusan, aralom o boros mantadko bai avantang, aso borotuduon, alus o ginavo sid vokon

Kinotimp. 31,24 Boros do Kinoringan sid hatod di Laban, Ontupato-no supaya amu-ko kapangarab do boros dot araat sid di Yakub (ko, supaya avanus o boros-nu sid di Yakub, ka).

Zabur 100,5 Sabap avanus (avantang) i Tuhan om i kovosihan dau nga amu-no engkod sampai penlaid.

Zabur 107,1 Ponorima kaseh-kou-no sid Tuhan, tu banalko avanus (avantang) i gama dau monunda di tokou.

Zabur 90,17 O Tuhan, lindungo-okoi-no di kovosihan-nu (kovonusan-nu)...

Yesaya 40,2 Patatapo-no dikou i ginavo dit ongoulun sid Yerusalim (avanus i boros dikou sid Yerusalim)..

Matius 5,47 Bang rontob it obpinai dikou o gunaon dikou (bai sid obpinai dikou avanus-kou-no)

1. Kor. 13,4 i samod dino alanut o ginavo dau om omomos (avanus) o ginavo dau.

Efesus 4,22 Gamko posibao-no om polomio-no (povonuso-no) i ginavo dikou om miaada-ada-kou-no do kasalaan songkoruhang, iadko i Kinoringan di nakapangada-no di kasalaan dikou sid saralom di Kristus.

1. Petrus 2,3 Ong sukul kopitiim-kou--no di kovonusan di Tuhan. 3,8 Kagi, ikou sokoviai opudo-no dikou it iseso i pongitungan om mirurundun do kopurimon do kosusaan om mioobpinai om obinsianan om osibak (avanus) o ginavo.

2. Kor. 6,6 Topot kakali atatap om otulid o bahazan om kikeloo dot alanut om omomos (avano) o ginavo-za, tu ponulung-okoi do Kinoringan.

Gal. 5,22 It ongouva do Sundu ino-no, samod, kopioondusan, kamamasan, kolomian, kovosihan, katatapan, kovonusan, kotulidan.

Kol. 3,12 Sabap ino, panampakai-kou di koruhunan, kosusian di ginavo dot osibak(kovonusan), kamamasan, agazo o ginavo sid koruhang.

Titus 3,4 Topot minimbulai-no i kovonusan om samod do Kinoringan, i Minananggung di tokou.

vasih, kovosihan Sid Kitab Laid, i kovosihan do Kinoringan sid bansa dau ino-no, agazo o ginavo dau sid bansa dot amu mongitung do kavazao dioti, avantang ko amu, inoi nga omomos om okosog om avasih i Kinoringan sid dioti. I gama posinang dot ulun dit osusa om orukung om titipoun, ino-no o harati, kikovosihan sid ulun dino ko, tumoguvang dit ulun di iadino sampai sumahau om mamabo di kosusaan dau.

Sid Kitab Vagu pengkaa din o harati, Kinoringan o tumoguvang sampai mongodundung dit ulun di kisala dot okonko kiroon-po i sala dau ko i suul dau ko kopotutan dau, inoi nga mongumbasih i Kinoringan dit ulun do manahak iosido di kaadaan do sala om mamanal-po dit ulun di mangasip om i humarap sid kovosihan do Kinoringan.

Kolobusan 34,6 Mininta dua i Musa dot, O Tuhan, ikau-no ot obinsian om avasih om alanut o ginavo sampai agazo i kovonusan om katatapan, ka di Musa.

Zabur 130,7 Sabap kikovosihan i Tuhan om ogumu o kotulungan dau.

Kolobusan 33,19 Ombo-nopo it ulun it anangan di koumbosihan-ku, ino-no ot umbosihan-ku, ka di Kinoringan.

Zabur 103,8 Asamod om avasih i Tuhan.

Yesaya 54,8 Nisusut-ku-no i vuross-ku dot oduruk i hiza di nakasaan-oku, nga monian-oku dikau sid saralom di kovosihan-ku dit amu engkod.

Zabur 100,5 I kovosihan dau nga amu engkod

Yesaya 54,10 Minsanko tumanus it ongoburul om gumuzu i pomogunan, topot ong i kovosihan-ku amu tumanus om i kopioondusan-ku, nga amu mabak.

Zabur 108,5 I kovosihan-nu kointavis sid pirantaban dot avan om i katapatan-nu sampai sid tinggorud.

Rom 5,15 Lobipo kalaba-no i kovosihan do Kinoringan sid kinogumuan dot ulun, tu it iso't ulun Yesus Kristus, i minanahak di kovosihan dino. Manjadi ong kodungko kovosihan, okonko iadko gaji ko suul ko nagaratan, inoi nga kovosihan antad pongitungan.

Rom 3,24 nga nembanaran-no ioti di kovosihan do Kinoringan, gima i gama di Yesus monindal di tokou.

Galatia 5,44 Sampai ikou dino ong kakali ihimon dikou i kabanaran gima i pinonuhuan, iniduan-no dikou i Kristus sampai nakalabus-kou-no sid kovosihan.

Rom 5,20 Topot bang nengkansangan-no i karaatan, lobipo manguasa i kovosihan, supaya iadko i kasalaan minomorinta sid saralom di kuasa do huntung, nga i kovosihan do Kinoringan, lobipo manguasa sid saralom do kabanaran.

1. Petrus 4,10 Kerad di nakatahak sid dikou, mitutulung-kou-no iadko it ongomandul dit apatut o gama mamakai di kovosihan do Kinoringan di madlaba-laba sid dikou.

1. Kor. 3,10 Nosuhut-ku-no i kovosihan do Kinoringan di nakatahak-no sid dohon, ioku-no diti o pinotonduk dit origi iadko it ulun dit elo muvalai, ka di Paulus.

1. Kor. 15,10 Topot i kovosihan do Kinoringan o pinengkakat dohon iadnoko iti biano diti sampai i kovosihan dau dino okonko aso kanangan, inoi nga katalib-oku di sokovia. Topot okonko ioku, inoi nga i kovosihan do Kinoringan i mozo-vozo dohon o posurut di gamaon-ku, ka di Paulus.

1. Petrus 1,13 Sabap ino, toromo-no om uludo-no i pongitungan dikou om harap-kou-no dot ensanan i ginavo sid kovosihan dit irikot sid dikou it ontok di kembulazan di Yesus Kristus.

vozon do rogon, it ulion dit ongorogon, Saitan, i kuasa di sumaap do Kinoringan

Sid kohorotizan do Momogun laid, varo i boginisan o rogon, ino-no it ongokuasa di sid valai, ko himbaan ko kazu om vaig, i panakit dot ulun ko posusa do pomogunan. Na it ulion dit ongorogon, ino-no i vozon do rogon. It ongorogon sid Momogun, kingaran kavi do bai i bobolizan o kavasa mangarait om mangambo.

Matius 4,1 I Yesus sinuba di vozon do rogon. 4 Iri-ogi ginazad-no i Yesus di vozon do rogon sid pomogunan dot osusi. 8 sid timpak do burul di banalko asavat. 11 minogidu-no i vozon do rogon antad sid di Yesus.

Matius 12,27 Bang ioku o monunsub dit ongorogon do baiko i kuasa do Baalsebul ot iponunsub-ku, ka di Yesus.

Matius 13,39 I sangod i minonizas do kutad dino, ino-no i vozoon do rogon, ka.

Matius 15,22 Inot anak-ku dot ondu banalko opogos do rogon, ka.

Matius 25,41 Pogidu-kou-no siti, ot ongoulun di nolupu di Kinoringan. Sori-kou-nod apui dit aso kopisakan i noumpai-no dit Ama-ku do posubaan di vozoon do rogon om i sakup dau.

Markus 16,9 I Mariam Magdala it ondu di iniduan di Yesus do turu o rogon.

Lukas 8,12 Nokening-po, rumikot-no i vozoon do rogon sampai manganu-no vagu di boros dino antad sid ginavo dioti, supaya amu mangasip om amu osopulan ioti.

Lukas 9,1 I Yesus minanahak sid kinoruhangan dau do kuasa do monunsub dit ongorogon dot araat sampai pengkod dit ongosakit.

Yahya 6,70 Boros di Yesus, Okon-ka ko hopod om duvo ot nopili-ku? Topot iso sid pialatan dikou dino jumadi do rogon.

1. Kor. 10,20 Ong pasamba ioti do nunu-nopo, tantu sid rogon o pasambaan, okonko sid Kinoringan. Manjadi amu-oku engin do kezo-oku sid rogon. 21 Amu kavasa do minum-kou-po sid subung di Tuhan om minum-kou-no vagu sid meja do rogon.

1. Petrus 5,8 Tumahan-kou-no sampai ontupat-kou-no, tu i sumaap dikou, i vozoon do rogon, mirimpanau iadko mondou do monokuk di mogihim dot akanon dau.

1. Yahya 3,8 Isai-nopo i kakali monimbaru do sala, ino-no o nokosuhut

sid vozoon do rogon. Tu i vozoon do rogon o minonimbaru do sala antad di kinotimpuunan. Topot nokorikot-no it Anak do Kinoringan, tu mominasa sampai mananus di gagamaon di vozoon do rogon.

Kentalangan 2,10 I vozoon do rogon potorongku dit a-ko piro i sid pialatan-nu, tu moniim dikou. Tatap-kou-no sid dohon sampai matai om tahakan-ku-ogi ikau do kopolosizan do iadko antub-antub do kamanangan. 20,10 Na i vozoon do rogon di minonipu dioti dino, niada-no sid sinikit dot apui do monirang, ino-no i pinadaan di dupot om i misingnabi. Siri-no o pamagasan sodop adau sampai penlaid.